



3 1761 09622335 9

1 2 26
2 10 12

— 13. 1/2

EBERHARDI CHRISTOPHORI
CANZII^{us}

I. V. LIC. ET SVPR. APPELL. TRIB. WVRT.
CAVSAR. PATRONI

TRACTATIO SYNOPTICA
DE
PROBABILITATE
IVRIDICA
SIVE DE
PRÆSVMTIONE,

EXHIBENS

VERAM EIVS DEFINITIONEM, DIVISIONES GENVINAS,
REGVLAS DIIVDICANDORVM GRADVVM PROBABILITATIS,
ET MODVM EASDEM RITE
ADPLICANDI.

TVBINGÆ
SVMTIBVS IOH. GEORG. COTTÆ.
MDCCLI.

13499 A
14/6/91





PRAEFATIO

AD LECTOREM!



Novus jam in lucem prodit
Libellus, novus Auſtor! Ita
fert ſane Seculi hujus inju-
ria, ut vanum illud atque inane gloriae

PRÆFATIO.

quovis modo captandæ studium tot luxuriantis ingenii proferat portenta.

Scribimus indocti doctique &c.

Quid mirum ! quod, ex pessimo hoc fonte, tot & tanta literarum incrementis obijciantur impedimenta, nascantur diffensiones Eruditorum, Virique Eruditissimi & maxime de re literaria meriti sæpe plurimum temporis corrigendis hujusmodi interstrepentium nævis atque erroribus impendere, atque ita veritatem ab erroribus vindicare debeant ? Quid mirum ! quod sagaciores jam dudum insignem hunc scribendi furorem, liceat tantisper hoc vocabulo uti, deriserint ? Haud ignoro, quid hinc inde haud illepide de vano hoc Auctoris

PRÆFATIO.

ctoris titulo fenserint Viri eruditi; quo quippe effectum est, ut in tantam molem excreverint scripta, vel unico seculo edita, ut illis ex uno loco in alterum transvehendis vix centena sufficerent vehicula. Fateor sane, me, ne similis temeritatis notam incurrerem, diu dubitasse, num libellum huncce publice divulgare vellem? eoque magis ancipitem fuisse, quod non, ut sæpe contingere solet, aliorum Virorum gravium atque eruditorum suasiones atque adhortationes accedebant, &, ut verum fatear, facile prævidere poteram, fore, ut hujusmodi primitiæ vix quemquam reperirent, qui impressionis sumtus in se susciperet, neque tamen contra a me ipso impetrare

PRÆFATIO.

poteram, ut sumtus hujusmodi ipse ferrem, quippe quos valde inanes fore facile conjiciebam. Cum vero forte fortuna in aliquem inciderem, qui rei periculum in se fuscipere spondebat, & ex altero latere confiderarem, in tanta copia unum alterumve libellum neminem nimis gravaturum esse, & si ex rationibus allegatis quisque a scribendo deterreatur, fore, ut nullus unquam amplius scriptor in lucem prodeat, adeoque & utilissima sæpe cum inutilibus nobis incognita prorsus maneant; satius tandem judicavi, ut & supervacanea, vel & trita quandoque, publici juris fierent, quam ut plane nihil in publicum prodiret, cæterum judicium, an aliquid,
an

PRÆFATIO.

an nihil præstiterim ? B. L. relicturus. Interdum enim & olitor bona verba locutus est. Interim persuasissimus sum, fore, ut, si vel omnia displiceant, libelli tamen titulus ad unius vel alterius palatum fit, & Materia ipsa dignissima ab omnibus habeatur, quæ ulterius ab eruditis evolvatur. Accessit & alia ratio, quæ ad scribendum me non parum invitavit; multi hujus vel illius subjecti capacitatem ex eo metiuntur, si publica jam edidit specimina, nec &, deficiente forte occasione, aliter judicare possunt; de ignotis enim quis judicabit? & his igitur, qui forte promotorum loco sunt, obtemperandum est.

Cæterum, si cui scribendi genus minus
ele-

PRÆFATIO.

elegans, nec hodierno gustui, qui ita comparatus est, ut cum soliditate Lectionem, (Lecture) conjunctam esse, & recte quidem, cupiat, satis adtemperatum esse videatur, ignoscat, rogo, partim ætati, partim practicis occupationibus; ab Advocato enim, in medio fori pulvere, singularem elegantiam postulare, nimis sane durum foret. Vale igitur Lector! & fave

AVCTORI.

Dab. Tub. d. 4. Martii

1751.



Q. D. B. V.

CAP. I.

DE DEFINITIONE PRAESVMTIONIS.



um omnibus iis, qui Thema quoddam, Introitus.
sive Juridicum, sive aliud quodcunque,
sibi pertractandum proponunt atque præ-
sumunt, id potissimum curæ esse debeat,
ut genuinum rei, de qua sermo est, tra-
dant conceptum, hoc est definitionem
ejus exhibeant, ex qua quippe, tanquam

fundamento & basi, omnia reliqua pendent ac per se quasi
fluunt; & nobis, de probabilitatibus juridicis sive præsumtio-
nibus acturis, id ante omnia incumbere videtur negotii, ut
in veram præsumtionis inquiramus notionem, & de vera qua-
dam ejus definitione simus solliciti, cui deinde reliqua faciliori
quodam negotio superstrui queant, ne forte nimis vocabulis
intenti diversissimos revera conceptus inter se confundamus,
& in eum scilicet, communem quoque practicorum quorun-
dam, præsertim veterum, incidamus errorem, qui, de præ-
sumtionibus scripturi, omnes fere LL., in quibus hoc voca-
bulum reperere, exscripserunt, & hoc facto ea sæpe ad præsum-
tiones retulerunt, quæ tamen minime eo fuissent referenda.

A

Not.

Not. Orta inde videtur notissima illa præsumtionis divisio in præsumptiones hominis, juris, ac juris & de jure, quæ posterior tamen, quam male præsumtionibus accenseatur? ex infra deducendis patebit; evolvatur interim huc Exc. Boëmer, Diff. de Collis. præsumt. c. 1. §. 6. sq. ubi totam hanc divisionem, quippe ex nimio quodam vocabulorum captandorum studio ortam, egregie refutat. add. Thomasius, Diff. de præsumt. furoris, §. 2.

§. 2.

Ufus mater-
riæ.

Præsumtionum materia quantum in jure præstet usum, nemo sane erit, qui ignoret, si saltim innumera fere, quæ de hac materia in lucem prodierunt, scripta considerare, præsertim vero immensam fere, ut ita loquar, operam perpendere velit, quam veterum quidam, non plane sine omni fructu, huic materiæ excolendæ impenderunt.

Mascardus, Menochius præsertim, Card. Mantica, Pacianus, Alciatus, Ant. Faber in conjecturis. Oldus, Boichius, alique complures; nec hoc sane absque ratione; cum enim Jcti officium consistat tum in cognitione & explicatione LL., quum in earum etiam præcipue recta adplicatione ad casus propositos, facile patet, Jctum ante omnia de facto ejusque veritate, quod scilicet in Syllogismo quocunque practico minorem efficit propositionem, siquidem cum Logicis loqui liceat, sollicitum esse debere, adeo, ut Jctos æque Doctores Facti, ac juris, esse debeat; per notum illud: tibi non jus, sed probatio, deficit, in L. 30. ff. de test. tut.

§. 3.

Necessitas
præsumtio-
num.

Cum autem plerumque casus sint tam intricati, ut judex maxime ob defectum probationis, quid judicandum sit? Summopere hæsitet; cum porro inter centenos casus vix unus vel alter detur, in quo judex plenam facti certitudinem, juridice talem, (quæ quid sit? infra definietur) habere possit; fieri sane non potuit, quin recurreretur ad præsumptiones, quæ quippe judici in casibus dubiis veritatum, si quidem ita loqui liceat, interimisticarum loco essent, & causis obscuris in facto & incertis decidendis inservirent.

§. 4.

Præsumtio-
nibus locus
est, deficiente
plena certi-
tudine facti.

Apparet exinde, præsumptiones, deficiente certitudine & veritate facti plena, in subsidium adhiberi, adeoque minus involvere, quam veritatem; hinc primo evolvamus, quid sit veritas, & deinde, quid dicatur minus, quam veritas omni
ex

ex parte absoluta? Iquo facto facili negotio definitionem præsumptionis, & analytice quidem, investigabimus.

§. 5.

Ratio est, ex qua aliquid intelligitur.

Quid sit
Ratio?

Not. Si dubitas, evolve Ill. & Exc. Dn. Bilfingerum, in Dilucid. Philos. S. 4. c. 4. §. 60. p. m. § 26. ubi allegat Ill. Wolffium, in Metaphys. Germ. §. 29. add. Parens meus, Ontol. Polem. c. 1. §. 3. idem de Civit. Dei, sect. 1. c. 1. §. 90.

§. 6.

Ratio igitur sufficiens est, ex qua res plene intelligitur, ita scilicet, ut pro isto fine ac scopo nihil relinquatur, quod non intelligamus.

Quid Ratio
sufficiens.

Not. Evolvatur iterum Parens meus, de Civit. Dei, S. 1. c. 2. §. 91;

§. 7.

Hinc veritas est, cujus datur ratio sufficiens.

Quid
veritas?

NB. Evelvi omnino huc iterum meretur Excell. Dn. Bilfinger, in d. Dilucid. Philos. sect. 11. c. 11. §. 162. p. m. 161. ubi ita: „Intelligitur vero ex iisdem principiis porro, quid sit illud, quo veritatem factorum agnoscimus, & a fictione somniorum distinguimus? Opposita hic facile intelliguntur per opposita; Somnia inde agnoscimus, & negamus factam esse rem, sed esse visam solum fieri, quando hiat alicubi nexus rerum: Si res illæ, quæ videntur fieri, vel sui rationem non habent sufficientem in visionibus anterioribus, vel inter sese non habent suæ successionis sufficientem, vel visa posteriora non habent in ipsis. Sin Phenomena sint ejusmodi, ut antecedentia semper rationem in se habeant sufficientem consequentium: judicamus, illa revera sic existere. Foret hoc argumentum, quo ostendi posset, omnes homines, naturali judicio, quotiescunque somnia a factis discernunt, agnoscere hanc propositionem, quod in mundo omnia coherant; quæcunque enim non coherent, vocant somnia, putant non facta, sed visa solum, &c. hætenus Vir Illustris, ubi nostram hanc definitionem confirmat, imo stabilis.

Add. B. Dn. D. Elias Camerarius, in annot. Medicis ad Thomas. Diss. de præsumpt. fur. & dement. pag. 21.

§. 8.

Non differt hæc nostra veritatis definitio ab illa, qua veritas dicitur ordo eorum, ex quibus res intelligitur. (a) Ubi enim talis est ordo, ex quo res plene intelligi potest, ibi est ratio sufficiens. (§. 6.) Ubi autem est ratio sufficiens, ibi est veritas. (§. 7.)

Convenientia hujus definitionis cum aliis.

Tantum igitur abest, ut hæc nostram definitionem destruat, ut potius illam omni modo confirmet, imo supponat, nostra

vero ad præsentem, quem jamjam nobis proposuimus, scopum magis immediate referatur atque adcommodata sit.

Not. (a) conf. Parens noster, in Discipl. moral. in append. c. 17. §. 210. pag. 1330.

§. 9.

Dicitur hæc absoluta respectu veritatis jurisdi-
cæ.

Et hanc, quam demum descripsimus, veritatem, cum omnibus disciplinis communis sit atque generalis, appellabimus tantisper veritatem absolutam, contradistinguendo nimirum eam veritati jurisdi-
cæ speciatim tali, quam infra definiemus, & quæ saltem certo respectu veritas dici potest.

§. 10.

Veritas absoluta non admittit gradus.

Cum igitur verum absolute sic dictum, quod modo descripsimus, supponat rationem sufficientem ex omni parte plenam, facile intelligitur, veritatis absolute talis nullos dari gradus; quodsi enim hujus veritatis supponerentur gradus, alterum magis verum esset altero, adeoque contra hypothesin alterius non ex omni parte adesset ratio sufficiens; id, quod repugnaret definitioni veri. (§. 7.)

§. 11.

Quædam veritas cognoscitur a priori median-
tibus ratio-
ciniis.
Quædam a posteriori intervenien-
tibus sensibus.

Alia jam veritas versatur circa propositiones generales, & constituit objectum cognitionis humanæ certo respectu a priori, quam scilicet nullis intervenientibus sensibus dignoscimus, alia circa veritates individuas & particulares, quam nonnisi intermediis sensibus nostris percipimus, & ad hanc potissimum speciem referuntur facta, quæ ex parte constituunt objectum
Jcti & Judicis.

§. 12.

Veritas absoluta in foro haberi nequit.

Cum autem Judex nequiquam esse possit omnipræsens, neque per proprios sensus ipse certior fieri possit, imo si fieri posset, id ideo tamen Reipublicæ non conducere, quia ita occasio infinitis iniquitatibus præberetur, si judex secundum propriam Conscientiam judicare, & hoc modo judicis & testis officio una eademque vice fungi vellet: (a) intelligitur sane veritatem absolute talem a posteriori, quæ judicem in definiendis litibus instruere posset, dari non posse, quæ quippe omnibus, omni loco ac tempore, satis explorata esset; si enim vel maxime unus vel alter sit testis ocularis, adeoque huic vel illi veri-

veritas sit explorata & illius respectu absoluta, nondum tamen omnibus, qui forte facto non interfuerunt, illius assertio est ratio sufficiens, ex qua rem cognoscant & explorato credant.

Not. (a) Hinc nota illa atque sæpius inter JCtos agitata quæstio: Num iudex secundum propriam conscientiam, an vero secundum acta & probata judicare teneatur? quam aliàs occasione L. 6. §. 1. ff. de offic. Præsid. formare solent DD. Quidam negant hoc casu secundum acta judicandum, ob alleg. Legis prima verba: veritas rerum erroribus gestarum non vitia-
tur. & L. 3. §. 2. fin. ff. de testib. ubi dicitur, Judicem æstimare debere ex animi sui NB. Sententia, quid sibi probatum credat, aut non credat. Et huic sententiæ adstipulari videntur Lauterbach, Coll. Theor. Pract. tit. de Offic. Præsid. §. 2. & tit. de probat. §. 41. Casp. Ziegler, in Dicast. concl. 35. tot. alii putant omnino, non attentâ propria scientia explorata, secundum acta & probata judicandum esse, allegantes hunc in finem modo dict. L. 6. §. 1. de Offic. præsid. in verbis seqq. inter quos Covarruvias, Jac. Cujacius, & multi alii, allegati a Zieglero, d. l. §. 9. nobis media sententia magis arridet, qua iudici non quidem contra conscientiam agendum, verum etiam non contra acta judicandum, sed potius, si fieri potest, iudicis munus, quoad illum casum, deponendum esse arbitramur. Cum enim hic iudex non sui tantum, sed universi causa iudicet, quod hac convictione per proprios sensus destituitur, cujus universi utilitas in eo versatur, ut cuique suum reddatur, & ex talibus fundamentis iudicari debet, quæ ab omnibus agnoscuntur, jam vero iudicis tanquam unius hominis testimonium, quamvis ille certitudine absoluta factum cognitum habeat, reliquis tamen haud sufficit, adeoque plurimi sententiam pro injusta habituri sunt. Adde, quod hoc modo iudices, si debita religione destituerentur, amplissimam nanciscerentur occasionem, pro proprio libitu sententiam ferendi, nec modus inquirendi in talem sententiam, justa sit, nec ne? Civitati relinqueretur, quod absurdissimum foret dictu; neque vero ex altera parte a iudice jure quodam postulari potest, ut secundum acta judicando propriam offendat conscientiam; hinc tutissimum esse arbitror, si iudex, deposito iudicis officio, testis per tempus partes in sese suscipiat; nec, meo iudicio, huic sententiæ obstant Leges supra citatæ; dicta enim Lex 6. §. 1. ff. de offic. præsid. nihil innuit, nisi hoc, quod scilicet error in negotio quodam contrahendo commissus veritati nihil detrahat; id quod & ex L. 57. ff. de obl. & act. patet, adeoque ex hoc concludit Ulpianus, quod error probari debeat, & quod iudex omnino ad hoc respicere debeat, num error revera probatus sit, nec ne? modo scilicet ordinario, de eo vero, quod iudex posthabitis probationibus ex propria conscientia judicare possit, plane nihil exprimit; neque magis probat all. L. 3. §. 2. fin. ff. de testib. quæ quippe saltem iudicem ex actis & probationibus jam absolutis æstimare jubet, quid jam pro probato habeat, nec ne? adeoque magis iudicem ad acta remittit. Sed transeat hoc.

§. 13.

Factorum veritatem absolute talem in communi vita dari
vix ac ne vix quidem posse, ita scil. ut hæc facta omnes & sin-

In foro itaque sufficit minor gradus certitudinis.

guli simul propriis sensibus perciperent, supra evicimus. (§. 12.) quod cum ita sit, omnino necesse est, ut minori gradu certitudinis simus contenti, hoc est, ut, licet non omnimodam atque omni ex parte sufficientem rationem facti reddere possimus, aliqua tamen ratione simus contenti

§. 14.

Definitio
probabilis.

Verum est, quod sui habet rationem sufficientem, probabile habet aliquid ex vero, quamvis nondum plena veritas sit. (§. 4.) ergo probabile est, quod quidem sui habet rationem, sed nondum omni ex parte sufficientem.

§. 15.

In foro obtinet probabilitas.

Cum in communi vita paucissimorum factorum sufficiens ratio reddi possit, quæ scilicet omnibus omnique loco & tempore ad factum cognoscendum sufficiat, (§. 13) sed aliqua ratione saltem contenti esse debeamus; sequitur, ut iudici in communi vita de factis nonnisi probabiliter constare possit. (§. 14.)

§. 16.

Veritas iuridica definitur.

Quod cum ita sit, necesse est sane, ut certus probabilitatis gradus a LL. determinetur, (a) qui in negotiis hujus vitæ expediendis & litibus decidendis hætenus pro veritate habeatur, qui gradus probabilitatis vocatur veritas Juridica.

Not. (a) Hinc facile apparet, a Legislatore prudente talem determinandum esse gradum, qui ex altero latere non nimis remotus, adeo, ut parum rationis adsit, ex qua res cognosci queat, ex altero vero latere non ita comparatus sit, ut probatio reddatur nimis difficilis, id, quod iterum quàmmaxime justitiæ adversatur; Satius enim est negotia citius expediri, licet non undiquaque omnia etiam minutissima ad vivum refecerentur, & inter multos casus unus sit, quo injuriam aliquam privatus quidam patiatur, quam ob nimis rigidas probationes plurimos a jure suo arceri, & malitiæ januam aperiri.

§. 17.

Probabilitatis dantur gradus.

Cum verum absolute sic dictum supponat rationem sufficientem, facile est intellectu, veritatis absolutæ nullos dari gradus. (§. 10.)

§. 18.

Contra cum probabile sit, quod habet quidem, sed non sufficientem sui rationem, (§. 14) sequitur, ut probabilitatis dentur

dentur gradus ; quo plures enim vel graviores pro re aliqua militant rationes, eo major est probabilitatus gradus.

§. 19.

Veritatem juridicam supra definivimus per certum probabilitatis gradum a LL. determinatum, ut in litibus decidendis pro vero habeatur, (§. 16.) quodsi jam probabilitatis dantur gradus, (§. 18.) etiam veritatis juridicæ necesse est dentur gradus.

Igitur & veritatis juridicæ.

§. 20.

Qui veritates distincte repræsentat, dicitur demonstrare.

Quid sit demonstrare?

§. 21.

Qui igitur veritatem facti judici distincte repræsentat, dicitur demonstrare vel, uti loquuntur, probare.

Quid iudice demonstrare vel probare?

§. 22.

Est itaque probatio repræsentatio veritatis Facti cujusdam judici facta, per argumenta iudice certa.

Definitur probatio.

Not. at, inquis, quid igitur sibi vult nota illa probationis divisio in plenam & semiplenam? Quodsi enim probatio per definitionem supponit veritatem, hoc est ad minimum rationem sufficientem iudice talem, quæ igitur fieri potest, ut detur semiplena probatio, hoc est ratio sufficiens non plene sufficiens? nonne hoc est repugnantia statuere? non omnino sua specie destituitur objectio; sed semiplenam probationem valde improprie probationis nomine venire, ex eo patet, quod partim hæc judici non plenam fidem facit, neque ex sola semiplena probatione nullis concurrentibus aliis adminiculis vel juramento in supplementum, quod vocant, aliquis condemnari potest, vid. L. 3. §. 6. ff. de testib. B. D. Lauterbach, Coll. Theor. pract. tit. de probat. partim inde facile perspicitur, quod, si semiplena probatio proprie pro specie probationis habeatur, nulla amplius inter probationem & præsumptionem relinquatur differentia, quæ tamen differentia ab omnibus JCtis unanimiter statuitur; Adde, quod distinctio hæc nequidem Juri Civili ejusque analogiæ conveniat, sed merum inventum fit DD. & Juris Canonici, Ulr. Huber, Prælect. ad ff. tit. de probat. c. 2. add. not. Ill. Thomasi cum pluribus aliis. Quanquam enim semiplena probatio, hoc est talia argumenta & rationes, quæ non plenam fidem faciunt, non plane rejicienda sint, sed omnino quendam effectum producere debeant, adeoque idea semiplenæ probationis in se omnino in praxi usum præstet, vocabulo tamen probationis eam male insigniri puto.

§. 23.

Non equidem ignoro, JCtis communiter probationem dici actum judiciale, quo litigantes de Facto controverso vel de re dubia

Hæc definitio non differt a com-

muni; sed
falsim ad
scopum præ-
sentem ma-
gis est ac-
commodata.

dubia Judici fidem faciunt, definitione petita ex L. 12. fin. ff. de probat. Hanc tamen definitionem a mea plane non differre, sed meam potius scopo præsentis magis esse accommodatam, arbitror. Quodsi enim quæras, quid sit judici fidem facere? Respondeo, judici fidem facere de facto controverso idem significare, ac judicem de Facti veritate certum reddere, sive illi Facti veritatem repræsentare.

Vid. B. D. Lauterbach, dict. Coll. tit. de probat. & præsumt. §. 3. Jo. Gottl. Heineccius, Elem. Pand. eod. tit. P. IV. §. 115. Ulr. Huber, Prælect. ad ff. d. tit. n. 2. pag. mih. 1114. Edit. 3. Lipsi. aliique complures.

§. 24.

Transitus ad
materiam de
probabilita-
te juridica.

Præmissis generalioribus hisce de vero & probabili in genere, quibus ideo opus erat, quia præsumptiones sunt via ad veritatem juridicam & probationem, imo aliquando probationis locum sustinent; propius jam accedimus ad finem nostræ Tractationis ipsum; Primo jam de probabilitate quoque juridica sive præsumptione, ejusque definitione, solliciti.

§. 25.

Materia de
interpreta-
tione huc
non spectat.

Novi quidem probabilitatibus in jure duplici respectu, pro duplici scilicet, qua Jcti funguntur, persona, opus esse; in Explicatione nimirum & interpretatione LL. & earum præsertim applicatione. Cum vero nobis hoc loco præcise agendum sit de probabilitate juridica, quatenus scilicet contradistinguitur probabilitati absolutæ, supra (§. 14.) expositæ; in explicandis autem Legibus proprie, siquidem probabilitas locum capiat, probabilitas absoluta obtineat; facile patet, hunc posteriolem respectum ad nostrum institutum non pertinere.

§. 26.

Veritas juri-
dica refertur
ad probabi-
litatem, sed
absolutam.

Probabile supra (§. 14.) diximus, cujus quidem aliqua non tamen sufficiens datur ratio, neque ab idea probabilitatis in genere, ipsam sejunximus veritatem juridicam, quæ scilicet est certus determinatus gradus probabilitatis absolutæ, (§. 16.) quam definitionem veritatis juridicæ ideo huc transtulimus, quia jam in definitionem probabilitatis juridicæ, quatenus illa opponitur probabilitati absolutæ, supra (§. 14.) descriptæ, inquirimus, quod absque comparatione cum veritate juridica fieri nequit.

§. 27.

§. 27.

Cum igitur probabilitas omnis minus involvat, quam veritas, supra (§. 4. & 14.) veritas autem juridica sit certus a Legibus determinatus gradus probabilitatis, sequitur, ut probabilitas juridica sit omnis ille gradus probabilitatis, absolutæ scilicet, qui est infra gradum illum a LL. determinatum, qui veritatem sive probationem plenam constituit (a). Nimirum, ut analogiam definitionis veritatis atque probabilitatis absolutæ supra traditæ retineamus, cum verum juridicum sit, cujus ratio sufficiens, scilicet juridice talis, quæ quippe sola & æque judici ad pronunciandum sufficit, ac probatio, reddi potest, probabilitas juridica est, quando quidem ratio quædam, non tamen sufficiens, quæ scilicet probationem plenam constituat, facti alicujus reddi potest.

Not (a) Add. Thomasius, Diss. de præsumt. fur. §. 10.

§. 28.

Quibus præmissis jam intelligitur, quid sit præsumptio; est scilicet præsumptio probabilis juridica, quatenus gignit effectus quosdam civiles.

Not. (a) Facit huc L. ult. C. de hæc. instit. ubi Imperator Justinianus ex eo, quod verisimile non sit, quod proprium suum nomen aliquis ignoret, improbat institutionem illam, qua quis Sempronium Plotii heredem instituerat. Cum scilicet veteres hanc institutionem ita interpretarentur, quasi ipse testator Plotius appellaretur, & ex eo validam judicarent institutionem hanc, quod forte proprium hoc suum nomen testator ignoraverit, respondet Imperator: verisimile haud esse, quod quis proprium nomen ignoret, & ideo talem institutionem non valere, cum nemo alteri heredem scribere possit, adeoque supponit, quæ verisimilia non sunt, non præsumi. Add. L. ult. pr. ff. quod met. caus.

Not. (b) Hinc & quoties in LL. vocabulum, verisimile, occurrit, innuitur probabilitas juridica, consequenter præsumptio. e. c. in L. 7. ff. de adm. tut. Add. Exc. Böhrer, Diss. de collis. præsumt. c. 1. §. 17. pag. mih. 20.

Not. (c) Confirmat & hanc nostram definitionem Cicero in Topicis, l. 3. ubi præsumptionem per rationem, quæ rei dubiæ fidem facit, definit. Habemus enim hic primo rationem, ex qua, si scilicet non supponatur sufficiens, sive quæ plenam judici facit fidem, fluit probabilitas; ubi enim est ratio non tamen sufficiens, neque juridice talis, ibi est probabilitas juridica; (§. 27.) porro verba: quæ judici facit fidem, innuunt effectum hujus probabilitatis, quod quidem judici faciat fidem, sed non plenam. Quamvis, ut melius distinguatur præsumptio a plena probatione, magis adæquate loco vocabuli rationis, in genere positi, addi putem aliqua vel non sufficiens ratio, sive etiam, prout a nobis factum est, substituerem vocabulum probabilitatis, quod satis indigitat probationem veram non habere.

Not. (d) Add. Thomafius, Disp. de præsumt. bonit. §. 7. p. m. 8. nec non in Diss. de fide juridica, c. 2. §. 32. 33. ubi judici neganti probabilitates in jure & præsertim NB. circa facta juri applicanda, suadet, ut judicis munus plane deponat.

§. 29.

Comparatur hæc definitio cum Lauterbachiana.

Jam & brevibus aliquas ab aliis datas definitiones partim sub examen revocabimus, partim pro stabilienda nostra enucleabimus. Primum hîc honorem debeo Celeb. Lauterbachio, qui ita: Præsumtio, inquit, nihil aliud est, quam probatio per argumenta probabilia facta (a). Nonne hæc est ipsissima nostra definitio, si modo ab unico vocabulo probationis, quod quippe hîc improprie saltem intelligitur, abstrahas? Nihil aliud enim Celeb. Auctor per hoc vocabulum denotat, quam fidem in genere judici faciendam, non præcise plenam, cum præsumptiones, uti infra docebimus, vel aliquando probationis loco sint, vel ad minimum aliquid eo conferant. Quibus jam suppositis, per se sequitur, Auctorem primo requirere argumenta probabilia, id, quod nos quoque fecimus supra (§. 28.) insimulque eum excludere plenam probationem, quæ quippe supponit argumenta ad minimum juridice certa; (§. 16. & 22.) secundo eundem & finem præsumtionum indigitare per vocabulum illud, quamvis improprie sumtum, probationis, fidem scilicet, quam præsumptiones Judici faciunt.

Not. (a) B. D. Lauterbach, Colleg. Theor. pract. tit. de probat. & præsumt. §. 42. ubi insimul sibi consentientem Ummium de Proc. jud. Disp. 15. th. 6. n. 31. seq. hunc in fin. allegat.

Not. (b) Plane iterum cum hac definitione conspirat illa, quam exhibet Celeb. Boehmerus, Diss. de collis. præsumt. c. 1. §. 3. p. 6. ubi ita: præsumi dicitur aliquid, quando varii ac dubii casus ac sententiæ concurrunt, & ex istis magis probabilem præferimus ad fidem faciendam. Supponuntur enim primo varii ac dubii casus, quorum magis probabilis præferri potest; Ecce igitur probabilitatem, etiam juridicam! Quodsi enim unus ex his casibus ad probationem plenam juridicam ascenderet, sane Judicis arbitrio electio non relinqueretur, sed præcise, quod a LL. pro vero habetur, & ille pro vero habere deberet, exprimitur vero etiam finis præsumtionis, ad faciendam scilicet fidem; id unicum adde, non plenam, sed saltem aliquam, & quandoque interimisticam, siquidem ita loqui licet.

§. 30.

Item cum Mascardi definitione.

Alii, & præsertim Mascardus, (a) præsumtionem probabilem appellitant conjecturam, per argumenta probabilia ex variis rerum circumstantiis inductam; a quibus tamen ideo dissentimus,

sentimus, quia partim in hac definitione præsumptio per conjecturam, adeoque per æque obscurum, imo certo respectu idem per idem, definitur, partim vero finis præsumptionis primarius omittitur. Quodsi tamen intelligant illi ipsum iudicium & ratiocinium iudicis vel LL. sive actum judicandi de re probabili, insimulque fidem innuant, quam hic judicandi actus apud iudicem gignit, non utique multum absunt a nostra definitione.

Not. (a) Mascardus, de probat. vol. 1. qu. 10.

§. 31.

Aliis (a) præsumptio ab aliquo antecedente ad aliquid sibi Item cum
connexum deductio audit. Recte quidem meo iudicio, modo Manticae.
adjiciatur, LL. vel iudicis *probabilis* deductio. Infra enim alias
præsumptiones LL. vel naturalibus vel civilibus originem suam
debere, alias autem a Iudicibus induci ostendemus. Vocem
probabilis ideo addimus, quod necessaria inductio vel ratio-
cinatio non præsumptionem, sed probationem, & quidem cer-
tissimam & ex omni parte absolutam, gignit (b).

Not. (a) Mantica, de tacit. & ambig. convent. vol. 2. lib. 13. tit. 1. p. 37.
n. 9.

Not. (b) In certis enim præsumptionibus haud opus est. Thomafius, Diss. de
præsumt. bonit. §. 6. p. m. 8. Celeb. Bernoulli, Diss. de usu art. conject. in
jure, c. 1. p. m. 5.

§. 32.

Illam, quam nobis exhibet illustris Huberus, (a) præsum- Nec non
tionis definitionem, salva ceteroquin Summi Viri pace, qui Huberi,
forte accuratam definitionem sistere haud voluit, descriptione
scilicet illius aliqua, pro illo scopo ac fine contentus, haud
omnimodo probamus. Ita autem ille: Præsumptio, inquit, est
anticipatio iudicii de rebus incertis, ex eo, quod plerumque
fit, percepta (b). Recte quidem ex parte sese habere arbitramur
hancce definitionem, quoad priora verba, non item quoad
posteriora, quæ originem sive genesin præsumptionum ex Viri
Summi mente denotant. Quatenus enim dicitur anticipatio
iudicii de rebus incertis, primo recte supponitur causa finalis,
quod scilicet ad fidem, si non omnimodam, saltem tamen ali-
quam iudici faciendam, comparata sit præsumptio; secundo sup-
ponitur, & recte quidem meo iudicio, per vocabulum antici-
pationis, præsumptiones aliquando loco veritatum juridicarum

Not. (a) Magnif. Dn. D. Schöpf, Dec. 231. n. 11. & Dec. 323. n. 3. seqq. Add. Ill. Thomafius, Diff. de præfumpt. bonit. §. 23. & Ord. crim. art. 25. 29. 31. 37. 43. 44. ubi infimul notum illud c. 8. de R. J. in 6to. quod nobis contrarium eſſe videtur, explicatur.

Not. (b) Conf. Cânz. Diſcipl. moral. in append. §. 25. & 26. Nihilum enim morale etiam eſt, quod ab agente libero vel absolute vel determinate modo invincibili ignoratur, hinc & quæ Judici vel plane vel determinate ignota ſunt, hæcenus pro nihilo morali habenda ſunt.

§. 34.

Singularem plane probabilitatis ſive absolute ſive juridicæ definitionem invenire licuit apud Celeberr. Bernoulli (a), in-
 quientem: Uſu communi id dicitur probabile, cujus probabi-
 litas ſemiſſem ſuperat certitudinis. Si quidem vir celeberrimus
 ita definitionem hanc intelligat, uti nulli dubitamus, quod,
 quamdiu res intra meros poſſibilitatis terminos continetur, in
 æquilibrio quodam ſit, & æque parum rationis pro ejus exi-
 ſtentia adſit, quam contra illam, habet nos omnino conſen-
 tientes; tum enim, utprimum ratio adest, ex qua aliquo modo
 ad actuaſem ejus exiſtentiam concludi poteſt, tollitur æquili-
 brium, adeoque probabilitas ſuperat ſemiſſem certitudinis, &
 ita omnino convenit hæc viri celeberr. definitio cum noſtra
 ſupra (§. 14.) data.

Inquiritur
 in definit.
 Bernoullia-
 nam.

Not. (a) Bernoulli, in erud. Diſſ. de uſu artis conjectandi in jure, c. I.
 p. m. 5.

§. 35.

Stabilita igitur ſupra (§. 28.) præſumptionis definitione, p-
 pervenimus jam ad quædam ejus conſectaria. Supra diximus
 (cit. §.), præſumptionem eſſe probabilitatem juridicam, qua-
 tenus effectus gignit juridicos ſive civiles, aut quatenus eſt
 loco probationis, vel ad minimum illi infervit. Ex quo ſta-
 tim apparet differentia præſumptionis a probatione, quam vo-
 cant, artificiali, & quidem neceſſaria.

Quomodo
 differat præ-
 ſumptio a
 probatione
 artificiali
 eademque
 neceſſaria?

§. 36.

Artificialis enim probatio, quatenus opponitur inartificiali, Quid ſit pro-
 eſt, quæ ex interna facti vel antecedentium qualitate, confe-
 quentia per legitima ratiocinia elicit; inartificialis vero eſt, batio artifi-
 quæ immediate nullo interveniente ratiocinio petitur a qua-
 litate facti externa, e. gr. a teſtibus, instrumentis, juramen-
 tis, confeſſionibus &c. (a). Prioris generis probatio, artifi-
 cialis

cialis scilicet, a DD. iterum distinguitur in necessariam & probabilem; illa est, si consequentia ab antecedente ad consequens sit necessaria & plene concludens; hæc, sive probabilis, quæ fit per argumenta non necessaria, neque necessario concludentia (*b*), quæ tamen ultima non semper ad probationem stricte sic dictam referri potest (*c*).

Not. (*a*) L. ult. C. de probat. Lauterbach. Coll. Theor. pract. tit. de probat. & præsumt. §. 4. Huber, in prælect. ad ff. eod. tit. n. 3.

Not. (*b*) Lauterbach, cit. l. §. 48.

Not. (*c*) Add. supra §. 22. in not. Quatenus enim probationes inartificiales sive præsumptiones judici aliquam faciunt fidem, eatenus ad minimum ad probationem aliquid conferunt, &, quamvis improprie, ad probationem referri possunt; quatenus vero nondum efficiunt rationem sufficientem, adeoque probationem proprie talem, eatenus male pro specie quadam probationis venditantur. Accedit, quod quædam præsumptiones sint loco veritatis juridicæ, &, cum regulam constituent, probatio vero saltem, ubi Exceptio a regula statuitur, locum habeat, uti infra latius ostendetur, proprie plane non ad speciem probationis referri possint, quamvis quoad effectum loco probationis sint. Add. interim Ill. Thomafius, Diss. de præsumt. furor. §. 2.

§. 37.

Ejus differentia a præsumptione.

Cum vero probatio artificialis necessaria fiat per argumenta necessaria, & in quibus consequens ex antecedenti, facti scilicet interna quadam qualitate, necessario fluit; (§. 36.) facile perspicitur ejus differentia a præsumptione; hæc enim argumenta supponit probabilia saltem, etiam juridice talia (§. 28.); & hinc non efficit plenam probationem, sicut illa, sed aut aliquid confert ad probationem, aut, cum proprie probatio non sit, habet tantum probarionis effectum quendam.

§. 38.

A fitione juris.

Differt porro præsumptio a fitione juris; in fitionibus enim oppido falsum a LL. pro vero habetur, corrigendi juris rigorosi ergo vel suadente æquitate (*a*). Præsumptio vero veritatem tanquam scopum & finem sibi habet propositam; hinc licet in fitione falsitas oppido appareat, nihilominus ex dispositione Legis habetur pro veritate quoad effectus civiles, neque ideo probationem admittit in contrarium; secus ac præsumptio, in qua, uti dictum est, finis principalis est veritas; hinc, ubi veritas haberi potest, præsumptionibus locus

locus non conceditur. L. 24. L. 29. ff. de probat. (*b*) Plures enumerare differentias hujus jam loci non est, hinc remittimus benevolum Lectorem ad Menochium (*c*).

Not. (*a*) Lauterbach, cit. loc. §. 49. L. 15. ff. de usurp. & usuc.

Not. (*b*) Alciatus, de probat. in P. I. Præf. n. 2. 3. Gothofredus, in rubr. ad h. t. n. 31. Huber, ad h. t. cit. loc. n. 22.

Not. (*c*) Menochius, de præsumt. lib. 1. qu. 8. tot.

§. 39.

Distinguitur etiam præsumptio ab interpretatione; primo enim interpretatio circa LL. ipsas versatur, adeoque pro objecto habet majorem quasi propositionem syllogismi practici, præsumptio vero pro objecto habet facta, adeoque occupatur circa minorem ejusdem propositionem; secundo vero interpretatio aut determinat veritatem juridicam, & disponit aliquid, uti Authentica, (*a*) & hinc non admittit probationem in contrarium, aut versatur quidem circa probabilitates, sed absolutas, non juridicas, (§. 25.) qualis est doctrinalis. (*b*)

Not. (*a*) Const. Tanta. §. 21. in fin. C. de vet. jur. enucl. Lauterbach, Coll. Theor. pract. tit. de justit. & jur. §. 7.

Not. (*b*) Idem Lauterbach, c. l. §. 8. Card. Mantica, vol. 1. lib. 1. tit. 16. p. 36. n. 4. 5. Hinc, & cum habitus interpretandi in Jcto requiratur, necesse est, ut principiis philosophiæ imbutus sit, ait Thomafius, sive, qui sub eo dissertationem defendit Auctor, Ludovici, in Diss. de præsumt. bonit. §. 1. p. 3.

§. 40.

Differt porro præsumptio a probabilitate absoluta. Primo A probabilitatem enim hæc latius patet, cum & ipsam veritatem juridicam sub tate absoluta, se comprehendat, (§. 16.) illa autem minus involvit. (§. 27.) Secundo differunt etiam fine ac scopo; præsumptionis enim finis specialior est, præcise scilicet fides judici facienda, probabilitatis, ut inclinet quemcunque ad assentiendum certo modo.

§. 41.

Hæc sufficiant tantisper de Definitione Præsumptionis; jam, ut aliquem etiam Definitionis nostræ fructum consequamur, ad alia, & quidem ad Divisionem Præsumtionum.



CAP. II.

DE DIVISIONE PRAESUMTIONVM.

§. 42.

Dividuntur
in juris & de
jure, juris
tantum, & fa-
cti vel homi-
nis.

Inter omnes Præsumtionum Divisiones prima eademque frequentissima est illa, qua distribuuntur in Præsumptiones *Juris & de Jure*, *Juris tantum* & *præsumptiones hominis*; (a) quæ ultima species & præsumptio *facti* audit; (b) quamvis Lauterbachius duas saltem faciat species, juris scil. & facti, vel hominis; illam autem iterum distinguat in præsumptionem juris & de jure, & juris tantum.

(a) Menochius, de præsumt. l. 1. qu. 5. 6. 7. Alciatus, de præsumt. P. 1. n. 1. Lauterbach, Coll. Theor. pract. n. 1. tit. de probat. & præsumt. §. 43. sqq. 46. Thomasius, vel potius Ludovici, (Præf. Thomasio, Diss. de præsumt. bonit. §. 7. p. 8.

(b) Menochius, c. 1. l. 1. qu. 5. n. 5. sqq.

§. 43.

Diversa ta-
men sunt ho-
rum vocabu-
lorum signi-
ficatus.

Quamvis vero quoad hanc divisionem plurimi, quantum quidem ego scio, convenient, non tamen mihi convenire videntur in significatibus, quos hisce speciebus tribuunt.

§. 44.

Inde confu-
siones ortæ,
præsertim
quoad præ-
sumptiones
juris & de
jure.

Quantum enim ad præsumptionem juris & de jure, omnes fere consentiunt, quod scilicet in hac Leges ex rationibus verisimilibus aliquid inducant, & exclusa in contrarium probatione pro vero habeant; (a) in hoc vero, quod una manu dabant, altera iterum auferunt; quod in quibusdam casibus probationem quamvis liquidissimam & ordinaria probatione majorem contra has præsumptiones juris & de jure admittant, (b) adeoque aperte multos casus in LL. expressos, qui proprie ad præsumptiones juris tantum, quamvis fortiores, referendi erant, ad hanc speciem pessime retulerint, annumerantes scilicet præsumptionibus juris & de jure omnes illas, quæ in LL. aliquatenus fortiores erant, nec ordinaria probatione elidebantur; (c) adeoque præsumptionibus juris & de jure modo significatum jamjam dictum, quod scilicet probationem in contrarium non admittant, modo significatum præsumptionum violentarum, quod scilicet non quavis ordinaria probatione elidantur, tribuentes.

(a) Lau-

- (a) Lauterbach, Coll. d. l. §. 44. Menochius, de præsumt. l. 1. qu. 3. n. 17. & l. 1. qu. 7. n. 3. Pacianus, de probat. l. 1. c. 11. n. 2. Boehmer, Diff. de collis. præsumt. c. 1. §. 5. p. 8. Thomafius, d. Diff. de præsumt. bonit. §. 8. p. 10. Alciatus, de præsumt. p. 2. n. 3.
- (b) Menochius, d. l. l. 1. qu. 61. n. 1. sqq. l. 1. qu. 63. n. 1. l. 1. qu. 64. Boehmer, d. Diff. c. 1. §. 6. fin. p. 10. ubi hunc in finem allegat L. 7. de administr. tut. quam vulgo quoque DDres ad præsumptiones juris & de jure referunt, & qua præsumitur dolus tutoris inventarium non conficientis, contra quam doli præsumtionem aperte tamen probatio in contrarium admittitur.
- (c) Boehmer, cit. Diff. c. 1. §. 7. p. 10.

§. 45.

Idem & magis adhuc contingit circa significationem præsumtionum juris & hominis. Cum enim plurimi differentiam unicam atque specificam harum duarum specierum in eo posuerint, quod illæ, scilicet præsumptiones juris, a LL. expressæ & approbatae sint, hæ autem, hominis scilicet, in LL. non sint expressæ, verum a judice demum inducantur, (a) fieri non potuit, quin hæc sententia a multis, & quidem summo ac maximo jure, impugnaretur, (b) hisce potissimum rationibus innixis, quod utraque niti debeat sana ratione & LL., nisi sit frivola, imo multæ in LL. contineantur præsumptiones, quæ tamen ab ipsis adversariis ad præsumptiones juris haud referantur, e. gr. mendacitatis, nationis infamis, &c. ex L. 31. §. 21. ff. de ædilit. Edict. nec non, quod casus in LL. expressi saltem exempli loco allegati sint, nec alii similes excludantur, sed potius multæ dari possint præsumptiones, fundamentum in solo Jure Nat. habentes, quæ tamen omnino, quin ad præsumptiones Juris referendæ sint, dubitandum haud sit.

Item quoad
præsumptiones
juris &
hominis.

- (a) Lauterbach, Coll. d. l. §. 45. 46. & multi ibi alleg. Menochius, lib. 1. qu. 5.
- (b) Beyer, Posit. ad tit. ff. de probat. & præsumt. Boehmer, d. Diff. c. 1. §. 9. p. 12. & qui ibi citatur Joh. Francisc. Andreoli, controv. for. 104. fin. Franc. Sarmiento, Select. interpret. lib. 1. c. 1. n. 9.

§. 46.

Hinc, ut aliquo modo satisfacerent huic confusione, licet Hanc confusio-
ipse Lauterbachius asseruisset, præsumtionem hominis æque in fionem celeb.
alterum rejicere onus probationis ac præsumtionem juris, (a) Ludovicitol-
castra sua indirecte deserere, & terminis quidem prioribus re- lere satagit,
tentis, hisce novas subinde ideas substituere coacti sunt. Sic sed alterando
enim erudite satisfacit Celeb. Dn. Ludovici (b) dubiis supra re- conceptus
censitis, sed alterando conceptus priores, contra quos objectio- priusinos,

nes directæ erant. Non enim negat etiam præsumptiones hominis in LL. fundari, sed respondet saltem, differentiam in eo manere, quod præsumptio juris desumatur ex natura rerum in universum considerata, præsumptio autem hominis ex specialibus circumstantiis in hoc vel illo negotio occurrentibus, nec non quod præsumptio juris immediate ex Lege descendat, nullamque probationem requirat, præsumptio autem hominis omnino probationem ulteriorem desideret, item quod DDres, quando afferant, præsumptionem juris in Legibus fundari, æque subintelligant Jus Naturæ ac Jus Civile, adeoque Celeb. Ludovici alias assignando differentias, quam quidem allegati a nobis DD. Lauterbachius & ceteri dederant, alias quoque substituit notiones præsumptionum juris & hominis, & consequenter in castra nostra transit, fatendo scilicet, hanc non esse genuinam differentiam, quod illæ nitantur Legibus, hæ vero a solo iudicis arbitrio pendeant, item quod illæ ex jure in universum desumantur, hæ ex particularibus circumstantiis eruantur, imo contra ipsum Lauterbachium fatendo, quod illæ, præsumptiones scilicet juris, probatione non egeant, hæ ulteriori probatione opus habeant, nec solæ sufficiant.

(a) Lauterbach, Coll. d. l. §. 46.

(b) Ludovici, Us. pract. Dist. tit. de probat. & præsumt. Dist. 5.

§. 47.

In effectu
omnes con-
veniunt.

Licet enim in effectu omnes cum celeb. Ludovici hasce differentias agnoscant, atque in praxi ita observent, immo concedant, nec hominis præsumptionem a Lege & ratione discrepare; (a) peccant tamen, quod aliter doceant, aliter autem judicent, & in praxi propriam deferant doctrinam, alium tribuendo hisce vocabulis significatum in Theoria, alium autem in praxi; ex quo summa oriatur confusio, necesse est.

(a) Menochius, de præsumt. l. 1. qu. 5. n. 17.

§. 48.

Hinc genui-
nus significa-
tus eruitur
ex conclusio-
nibus, in qui-
bus conspi-
rant.

Quodsi igitur hæc vocabula ab æquivocatione hætenus demonstrata depurentur, iisdemque sensus, quem illis in effectu & praxi omnes, etiam adversam sententiam tuentes, tribuunt, restituitur; facile patet, cum in effectu omnes in eo conveniant, quod præsumptiones Juris nitantur natura rerum in universum considerata, præsumptiones autem hominis his vel illis circumstantiis

stantiis particularibus, item quod illæ probationem ulteriorem non requirant, sed probationem in adversarium rejiciant, hæc a probatione non liberent, (a) proprie hunc hujus divisionis sensum esse debere, quod præsumptiones juris instar Regularum universalium, hæc autem exceptionum loco sint. Hinc ab ipso Menochio præsumptio juris non illepide comparatur cum possessione, (b) quæ scilicet etiam, donec petitorium, sive, ut in analogia maneamus, exceptio probetur, onus probationis in adversarium rejicit.

(a) Menochius, c. l. lib. 1. qu. 33. n. 2. add. lib. 1. qu. 39. n. 4.

(b) Idem, lib. 1. qu. 33. n. 3.

§. 49.

Merito igitur aliam, eandemque meliorem, jam recensita, Ideo meliorem substituit divisionem præsumptionum Boëmerus, in qualificatas scilicet & simplices eas distribuendo, qualificatam dicens, quando Lex insimul disponit, ut aliquid pro vero habeatur, donec probetur contrarium, simplicem vero, quando aliquid ex legitimis conjecturis vel a Lege vel ab homine infertur, sed ita saltem, ut tantum adjumento sit probanti. (a)

rem substituit significatum Ill. Boëmer.

(a) Boëmer, d. Diff. de collis. præsumt. c. 1. §. 10. fin. p. 13. 14.

§. 50.

Quamvis hæc divisio cum priori, qua distribuuntur præsumptiones in præsumptiones juris & hominis, siquidem hæc sensu depurato, modo indicato, sumatur, nostra sententia, coincidat. Hic cum priori nostro conspirat.

§. 51.

Ex hisce jam præmissis patet, in effectu omnes in eo convenire, quod præsumptio juris & de jure sit, quando judex aliquid pro vero habet, & ita quidem, ut nulla in contrarium admittatur probatio, præsumptio juris, quando Lex aliquid pro vero habet tamdiu, donec per ordinariam probationem contrarium probetur, & præsumptio hominis, quando Lex aliquid non præcise pro vero habet, sed statuit tamen, ut probanti aliquatenus sit adjumento, adeoque præsumptionem juris & de jure superare probationem, præsumptionem juris simpliciter talem, minus quidem involvere, sed tamen deficiente plena probatione locum ejus sustinere, & præsumptionem denique hominis ne ultimum quidem effectum producere. Quare jam quæritur, num divisio hæc,

Definitio præsumptionis juris & de jure, præsumptionis juris, & præsumptionis hominis.

modo explicata, sit genuina & accurata, id, quod ex collatione cum definitione præsumtionis, supra (§. 28.) data, statim patescet.

§. 52.

Præsumtio
juris & de jure
male ad
præsumtio-
nes refertur.

Dicto enim loco præsumtionem per probabilitatem juridicam definivimus, hæc est per supra (§. 27.) tradita, quando adest gradus probabilitatis, qui minus rationis involvit, quam probatio plena, nec judici ad pronunciandum eadem certitudine sufficit, qua probatio; ex quo statim per se fluit, præsumtionem juris & de jure ad præsumptiones male referri. Cum enim hæc plus involvat, quam probatio plena, & Lex in ea, rejecta contrarii probatione, constituat, ut aliquid pro vero habeatur, (§. 51.) præsumtio vero, ex definitione, minus involvat, quam probatio; (d. §. 51.) statim sequitur, præsumtionem juris & de jure male & valde improprie referri ad præsumptiones. (a)

(a) Optime originem hujus communis fere erroris detexit atque indicavit Ill. Boehmerus, d. Diff. de Collis. præsumt. c. I. §. 6. ubi ait: „Neque difficile, est ostendere, unde error ille communis ortus sit; vel enim DDres verbis „LL. inhæserunt, & ubi vox præsumtionis occurrit, statim illud de vera interpretatione, (ecce æquivocationem, de qua supra §. 43.) „vel potius præsumtionem violentam, quæ tamen juris est, & probationem „in contrarium admittit, cum aliis casibus, ubi Lex statim condemnat reum, „confuderunt, ubi insimul allegat Ill. Coccejum, Dfss. de probat. directa negativæ, c. 3. §. 14. 17. Bachovium ad Treutler. P. 2. Disp. 4. th. 10. lit. c. Cum quibus quoque conspirat Celeb. Ludovici, in Us. Pract. Dist. tit. de probat. & præsumt. Dist. 5. Add. Celeb. apud nos J Ctus, Dn. Günth. Alb. Renz, jam Ser. Princ. nostri Consiliarius Regininis, in Disp. de præsumt. juris & de jure.

(b) Non equidem ignoro, quid Ill. Thomafius, vel potius, qui sub eo Dissertationem defendit, idem Celeb. Ludovici, d. Diff. de præsumt. bonit. §. 8. p. 10. 11. pro salvanda aliquatenus hac divisione & denominatione præsumtionis juris & de jure non sine magna specie proferat. Cum enim ipsemet sibi objectionem hanc formasset: quod, si contra præsumtionem juris & de jure non admittatur probatio, inde secuturum sit, rem esse certam, sicque falsam fore definitionem præsumtionis, quod scilicet omnis præsumtio versetur circa res incertas; in fine annectit duas responsiones: 1) accedere quidem hanc speciem præsumtionis proxime ad probationem, interim tamen gradu ab ea differre. 2) Aliud esse ab initio incertum esse, aliud ex post demum certum fieri. Uno verbo, res illas, circa quas versetur præsumtio juris & de jure, ab initio quidem incertas esse intuitu Legislatoris, qui, probabilitati cuidam innixus, rem voluntate sua hoc modo determinaverit, hocque effectu donaverit, non autem incertas esse intuitu judicis, qui, cognita hoc modo voluntate Legislatoris, non amplius versetur in incerto, quid pronunciandum sit. Sed liceat, pace Viri summi, & summa ceteroquin modestia,

destia, regerere, & quidem ad resp. 1.) verum quidem esse, quod proxime accedat ad probationem hæc species præsumtionis, & gradu ab ea differat, sed non tam gradu inferior, quam potius superior sit; supra enim (§. 51.) demonstratum est, præsumtionem juris & de jure superare probationem ordinariam; Tantum igitur abest, ut hæc species ad præsumptiones referri possit, ut potius minus præsumtionibus annumerari queat, quam ipsa probatio. Ad resp. 2.) nimis videtur probare hoc argumentum: Præsumptiones juris & de jure ab initio tamen respectu Legislatoris incertæ sunt, quamvis ex post demum per Legislatoris determinationem certæ reddantur, ergo adest talis incertitudo, qualis ad præsumtionem requiritur; pari enim ratione ita etiam ipsa probatio ad præsumptiones referri posset, quam tamen omnes præsumptioni opponunt; Omnis enim probatio juridica, excepta artificiali illa, quæ fit per argumenta necessaria, per supra demonstrata, nititur probabilitate quadam, & sic ab initio incertum quid intuitu Legislatoris supponit; Ponamus enim, e. gr. homicidium per duos testes omni exceptione majores probatum esse, nonne possibile est, & hosce testes falsum deposuisse, num repugnat duos testes mentiri? Hinc & supra (§. 16.) veritas juridica sive plena probatio per certum probabilitatis gradum definita fuit, a LLatore determinatum, ut hætenus pro veritate haberetur; sed cum in præsumtionibus non de probabilitate absoluta, ad quam & probatio ipsa referenda est, sed de probabilitate juridica (§. 27.) definita sermo sit, præsumptiones autem juris & de jure plusquam certitudinem & veritatem juridicam involvant, non sane sufficit ad præsumtionem, aliquid ab initio intuitu Legislatoris & antecederet ad ejus determinationem incertum fuisse, sed requiritur, ut hoc incertum non pro certo assumtum sit a LLatore; quod tamen in præsumtionibus juris & de jure, quæ ordinariam certitudinem juridicam, in qua quippe dantur gradus, (§. 19.) superant, fecus est.

§. 53.

Ut hætenus dicta eo magis illustrentur, allegabimus quædam exempla, quæ ab omnibus, quantum ego scio, pro præsumtionibus juris & de jure habentur, & subjungemus postea quædam, quæ manifeste, etsi fortiores requirant probationes, ad præsumptiones tamen juris tantum referenda sunt, & male a quibusdam præsumtionibus juris & de jure annumerantur; partim, quo pateat, quam male præsumptiones juris & de jure ad præsumptiones referantur; partim etiam, quo pateat, quam confusas in hac materia DDres ideas dederint, & quam male quædam exempla contra propriam definitionem ad præsumptiones juris & de jure retulerint. Sic e. gr. extra dubium & ab omnibus concessum est, inter alia exempla præsumtionibus juris & de jure accenseri Casum L. 13. §. 9. ff. ad L. Jul. de adult. quo maritus uxorem adulterii accusans, & postea ei cohabitans, adulterium remisisse præsumitur, non admissa contrarii probatione; Leyser, spec. ad

Reçensentur
exempla
præsumtio-
nis juris &
de jure ge-
nuina.

ff. 260. n. 7. Casum rei judicatæ in L. 25. de statu hom. L. 207. de R. J. & L. 1. ff. de re judic. quando scilicet res judicata NB. *pro veritate* habetur, rejecta in contrarium probatione; porro Casum L. 11. §. 9. ff. ad L. Jul. de adult. quo pro filio legitimo habetur is, qui a muliere editus est, cum qua maritus cohabitavit, & in quo contrarii probatio per se impossibilis est; Casum C. 12. X. de præsumt. quo nudus cum nuda in lecto inventus pro adultero habetur. C. 30. X. de sponsal. quo illi, qui data fide de matrimonio ineundo concubuerunt, rejecta contrarii probatione, matrimonium præsumuntur iniisse. Alius iterum casus est in L. 22. C. ad SCtum Vellejan. ubi mulier, post biennium intercessionem pro aliis factam repetens, in suam utilitatem intercessisse præsumitur; & qui sunt alii hujus generis; quo & referendus est adhuc Casus L. 34. C. ad L. Jul. de adult. quo adulterii accusati & ob conjunctionem sanguinis, adulterii scilicet præsumtionem exclusivam, absoluti, postea matrimonium inter sese contrahentes, pro confessis & convictis de adulterio habentur; & Casus denique §. un. Instit. de Liter. obl. L. 8. L. 14. §. 3. L. 15. C. de non numer. pecun. quo biennio elapso Reus exceptionem non num. pecun. non amplius opponere potest, etiam si onus probandi in sese suscipere velit (a).

Not. (a) Quamvis hodie ex praxi & æquitate Reo Exceptio doli concedatur. Hart. Pistoris, P. 4. qu. 12. n. 13.

§. 54.

Patet exinde, hos casus pessime ad præsumptiones referri.

Cum igitur ex omnibus casibus hætenus recensitis pateat, in illis Legislatorem, vel in pœnam vel ob defectum & difficultatem probationis, vel & ob utilitatem publicam, & ad abbreviandas lites, imo etiam quandoque ideo, quia contrarium probare plane impossibile est, uti in casu dicto L. 11. §. 9. ff. ad L. Jul. de adult. aliquid disponere, nec quicquam incerti relinquere, sed potius illos voluntate sua juridice certos, imo plusquam certos reddere; facile apparet, hos casus male ad materiam præsumtionum transferri.

§. 55.

Alii dantur casus, qui male accensentur præsumtionibus juris & de jure.

Econtra alii, iidemque multi, dantur casus, qui ex hac sola ratione, sed perperam, a DD. ad hanc classẽ relati sunt, quia majorem, ordinaria, requirunt probationem, adeoque ad præsumptiones juris tantum, & ad nostram materiam spectant; quales

les recensentur plurimi ab Illustr. Bœhmero, c. l. Leysero, spec. ad ff. 260. n. 7. Quo inter alios referendi sunt e. gr. casus L. 7. ff. de administr. tut. quo tutor, inventarium rerum pupillarium non conficiens, hoc dolo malo fecisse præsumitur, & prævio jurejurando in litem condemnatur in id, quod pupilli interest. Casus L. 14. C. de contrah. stip. junct. L. 1. L. 18. C. de test. (a) & Nov. 90. c. 4. quo sancitur, ut contra scripturas testibus munitas non minores quam 5. testes admittantur (b). Casus L. 24. ff. de probat. quo, Chirographo cancellato, manifestissimis probationibus, h. e. ordinaria probatione majoribus, creditor probare tenetur, solutionem non esse factam. Item casus L. 23. pr. ff. quod metus causa. quo persona in dignitate constituta, metum prætexens, manifestissimis probationibus metum probare debet &c. unde patet, cum in his casibus leges ipsæ contrarii probationem, quamvis ordinaria majorem, admiserint, quam male hi casus a quibusdam ad præsumptiones juris & de jure relati sint, qui tamen ipsi in harum præsumptionum specie contrarii probationem plane non admitti fatentur.

(a) Distinguit quidem Gothofredus, in notis ad d. L. 1. C. de testib. n. 29. an ipsa scriptura falsitatis arguatur, an vero testes deponant, rem aliter esse gestam? priori casu eosdem testes, qui instrumenti confectioni interfuerunt, derogare putat instrumento, posteriori, nudos testes contra instrumentum audiri negat, nisi ad minimum eorum quinque sint, ob L. seq. 18. C. de test. quem tamen optimo fundamento refutat Bœhmer, Diff. de Collis. probat. c. 2 §. 15. ubi insinuat allegat Gilkenium, ad L. 15. C. de fid. instrum. n. 30. ex ea scilicet ratione, quia in d. L. 18. C. de testibus. non impugnantur contenta instrumenti, sed reus saltem hoc casu exceptionem solutionis, ob instrumentum contrarium probans, valde improbabilem, 5. testibus probare jubetur.

(b) Hodie vero, ex praxi & æquitate, & hoc casu duo sufficiunt testes *omni exceptione majores*, ita, ut hodie hujus materiæ nullus sit usus; hinc probe ponderandæ sunt circumstantiæ & gradus probabilitatis tam in assertis testium, quam documentorum; Id. Bœhmer, d. Diff. de Collis. probat. §. 15. Joh. a Sande, L. 1. tit. 10. def. 1. Faber, in Cod. L. 4. tit. de test. def. 23. n. 13. Quodsi tamen utrinque æqualis sit probabilitas, ponderatis utrinque rationibus, in dubio standum est instrumento, pro quo militat præsumtio. L. 18. C. de probat. L. 14. C. de contrah. stip. Huber, Præl. tit. de fid. instrum. §. 11. 15.

§. 56.

Jam vero, ut paucis etiam nostram de divisione præsumtionum exponamus sententiam, necesse est. Supra scil. (§. 11. & 12.) traditum est, judicem veritatem factorum, circa quam potissimum sententia.

Explicatur
nostra de di-
visione præ-
sumtionum
mum sententia.

Quædam
sunt genera-
les, & Regu-
lam consti-
tuunt.

num ejus officium versatur, absolutam habere non posse, & ideo opus fuisse, ut certus constitutus fuerit probabilitatis gradus, qui juridice pro vero haberetur (§. 13.). Cum vero sæpe cognitio judicis circa facta, ne ad illum quidem gradum ascendat, sed ille potius etiam in probabilitate juridica vel plane subsistere, vel ad minimum illam in subsidium vocare debeat, ut veritas juridica, vel probatio plena efficiatur; dispiciendum jam est, quotuplicis generis probabilitates juridicæ vel præsumptiones sint? Præsumptio est, ubi aliqua, non tamen sufficiens, ad aliquid pro vero habendum, adest ratio (§. 27. 28.); ubi itaque ad aliquid credendum adest ratio, non tamen sufficiens, neque in contrarium alia vel major est ratio, ibi aliquid præsumendum est; cum vero sæpe accidere possit, ut judex de factis individualibus nullam adhuc habeat cognitionem, opus sane est, ut generales habeat regulas, secundum quas de facti existentia judicium ferat; quæ regulæ determinant, quid, abstrahendo ab hoc facto individuo, de quo judex nullam adhuc cognitionem habet, in genere probabilius sit, h. e. ad quid credendum judex, abstrahendo a circumstantiis facti individualibus, ex generalibus principiis plus habeat rationis? Hæ generales Regulæ, quæ, in subsidium specialioris hujus vel illius facti individui cognitionis, pro veritate quadam, ut ita loquar, interimistica assumuntur, adpellari possent præsumptiones generales; adpellabimus tamen illas, ne præter rationem aliquid innovare videamur, hætenus præsumptiones juris, sive in LL. præcise expressæ sint, sive non sint (a).

(a) Retinuimus hanc denominationem ideo, quia re ipsa auctores, qui præsumptiones in præsumptiones juris & facti dispeſcunt, idem fere hac denominatione denotare videntur; Ludovici, in Ul. Pr. Dist. tit. de probat. & præsumt. d. Dist. 5. adeoque convenientius esse judicavimus, ne confusione alicui occasionem præberemus, vel novandi studio veterem divisionem mutasse videremur, receptis & hic loci uti vocabulis.

§. 57.

Quædam
sunt specia-
les, & consti-
tuunt quasi
Exceptio-
nem a Re-
gula.

Cum vero dictæ Regulæ nitantur nonnisi probabilitate quadam, fieri sane non potest, quin quandoque, facto specialius paulisper cognito, tales occurrant circumstantiæ, quæ contra dictas generales Regulæ & veritates interimisticas pugnent, adeoque sæpe ex hisce circumstantiis alia suboriatur præsumptio vel probabilitas in contrarium, quam concinne appellari putare-
remus

remus præsumtionem specialem, ex rationibus tamen supra allegatis, hæcenus vocabimus præsumtionem facti (a).

(a) Hanc præsumtionum speciem & ideo cum ratione quadam præsumtionem facti appellari posse arbitramur, quia supponit facti individualis specialio- rem quandam cognitionem, ex qua specialiori deinde cognitione facti oritur suspicio exceptionis a regulis illis generalioribus.

§. 58.

Nimirum, ut sententiam nostram paulisper distinctius explicemus, cum cujuslibet facti individualis veritas etiam juridica in paucissimis casibus & rarissime haberi possit, judici humano faciendum est, quantum fieri potest, & hinc circumstantiæ facti individualis, quarum iudex nullam cognitionem habet, hæcenus pro nihilo juridico habendæ sunt; paria enim in jure sunt, esse, & judici non constare; adeoque & iudex, quamdiu non constat, casus substrati singularem esse rationem, illum ad Regulas generales referre & secundum illas dijudicare debet; & hinc ortæ præsumptiones generales sive juris; quodsi vero judici de facto individuali ex certis circumstantiis aliquatenus, non tamen plene, constet, nascuntur inde præsumptiones speciales sive facti. E. gr. Regula generalis ex natura rerum desumpta hæc est: Senex citius moritur, quam juvenis (a). Jam vero, si judici offeratur casus, quo controvertitur, num Senex quidam, an juvenis primus mortuus fuerit? Sine dubio præsumendum est, senem ante juvenem mortuum esse; Licet enim non solum fieri possit, sed etiam sæpissime fiat, ut juvenis ante senem moriatur, imo forte in casu substrato singularis adesse potuerit ratio in dispositione hujus juvenis, ut ante senem mortuus fuerit; quia tamen iudex vel nullam vel non sufficientem hujus particularis circumstantiæ habet cognitionem, hæcenus generali illi inhæret Regulæ, & has particulares circumstantias in judicando pro non-entibus juridicis habet. Quamdiu enim non adest ratio major, ex qua diversitas substrati apparet casus; iudex etiam non aliter pronunciare potest; alias absque ratione pronunciaret (b); Quodsi deinde e. gr. pateat, juvenem morbo quodam gravi laborasse, inde oritur suspicio quædam exceptionis ab hac regula, quæ deinde suspicio est præsumptio specialis vel facti, & accedentibus aliis adminiculis, gravio- rem constituit rationem in contrarium, id operantem, ut iudex deinde contra regulam pronunciare possit.

Uterius explicatur sententia.

- (a) Alciatus, Reg. 1. præsumt. 43. L. 2. ff. de termino moto. L. 15. ff. de inoff. test. verb. turbato mortalitatis ordine. L. 15. ff. de fideicomm. libertat. add. Seneca, Epist. L. 4. Epist. 30. verb. „Senectus uti adolescentiam sequitur: „ita mors sequitur senectutem.
- (b) At, inquis, quæ fieri potest, ut circumstantiæ illæ, quarum iudex cognitionem non habet pro non-entibus habeantur? Nonne omnes casus individui determinati esse debent? Annon igitur, cum certum sit, adesse certas circumstantias, easdemque determinatas, oppido fallitur iudex, qui circumstantias & determinationes speciales, quales novit necessario adesse debere in quovis casu individuo, pro non-entibus iuridicis habet? Sed responsionis loco ad sequentia attende: 1) Sæpe accidere potest, ut factum, de quo quæritur, plane non extiterit, adeoque adhuc sermo sit, an factum quæst. unquam in rerum natura fuerit? & hoc casu iudex non certo scit, nec scire potest, adfuisse certas facti circumstantias & determinationes speciales; non entis enim nullæ sunt qualitates; adeoque, quando iudex adhuc dubitat, num factum actu extiterit? Melius est generali inhærere regulæ, nec præter rationem exceptionem vel singulare factum statuere, ad quod statuendum nullam habet rationem. 2) Licet etiam quæstio, an certa sit, & constet factum extitisse, nec tamen constet, quomodo & quibus circumstantiis, iterum plus adest rationis, regulæ inhærendi, neque absque ratione determinata alias circumstantias supponendi, quam quidem ex regula generali supponendæ sunt; non igitur, ubi iudex novit factum extitisse, plane iudicat abstrahendo ab omnibus circumstantiis, sed tales adfuisse circumstantias præsumit, quales secundum regulam generalem ordinarie adfunt, vel ad minimum adesse debent. En igitur usum, celebris illius Principii Rationis sufficientis! ubi enim vel nulla, uti in casu priori, vel non determinata, uti in casu posteriori, præsto est ratio; iudex etiam vel plane nihil, vel non aliter, quam ex regula generali, quæ quippe in suo genere est determinata & rationem præponderantem habet, statuere potest.

§. 59.

Hæc divisio
rem exhaurit.

Ex hætenus igitur adductis patet, nos nonnisi duas admittere species præsumtionum, præsumptiones scilicet generales, sive juris, & speciales, sive facti? Sed quæritur jam: num hæc divisio sit adæquata, & rem exhauriat? Nos omnino hanc divisionem completam & principalem inter omnes reliquas divisiones esse putamus, & hac quidem ratione moti: quia supponit contradictorie opposita, inter quæ intermedium vel tertium non datur. Cum enim præsumptiones juris constituent regulas universales, præsumptiones autem facti pro objecto habeant Exceptiones a regulis generalibus illis, exceptum autem esse a regula nihil aliud involvat, quam sub regula non comprehensum esse; esse autem & non esse contradictorie sibi opponantur; facile apparet, divisionem hanc niti contradictorie oppositis, adeoque etiam secundum regulas Logicas bonam esse (a).

(a) Patet

(a) Patet exinde respective ad minimum meliorem esse Lauterbachii divisionem præsumtionum, in præsumptiones juris & hominis vel facti illas distribuentis, præsumptiones autem juris iterum in præsumptiones juris & de jure, & juris tantum subdividentis, Lauterbach, Coll. Theor. Pract. tit. de probat. & præsumt. §. 43 - 46. quam illorum, qui tres constituunt separatas præsumtionum species, præsumptiones scilicet juris & de jure distinctæ accensentes speciei. Quodsi enim vel maxime præsumptiones juris & de jure inter præsumptiones referendæ essent, quam tamen sententiam, uti putamus, satis supra refutavimus (§. 52); Non tamen distinctam constituerent speciem, sed omnino, secundum sententiam Lauterbachianam, præsumtionibus juris accensendæ essent; cum enim præsumptiones juris & de jure, æque ac præsumptiones juris, nitantur regulis generalibus, & unica differentia, quæ inter illas & præsumptiones juris tantum intercedit, in eo consistat, quod illæ non admittant probationem in contrarium, hæ autem admittant; facile patet, præsumptiones juris & de jure sub eadem specie comprehendi, sub qua comprehenduntur præsumptiones juris tantum, adeoque utramque unicam constituere speciem, nec sibi opponi, sed potius coordinari debere.

§. 60.

Supra autem (§. 59.) etiam diximus, hanc divisionem inter omnes reliquas primum locum obtinere; quæritur itaque, quomodo hoc probari possit? & hoc quidem sequenti argumento probo: Quæcunque divisio ita comparata est, ut illi omnes reliquæ superstruantur, & nonnisi effectus ut plurimum illius diversi sint, illa divisio omnino primum meretur locum; Atqui hæc; E. Minor non solum a priori ex eo probatur, quod hæc divisio differentiam specificam & originem ac genesin præsumtionum exprimit, adeoque ab earum essentia desumpta est, cui reliqua omnia superstruuntur, sed etiam a posteriori & per inductionem; quotquot enim ad minimum mihi innotuerunt divisiones aliæ, illæ omnes aut diversos saltem harum specierum gradus exprimunt, aut distincti effectus sunt, adeoque omnino ex hac facile derivari possunt, & vel subdivisiones potius vel & plane spurix sunt, quarum infra in fine hujus capituli exempla allegabimus.

Et hæc divisio primum locum obtinet.

§. 61.

Hinc statim apparet, quænam sit ratio divisionis illius in generales & speciales; alio quippe sensu, quam supra nos illas ita appellavimus, & unde orta sit, Regula illa: Generales scilicet præsumptiones cedere debere specialioribus (a)? Primo enim in hac Regula non intelligi possunt speciales præsumptiones sensu illo, quem supra indicavimus, quo intelliguntur præsumptiones

Alio sensu etiam dividuntur in generales & speciales.

hominis vel facti, & contradistinguuntur præsumtionibus juris; præsumtionibus enim facti per se nunquam cedunt præsumptiones juris; dico per se; si enim alia adsint adminicula sufficientia, efficitur probatio plena, quæ omnino est fortior præsumptione juris; hinc patet, Regulam hanc non de divisione præsumtionum in juris & facti loqui, sed alium esse hujus divisionis sensum, & *potius præsumptiones juris subdistingui in generales & speciales, de qua divisione in hac regula sermo est.* Cum enim supra dictum fuerit, præsumptiones juris niti certis Regulis universalibus, quæ deficiente plena probatione in casibus specialibus & individuis pro veritate habentur, hæ autem Regulæ modo magis generales, modo, ob novas forte accedentes determinationes, speciales sint, nihilominus tamen nondum casum quendam individuum supponant; facile patet, illas, quæ rationem habent specificè ad minimum magis determinatam, præferendas esse illis, quæ rationibus & regulis nituntur generalioribus; quo propius enim præsumptio accedit ad veritatem, hoc est, quo magis factum quoddam determinatur, per certas circumstantias, ex quibus elicitur præsumptio, eo fortior est. Ex quo patet, præsumptiones juris iterum discesci in generales & speciales; quo sensu speciales ab illis, quas supra speciales vocavimus, scilicet præsumtionibus facti vel hominis, ita differunt, ut hæ ex facto quodam individuo desumantur, & eventendis præsumtionibus juris inserviant, illæ autem sub his comprehendantur, & ex Regula saltem specialiori deriventur, nec non ut præsumptiones speciales sensu, quem supra indicavimus, & quo opponuntur præsumtionibus juris sive generalibus, ab his specie differant, speciales autem hoc sensu a generalibus non nisi gradu distinguantur &c.; Exempla rem magis illustrabunt: v. gr. Generalis aliàs, eademque satis cognita, Regula est, quemlibet præsumi bonum, donec probetur contrarium (*b*). Ponamus jam casum, Theologum sive Pastorem litigare cum Rustico; hoc casu rusticus quidem pro se habet præsumptionem bonitatis generalem, Pastor vero pro se habet præsumptionem, qua Theologi majori fide digni sunt, quam rustici; & hinc, licet de casu individuo ejusdemque circumstantiis nihil adhuc notum sit, pro Pastore judicabitur; Si scilicet res ita comparata sit, ut alterutrius bonitas in dubium vocari debeat. Hoc casu præsumptio hæc, quæ pro Pastore militat, non est specialis sive facti; deficientibus

bus enim particularibus circumstantiis, Regula illa, quod Pastores & Theologi majori fide digni sint, quoque loco veritatis habetur, & obtinet, donec contrarium & exceptio probetur; est itaque præsumtio Juris, sed specialior illa, qua quilibet præsumitur bonus, specialiori scilicet & majori nitens ratione. Aliud exemplum hoc esto: Regula generalis est: donatio non præsumitur; at vero, si pater, mater vel avia, liberis aliquid simpliciter dederint, censentur donasse; L. 34. ff. L. 15. C. de Neg. Gest. (c) & hoc casu præsumtio Juris est, parentes in dubio liberis donare; non enim ex hac vel illa facti individui circumstantia derivata est, nihilominus tamen est specialior illa generali, qua donatio non præsumitur, adeoque hæc generali illi cedere debet.

(a) Bœhmer, sæpe cit. Diff. de Collis. præf. c. 2. §. 7. Menochius, de præsumt. L. 1. qu. 29. n. 6.

(b) Thomafius, d. Diff. de præsumt. bonit. tota. Id. Bœhmer, d. l. c. 2. §. 9. Parens noster Canz, Disc. Moral. Disc. 2. P. 2. c. 7. §. 1493.

(c) Bœhmer, d. Diff. c. 2. §. 8.

§. 62.

Ex jam dictis patet, quoties Regula magis determinatam rationem habens ac specialior in promptu est, quæ tamen non nititur circumstantiis casus cujusdam individui, NB. qua talibus, toties adesse præsumtionem juris, sed specialem, quæ generaliori, non tam determinatam habenti rationem, in judicando præferenda est. Huc referri possunt casus L. 1. §. 1. L. 24. L. 26. §. 3. L. 62. de condict. indeb. L. 9. C. ibid. ubi sciens solvens indebitum, illud donasse censetur; (a) casus L. 14. L. 15. C. de solut. ubi ex redditione chirographi præsumitur solutio. (b) Casus L. 6. §. 1. ff. de usur. quo ex præstatione usurarum debitum præsumitur & plerumque sufficit quinquennium; arg. L. 1. §. 13. ff. de separat. (c) Casus L. 3. C. de Apoch. publ. quo, probata solutione tributorum per 3. annos ultimos, in reliquis quoque solutio præsumitur. (d) Casus L. 22. C. ad SCt. Vellej. quo mulier, repetens post biennium intercessionem, præsumitur renunciasse SCto Vellejano, licet hic casus proprie ad præsumtiones Juris & de Jure referatur. (§. 53.) Alius recensetur casus in L. 25. §. 1. ff. de probat. quo is, qui dicitur pecuniam indebitam accepisse, si negaverit, se pecuniam accepisse, & adversarius postea solutionem probaverit, compellitur probare, pecuniam fuisse indebitam. (e) Alius, idemque celebris in jure Publico, præsto est casus; no-

Ulterius explicatur hæc divisio, & adduntur exempla.

tum enim est, secundum Pacem Westphalicam, (f) intuitu bonorum mediatorum & Exercitii Religionis Subditorum, pro norma haberi annum Decretorium illum, & quidem quamcunque partem anni 1624. Quodsi jam quis probare voluerit, hanc vel illam Religionem in aliquo loco in anno Decretorio exercitam fuisse, nec hoc ad annum illum Decretorium usque facere possit, sufficit, si antiquiorem possessionem probaverit, quo casu ille præsumitur etiam in Anno Decretorio in possessione dicti exercitii Religionis fuisse. (g) Licet enim facta, i. e. in casu nostro possessio Exercitii Religionis, non præsumantur, eoque minus, si adversæ Religionis addicti sint in possessione; specialis tamen hæc determinatio, quod quis in antiquiore & proxima anno decretorio fuerit possessione, elidit generaliore illam præsumtionem, & efficit, ut posterior possessio habeatur pro vitiosa. (h)

- (a) Hic forte alicui in mentem venire posset, num casus hic spectet ad materiam præsumtionum; cum hoc casu, quo aliquis sciens indebitum solvit, videatur adesse definitio donationis ipsa, adeoque certum esse, hic intervenisse donationem, nec in demum præsumi debere? Sed notandum est, ex eo, quod quis sciens solvit pecuniam indebitam, nondum præcise sequi, eum hoc animo donandi fecisse; hoc casu enim adesse potest animus, alterum perfecte demum sibi ex post obligandi; in donatione autem requiritur, ut non adsit animus, alterum sibi vicissim perfecte obligandi; cum igitur hoc casu duo sint possibiles rationes, ob quas quis indebitum solvisse potest, animus donandi nondum probatus est, sed saltem præsumitur.
- (b) At L. 14. C. de solut. hic allegata contrarium & hoc probare videtur, quod redditio Chirographi non faciat præsumtionem donationis; quomodo itaque asseri potest, ex redditione Chirographi præsumi remissionem debiti? Sed addatur L. 59. ff. de leg. 3. & L. 2. ff. de pact. & sq. L. 15. C. ibid. ubi expresse dicitur, sub nomine Chirographi ipsam actionem, in Chirographo contentam, venire. add. Eisselen, Diss. Giess. 1693. habit. de solut. præsumta, c. 2. n. 70. sqq. Probamus igitur distinctionem Gothofredi in not. ad hanc L. 14. n. 37. num scilicet ipse creditor reddiderit, num tertius? illo casu præsumi putamus remissionem, hoc non.
- (c) Bœhmer, c. Diss. c. 2. th. 8. ubi hunc & alios a nobis recensitos exhibet casus.
- (d) Eisselen, d. Diss. c. 2. n. 1.
- (e) Quamvis enim regulariter quilibet præsumatur bonus; Major tamen, eademque magis determinata, est ratio, illum pro mendace habendi, qui jamjam de mendacio convictus est, quam alterum.
- (f) Instr. Pac. Westphal. art. 5. §. 2. 30. & 31.
- (g) Henniges, in Medit. ad Instr. Pac. Westphal. art. 5. §. 31. n. 12.
- (h) Menochius, de recuper. possess. remed. 15. n. 383. Cons. 725. n. 2. Gail, l. 2. obs. 75. n. 12. Stryk, Disp. de comp. possess. c. 3. n. 13. sqq. Magn. Dn. D.

D. Schoepf, Dec. 161. n. 7. & Dec. 185. n. 20. 21. Harpprecht, resp. 85. n. 371. Idem, cons. nov. 36. n. 352. Hinc & huc referendus est in genere casus ille, in quo, probata possessione antiquiore, præsumitur junior vitiosa; cum enim regulariter præsumtio sit pro possessore, hæc regula generalis est, & facit generaliore præsumtionem; quodsi deinde antiquior probata fuerit possessio, nova eademque specialis & magis determinata accedit circumstantia, quæ constituit specialem præsumtionem, sed etiam juris, cui prior cedere debet.

§. 63.

Neque cum generali præsumptione, sensu supra recensito, Alio sensu
generalis
sive remota. confundenda est præsumtio alio iterum sensu generalis sive remota; hoc enim sensu generalis sive remota dicitur, non quæ deficiente probatione loco veritatis juridicæ & probationis est, & regulam quandam generalem constituit, sed quæ levem quandam efficit præsumtionem specialem sive hominis vel facti; dicitur vero generalis, quia factum individuum non satis determinat, ita, ut exceptio a regula generali pro sufficienter probata haberi possit. (a) Patet exinde priori sensu, generalem præsumtionem esse præsumtionem juris ejusdemque synonymum, hoc posteriori sensu vero generalem, esse præsumtionem facti, sed levem saltem & parum determinatam. (b)

(a) Cum enim præsumptiones hominis vel facti ad Exceptionem quandam a generali regula vel præsumptione juris demonstrandam comparatæ sint, & ideo semper factum quoddam individuum, ex quo ad Exceptionem a regula argumentum fieri possit, præstuant; facile patet, hoc factum vel indicium modo ejus generis esse, ut majori cum ratione inde conclusio ad factum probandum, vel Exceptionem a regula demonstrandam, fieri possit, modo cum minori ratione; quo majori igitur cum ratione a facto illo individuo fieri potest inductio ad factum, de quo quæritur, eo fortior est præsumtio, & quo minori hoc fit ratione, eo debilior est, quæ dicitur remota. Ex quo apparet, præsumtionibus hisce facti similitudinem quandam esse, quoad modum scilicet investigandi veritatem, & nostro casu, quoad investigandam majorem probabilitatem facti, cum problematibus in Matthesi, ubi quoque, ex certis datis & cognitis, conclusio fit ad incognita; quod tamen nonnisi incidenter notamus. Eo ipso autem, ut iterum ad scopum nostrum redeamus, & cum in hisce generalibus vel remotis præsumtionibus scopus sit probandi Exceptionem quandam a regula generali, patet, has referri ad præsumptiones facti vel hominis, non juris.

(b) Ad hanc classem merito & referri putamus indicia illa generalia, omnibus vel pluribus delictis communia, qualia quædam recensentur a Petro Mascovio, in Diss. respondente Landreuttero; Gryphiswaldæ 1698. habit. de eo, quod præsumitur, th. 2. Dn. D. Harpprecht, resp. 2. n. 121. 202. 210. resp. 32. n. 80. & DD. passim. e. gr. fama, vita antea facta, natio infamis, &c. Cum enim præsumptiones facti, & ideo etiam remotæ, (§. 63. & ibi not. a) pro

pro scopo & objecto habeant factum probandum exceptum a regula generali, quod factum plene probandum est, h. e. rationem sufficientem habere & determinatum esse debet; facile patet, quo minus cognitum illud factum, ex quo nimirum, secundum antecedentia, inductio fieri debet ad factum quæst. & quod probandum est, determinat hoc factum probandum, eo minus etiam hoc præsumi & eo remotiorem esse præsumtionem inde inductam. Cum vero generalia hæc indicia semper talia facta talesque circumstantias cognitæ supponant, quæ omnibus vel pluribus delictis sunt communia, adeoque hoc vel illud factum illicitum vel delictum, de quo quæritur, nondum specificè determinant, vel ad minimum conclusionem præcise ad hoc vel illud non admittunt; apparet, hæc indicia generalia referri debere ad Præsumptiones facti remotas; hinc, quænam inde sequantur conclusiones, infra docebitur.

§. 64.

Traditur Regula de Collis. præsumtionum juris generalium & specialiorum.

Ex illis, quæ ad (§. 61.) dicta sunt, quod scilicet quandoque dentur præsumptiones Juris, licet specialiores, quæ specialiores & magis determinatam habent rationem, quam generaliores, & quibus ideo hæc cedere debent, iterum apparet, *generaliores Juris præsumptiones hoc casu induere naturam specialium sive facti vel hominis, & esse eo casu remotis accensendas.* Cum enim, per supra demonstrata, generaliores in collisione specialioribus cedere debeant; nihilominus tamen adhuc quædam supersit ratio in contrarium, oriunda ex generaliiori illa præsumptione; facile patet, hanc generaliorem, licet a specialiiori superetur, adeoque non amplius loco Regulæ sit in casu substrato, nihilominus locum præsumptionis specialis vel facti, contra specialiorem illam Juris, obtinere; cum vero de exceptione & casu individuo excepto, de quo quæritur, nihil particulariter determinet, quia nimirum ejus ratio generalior adhuc est, quam ipsa specialiiori illius præsumptionis juris, cui loco Regulæ, donec exceptio probetur, inhærendum est, iterum apparet hoc casu, generalem illam induere naturam præsumptionis hominis vel facti, sed remotæ. Exemplum supra de Clerico & Rustico datum rem illustrabit: uterque nimirum præsumptionem juris generalem honestatis ac probitatis pro se habet; cum vero Clericus specialiorem Juris præsumptionem, intuitu probitatis, ex ordine scilicet suo Clericali, pro se habeat, facile patet, hanc posteriorem specialem præsumptionem superare generalem illam utriusque communem, nihilominus tamen hoc casu præsumptionem generalem honestatis pro rustico militantem induere naturam præsumptionis hominis vel facti, sed remotæ, quæ accedentibus aliis adminiculis gravioribus, elidit iterum specialem illam ex ordine

ordine clericali desumptam, pro clerico militantem, remota tamen est, quia tantum abest, ut inde, ad factum quæst. probandum, & Exceptionem a regula speciali ex Ordine Clericali desumptam, argumentum forte desumi possit, idemque propinquum, ut potius in generaliori adhuc ratione subsistat, quam ipsa Præsumptio pro clerico militans, adeoque de facto, ab hac pro clerico militante præsumptione excepto, & particulari, plane nihil particulariter determinet.

§. 65.

Satis jam, uti opinamur, exposita nostra sententia de Divisione Præsumtionum, restat jam, ut quædam de utraque specie paucis adhuc subjungamus, & regulas quasdam ad dignoscendas præsumptiones juris & facti tradamus, ex quibus deinde præsertim præsumptiones juris facili negotio derivari possunt. Supra diximus, præsumptiones esse probabilitates Juridicas, (§. 28.) probabilitatem autem esse, ubi est ratio quædam, non tamen sufficiens. (§. 14.) Præsumptio juris est, quando ejusmodi adest probabilitas, quæ efficit, ut iudex illam pro veritate interimistica assumat, tam diu, donec adversarius contrarii veritatem probaverit; (§. 51.) ex quarum definitionum comparatione statim fuit Regula: *ubicunque major adest ratio, considerato nexu facti quæsti cum universo, ibi adest præsumptio Juris.* (a)

Regula dignoscendi præsumptionem generalem sive Juris.

(a) Intelligitur hic major ratio absoluto sensu non præcise habita ratione ad factum individuum quæst. quo ipso statim excluditur omnis præsumptio facti vel hominis, licet quandoque fortior sit hac aut illa præsumptione etiam hominis; hoc enim casu major adest ratio saltim comparative ad hanc vel illam conjecturam, non absolute ponderato nexu universi. Cum enim in communi vita hujusmodi veritatibus interimisticis quam maxime opus sit, (§. 3.) in hisce autem semper id sequendum sit, cujus pro præsentibus circumstantiis major adest ratio, h. e. quod inter plura probabilia probabilissimum est, (§. 14.) major autem semper adsit ratio Regulæ generali inhærendi, quam absque majori ratione, h. e. contrarii probatione, exceptionem statuendi; sequitur, ut semper pro præsumptione juris, donec contrarium probetur, major militet ratio, adeoque, ubi major est ratio, ponderatis scil. omnibus cogitis rei circumstantiis, ibi sit nota characteristica præsumptionis juris.

Obijcitur præsumptio facti.

§. 66.

Cum igitur, per modo tradita, ibi sit præsumptio juris, ubi ponderatis omnibus, non quibusdam saltim, rei circumstantiis, & quidem in nexu cum universo spectatis, major adest ratio, aliquid hætenus pro vero habendi; statim patet,

Præsumptiones juris duplici modo sese exferunt.

patet, hasce præsumptiones juris duplici modo sese exserere posse, aut enim quæstio est, 1) an factum quoddam actu contigerit, nec ne? aut 2) si certum sit, factum existere, quæstio incidit, quomodo contigerit? Priori casu obtinet Regula, *semper res in eodem statu præsumitur manere, quantum fieri potest*; quamdiu enim non est ratio determinata, factum novum determinatum statuendi, tamdiu etiam statui non debet; hinc omnino mutatio absque ratione sufficienti haud statuenda est. (a) Posteriori casu iterum factum, de quo quæritur, aut spectat ad Regnum morum, aut ad Regnum naturæ; Jctorum enim est, in factorum inquirere veritatem, ob quam quippe rationem circa præsumptiones occupantur; (§. 2.) de factis autem, siue existentia quadam, saltem duobus modis sermo esse potest, vel de iis scilicet, quæ ex libera hominum voluntate descendunt, adeoque ad Disciplinam morum spectant, vel quæ non ab ente libera voluntate & intellectu prædito oriuntur, h. e. quæ spectant ad Physicam; in Metaphysica enim & Logica, tanquam disciplinis abstractis, & quæ saltem circa possibilitates & ideas generalissimas versantur, (b) non quæritur de existentia quadam vel facto, adeoque etiam hæc disciplinæ objectum præsumtionum, h. e. probabilitatum Juridicarum, (§. 27. & 28.) non absolutarum, (§. 14.) esse non possunt. (§. 11.)

(a) Sicut & in Oeconomia divina generalis Regula est, Deum absque ratione nova nihil mutare, ob principium generale rationis sufficientis. Parens noster, Civit. Dei. Ed. nov. 1744. sect. 4. cap. 1. §. 1256.

(b) Add. Ill. ac Excell. Dn. Billfinger, in Diluc. Philos. in Ratione Instit. §. 2. p. m. 2. & parens noster Canzius, in Disc. Moral. Append. §. 2. 3.

§. 67.

Traditur Regula de Regno Morum.

Superiori §pho dictum fuit, præsumptiones duobus modis, scilicet vel in Regno morum, vel in Regno naturæ, sese exserere posse; quæritur itaque: quænam in utraque specie assumenda sit Regula generalis? Faciamus initium a Regno morum; generalis Regula supra (§. 65.) data hæc fuit: ubi major est ratio ponderatis omnibus rei circumstantiis consideratoque earum cum universo nexu, ibi est præsumtio juris; quodsi igitur quis scire velit, quid in Regno morum generaliter præsumendum sit, & quænam ibi obtineat regula? in id inquirere debet; ad quidnam de actionibus hominum generaliter præsumendum major in genere adsit ratio, non attentis his vel illis individualibus circumstantiis, de quibus nondum satis constat. Jam vero hæc actiones in genere triplicis

triplicis esse possunt generis: aut enim ita sunt comparatæ, ut Officiis in Republica generalibus & necessariis, nec non omnibus hominibus, vel ad minimum certæ saltem speciei hominum communibus, respondeant, aut non respondeant, aut non solum hisce officiis respondeant, verum etiam imperfectis nec a Legibus imperatis officiis fungantur. Hinc quæritur: quidnam de homine in genere, de quo nihil specialius constat, præsumendum sit? Hoc equidem ex supra data regula facile demonstrari posse arbitror. Cum enim absque determinata ratione nemo neque determinato malo, neque determinato bono afficiendus sit; sequitur 1) ut nemo possit præsumi vel dolo vel culpa lata negligere officia, vel omnibus vel certæ saltem speciei communia, quæ ab ipso perfecto jure in Republica exiguntur; hæc enim negligentia obligat vel ad damnum determinatum resarciendum privatis, vel ad pœnam determinatam Reipublicæ præstandam, ad quam tamen statuendam nulla NB. singularis adest ratio; hinc hæc negligentia non præsumitur. Cum vero etiam nec determinatum bonum absque determinata ratione alicui statuendum sit, in quo ponitur existimatio, quam DD. appellant intensivam; sequitur 2) ut nec Existimatio intensiva, tanquam determinatum & singulare bonum, cuiquam absque ratione determinata statuenda sit, sed cuilibet potius 3) relinquenda sit Existimatio simplex, h. e. præsumtio, quod officia, ad quæ perfecto jure obligatur, & quæ absque injuria in Republica vel dolo vel culpa lata negligere nequit, nec non quæ omnibus hominibus ex æquo vel saltim certæ speciei communia sunt, observaverit; & hinc in Regno Morum obtinet regula generalis: *cuiquam relinquenda est Existimatio simplex, qua quippe nemo neque determinato bono neque determinato malo absque determinata ratione afficitur, & quæ ideo cuiquam a quolibet debetur.* (a)

(a) Et hæc est ratio præsumtionis illius notissimæ, qua in dubio quilibet bonus, h. e. ita comparatus præsumitur, ut officia necessaria, & ad quæ jure perfecto obligatur, observet. Conf. Parens noster Canzius, *Discipl. moral.* II. P. 2. c. 7. §. 1493. de qua præsumptione Ill. Thomasius integram conscripsit Dissertationem, quæque præsumtio omnibus inter primas refertur. Ill. Böhmerus, *Diff. de Collis. præsumt.* c. 2. §. 9. &, qui ab hoc allegatur, Ill. Stryk, *Disp. de præsumt. pro Magistrat.* c. 1. §. 10.

§. 68.

Jam & de secundo casu dispiciendum est, scil. de Regno Na- Item de Re-
turæ & Physico, ac quanam ibi obtineat regula generalis? Na- gno Naturæ.

tura dicitur Entis cujusque vis insita. (a) Hæc natura certum in agendo observat ordinem, qui vocatur ordo Naturæ, (b) & hic est vel necessarius, physice scilicet & posita hæc rerum natura universali, &, nisi accedat vis externa, immutabilis est, uti sunt Leges motuum, (c) vel non necessarius sive etiam physice contingens, ita, ut & posita hac vel illa rerum universali natura mutari possit. (d) Cum igitur id præsumendum sit, cujus major in genere & ponderatis omnibus circumstantiis est ratio; facile patet, *in Regno Naturæ id præsumendum esse, quod Ordini Naturæ, sive necessario, sive contingenti, congruum est.* Ordo enim est similitudo in modo, quo res conjunguntur; (e) similitudo autem supponit certam regulam, (f) dissimilitudo autem Exceptionem a regula. Cum igitur pro regula major sit ratio, quam pro Exceptione, quia major est ratio a simili concludendi ad simile, quam ad dissimile; igitur etiam Ordo Naturæ præsumendus est. (g)

(a) Parens noster Canzius, in Philos. fundament. in Cosmol. c. 12. §. 1862.

(b) Idem, ibid. §. 1864.

(c) Ill. ac Excell. Dn. Bilfinger, Dilucid. Philos. sect. 1. c. 2. §. 58. & sect. 2. c. 3. §. 181.

(d) Sic convenit e. gr. Ordini Naturæ universali, ut homo habeat duos oculos bene constitutos, quamvis fieri possit, ut alteruter vitio quodam præternaturali laboret. Sic & Ordini Naturæ conforme est, Senem citius mori, quam juvenem, quamvis in hoc vel illo subiecto ratio esse possit, ut juvenis moriatur ante senem. Hinc hoc loco discrimen esse positum arbitramur inter Ordinem Naturæ necessarium & contingentem vel non necessarium, quod hujus phænomena dependeant non a Natura universali, sed nitantur ordine ex similitudine actionum omnimodo determinatorum Entium, adeoque in hoc naturæ cursus & ordo aliquando aliter sese habere & mutari, in eoque eventus contrarii, quamvis raro, locum habere possint.

(e) Parens noster Canzius, in Philos. fundam. Ontol. c. 24. §. 382.

(f) Idem, cit. loc. §. 383.

(g) Hinc duæ illæ regulæ, Naturalia rei semper inesse, & illa, quæ frequenter fieri consueverunt, præsumi. Alciatus, de præsumt. reg. 1. tot. Boehmer, de Collis. præsumt. c. 2. §. 7. Idem, c. l. c. 2. §. 1. Sichardus, in L. sive possidetis. 16. n. 12. sqq. C. de probat. Ex quo insimul patet, non omnem præsumtionem niti principio illo, quod id, quod sæpius fieri consuevit, præsumatur, cum illa, quæ ex regno morum descendit præsumtio, huic regulæ non semper subit; vid. supra (§. 32.) alias enim, cum de facto plurimi homines sint mali, & etiam contra officia, quæ jure perfecto debent, impingant, neque Existimatio simplex præsumi deberet. vid. Thomasius, resp. Ludovici, de præsumt. bonit. §. 11. p. 10. Regula enim hic quoad forum humanum, non Divinum, tradenda est, ubi delicta occulta & cogitationes puniri non solent, L. 18. ff. de pœn. Pufendorf, de J. N. & Gg. lib. 8. cap. 3.

§. 69.

Quantum illam attinet regulam, quam supra (§. 17.) de regno morum tradidimus, quod scilicet in quolibet Existimatio simplex præsumatur, illa ita intelligenda est: Quæcunque officia, tam de Jure Naturæ, quam Civili, generalia, h. e. vel omnibus hominibus & civilibus, vel certæ saltem speciei, ex æquo communia sunt, iisdemque incumbunt, illa, a quovis homine, ad minimum illius speciei, præsumuntur observari; Si enim in hoc vel illo subjecto nulla determinata, eademque sufficiens, reperitur ratio, cur aliud & diversum præsumatur, (id, quod supponitur in casu nostro; alias enim, si contrarium probatum esset, præsumtionibus non amplius opus esset; Thomæus, sæpe cit. Diff. de præsumt. bonit. §. 6. pag. mih. 8. & Bernoulli, d. Diff. de arte conject. in jur. cap. 1. pag. 5.) diversum etiam non est præsumendum; A. per hypothesin; add. supra (§. 67.) E. (a).

Explicatur
prior de Re-
gno morum.

(a) Non absque ratione addimus: Officia generalia & omnibus vel ad minimum certæ saltem hominum speciei ex æquo communia, h. e. quæ ex statu hominum in genere vel certe alicujus speciei hominum derivari possunt, ex eoque determinantur; aliud enim dicendum est de officiis huic vel illi homini individuo incumbentibus; Sicut enim ipsa obligatio determinate huic vel illi homini soli incumbens, adeoque specialis, nec, ut ita loquar, ex statu hominum vel omnium vel certe quorundam derivabilis, non præsumitur, quia, vi hypotheseos, ex natura hominum in genere, vel saltem quorundam, nulla est ratio illam statuendi: ita nec ejus observatio ac extinctio obligationis absque nova eodemque speciali ratione, & ut brevibus me expediam, absque speciali probatione, præsumitur. Et ita occurri posse arbitramur illi dubio, quod nobis forte obmoveri possit: Si omnia officia omnisque obligatio perfecta observata esse a quovis præsumuntur, præsumendum etiam est, e. gr. ubi de solutione sermo est, solutionem esse factam; A. prius est per definitionem Existimationis simplicis, qua a quolibet omnia officia, quæ perfecte debet, observari præsumuntur; E. Conclusio est absurda; minor fluit ex definitione; E. Consequentiam oportet esse falsam & absurdam; Sed limitandam esse putamus consequentiam argumenti, si omnia officia, quæ a quoquam perfecte debentur, eademque generalia & omnibus vel ad minimum certæ hominum speciei ex æquo communia, præsumuntur, tum & solutio præsumenda est; Sub hac enim limitatione negatur consequentia; quia solutio certi debiti determinati, adeoque extinctio obligationis certo homini individuo incumbentis, non spectat ad officia omnibus vel saltem certæ hominum speciei communia, sed uni saltem individuo homini incumbit. Sicuti enim debitum determinatum, certum & individuum, absque speciali probatione adesse non præsumitur, adeoque debitum petenti ejus probatio incumbit determinata: ita & debiti determinati extinctio & solutio, adeoque & determinata liberatio, non præ-

sumitur, neque determinatum hoc & singulare factum, ex generali regula: Quilibet censetur bonus &c. derivari potest; ad singularia enim statuenda & determinata, singularis etiam & determinata requiritur ratio.

§. 70.

Tres regulæ
generales,
quibus reli-
quæ nitun-
tur.

Cum igitur per (§. 66.) omnis præsumptio versetur vel circa facta ipsa, vel circa eorum qualitates, de qualitatibus autem factorum duplici modo quæstio incidere possit, vel in regno morum, vel in regno naturæ; facile patet, præsumptiones juris ad tres supra traditas regulas omnes referri posse: scilicet 1.) *facta adeoque & mutationem non præsumi* (§. 66.): *Quemlibet censeri observare omnia officia generalia, quæ vel omnibus hominibus, vel certe speciei cuidam singulari hominum, ex æquo incumbunt* (§. 67. & 69.): & 3.) *id præsumi, quod Ordini Naturæ convenit* (§. 68.). Omnino itaque a priori demonstravimus, totam hanc materiam exhaustire Alciatum, itidem eodem fere modo tres regulas tradentem: 1) Qualitatem, quæ rei naturaliter inest, præsumi: 2) mutationem non præsumi, vel, quod idem fere est, Factum non præsumi: & 3) præsumptionem semper fieri in meliorem partem. Id unicum notamus, secundam primo loco ponendam fuisse, quia hæc nititur divisione generaliore, prima & tertia autem specialiore vel subdivisione quadam. Ex hisce regulis Alciatus plures casus derivat, & quidem ex prima LIII. ex secunda XXVI. ex tertia denique XLV. quamvis non solum hisce infiniti alii addi possint, sed & quidam ex Alciati casibus plane huc non quadrent.

§. 71.

Ratio hujus
divisionis.

At, inquis, cur divisio factorum in ea, quæ sunt in Regno Morum, & in ea, quæ accidunt in Regno physico, saltem apud nos pro subdivisione venditatur, & quidem illius divisionis, quæ præsumptiones dicuntur versari circa quæstionem, quomodo contingerint facta? Nonne eadem divisio etiam ad casum, quando quæritur, an aliquid factum sit, applicari potest? Sed resp. Non negamus quidem, eandem divisionem & huc applicari posse, adeoque etiam, quando quæritur, an factum quoddam acciderit, nec ne? Facta, circa quæ versatur præsumptio, dividi posse in ea, quæ sunt in Regno morum, & in ea, quæ sunt in Regno physico. Sed cum hoc loco de utriusque generis factis, sive in Regno morum,

morum perpetrentur, sive in Regno physico accendant, eadem sit regula, quod scilicet non præsumantur, nos autem circa regulas quasdam tradendas occupati simus; quoad hunc finem divisio hæc in dicto casu nullum præstat usum, adeoque eatenus nobis non attendenda est. Aliud est in secundo casu, quando quæritur, quomodo factum contigerit, vel quomodo factum esse præsumendum sit? Hoc enim casu omnino dicta divisio maximi est usus, & ex illa duæ diversæ regulæ notatu omnino dignæ oriuntur.

§. 72.

Quando Facta non præsumi dicuntur, intelliguntur certa Uterius explicatur. & determinata, nec non talia, ex quibus quis in iudicio certum & determinatum quid præ alio sibi dari vel fieri cupit (a). Facta enim ordinaria & generalia, & ex quibus quis nihil *determinati præ alio sibi dari vel fieri petit*, omnino præsumi possunt, v. gr. illa, quæ constituunt existimationem simplicem hominis cujusvis, vel quæ naturaliter accidere consueverunt; quia enim vi hypotheseos ex tali facto determinato aliquid singulare petitur, determinationes autem factorum singulares mutabiles sunt, & modo ita, modo aliter comparatæ esse possunt, adeoque nulla est ratio, potius hanc, quam alteram præsumendi, effectus autem determinatus, scilicet petitum determinatum, absque determinata ratione, statui non debet; facile patet, determinata facta non præsumi.

(a) Ex hoc tota quæstio, quænam pars in iudicio probare debeat? mea quidem sententia, decidi potest; Regula enim, quæ vulgo traditur, quod affirmanti incumbat probatio, omnino non absolute universalis est; Ponamus enim, aliquem asseverare in iudicio, se esse honestum virum, hoc sane casu, ubi de contratio non constat, asseveranti probationem incumbere vix putem; hinc & in hac materia distinctionem §. superiori traditam adhibendam esse arbitror.

§. 73.

Pertractatis jamjam Præsumtionibus Juris, traditisque Regulis eas dignoscendi, restat, ut & brevibus quædam de divisione præsumtionum hominis vel facti subjungamus. Transitus ad divisionem præsumtionum hominis vel facti. Definitionem præsumtionum hominis vel facti exhibuimus supra (§. 57. & 58.) in casu scilicet, ubi factum quoddam certum & determinatum probandum est, & pro tali aliqua ratio militat, præsto esse dicitur præsumtio hominis vel facti. Hæc igitur non sermo est de

de veritate quadam interimistica, sive de eo, quod in dubio, ubi de facto nihil singulare constat, præsumendum sit, sed de casu, ubi pro facto quodam singulari militat quædam ratio. Requiritur itaque quædam circumstantia, ex qua aliquo modo ad factum, de quo quæritur, concludi potest; hæc circumstantia, ex qua argumentum fit ad factum probandum, aut desumpta est ex regulis quibusdam universalibus, sed talibus, quæ nituntur generaliiori quadam ratione, adeoque, intuitu præsumtionum juris specialiorum, induunt naturam præsumtionum hominis vel facti (§. 46.), aut nititur circumstantiis particularibus ex facto probando desumptis; hæc posteriores iterum vel nituntur circumstantiis facti particularibus, ipsa substantialia facti probandi tangentibus, aut saltem accidentalia (a).

(a) v. gr. Hujusmodi circumstantiæ accidentales sunt tempus, locus &c. nisi factum probandum ipsas hasce determinaciones temporis & loci &c. cernat.

§. 74.

Quænam
dicantur
re-motæ,
quænam
propinquæ?

Cum igitur illæ, quæ nituntur præsumtionibus juris generaliioribus, & illæ, quæ nituntur circumstantiis facti accidentalibus tantum, factum probandum minus determinent, illas dicemus remotas; Cum vero posteriores, illæ scilicet, quæ ex circumstantiis facti substantialibus oriuntur, factum probandum magis determinent, has appellabimus propinquas (a).

(a) Possemus quidem remotas in genere dicere, quæ minorem involvunt rationem pro vero habendi factum quæstionis, propinquas autem, quæ majorem continent rationem; ut vero insinuat appereat, unde intelligendum sit hanc vel illam circumstantiam fortiolem esse, malumus eas ita definire, ut in §. hoc factum est.

§. 75.

Omnes sunt
vel remotæ,
vel propin-
quæ.

Omnes igitur præsumptiones hominis vel facti sunt vel remotæ, vel propinquæ; unde autem cognoscatur, quænam sint aliis remotiores, quænam propinquiore, ex capite sequenti III. clarius patebit; ubi ex professo de dijudicandis gradibus probabilitatis in jure agetur. Heic igitur saltem adhuc quædam de divisione in specie præsumtionum hominis indicasse, & in fine spurias quasdam earum divisiones refutasse, sufficiat.

§. 76. Sicuti

§. 76.

Sicuti igitur supra præsumtionum juris objectum esse facta diximus, eademque vel considerantur in Regno morum, vel in Regno physico; ita facile patet, & hanc distinctionem huic, de qua jam agimus, præsumtionum speciei applicabilem esse. Aut enim factum probandum ita comparatum est, ut actionem humanam, h. e. ab homine prælucente intellectu & decernente voluntate susceptam, supponat, aut non; Priori casu quæri dicitur de moralitate actionis vel facti cujusdam, posteriori saltem de facto ipso, abstrahendo ab ejus moralitate. Utrumque supponit circumstantiam antecedentem, ex qua colligitur consequens. Sæpe etiam utrumque simul concurrit & probandum est tam factum ipsum, quam ejus moralitas, & tum factum ipsum appellatur Materiale, moralitas autem ejus Formale, id, quod in delictis maximum usum habet, in quibus inprimis de utroque constare debet, tam de materiali sive corpore delicti, quam de formali sive animo nocendi, præsertim si de decernendo ultimo supplicio sermo sit (*a*); quandoque tamen & alterutrum sufficit; sic v. gr. ad infligendam pœnam extraordinariam sufficit, constare de nisu & animo nocendi, modo aliquo modo ad effectum pervenerit delictum (*b*); e contra vero v. gr. ad instituendam inquisitionem specialem sufficit, constare de corpore delicti, & adesse præterea quasdam præsumptiones contra hanc vel illam personam singulares (*c*).

Porro aut in
computum
venit factum
tantum aut
facti mora-
litas.

(*a*) Vid. B. Dn. D. Grafs, Conf. Tub. Vol 5. Conf. 107. n. 67. B. Dn. D. Schweder, ibid. Vol 6. Conf. 87. n. 28. Guazzinus, ad Defens. reor. Def. 4. c. 1. n. 15. & c. 2. n. 18. c. 3. n. 13.

(*b*) Ordin. Carol. art. 178. L. 21. §. 7. ff. de furt. Carpzov, Prax. crim. qu. 2. n. 55. Stryk, ul. mod. tit. de priv. delict. §. 7. Tabor, integr. tr. de conatu.

(*c*) Brunnemann, de Process. inquisit. c. 4. & 5. Granz, de Defens. inquisitor. c. 4. n. 2. Sect. 1. n. 5. seqq. Ord. crim. art. 6 & 8. Nov. Constit. Würt. d. 23. Jun. 1621. §. 2. verb. Sodann und fürs andere, wann ein Corpus delicti, und daß eine Mißhandlung begangen, öffentlich an Tag ic.

§. 77.

Jam etiam Regulæ quædam generales, quibus præsumptiones hominis vel facti continerentur, tradendæ essent. Cum vero hæ præsumptiones supponant facta individua probanda, quæ infinities variare possunt: partim difficillimum sane est, omnes hasce præ-

Regulæ di-
gnoscentia-
rum præ-
sumtionum
facti, earun-
demque gra-
duum, infra
cap. seq. tra-
dentur,

præsumptiones in generalibus comprehendere regulis, partim vero etiam Capite seq. generales tradentur regulæ de dijudicandis hujusmodi præsumtionibus hominis, earundemque gradibus, quantum fieri potest, determinandis; hinc, ne opusculum nostrum in nimiam molem excrescat, sufficiant hæ divisiones supra traditæ, quæ, uti quidem putamus, omnes possibiles casus, licet generalissime sub sese comprehendunt. Id unicum adhuc notandum esse putamus, in nulla unquam materia nexum disciplinarum, præsertim Philosophiæ & Juris, magis sese exserere, quam in materia de præsumtionibus, imprimis hominis vel facti. Aut enim quæstio est de facto simpliciter probando, aut de probanda ejus moralitate (§. 76.). Priori casu utilissima sane est materia de signis, de qua in Metaphysica alias, & quidem in Ontologia differitur (a); Posteriori casu expedit omnino, Ictum probe callere Psychologiam, & genuinam habere cognitionem animæ humanæ (b); Quo magis enim Ictus in hisce materiis versatus est, sive longo usu habitum acquisiverit, sive etiam hasce scientias per modum artis didicerit, eo magis etiam in materia præfenti nostra proficiet (c).

(a) Parens noster Canzius, in Philos. fundament. c. 41. & Idem, in Ontolog. Polem. c. 35.

(b) Ill. atque Excell. Dn. Bilsinger, in Dilucid. philos. Sect. 3.

(c) Triplicem Psychologiæ usum philosophicum, eundemque maximum, Idem demonstrat Vir Excellent. in alleg. Dilucid. philos. Sect. 3. c. 1. §. 236. seq. Equidem alium & quidem juridicum Psychologiæ usum omnino asserere aulin, modo dictum scilicet in dijudicanda moralitate actionum humanarum. Operæ pretium hinc fore putarem, si quis Psychologiam ad Jurisprudentiam ex professo applicare, ejusque usum egregium in hac scientia ostendere sibi proponeret, & ad modum Polackii, qui Mathefin forensensem conscripsit, Psychologiam forensensem edere fatageret.

§. 78.

Quomodo
præsumtio-
nes facti sub-
oriantur ex
modo prob-
andi?

Monstravimus hætenus, quotuplici modo præsumptiones hominis vel facti sese exserere possint circa objectum probandum. Jam vero etiam tradendum est, quomodo quandoque suboriantur ex modo probandi. Supra (§. 22. not. a.) dictum fuit, a Ictis probationem dispesci in plenam & minus plenam, nec non; quid dicatur plena & minus plena, ibidem indicavimus. Licet igitur probationem minus plenam valde improprie probationem appellari supra demonstraverimus; nihilominus tamen illam inter præsumptiones referre nulli dubitamus. Minus plena enim probatio

probatio dicitur, quæ sola judici non plenam facit fidem; eodem fere modo probabilitatem juridicam definivimus (§. 27.); adeoque & omnino præsumtionibus annumeranda est hæc minus plena probatio (§. 28.) (a).

(a) Idem in effectu Præctici omnes asseverant. Dn. a Lyncker, in Disp. de semipl. probat. Stryk. Diff. de probat. semiplen. Bardili, Disp. Unicus testis, nullus testis. Carpzov, lib. 3. resp. 67. n. 11. Gail, lib. 1. obs. 108. n. 6.

§. 79.

Coronidis loco tandem sub finem hujus Capitis allegabimus quasdam divisiones præsumtionum, a veteribus quibusdam traditas, ut constet, quam confusas quandoque in hac materia ideas habuerint, & quam parum eorum principia utilitatis quandoque habeant, licet haud raro in ipsis conclusionibus feliciores fuerint, uno verbo, quam parum logice in hac materia, quæ, nostro quidem judicio, quam maxime philosophica est, processerint. Sic spuriam statim esse, ex supra probatis, patet, divisionem præsumtionum in necessarias & non necessarias, a Menochio traditam, qui ad illas præsumptiones juris & de jure, ad has præsumptiones juris & hominis retulit (a). Cum enim omnis præsumptio per definitionem sit probabilitas juridica (§. 28.); Probabilitas autem supponat factum nondum undiquaque determinatum, sive quod nondum omnimodam sui habet rationem sufficientem (§. 14.); facile patet, id, de quo probabiliter saltem, i. e. per præsumptionem, constat, adhuc hoc vel illo modo determinari, adeoque hoc vel illo modo sese habere posse, consequenter necessarium non esse. Hinc minus cohærent ea, quæ infra tradit Menochius, quando differentiam fictionis a præsumptione ostendere contendit; ibi enim disertis verbis notam characteristicam præsumptionis in eo ponit, quod præsumptio semper versetur circa rem dubiam, quæ esse possit & non possit (b). Adeoque mirum non est, quod alii jam nodum hunc viderint, & præsumptionem juris & de jure ab initio quidem argumentis probabilibus niti, ex post vero per Legislatorem determinari & pro veritate haberi, affirmarint (c), quos tamen supra refutavimus (§. 52. not. b.).

Refutantur quædam divisiones spuria, & quidem prima, qua distribuuntur in necessarias & non necessarias.

(a) Menochius, de præsumt. lib. 1. qu. 3. n. 3. & 4. ubi in specie exemplum allegat ejus, cui caput amputatum est, quod scilicet præsumptio juris & de jure tum adsit, talem mortuum esse. Quis vero non hoc pro veritate absoluta, ne dicam juridica, habeat? Aliud ibidem allegat exemplum, quod

scilicet ex fumo per præsumptionem juris & de jure constet de igne; Sed & hoc pro veritate absoluta quis non habebit?

(b) Menochius, d. l. lib. I. qu. 8. n. 2. & 3.

(c) Ludovici, alleg. Diff. de præsumt. bonit. §. 8. p. 10. & 11.

§. 80.

Rejicitur divisio in præsumptiones facti & juris, quatenus illæ a rebus corporeis desumptæ esse dicuntur.

Haud admodum bene porro comparatam esse judicamus illam præsumptionum divisionem, quando Menochius illas distribuit in præsumptiones facti & juris (a), facti præsumptiones dicens illas, quæ a rebus corporeis desumptæ sint, ad juris autem præsumptiones referens, quæ circa res incorporeas versentur (b). Omnes enim præsumptiones originetenus a rebus corporeis, h. e. rebus sensibus percipiendis, fieri, vel ex eo patet, quia nulla idea in mente est, quæ non originem suam, sive mediate, sive immediate sensibus debeat. Quodsi vero Menochius contendat, præsumptiones hominis vel facti magis immediate, quam præsumptiones juris, a rebus corporeis repeti, nego & pernego ejus hypothesin; semper enim in materia præsumptionum, ubi scilicet semper de facti veritate quæritur, a circumstantiis vel factis antecedentibus ad consequentia fit argumenta; quæ circumstantiæ vel facta quin corporei quid sint, nemo dubitabit. Quodsi vero quammaxime concesserim, divisionem hanc in se adhuc certo modo admitti posse, nullum tamen ejus hætenus video usum, adeoque & entia præter necessitatem cumulare nollem. Hoc tamen sensu adhuc aliquo modo salvari posse arbitror hanc divisionem, si Menochius præsumptiones hominis vel facti ut plurimum desumptas esse ex facti cujusdam magis particularis & individualis circumstantiis, quam præsumptiones juris (§. 58.), licet utraque tam a rebus corporeis, quam incorporeis, originem habere possit suam, contendat.

(a) Menochius, c. l. lib. I. qu. 11. n. 2. ubi ita ratiocinatur: Præsumptio juris nititur Lege, Lex est invisibilis, adeoque incorporate quid, E. præsumptio juris nititur re incorporali. Sed pari modo ratiocinari possemus: Præsumptio hominis vel facti nititur Lege, (si non expresse, tacite tamen, ipso Menochio fatente lib. I. qu. 5. n. 18. ubi præsumptionem facti a Lege discrepare non debere ait) A. Lex est invisibilis, E. annon enim & Leges hasce præsumptiones ex certis factis eruerunt & ita sequendas statuerunt? Sed transeant hæc.

(b) Menochius, c. l. lib. I. qu. 11. n. 15. & 16.

§. 81.

Minus accurata etiam est illa præsumtionum divisio, quando Menochius (a) cum Cicerone (b) illas constare dicit argumentis, signis & exemplis. Si Auctores hujus divisionis sustinerent, ex signo argumentum fieri, quod deinde argumentum dicatur præsumtio, equidem haud admodum repugnarem, sed, cum argumenta & signa quasi sibi invicem opponant, omnino haec tenus dissentire licebit. Omne enim signum, dum signum est, in se jam habet rationem aliquam conclusionis ad alterum, cum signum & signatum inter se sint correlata. Præsertim vero in eo falluntur Menochius & Cicero, quod signum & argumentum in eo a se invicem differre credant, quod signum & arte carere possit, argumentum semper artificii quid supponat. Supra enim jam dictum fuit; hæc duo saltem formaliter a se invicem differre, quia scilicet in unaquaque præsumptione distingui potest materia sive illud factum, ex quo alterum colligitur, & forma sive conclusio ipsa, quæ fit in mente humana, adeoque, si Menochius argumentum & signum pro duabus diversis præsumtionum speciebus habeat, maxime errat. Ne dicam, & hanc divisionem plane nihil utilitatis habere.

Nec non illa, qua distribuuntur in argumenta & signa.

(a) Menochius, d. l. lib. 1. qu. 6. n. 1.

(b) Cicero, in Topica.

§. 82.

Neque minus Menochium (a) male sibi invicem opponere arbitror præsumtionem, indicium, conjecturam, signum, suspicionem, adminiculum; Indicum enim, conjecturam, signum, suspicionem & adminiculum si non pro uno eodemque, certe tamen pro diversis præsumtionum hominis vel facti speciebus habemus. Omnibus enim hisce speciebus definitionem præsumtionis competere vel ex eo colligitur, quia singulæ, in judicando, probabilitatis aliquid habere, ab ipso Menochio (b) affirmantur; quod idem & character præsumtionum est (§. 28.). Imo, si cui lubeat descriptiones Menochii harum specierum paulo accuratius ponderare, statim patebit, in effectu plane has species a se invicem haud differre. Unicam in eo ponere videtur differentiam harum specierum a præsumptione, quod præsumtio aliquando oriatur ex necessariis, hæ species nunquam (c); sed falsitatem hujus hypotheseos supra jam satis superque refutavimus (§. 79.).

Indicum, conjectura, signum, suspicio & adminiculum, male opponantur præsumtionibus.

(a) Menochius, d. l. lib. 1. qu. 7. tot.

(b) Idem, d. qu. 7. n. 6. 21. 31. seq. 44. 57. Hoc unicum facile concessero, vocabulum suspicionis in delictis potius usurpari, quam in licitis.

(c) Menochius, cit. loc. d. qu. 7. n. 3. 4. & 5. Add. Ill. Boehmer, in Diss. de Collis. præsumt. c. 1. §. 4. pag. 8. ubi identitatem conjecturæ & præsumtionis hominis demonstrat ex L. un. ff. si tabb. test. nullæ existant.

§. 83.

Refutantur
gradus suspi-
cionis, qua-
tenus a Me-
nochio tra-
duntur.

Tandem non admodum bene sese habet illa divisio, qua non solum præsumptioni opponitur suspicio; sed & hujus iterum tres diversi traduntur gradus: Primus, suspicio temeraria, quando iudex levem saltem conjecturam, vel minimum indicium, ad aliquid credendum, vel minus, habet: Secundus, opinio vel verisimilis suspicio, quando fortiora sunt argumenta, nondum tamen ad condemnandum vel absolvendum sufficientia: Et tertius denique, violenta suspicio, si iudex plane in unam vel alteram partem absque ulteriori hæsitazione inclinatur (a). Primo enim, suspicionem præsumptioni facti vel hominis male opponi, supra jam satis evicimus (§. antec. 82.); Secundo vero ultimum gradum dari non posse, sed esse veram probationem, arbitror; Probatio enim dicitur ille gradus probabilitatis absolutæ, qui a Legibus approbatus est, ut pro veritate habeatur, quatenus scilicet iudici repræsentatur; Nullam enim præsumptionem facti per se esse posse loco probationis vel ex ipsa ejus definitione fluit, nisi alia concurrant adminicula; Et tertio denique nec primum gradum, eatenus, quatenus a Menochio supponitur, admittendum esse puto, qui scilicet huic gradui plane nullum effectum in jure concedit; Si enim vel levissima sint indicia, quin ad minimum aliquid conferant, nullum est dubium. Quod si vero alicui in genere præsumptionis hominis tres gradus statuere placuerit, quorum tamen nullus per se solus est sufficiens ad condemnandum vel absolvendum, & e contrario, quorum nullus plane nihil confert ad repræsentationem veritatis facti; equidem haud repugnabo, & tum sequenti jam Capite explicabitur, quomodo hi gradus possint dignosci?

(a) Menochius, cit. loc. L. 1. qu. 7. n. 47 -- 56.



Sequitur

Sequitur itaque

CAP. III.

DE REGVLIS DIMETIENDI GRADVS
PROBABILITATIS IVRIDICÆ.

§. 84.

Egimus hucusque de Probabiliitate juridica sive de præsumptionibus in jure, theoretice magis, quam practice; exhibuimus scilicet illius definitionem, uti speramus, genuinam, eandemque tam Philosophorum & Jurisconsultorum testimoniis, quam ex ipsa rei natura & indole, quantum fieri potuit, firmavimus; tradidimus porro ejus divisiones genuinas, & indigitavimus, uti nobis quidem persuademus, characteres genuinos, ex quibus utraque species optime dignosci potest; Sed, inquis, non absque ratione, Lector! quo Theoria hæc, nisi & ostendatur ejus usus practicus? Nonne ita fumus venditur? Nonne præstat subsistere in Theoria qualicunque, modo fructum inde consequi liceat in praxi ipsa, quam Theoriæ subtilissimæ operam dare, cujus tamen nullus in praxi usus demonstrari potest? Recte quidem instares, nisi res ipsa doceret, illis, qui Theoriæ magis magisque excolendæ operam dant, felicioribus etiam esse licere in praxi, accedente scilicet exercitio & habitu quodam. Quid enim praxis est, nisi habitus Theoriam applicandi ad casus quosvis obvios? quo certior, quo distinctior igitur est disciplinæ cujusdam Theoria, eo majores & feliciores quoque sint progressus in praxi ipsa, necesse est; cum contra, si Theoria sit aliquantisper minus distincta, si regulæ non sint generales, sed multis instantiis obnoxia, etiam earum applicatio ad factum semper cum formidine quadam oppositi conjuncta sit, oportet. Ne tamen nullus Theoriæ hæctenus traditæ videatur esse usus, transimus jam ad magis practica, tentaturi, annon, ex principiis hæctenus deductis, derivari possint regulæ quædam, quibus quantitates etiam præsumtionum, adeoque quænam alteris sint præferendæ in concursu, aliquo modo, determinare liceat (a)?

Transitus ad
magis practica.

(a) Nonne vero audaciæ indicium non leve est, argumentum sibi pertractandum proponere, quod, quantum scimus, nemo, vel paucissimi, adhuc ex professo pertractarunt? Sed absit, ut solos nos tantæ rei pares judicemus; tantabimus saltem, quousque nobis per vires qualescunque ingenii progredi
liceat,

liceat, occasionem forte viris gravioribus magisque tam gravi materiæ extricandæ idoneis præbituri, quo argumentum hoc, quod tamen per omnem Jurisprudentiam utilitate sua quam maxime sese commendat, expoliant. Non parum quidem nobis haurire licuit ex Illustr. Bœhmieri, sæpe cit. Diss. de Collis. præsumt. qui sane, quantum nos quidem scimus, primus fuit, qui huic materiæ alias valde obscuræ, lucem affudit, & characterem nobis omnino optimum dijudicandi gravitatem præsumtionum, sinit in cit. Diss. c. 2. §. 6. p. m. 28. ubi gravitatem & pondus præsumtionum dijudicaturum ad earundem rationem attendere jubet, & optime quidem, cum, per deducta, quo major est ratio aliquid credendi, eo major quoque sit probabilitas, eo-que majus præsto sit requisitum ad veritatem; add. Doctiss. atque Clariss. Göttingens. Prof. Dn. Kahl, in Elem. Log. probab. sect. 1. c. 1. §. 26. p. 18. sed tentabimus nos, annon aliquo modo specialius determinare possimus, quænam præsumptiones majori ratione nitantur? & quænam itaque alteris sint præferendæ? Novimus quidem, multum circa Mathematicam præsumtionum quantitatem præstitisse Celeberr. & Eruditiss. Nicol. Bernoulli, in sæpe laud. Diss. de arte conjectandi in jure, ubi Vir Celeberr. Regulam nobis generalem exhibuit, secundum quam enotari licet omnem probabilitatis gradum; sed cum partim multi Mathesin non calleant, adeoque multis forte difficillima videri possit applicatio Regulæ, de cætero præstantissimæ, partim vero innumeri in jure occurrant casus, in quibus omnes possibiles casus enumerare vix licet, ob infinitam scilicet circumstantiarum quarumvis varietatem, sine quarum notitia tamen gradus probabilitatis accurate determinari nequit, vid. Clariss. Kahlius, c. 1. sect. 1. c. 2. §. 53. tentabimus nos, annon aliquem characterem sistere possimus, ex quo saltem, quantum fieri potest, pondus & gravitas præsumtionum determinari possit?

§. 85.

Regulæ tradendæ assignabunt quantitatem præsumtionum comparative, non positive.

Tentandum nobis esse, annon aliquo modo gravitatem & pondus præsumtionum determinare, & eum in finem Regulas quasdam generales ex antecedentibus eruere liceat, secundum quas earum commensuratio institui possit? supra (§. antec. not. a.) diximus. Cum vero de gradibus præsumtionum genuinis præcise semper constare nequeat, ita scilicet, ut assignari semper possit, quanto hæc præsumptio vel probabilitas major sit altera, ex hac quidem ratione, quia, ad quantitatem hujusmodi præcise & absolute assignandam & calculum instituendum, requiritur, ut requisita ad veritatem aliquam, de qua quæritur, nota sint omnia; cum alias proportio præsentium sive cognitorum in problemate solvendo, ad ea, quæ remota sunt, vel incognita, institui, & inde eorum ratio conferri nequeat (a), nec etiam in plerisque casibus Regula Bernoulliana (b) propter defectum scilicet notitiæ omnium casuum possibilium applicari possit; necesse est sane, ut tales tradantur Regulæ, ex quibus ad minimam cognosci

cognosci possit, an hæc vel illa præsumtio major sit vel minor altera, licet præcise ejus gradus Mathematicè assignari nequeat, quo deinde, collatis inter se præsumtionibus ad minimum aliqua ratione, & quantum fieri potest, de probabilitate ejusque quantitate in hoc vel illo casu constet (c)

(a) Vid. Clariff. Kahlius, c. l. sect. I. c. 2. §. 53. p. 39.

(b) Sæpe laud. Nic. Bernulli, in erudita Diss. de arte conject. in jure, c. I. p. m. §. Regula hæc est: *Multiplicetur id, quod singulis casibus evenit, per numerum casuum, quibus unumquodque evenire deprehenditur, summaque productorum dividatur per summam omnium casuum, quotiens ostendet, quid probabiliter eventurum sit, hæc denotabit valorem expectationis seu gradum probabilitatis quæsitæ.*

(c) Similis mihi videtur Methodus determinandi quantitates in Mathesi per approximationem, quando scil. quantitates, quantum fieri potest, determinantur assignando limites, in quos quantitates incidunt.

§. 86.

Notandum est præterea, in capite præsentî speciatim nobis sermonem esse de quantitate præsumtionum facti vel hominis (§. 77.); quod enim præsumptiones juris attinet, cum illæ, ex definitione, sint loco probationis, adeoque per supra tradita (§. 56.) pro veritate juridica, licet interimistica, habeantur: Præsumtio-
nes juris huc
non spectant,
sed præsum-
tiones homi-
nis vel facti. judici, quo de earum quantitate admodum sollicitus sit, necesse non est; quodsi enim aliquis pro se habeat præsumptionem juris, judex pro illo, si alter contrarium non probaverit, pronunciare debet (a); adeoque hoc casu de reliquis requisitis ad veritatem adhuc deficientibus amplius Jcto sermo non est (b).

(a) B. Dn. Harpprecht, in Resp. 83. n. 262. seqq. ubi, hujusmodi præsumptionem non solum onus probandi in alterum rejicere, verum etiam alias evidentem probationem dici passim a DD. tradit, & multis allegatis tam LL. quam DD. firmat.

(b) At, inquis, nonne supra ipsi concessistis, dari quandoque pugnam inter præsumptiones juris, adeoque alteram alteri cedere debere (§. 61.)? nonne igitur opus est, ut & harum gradus determinetur, quo dignosci possit, quænam alteri sit præferenda? sed supra jam hanc objectionem prævidimus, & uti putamus, occupavimus. Demonstravimus enim, præsumptionem juris specialiorum generaliorum absorbere, quia scilicet illa specialiori & magis determinata nititur ratione, adeoque hoc casu generalior præsumptionem juris induere naturam præsumptionis hominis vel facti, & quidem remotam (§. 64.). Cum igitur supra jam traditæ sint Regulæ, ex quibus præsumptiones juris dignosci possunt, nec non facile appareat, quænam alteris sint specialiores, quænam generaliores adeoque, quænam pro præsumtionibus facti habendæ sint?

de iis heic nihil amplius dicendum erit, ut, quantum fieri potest, tædiosæ repetitiones evitentur; & insuper ex sequentibus regulis apparebit, quantum in casibus occurrentibus hujusmodi præsumtionibus juris generalioribus, in collisione scilicet cum præsumtionibus specialioribus, naturam præsumtionum facti induentibus, tribuendum sit roboris, nec ne?

CAPVT III.

PARS I.

DE PROBABILITATIS IVRIDICÆ GRADIBVS
DETERMINANDIS, QUATENVS ILLA SESE
EXSERIT CIRCA OBJECTVM
PROBANDVM.

§. 87.

Præsumtio-
nes hominis
vel facti sese
exserunt vel
circa ipsum
objectum
ipsum objectum
probandum,
vel circa mo-
dum pro-
bandi.

Cum igitur nobis, per deducta (§. anteced. 86.), in capite præsentis de determinatione quantitatis probabilitatis in præsumtionibus hominis vel facti, non juris, dispiciendum sit, præsumtiones autem hominis vel facti sese exserant vel circa ipsum objectum probandum, vel circa modum probandi (§. 78.); facile patet, de utraque specie heic nobis differendum esse speciatim; hinc I.) agemus de probabilitate ejusque quantitate, quatenus sese exserit circa ipsum objectum probandum, & II.) quatenus oritur ex modo probandi. Faciamus initium a prima specie!

§. 88.

Quid Requi-
situm sit ad
veritatem?
ut de facto
quodam ple-
ne constet,
requiritur,
ut omnia re-
quisita præ-
sto sint.

Ut de facto quodam ejusque veritate plene constet, requiritur, ut præsto sit ejus ratio undiquaque sufficiens (§. 7.), h. e. ut plene determinatum sit, & omnia sibi invicem respondeant, & ex sese sint intelligibilia; hujusmodi circumstantias, ex quibus factum aliquatenus determinatur & intelligitur, vocamus requisita ad veritatem; hinc patet, ut de facto quodam ejusque veritate constet, requiri, ut omnia ad veritatem hujus vel illius facti requisita præsto sint & cognita (a).

(a) Vid. sæpe laud. Dn. Kahl, in Elem. Log. probab. sect. I. c. I. §. 20. p. m. 12.

§. 89.

Requisita
hæc vel sunt
essentialia,
vel extra-
essentialia.

Quæcunque in re quavis possibili distinguere possumus, sunt vel essentialia, sive ex sola rei essentia per se fluunt & cognoscuntur, vel sunt accidentia, & non ex sola rei essentia fluunt, sed rationem suam habent partim in ipsa rei essentia, partim extra illam,

illam, uti Metaphysici norunt omnes. Hinc per se patet, requisita hæc ad veritatem facti cujusdam vel spectare ad ejusdem essentialia, vel ad accidentalialia.

§. 90.

Licet ad omnimodam veritatem facti cujusdam, per demonstrata, (in §. 88.) requiratur, ut omnia sint determinata, atque ex sese invicem sint intelligibilia, adeoque & essentialia veritatis requisita & accidentalialia amice conspirent; non tamen semper opus est judici, ut præcise accidentalialia requisita ipsi sint cognita, modo de omnibus essentialibus ipsi constet. Ubi enim omnia facti cujusdam requisita essentialia simul præsto sunt, fieri non potest, quin accidentalialia insimul conspirent, licet de illis judici speciatim non constet; ubi enim effectus certus est, etiam causa determinata præsto sit, necesse est, licet de causa speciatim non constet; cum igitur judici, si de facti alicujus veritate investiganda quæstio incidit, proprie de facto ipso ejusque essentialibus, tanquam effectui, constare debeat, facile patet, si de hisce essentialibus omnibus, sive de effectui, constet, opus haud esse, ut de circumstantiis accidentalibus vel & causis quoque ipsi liquet. Exemplum rem magis illustrabit: quæstio sit: an Cajus Titium occiderit? ponamus, per testes oculatos, omni exceptione majores, probatum esse, Cajum Titium gladio in via Regia percussisse, & Titium illico mortuum deprehensum esse; ponamus porro, in inspectione oculari a Medicis unanimiter concludi, Titium necessario ex hoc vulnere mortuum esse; hoc sane casu nemo inficiabitur, Titium a Cajo interemtum esse, licet de accidentalibus circumstantiis, v. gr. num Cajus nigra, an rubra veste indutus fuerit? num Cajus antea odio persecutus sit Titium? num gladius sit Caji, num alterius &c.? judici non constet (a).

Si judici de omnibus requisitis essentialibus constat, non opus est, ut ipsi insimul de accidentalibus constet.

(a) Quamvis enim in hujusmodi circumstantias quandoque inquiratur, & exinde animus malignus probari possit; attamen tum iterum de alio & novo facto quæstio est, an Cajus dolo malo Titium occiderit? adeoque eatenus nondum adsunt omnia requisita essentialia; nos autem supposuimus saltem casum, ubi de probando corpore delicti, num scilicet Cajus Titium occiderit? abstrahendo tantisper, an hoc dolo malo, an alio casu, factum sit? quæstio erat,

Ubi non de omnibus essentialibus requisitis constat, ad omnes circumstantias cognitās, quotquot haberi possunt, tam essentielles, quam accidentales, attendendum est.

Ubi plura vel graviora præsto sunt requisita, ibi major est gradus probabilitatis.

§. 91.

Contra vero, ubi non de omnibus essentialibus simul constat, sed saltem de uno vel altero, vel & saltem de quibusdam accidentalibus circumstantiis judici constat, adeoque de ipso facto probando, tanquam effectu, judici haud liquet, omnino omnes circumstantiæ tam essentielles, quam accidentales, quotquot haberi possunt, colligendæ sunt, quo factum ipsum, quantum fieri potest, determinetur, & veritas eruatur.

§. 92.

Veritatem facti omnem certis absolvi requisitis, quæ, si præsto sint, veritatem plenam constituunt, si removeantur, una & removetur veritas, supra (§. 88.) evicimus. Quo plura igitur vel quo graviora adsunt requisita, eo major sit probabilitatis gradus necesse est; id quod vel ex eo patet, quia, quo major est ratio aliquid credendi, eo major est probabilitas (§. 14.); jam vero, ubi factum magis determinatum est, & de pluribus ejus requisitis liquet, major omnino est ratio, illud pro vero habendi, quam ubi de paucioribus vel levioribus ejusdem requisitis constat; ex paucioribus vel levioribus enim requisitis ipsa facti veritas minus intelligi potest, quam ex pluribus & gravioribus (§. 5.).

§. 93.

Circumstantia antecedens, ex qua concluditur ad conseques sive factum, aut est requisitum hujus facti individui, de quo quæritur, aut pluribus ejus generis communis.

In qualibet præsumptione, facti vel hominis, requiritur, ut constet de circumstantia aliqua antecedente, ex qua concluditur ad ipsum factum, de quo quæritur (§. 73.); Quælibet autem præsumptio specialis, sive hominis vel facti, supponit, ut factum probandum exceptum sit a Regula generali (§. 57.); de hujusmodi autem facto probando, & a Regula generali excepto, aut constat ex tali circumstantia antecedente, quæ non præcise ad hujus facti individui requisita spectat, sed pluribus hujusmodi factis communis est, aut ex circumstantia ex hoc facto probando, eodemque NB. individuo, desumpta, adeoque ex requisito quodam ad veritatem hujus præcise facti; Cum autem factum, de quo quæritur, magis semper determinetur ex circumstantiis huic facto individuo propriis, quam ex aliis, multis factis communibus: facile patet, si constet de circumstantia quadam facto probando individuali propria, sive de requisito ad ejus veritatem, majorem esse probabilitatis gradum, quam si constet de tali

tali circumstantia generali multis factis communi (a). Ad huiusmodi circumstantias generales referri possunt, variatio, mutatio coloris, si quis de delicto quæsitus palleat, vel contremiscat, si quis in responsionibus hæsitet, fama, vita antea acta, & complures aliæ, vid. (§. 63. not. b.) (b).

(a) Confer. B. Dn. D. Harpprecht, Resp. 32. n. 76. ubi ita: quod enim & ista *fraudulenta simulatio* & *negatio* contra Reum principaliter militancia indicia haud parum corroborent &c., cur opponit heic indicia hæc generalia negationem & simulationem scil. illis, quæ principaliter contra Reum militant? quia illa erant generalia reliqua ex ipsis facti individui circumstantiis erant petita.

(b) Exemplum rem magis illustrabit: Ponamus, Caji occisi cadaver reperiri in aliquo loco, ex sectione & inspectione constare, Cajum interemptum esse, & ex vulnere periisse; ponamus porro, Titium olim odio persecutum esse Cajum, famam suboriri Cajum a Titio fuisse occisum, Titium a iudice interrogatum pallefcere, & contremiscere; suspicionem sane exinde suboriri contra Titium facile patet, cum aliquot hoc casu suspensiones generales contra illum concurrant, a) odium antecedens, b) fama subsecuta, illum esse homicidam, c) pallor & tremor coram iudice; omnes vero hæc suspensiones sunt generales & multis factis communes, nec supponunt circumstantiam huic facto individuo probando propriam, nec ideo solæ sufficiunt saltem ad toriuram. Ord. Crim. Carol. art. 27. verb: *Wo aber solcher argwöhniger Theil oder Stück etliche bey einander auf jemand erfunden werden, so sollen diejenigen, denen peinlicher Frag halber zu erkennen gebühret, ermeffen, ob dieselbe obbestimmte (scil. suspensiones generales) oder dergleichen erfunden: argwöhnliche Theil oder Stück so viel redlicher Anzeigung der verdachten Missethat thun mögen, als die nachfolgende Artikel, der ein jeder allein eine redliche Anzeigung macht und zu peinlicher Frag genugsam ist.* hinc hoc casu omnino reum absque sententia dimittendum esse putem. vid. Excell. Dn. D. Mœglingii, Patroni nostri multis modis suspiciendi, Diff. de Dimiss. Reorum sine sententia, §. 8. p. m. 22. quia enim hoc casu fieri potest, ut aliquando majores eruantur circumstantiæ, vel accedant ex ipsis circumstantiis facto individuo propriis, omnino neque absolvendus, neque condemnandus est reus, & ne quidem tortura decernenda; admodum enim inhumanum foret, gravatum nonnisi generalibus suspensionibus, si & plurimæ concurrerent, quamdiu de facto hoc in specie plane nullatenus constat, aliquem torqueri, & remedium veritatis eruendæ tam durum, imo valde dubium & periculosum, adhibere. Ponamus vero porro, ad supra enarratas generales suspensiones accedere vel unicam saltem, ex circumstantiis facto ipsi probando propriis, v. gr. Titium in via ad locum, ubi Caji cadaver repertum erat, visum esse; hoc sane casu omnino aliquem ad minimum torturæ gradum applicari posse putem, ex rationibus infra ulterius explicandis. Quodsi vero v. gr. Titii gladius vel alia quæcunque res, quæ Titii fuerat, reperiat prope Caji cadaver; hoc sane casu, licet nulla alia accedat circumstantia, tortura decerni potest; Ord. Crim. art. 29. vel posito, Titium, tempore homicidii, sanguinolento gladio vel vestibus sanguine perfusis visum esse, vel & apud Titium v. gr. horologium

gium portatile vel nummos reperiri, quod vel quos Gajus occisus secum tulerat; tanta sane est suspicio, ut vel ex hac sola tortura decerni possit. Ord. Crim. Carol. art. 33. &c. quænam est ratio? Resp. quia hi casus non solum supponunt suspensiones ex ipsis facti individualis circumstantiis desumptas, sed & easdem non remotas, sed propinquas. Sed de his jam pluribus agendum erit.

§. 94.

Circumstantiæ hæ generales nec ex facto individuo, tanquam ejus requisito, petita, levissimam constituunt præsumptionem.

Circumstantias igitur, ex quibus fieri solet illatio ad factum probandum, aut generales esse, nec præcise requisitis veritatis hujus vel illius facti individui accenseri, vel ad ejusdem requisita referri, supra diximus (§. 93.); nec non generales hasce circumstantias nonnisi remotas constituere conjecturas, ibidem evicimus, adeo, ut & plures simul sumptæ ne quidem locum faciant torturæ, nisi & accedant circumstantiæ ex ipso facto probando individuali petita; jam igitur aliquo modo harum quantitas determinata est, sed etiam, quænam harum circumstantiarum inter sese concurrentes fortiores sint, nec ne? dispiciendum esset; cum autem hoc specialiter, ob innumeram circumstantiarum & factorum varietatem, & deficientem notitiam personarum, earundemque passionum, temperamentorum &c., determinari vix ac ne vix quidem possit, transeant hæ, & sufficiat nobis, scire, omnes has ad classem levissimarum conjecturarum pertinere, nec per se, nisi concurrant circumstantiæ facti individui, aliquid operari, nisi forte, ut aliquando inquisitio specialis decernatur (a). Progredimur igitur ad circumstantias facti probandi individuales, tanquam requisita veritatis in facto probando (b).

Communiæ famam.

(a) Conf. d. Ord. Crim. Carol. art. 6. verb: So jemand einer Ubelthat, durch gemeinen Leumuth berüchtiget, oder andere glaubwürdige Anzeige verdacht und argwöhnig, und derhalb durch die Obrigkeit von Untzswegen angenommen wurde &c. & art. 10. verb: So der Kläger die Obrigkeit oder Richter verruft, jemand zu strengen peinlichen Rechten, zu Gefängnis zu legen, so soll derselbige Ankläger die Ubelthat und derselben redlichen Verdacht, die peinliche Straf auf ihm tragen, zuvor derselb ansagen &c. Ex quo patet, ad decernendam inquisitionem specialem requiri, ut, præter corpus delicti, judici de aliqua suspicione, ad minimum generali, sive fama publica, sive alia, a denunciante indigitata & legitime probata, liqueat. add. Cothmann. Vol. III. resp. 30. n. 60. seqq. Rittershufius, in Conf. Alt. resp. 35. per tot. Lauterbach, in Coll. Theor. Pract. tit. de publ. judic. §. 11.

(b) Hoc unicum nobis addere liceat, nostro quidem judicio non parum lucis affusum iri, quantum in specie ad magis determinandos gradus probabilitatis attinet,

attinet, hujusmodi conjecturis generalibus, si attendamus magis ad casus individuos, & notemus numerum casuum, in quibus, iisdem positis circumstantiis, hoc vel illud secutum est; hinc omnino, cur Practicus exercitatus leviori opera gradus probabilitatum harum determinare possit, quam alius, cui nondum tot obvenerunt casus, facile patet. Hinc & patet usus Consiliorum, quæ quandoque typis excudi solent. Cum enim tam in Regno Morum, quam Naturæ, omnes eventus certis LLbus contineantur, illo casu psychologicis potissimum, hoc casu cosmologicis; omnino ille, cui multum circa decidendos casus speciales versari licuit, per expectationem casuum similium, sensim sensimque sibi ipsemet ex analogia casuum hasce leges aliquo modo formare poterit, & si ad frequentiam hujus vel illius eventus sub iisdem circumstantiis attendat, eruere poterit aliquo modo & determinare quantitatem & gravitatem harum conjecturarum; Clar. Dn. Kahl, in Elem. Log. Prob. sect. 1. c. 2. §. 65. seq. Quo plures enim ejusdem generis casus menti nostræ obversati sunt, eo faciliori negotio ad omnes in illis occurrentes circumstantias attendere, & diversa distinguere, similia autem cognoscere possumus. per Princ. Psychol. add. Dn. Kahl, c. 1. sect. 3. c. 2. §. 266. p. m. 231. Nec non faciliori modo in dijudicandis hisce conjecturis versabitur ille, qui praxi huic principia Cosmologica & Psychologica jungit, adeoque tam Leges motuum, quam Leges, secundum quas anima humana agere consuevit, bene novit.

§. 95.

Progredimur itaque, secundum promissa, ad circumstantias ex ipso facto probando individuo petitas, adeoque ad ejus veritatis requisita spectantes; ex quibus illatio fit ad ipsum factum probandum, de quo quæritur; operam daturi, num heic feliciori fortasse eventu determinare liceat aliquo modo gradum probabilitatis? speramus ad minimum, fore, ut aliquo modo determinetur, quænam circumstantia altera sit fortior, quænam debilior, adeoque ut inveniantur limites, in quas incidunt hujusmodi circumstantiæ.

Transitus ad
requisita fa-
cti probandi
individualia.

§. 96.

Omnis facti veritas absolvitur certis requisitis, & hæc requisita sunt vel essentialia, vel extraessentialia, ut ita loquar; utraque tamen nota esse debent illi, qui facti veritatem probe cal- lere satagit. Cum enim, si de facti cujusdam veritate indaganda quæstio sit, sermo sit de facto individuo, h. e. undiquaque determinato (a), omnia autem contingentia determinata supponant etiam circumstantias extraessentialiales (b), facile patet, facti veritatem cognosci non posse plene, nisi de omnibus ejus determinationibus, adeoque & circumstantiis extraessentialibus, constet, licet aliquando Jcto, si præsto sint omnes circumstan-
tia essentialia.

Qui facti ve-
ritatem in
toto suo
complexu
scire satagit,
illi nota esse
debent
omnia ejus
requisita,
tam essen-
tialia, quam
extraessen-
tialia.

tiæ essentialis, præcise opus haud sit, ut ipsi etiam de extraessentialibus liqueat, sed hæc tum supponi possint (§. 90.).

- (a) Evolv. Illustr. atque Excell. Dn. Bilfinger, in sæpe alleg. Dilucid. philos. sect. 1. c. 4 §. 93. p. m. 86. seq. add. Parens noster Canzius, in Ontol. Polem. c. 12. §. 79. & in Philos. fundam. in Ontol. c. 19. §. 280. p. m. 36.
- (b) Omnia enim contingentia determinantur per alia; quod vel ex eo patet, quia hujus determinationis ratio in aliis extra contingentia positis quærenda est. Parens noster Canzius, in Philos. fundam. in Theol. Nat. sect. 1. P. 2. c. 3. §. 1381. p. m. 203.

§. 97.

Licet iudex, ubi de omnibus essentialibus constat, extraessentialibus circumstantiis supersedere possit, non tamen illas præterire potest, si de omnibus essentialibus constat (§. 91.); quia enim per hypothesein factum aliquo modo determinant, adeoque ex illis intelligitur aliquantisper, cur factum potius ita, quam aliter, contigerit? & consequenter ex illis peti potest ratio quædam concludendi ad factum, de quo quæritur, omnino & harum ratio habenda est, quia, quo major est ratio, aliquid pro vero habendi, eo major quoque est probabilitatis gradus (§. 14. & 92.) (a).

- (a) Add. Illustr. Bœhmer, in sæpe laud. Diss. de Collis. præsumt. c. 2. §. 6. p. m. 28.

§. 98.

Hæ circumstantiæ connexæ, sunt vel antecedentes, vel concomitantes, vel consequentes. Quia igitur in determinando gradu probabilitatis ratio habenda est omnium circumstantiarum facti, quæ scilicet cum facto, de quo quæritur, connectuntur, sive ejus requisita sunt (§. 97.), circumstantiæ autem connexæ vel esse possunt antecedentes, vel concomitantes, vel consequentes, quia scilicet quodlibet factum omnimodo determinatum esse, adeoque cum antecedentibus concomitantibus, & consequentibus cohærere debet; intelligitur, circumstantias facti cujusdam individui, ex quibus aliquid infertur & concluditur ad ipsum factum, de quo quæritur, esse vel antecedentes, vel concomitantes, vel consequentes (a).

- (a) In hac hypothese, uti speramus, omnes Jctos habemus consentientes; sæpe enim, in dijudicandis circumstantiis, ea, quæ præparatoria actus & consequentia appellant, probe secernunt ab illis, quæ factum probandum immediate tangunt; quid enim aliud sibi vult locutio illa maximi nominis Jctis frequentissime usitata: ex sequentibus antecedentia esse explicanda? vid.

B. Dn.

B. Dn. D. Harpprecht, Resp. I. n. 90. Resp. XIV. n. 207. item ex antecedentibus & consequentibus optimam desumi interpretationem? vid. Magnif. Dn. D. Schœpf, Dec. 207. n. 16. Porro: quod præparatio ad actum quen-
dam ipsius actus secuti indicium præbeat? B. Dn. D. Harpprecht, Resp. 32.
n. 70. seqq. & Resp. 67. n. 26. Cur itidem præparatoria contractus tam
sollicite ab ipso contractu fecernuntur &c.? Idem, Resp. 97. n. 46. seqq.
Nullam aliam video rationem, quam hanc, quia ex antecedentibus & con-
sequentibus ad ipsum actum aliquo modo fieri potest illatio, quamvis harum
circumstantiarum gravitas diversa sit, quandoque major, quandoque levior;
id quod volumus.

§. 99.

Circumstantias factum probandum determinantes, sive re-
quisita ad veritatem facti quæsitæ, illud vel antecedere, vel con-
comitari, vel subsequi, supra probavimus (§. antec. 98.); jam,
quænam vocentur concomitantes circumstantiæ, quænam ante-
cedentes, quænam consequentes? paulo penitius dispiciendum
est, quia exinde ad illarum gravitatem vel pondus aliquo modo
argumentum duci potest. Concomitantem circumstantiam ap-
pellamus, quæ factum probandum immediate tangit & *aliquo mo-
do* determinat; v. gr. pone, aliquem prope occisum cadaver re-
periri, vel plane reperiri ibidem stricto gladio; hæc sane cir-
cumstantia est concomitans; immediate enim connectitur cum
facto probando, scilicet homicidio; *antecedentes circumstantias*
vocamus, quæ mediate, & nonnisi positis intermediis aliis cir-
cumstantiis & requisitis, factum probandum *aliquo modo* (a) de-
terminant, & quidem in ratione causarum; v. gr. Titii cadaver
interemtum reperitur in sylva, Cajus tempore probabiliter com-
missi homicidii visus fuit in via ad sylvam & locum corporis de-
licti; hæc circumstantia nonnisi mediate & in ratione causæ de-
terminat aliquo modo factum probandum; plura enim requi-
runtur intermedia & sequentia, si exinde probari velit homici-
dium. *Consequentes denique circumstantiæ* dicuntur, quæ itidem
mediate conjunguntur cum facto probando, illudque aliquo
modo determinant, sed & in ratione effectuum; sic v. gr. ut in
eadem analogia exempli maneamus, consequens est circumstan-
tia, si Cajus ex loco delicti veniens in via visus fuerit, itidem
enim mediate connectitur hæc circumstantia cum facto proban-
do, & de quo quæritur, & quidem per modum effectus, non
causæ.

Quid sint an-
tecedentes?
quid conco-
mitantes?
quid conse-
quentes?

(a) Non absque ratione dicimus: *aliquo modo determinat*, quia per hypo-
thesin ex circumstantia antecedente non plane determinatur factum proban-

dum, adeoque causa supponitur saltem partialis; quodsi enim supponeremus, ex huiusmodi circumstantiis antecedentibus factum probandum plene determinari, adeoque antecedentes circumstantias esse causam totalem facti illius, de quo quæritur, non posset non necessario sequi effectus, scilicet factum probandum; posita enim causa totali, non partiali saltem & concurrente, necessario ponitur effectus, evolv. Illustr. atque Excell. Dn. Bilsinger, in Diluc. Philos. sect. 3. c. 2. §. 249. p. m. 240. Causa enim adæquata ab inadæquata probe est secernenda. add. Parens noster Canzius, in Philos. fundam. Ontol. c. 40. §. 831. p. m. 114.

§. 100.

Concomitantes majori probabilitatis gradu sese commendant, quam antecedentes & consequentes.

Immediate cum facto probando connecti circumstantias concomitantes, supra evicimus in definitione circumstantiarum concomitantium (§. 99.); Quæcunque autem circumstantiæ cum facto, de quo quæritur, immediate cohærent, illæ non tot desiderant alia concurrentia requisita, ad determinandum factum, quot desiderant illæ, quæ cum hoc facto mediate cohærent, per definit. adeoque illæ circumstantiæ, quæ immediate cum facto, de quo quæritur, connectuntur, plura supponunt requisita ad facti cujusdam veritatem. Ubi autem præsto sunt plura requisita ad facti cujusdam veritatem, ibi major est probabilitatis gradus, quam ubi liquet de paucioribus (a). *Ergo omnino concomitantes facti cujusdam circumstantiæ majori sese commendant probabilitate, quam antecedentes & consequentes, quæ quippe nonnisi mediate cum facto probando cohærent (b).*

(a) Evolv. Clariss. Dn. Kahl, in laud. Elem. Log. probab. cap. I. sect. I. §. 26. p. m. 18.

(b) En! igitur quantitatem circumstantiarum concomitantium aliquo modo, respectu scil. habito ad antecedentes & consequentes, nec non factum ipsum, determinatum, adeoque limites, in quos incidunt, notos esse, & dici posse, hæc vel illa circumstantia concomitans probabilius reddit factum comparative, quam alia antecedens vel consequens, licet gradus præcise probabilitatis in positivo assignari adcurate nequeat; hinc aliquatenus satisfacimus promisso (supra §. 85.) dato. Sed, cum nondum sufficiat hæc determinatio, & nimis adhuc generalis sit, tentabimus, annon specialius adhuc determinari possit gradus probabilitatis circumstantiarum concomitantium, potissimum, si inter se concurrant.

§. 101.

Concomitantes sunt vel essentialiter, vel extrinsecus.

Patet ex prioribus, circumstantiam concomitantem majorem innuere probabilitatis gradum, quam antecedentem vel consequentem (§. 100.); & ita quidem habemus characterem, ex quo patet, quamnam in concursu alteri sit præferenda, concomitans,

tans, an vero antecedens, vel consequens? at vero, si circumstantiæ concomitantes inter se concurrant, quid consilii, & quænam alteri erit præferenda? hoc sane nondum determinatum est; operam igitur dabimus, num & hunc casum aliquo modo determinare possimus? Circumstantias esse vel essentielles, h. e. sine quibus factum probandum plane intelligi nequit, vel extra-essenciales, quæ, licet haud præcise ita, sed aliter fortasse sese habeant, vel & plane ignorentur, factum nihilominus intelligi potest, supra evicimus (§. 89.). Nec antecedentes, nec consequentes circumstantiæ ipsam notionem facti probandi constituunt, adeoque nec ad essentialia facti probandi spectant; *hinc nonnisi de concomitantibus enunciari potest, quod sint vel essentielles, vel non essentielles & accidentales.*

§. 102.

Concomitantes igitur circumstantiæ sunt vel essentielles, vel extraessenciales; id, quod patet ex (§. antec. 101.) in facti veritate indaganda finis est, ut omnia essentialia facti pateant; his enim cognitis, de ipso facto probando liquet, nec opus est, ut & judici de reliquis extraessentialibus constet (§. 90.); hinc finis, quo scil. factum probandum determinetur, magis obtinetur per circumstantiam essentialem, quam extraessentialem (a), adeoque hæc probabilius reddit factum, de quo quæritur, quam alia extraessentialis, & in collisione huic est præferenda (b).

(a) Essentia enim internam rei cujusdam possibilitatem constituit; Illustr. atque Excellent. Dn. Bilfinger, in Dilucid. Philos. sect. I. cap. I. §. 6. p. m. 5. Parens noster Canzius, in Philos. Fundam. Ontol. c. 9. §. 110. p. m. 15. quo magis igitur essentia facti cujusdam per circumstantiam cognitam determinatur, eo magis factum per eam intelligitur, eo major igitur est ratio, factum pro vero habendi (§. 14.), & eo major quoque est probabilitatis gradus (§. 92.). A. per circumstantiam essentialem; E.

(b) En! igitur specialiozem determinationem, ex qua etiam intelligitur, quænam inter concurrentes fortasse circumstantias concomitantes altera sit probabilior, adeoque præferenda.

§. 103.

Quæritur, annon etiam aliquatenus determinari possit major gradus probabilitatis inter ipsas circumstantias essentielles concurrentes? quod omnino affirmandum esse puto, & hoc per generalem Regulam exprimi posse arbitror; quo magis ipsa facti quæsitæ essentia per circumstantiam cognitam essentialem determinatur, adeoque factum ipsum exinde cognoscitur, eo major

Quo magis factum probandum per circumstantiam quandam essentialem determinatur, eo magis probabile est redditur.

est gradus probabilitatis hujus vel illius circumstantiæ essentialis (a); id quod vel ex eo patet, quia, si de omnibus requisitis constet essentialibus, ipsum factum satis probatum est (§ 90.); quo magis autem per circumstantiam quandam cognitam essentia facti probandi determinatur, eo magis de requisitis veritatis facti essentialibus liquet, eo probabilius igitur redditur factum (b).

(a) Sæpe enim ita comparata est circumstantia cognita, ut aliam antecedentem supponat, factum ipsum autem magis determinet, adeoque alteri aliquid certitudinis superaddat; quin igitur hæc probabilius reddat factum, quam altera, nemo sane dubitabit. Exemplum supra allatum rem magis illustrabit: Ponamus, Titii cadaver in sylva reperiri ense perfoctum; ponamus Cajum stricto gladio prope cadaver visum esse; erit sane hæc circumstantia essentialis concomitans, major itaque alia concomitante extraessentiali, v. gr. si Cajus saltem prope cadaver, sed absque gladio, visus esset; ponamus vero, Cajum visum esse, cum ad Titii occisi pectus gladium admooveret, etiam hæc erit circumstantia essentialis, sed major illa, ubi saltem stricto gladio visus esse ferebatur; cur? Ratio hæc est, quia posterior priorem jam involvit & insuper facto probando aliquid superaddit; Ponamus porro, Cajum visum esse, cum gladio peteret Titium, & sanguinem profluentem visum esse ex pectore Titii, iterum hæc erit circumstantia gravior & fortior priori; & sic porro, donec omnia facti quasi essentialia præsto sint.

(b) Vid. sæpe alleg. Dn. Kahl, in d. Elem. Log. probabil. l. 6. c. 1. sect. 1. §. 26. p. m. 18.

§. 104.

Traditur regula com-
mensurandi
circumstan-
tias antece-
dentes &
consequen-
tes.

Habemus igitur normam quandam, secundum quam nobis quantitatem & gravitatem circumstantiarum concomitantium, siue extraessentialium, siue essentialium, dimetiri licet; jam & restat, ut ad circumstantias antecedentes & consequentes revertamur, operam daturi, num & harum quantitas aliquo modo assignari possit? eadem fere mihi recurrere videtur regula, quæ (§. antec. 103.) de circumstantiis concomitantibus essentialibus tradita fuit. Circumstantiæ enim antecedentes & consequentes mediate connectuntur cum facto ipso probando, adeoque adhuc supponunt plura requisita, donec ad concomitantes, multo magis donec ad essentielles, accedant; *quo propius igitur accedunt ad concomitantes*, h. e. quo plures determinationes, & quo plura requisita facti probandi, accedunt, *eo probabiliores sunt circumstantiæ antecedentes vel consequentes*. Cur? quo propius enim accedunt circumstantiæ antecedentes vel consequentes ad concomitantes, eo magis determinatur factum probandum, eoque mi-
nora

mora & pauciora desiderantur requisita veritatis facti (§. 99. & 100.); quo pauciora autem desiderantur requisita veritatis facti, eo major est gradus probabilitatis; Repetamus majoris illustrationis gratia exemplum supra prolatum: Ponamus Titii cadaver in sylva ense perfoſſum reperiri, ponamus Cajum in via ad sylvam tendente viſum eſſe; eſt hæc circumſtantia quædam antecedens; quo propior igitur cadaveri fuit, eo magis accedit hæc circumſtantia antecedens ad concomitantem, eoque major eſt ejus probabilitatis gradus (a).

(a) En! Regulam etiam pro circumſtantiis antecedentibus & conſequentibus, mediante qua, uti ſperamus, quantitas illarum, ſi non in poſitivo, tamen in comparativo, aliquo modo determinari poteſt!

§. 105.

Superioribus igitur §§phis tradidimus Regulas dimetiendi gradus probabilitatis, quantum fieri poteſt, tam pro circumſtantiis concomitantibus, iisque ſive eſſentialibus, ſive extraeſſentialibus, quam pro antecedentibus & conſequentibus, adeoque ſtetimus promiſſo ſupra (§. 84.) dato; hinc & ſtatim progredi poſſemus ad præſumptiones hominis vel facti, quatenus oriuntur ex modo probandi, tentaturi, num & heic aliquo modo earum quantitas determinari poſſet? niſi adhuc indicandæ eſſent quædam difficultates, quæ aliquando in dijudicandis hujusmodi probabilitatibus & dimenſione earundem quantitatum ſeſe exferunt. Sæpe enim accidit, ut circumſtantia, ex qua fit illatio ad factum probandum, non ſatis determinata vel probata ſit; unde ſtatim patet, hoc caſu non tantum tribuendum eſſe hujusmodi circumſtantiæ, quam ſi eſſet determinata in *ſuo genere*, adeoque hoc caſu non tantum efficaciæ habet, quantum habet alia ejusdem generis, quæ autem plene determinata eſt. v. gr. Ponamus, quæri de homicidio in ſylva patrato, & de ejus Auctore, viſum eſſe aliquem in via ad ſylvam tunica cærulea veſtitum, Cajum autem illo tempore tali veſtimento indutum fuiſſe; hæc ſane circumſtantia, h. e. hominem, in via viſum, fuiſſe Cajum, ſi plene probata & determinata eſſet, haberemus ſane circumſtantiam antecedentem, eo majorem, quo propior Cajus cadaveri viſus fuiſſet (§. 104.); cum vero ex ſolo veſtimento Caji perſona nondum ſatis determinata ſit, huic ſane conjecturæ non tantum tribuendum eſt, quantum

Reſolvuntur
heic quæ-
dam difficul-
tates, quan-
doque oc-
currere ſo-
litæ.

alias alii circumstantiæ antecedenti tribueretur, quæ plene in suo genere determinata est; & quidem eo minus in eodem genere efficaciam huiusmodi circumstantiæ minus determinatæ tribuendum est, quo minus est determinata; & contra eo plus virtutis illi accedit in suo genere, quo plures accedunt ejus determinationes; sic, v. gr. si accedant priori exemplo aliæ circumstantiæ determinantes, e. gr. si pateat, visum in via coma factitia instructum vel & hujus vel illius staturæ fuisse, hæc autem circumstantiæ quadrent etiam in Cajum: magis sane hæc circumstantia antecedens firmatur, & eo plus roboris accipit, quo magis persona Titii determinata est, ita, ut, si plene determinata sit, hæc circumstantia omnino omnem antecedentis circumstantiæ vim accipiat, adeoque gradus probabilitatis dijudicandus sit plene ex regula supra (§. 104.) tradita. Ponamus aliud exemplum: Sacrilegium dicitur commissum in templo, & nummi antiquiores, rari, furtim surrepti sunt, quæritur de sacrilegii Auctore; Cajus nummos similes expendit; quin inde suspicio quædam sacrilegii in Cajum oriatur, nemo dubitabit; sed quæritur, qualis sit hæc suspicio? Respondeo: si certo constaret, nummos hosce revera illos esse, qui surrepti sunt, præsto esset circumstantia concomitans non solum, sed & essentialis; cum vero de eo nondum satis constet, nondum etiam tantum efficaciam huic circumstantiæ tribuendum est in suo genere, quantum tribueretur, si esset probata plene & determinata; & sic porro: heic certa regula tradi non potest, sed in genere saltem dici potest, quo magis huiusmodi circumstantia probata & in suo genere determinata est, eo plus accipit roboris *in suo genere*.

§. 106.

Ex (§. antec. 105.) apparet, regulas supra traditas non aliter locum habere, quam si circumstantiæ in suo genere sint determinatæ plene; quod si enim deficiat determinatio, sæpe fieri potest, ut circumstantia, quæ, si plene determinata esset, ad hanc vel illam classem spectaret, minus roboris habeat, & ad aliam sit referenda classis; hinc aliquando fieri potest, ut circumstantia, quæ, si plene determinata esset, spectaret ad circumstantias concomitantes, easdemque essentielles, saltem referenda sit inter antecedentes vel consequentes. Sic, v. gr. si Titii vel Caji gladius prope cadaver occisum reperiatur, est sane hæc circumstantia

Si talis circumstantia non satis determinata sit in suo genere, sæpe referenda est ad aliam classis, & huic majus robur addit.

stantia concomitans, & essentialis, quodsi vero Titius saltem visus sit in via ad locum delicti gladio instructus, hæc sane circumstantia est saltem antecedens, quia nondum satis determinatum est, nec ex ulla circumstantia apparet, gladium hunc tempore homicidii prope cadaver fuisse, multo minus hoc gladio homicidium perpetratum esse; cum enim multi dentur gladii, nec ex alia circumstantia appareat, hunc præcise gladium illum fuisse, quo homo interfectus est, adeoque hæc circumstantia, alioquin essentialis, non satis determinata sit, hæc sane spectat saltem ad circumstantias antecedentes, iisque majus robur addit (a). Usus & applicatio hujus materiæ ulterior infra Capite seq. IVto, ubi ex professo de applicatione & effectu juridico harum præsumptionum agemus, patefcet.

(a) Operæ pretium esse duximus, ut hanc materiam adhuc exemplo quodam illustraremus, ejusque hætenus applicationem saltem brevibus monstraremus; Ponamus, Cajum, tempore homicidii perpetrati, in via, per quam aditus patet ad locum delicti, vestibus sanguine perfusis visum fuisse, quæritur: cuinam speciei hæc circumstantia annumeranda sit? Si certum esset, Cajum occisi sanguine perfusum esse; haberemus sane circumstantiam facti concomitantem, eandemque essentialem; quia vero hæc circumstantia per se nondum satis est determinata, spectat saltem ad consequentes circumstantias, iisdemque majus robur addit, si, quod probe notandum est, nullo modo determinari posset, neque probabiliter, Cajum occisi sanguine perfusum esse; hinc semper adtendendum est ad id, num hæc circumstantia magis determinari possit? ponamus, homicidium in campo esse perpetratum; ponamus, Cajum indicare non posse, cur ipsius vestes sanguine sint tinctæ; ponamus, Cajum neque tali operam dare arti, ex qua aliquatenus concludi possit, illum circa sanguinem effundendum occupari, v. gr. lanionem, venatorem &c., probabilissimum sane erit hoc casu, & circumstantia valde verisimiliter erit determinata, quod scil. ejus vestes sanguine Titii occisi sint perfusæ, adeoque non dubitandum est, quia talis circumstantia pro concomitante essentiali sit habenda.





CAPVT III.

PARS II.

DE PROBABILITATE IURIDICA ET DETERMINANDIS EIVS GRADIBVS, QVATENVS ILLA SESE EXSERIT CIRCA MODVM PROBANDI.

§. 107.

Transitus ad determinationem probabilitatis graduum, quatenus probabilitas sese circa modum probandi exserit.

Jam accedimus ad materiam paullo difficiliorem, num scilicet etiam gradus quidam probabilitatis in præsumptionibus facti vel hominis, quatenus ex modo probandi oriuntur, aliquo modo assignari possit? Tentabimus, quantum in viribus nostris positum est, spe freti, fore, ut, si rem minus acu tetigerimus, imbecillitati virium nostrarum aliquid indulgeatur, & nonnihil materiæ ipsi, non solum in se difficili, sed hucusque etiam ex professo, quantum scimus, nondum pertractatæ, tribuatur. Quando igitur quæritur de assignandis aliquatenus gradibus probabilitatis, quatenus ex modo probandi oritur probabilitas juridica & præsumptio; statim apparet, excludi materiam de collisione diversorum probandi modorum inter se; Cum enim quælibet probatio plena jam sit veritati juridicæ accensenda, nec amplius ad probabilitatem juridicam vel præsumptionem, sed probabilitatem absolutam, spectet, nobis autem saltem de probabilitate juridica agendum sit sive de præsumptionibus: neque nostrum est de hac materia speciatim differere, eoque minus, quia illa jamjam a Celeberrimo JCto ex professo, & quidem solidissime, fuit pertractata & exhausta (a).

(a) Conf. Illustr. Bæhmer, in erudit. Diss. de collisione probationis, per tot.

§. 108.

Modus probandi ordinarius quintuplex est.

Nobis igitur saltem sermo est de diversis modis probandi, quatenus unus vel alter nondum omnibus numeris & modis absolutus est, adeoque adhuc in illo aliquid desideratur. Cum autem modi probandi diversi sint, de quolibet aliquid, licet brevissimis, erit dicendum. Aliunde novimus, quintuplicem proprie esse probandi modum ordinarium, a) *per confessionem scilicet ipsius adversarii*, b) *per testes*, c) *per instrumenta vel documenta*, d) *per*

d) per juramenta, & e) per inspectionem ocularem. De singulis hisce paucis differemus (a).

(a) Licet quartus probandi modus, per juramenta scilicet, quam maxime subsidiarius sit, nec, nisi deficientibus reliquis probationibus, admittatur, & ut plurimum saltem confirmandis probationibus imperfectis, vel infirmandis suspicionibus, accedat, ut suppletorium & purgatorium, vel & ad speciem quandam confessionis referri possit, ut judiciale juramentum.

CAPUT III.

PARS II.

SECTIO I.

DE PROBATIONE, QVÆ FIT EX CONFES-
SIONE ADVERSARII.

§. 109.

Primus itaque idemque optimus probandi modus est ille, qui fit mediante confessione, quam confessionem alias Regiam probationum omnium adpellitant Jcti (a). Hinc etiam confessio in jure facta comparatur rei judicatae, & paratam habet executionem (b); confessio autem judicialis, sive in judicio vel post litis contestationem facta, licet requirat præviam sententiam condemnatoriam (c), hunc tamen notabilem quoque producit effectum, ut judex statim sententiam condemnatoriam ferre teneatur, ut porro confessus appellare nequeat (d), imo, ut & mediante illa res judicata retractari possit (e); quod secus sese habet in reliquis probandi modis, ubi ob novas probationes, vel instrumenta noviter reperta, saltem locus conceditur restitutioni in integrum (f), imo vero de Jure Würt. utraque habet paratam executionem, & ne quidem in ultima specie requiritur sententia judicis condemnatoria (g).

Primo igitur de confessione, tanquam nobilissima probationum specie.

(a) B. Dn. D. Lauterbach, Disp. de Confess. th. 41. B. Dn. D. Harpprecht, Resp. 66. n. 140. Resp. 72. n. 119. Resp. 83. n. 272. & passim.

(b) L. 1. L. 6. pr. & §. 2. & §. ult. ff. L. un. C. de Confess. L. 56. ff. de re jud.

(c) Gail, lib. 2. obs. 206. n. 1. fin. & 2. Stryk, Us. mod. tit. de confessis, th. 3.

(d) L. 2. C. quor. App. non recip. c. 3. §. si autem X. de Appell. in 6to. Lauterbach, in Disp. de Confess. th. 38.

(e) B. D. Lauterbach, Disp. de Confess. P. 2. th. 41.

I

(f) L. 1.

(f) L. 1. ff. de in integr. rest. L. 44. ff. de minor. 25. ann. B. D. Lauterbach, in Coll. Theor. Pract. tit. de re jud. §. 26.

(g) Jus Prov. Württ. P. 1. tit. 33. §. weil eigene freywillige Bekanntschaft u. p. 127. add. B. D. Lauterbach, in Differ. Jur. Civ. & Württ. P. 1. th. 54.

§. 110.

Diverfos effectus producit confessio in delictis capitalibus, & non capitalibus, vel & civilibus.

Confessionem omnium probationum nobilissimam, imo Reginam probationum, esse, supra diximus (§. 109.) Sed Regula hæc intelligenda est de causis civilibus; at in criminalibus, quatenus hæc pœnam ultimi supplicii involvunt, requiritur, ut constet insimul de corpore delicti, & quidem plene, quatenus scil. pro qualitate delicti, facti sive permanentis, sive transeuntis, corpus delicti, alias repræsentandum est (a); hinc aliud dicendum de criminibus non capitalibus vel & capitalibus, in casu, quando de pœna extraordinaria infligenda sermo est, ubi, licet corpus delicti plane non probatum sit, omnino pœna locum obtinet, sed non capitalis, verum alia levior & extraordinaria (b), v. gr. fustigatio & relegatio, condemnatio ad operas publicas &c.

(a) Lauterbach, in Disp. de Confessione, th. 50. B. D. Harpprecht, Resp. 100. n. 17. seq. Dn. D. Schœpf, in Dec. 130. n. 2. & Criminalistæ passim.

(b) Lauterbach, d. Disp. de Confess. §. 50. B. D. Harpprecht, Resp. 94. n. 16. seq. Dn. D. Schœpf, Dec. 176. n. 3.

§. III.

Confessioni in capitalibus, quando vel majus vel minus robur accedat?

Cum igitur confessio in delictis non capitalibus a confessione in causis civilibus facta, quoad effectum condemnationis, plane non differat, quæ infra de hac tradentur, quin etiam de illa intelligenda sint, dubitandum haud est. De confessione autem in capitalibus delictis facta heic unicum hoc notandum esse arbitramur, quod, licet sola confessio, cæterum suis requisitis instructa, locum faciat pœnæ, nihilominus gradus ejus probabilitatis augeatur eo magis, quo magis de corpore delicti constat, adeoque, quo plura adsunt indicia, Reum vera, non falsa, confessum esse, eo magis pœna hæc extraordinaria exasperanda sit, & contra, quo minora indicia de corpore delicti præsto sunt, eo levior dictanda sit pœna extraordinaria (a). Sic quandoque, ubi plane non, & nequidem per minimam suspicionem, de corpore delicti constat, saltem confinatio decernitur, vel & consilium abeundi Reo datur, ad scandalum removendum (b).

(a) B. D.

(a) B. D. Harpprecht, Conf. 7. n. 41. seqq. & Conf. 10. n. 136. seq.

(b) Et quidem ex hac ratione, quia confiteri factum, quod plane nullo modo apparet, est idem, ac fateri non factum. B. D. Harpprecht, Conf. 10. n. 90.

§. 112.

Hiscæ præmissis; ad ipsam confessionem accedimus, quantitatē probabililitatis in casibus, ubi quædam desunt ejus requisiti, quantum fieri potest, eruturi. Hoc, ut eo melius fieri possit, omnino haud abs re erit, præmittere definitionem confessionis. *Confessio est, quando quis factum quoddam, in sui præjudicium tendens, affirmat* (a). Ratio igitur, cur tanta confessioni vis tribuatur, in eo posita est, quia nullo modo credibile est, fore, ut aliquis sciens prudens sibi nocere velit, nisi de injustitia causæ suæ sit convictissimus (b).

Definitur confessio.

(a) B. D. Lauterbach, Disp. de Confessione, th. 1. Idem, in Coll. Theor. Pract. tit. de Confessis, §. 1.

(b) Analogia L. 25. pr. ff. de probat. B. D. Harpprecht, Conf. 10. n. 137. ubi ita: „Neque enim jura nostra de quoquam præsumunt, quod falsum contra se ipsum testimonium sit perhibiturus; Nemo enim tam fatuus censetur, ut in se ipsum, cum jactura sui capitis, (vel & in genere in sui præjudicium,) ipsemet mentiatur &c., add. Clariss. Kahl, cit. Elem. Log. Probab. sect. 3. c. 1. §. 224. verb: „Propria testimonia de actionibus perpetratis, vel non perpetratis, in deteriore partem, si non vi extorquentur, se commendant insigni probabilitate; quoniam inter 1000. nemo sibi ipsi injurias inferet, ac narrabit, quæ sunt dedecori; NB. hæc ratio, cur judices secundum confessionem propriam ferant sententias &c.,

§. 113.

Quo majus itaque aliquis ex confessione sua sibi præjudicium imminere videt, eo majori sese commendat probabilitate confessionis, licet non omnibus numeris & requisitis absoluta. Et contra, quo minus aliquis præjudicium inde emersurum intelligit, vel quo majus ex confessione sua lucrum ambit, quam contra detrimentum ex confessione redundans est, eo minus valoris habeat confessio, necesse est; Ex hac regula plurimos casus confessionis alias insufficientis, quantum ad ejusdem gradus determinandos attinet, dijudicari posse arbitror.

Regula dijudicandi pondus confessionis.

§. 114.

Confessio est vel judicialis, vel extrajudicialis; illa, quæ vel in jure vel in judicio, h. e. olim vel coram Præatore vel iudice pedaneo (a), hodie vero ante vel post litis contestationem, facta est

Confessio est vel judicialis, vel extrajudicialis.

est (b); hæc, quæ inter privatos facta est (c); extrajudicialis iterum est vel facta præsentem & acceptantem adversario, vel hoc absente (d).

(a) B. D. Lauterbach, Disp. de Confessione, th. 28. & 40. add. Idem, in Coll. Theor. Pract. tit. de Confessis, §. 4.

(b) Lauterbach, in Coll. Tract. tit. de Confessis, §. 21. Idem, laud. Disp. de Confessione, th. 39. & 42.

(c) Lauterbach, in Coll. tit. de Confessis, §. 4. & in d. Diff. §. 43. seqq.

(d) Lauterbach, Coll. d. l. §. 23. & in d. Disp. §. 45.

§. 115.

Recensentur
requisita
confessionis
judicialis.

Percurramus jam primo loco singula requisita confessionis judicialis, indagaturi brevibus, quodnam requisitum, si deficiat, minus probabilem reddat confessionem, quam alterum, vel quodnam penitus illam destruat, ita, ut plane nullum in jure producat effectum? Requisite confessionis judicialis, si rite ac legitime comparata est, sunt: 1) ut facta sit coram judice competente (a); 2) a persona habili ad confitendum (b); 3) adversario præsentem (c). Requisite reliqua, scilicet, ut sit libera, non vi extorta (d), clara, specifica (e), non veritati oppido contraria (f), non erronea (g) &c. ex ipsa definitione fluunt, & quia, illis remotis, ipsa per se removetur definitio confessionis, oppido patet, deficientibus hisce requisitis, plane nullum esse posse effectum juridicum confessionis, adeoque neque sermonem esse posse hoc casu de determinando gradu probabilitatis quodam (h).

(a) C. 4. X. de Judic. Lauterbach, in Coll. d. tit. de Confess. §. 14. Idem, in Disp. de Confess. §. 49.

(b) Lauterbach, in Coll. d. l. §. 6. & in d. Disp. th. 7.

(c) Lauterbach, Coll. d. l. §. 15. & in laud. Disp. th. 30. & 40. L. 6. §. 3. ff. de Confessis, L. 47. ff. de re jud.

(d) Rütger Ruland, de Commiss. P. 4. L. 8. c. 10. & 11. Lauterbach, Coll. d. tit. §. 12.

(e) L. 6. pr. ff. de Confess. L. 11. §. 7. ff. de Interr. in jure fac. Lauterbach, in Coll. d. t. §. 12.

(f) L. ult. ff. de Confess. L. 13. pr. L. 14. §. 1. ff. de Interr. in jure fac. Lauterbach, in Coll. d. tit. §. 11.

(g) L. 2. L. 7. ff. de Confessis. Lauterbach, Coll. d. tit. §. 12.

(h) Ponamus enim, confessionem extortam, non liberam, cadet potissima ratio, ob quam vis tanta confessioni tribuitur, quia scilicet aliquis hoc casu non sciens prudens vel & sponte aliquid in sui præjudicium asserit; cadit enim omnis probabilitatis gradus, si quis aliquid in sui præjudicium asserat in casu, ubi omnes idem facerent. Hoc tamen dici potest, quo minor vis est illata, eo majorem fidem meretur confessio; sic v. gr. metus reverentialis, qui in con-

constantem virum non cadit, non infirmat confessionem, neque locum facit restitutioni in integrum, neque quilibet vanus metus, vel minæ, quæ facile executioni mandari nequeunt, B. D. Harpprecht, Resp. 66. n. 84. seqq. Licet autem hoc casu confessio non plane infirmetur, non tamen dubitandum est, quin minor hujusmodi confessionis vis sit, quam confessionis omnimodo spontaneæ; hinc ex gradu metus vel vis, ut ita loquar, actu illatæ, gradus efficaciæ confessionis determinandus est. Aliter quoque dicendum est de confessione metu justo, v. gr. per tormenta rite adhibita, extorta, modo accesserit, ex post, legitima ratificatio. Lauterbach, d. Disp. de Confess. th. 53. Obscura & generalis vel vaga confessio quod nullius possit esse roboris, vel ex eo patet, quia obscura & generalis, sive vaga, confessio ita comparata est, ut in utramque partem explicari possit; quod si vero non constet, num hac vel illa locutione aliquis in sui præjudicium aliquid affirmare voluerit, nec ne? cadit definitio confessionis, hinc & ipsa confessio; in dubio enim locutio in favorem loquentis est explicanda. B. Dn. D. Harpprecht, Conf. nov. 44. n. 453. Lauterbach, d. Disp. de Confessione, th. 6. Dn. D. Schœpf, Dec. 33. n. 18. Idem ex eadem ratione dicendum est de confessione spe majoris præmii, elicitæ, B. D. Harpprecht, Cons. nov. 85. n. 22. vel & spe impunitatis elicitæ, Lauterbach, d. Disp. de Confessione, §. 53. & de illa, quæ veritati vel naturæ oppido repugnat; Lauterbach, d. Disp. de Confessione, th. 18. Idem, Coll. Theor. Pract. tit. de Confessis, §. 11. B. Dn. D. Harpprecht, Cons. 7. n. 84. quia scilicet cessat finis confessionis, qui est, ut veritas eruatur; Lauterbach, d. Disp. th. 20. & in Coll. d. l. §. 13. Idem etiam iudicium ferendum est de confessione erronea; L. 2. ff. de Confess. B. Dn. D. Harpprecht, Resp. 80. n. 365. seqq. Dn. D. Schœpf, Dec. 10. n. 29. ubi enim non est voluntas aliquid in sui præjudicium asserendi, cadit ipsa confessio (add. §. 112. supra).

§. 116.

Nobis itaque sermo est de tribus illis confessionis judicialis requisitis (§. 115.) expositis, & dispiciendum, quonam licet deficiente, confessio altera præ altera nihilominus majori sese commendet probabilitate. Primum requisitum erat, ut facta esset confessio coram iudice competente; secundum, a persona ad confitendum habili; & tertium, adversario præsentem & acceptante. Illud igitur requisitum, quod, si deficiat, fini confessionis minimum detrahit, omnino, licet deficiat, magnum adhuc gradum probabilitatis confessioni relinquit. Ponamus 1) *confessionem coram iudice factam esse absente parte adversa*, quia, qui sciens aliquid in sui præjudicium asserit coram iudice competente, non facile mendax præsumendus est, quia iudex gravissimam suspicionem contra talem concepturus esset, qui uno momento absente adversario aliquid confiteretur, altero vero momento iterum negaret, adeoque sibi ipse contradiceret; proxime sane accedit hic gradus confessionis ad confessionem omnibus

Exponitur,
quodnam
requisitum,
si deficiat,
plus fini confessionis detrahat, adeoque confessio minori sese commendet probabilitate, quam deficiente altero?

numeris absolutam; minime enim probabile est. quod talis, fatendo, in sui ipsius præjudicium mentitus sit; hinc & judex huiusmodi confessionem, nomine adversarii, ex officio potest acceptare, ita, ut tum talis confessio, licet absente adversario facta, eundem effectum producat, quem alia quævis producit confessio judicialis (a) *deficiente igitur licet hoc requisito summus remanet probabilitatis gradus.* Ponamus porro, primum requisitum deesse, scilicet *confessionem coram iudice incompetente factam esse*, licet talis confessio, coram iudice incompetente facta, pro judiciali confessione haberi nequeat, ex ea scilicet ratione, quia iudex incompetens intuitu litigantium non est iudex, adeoque intuitu illorum pro publica persona haberi nequit; nihilominus tamen, cum talis confessio a prudente & sciente facta sit coram tali, quem pro iudice, licet per errorem, habebat, nec hoc casu facile credibile sit, talem mentitum esse, adeoque probabile sit, talem veritatem dixisse, & finem confessionis obtentum esse, *non quidem pro judiciali haberi poterit hæc confessio, adeoque nec vim eandem habebit, quam habet confessio, in priori casu;* nihilominus incidet hæc confessio in privatam vel extrajudicialem confessionem, & hujus magnum gradum consequetur (b); minus enim probabile est, talem mentitum esse coram illo, quem, licet erronee, pro iudice suo habebat, quam coram alio quovis privato, quem noverat non esse suum iudicem, adeoque ubi persuadere sibi poterat, ex tali confessione minus præjudicii sibi metuendum esse. Ponamus porro *tertium casum, personam confitentem ad confitendum fuisse plane inhabilem*, v. gr. furiosum, summo opere ebrium, mente captum, iratum in summo gradu &c., facile patet, hoc casu confessionis plane nullam vim fore; cadit enim ipse finis confessionis, veritas scilicet, cum talis, quid agat, plane nesciat, adeoque confessio a prudente & sciente orta esse dici nequeat (c). Quo major autem præsto est intellectus, eo major quoque est gradus confessionis: sic fatuus, qui non omni plane destituitur intellectu, omnino aliquo modo confiteri potest, licet hujus confessionis non tanta vis sit, quanta est hominis omnino integræ mentis (d). Sic, licet pupillus sine auctoritate tutoris fateri nequeat, alias confessio ipso jure nulla sit (hæc tamen thesis nobis ita videtur intelligenda, ut hæc confessio nulla sit intuitu effectuum, quos alias confessio, omnibus numeris absoluta, producit) non tamen dubitandum est,

quia

quin levem quendam constituat præsumtionis gradum confessio hujusmodi pupilli, si scilicet agatur de rebus in ejus sensus cadentibus, neque enim plane arcentur a testimonio (e); quandoque enim proverbio locus est: Kinder und Narren sagen die Wahrheit (f). Sic iterum major vis est confessionis minoris sine consensu curatoris contentis, quam pupilli, & iterum fœminæ legitimæ ætatis, licet curatore ad litem destitutæ, confessionis major vis est, quam confessionis minoris &c. *In genere vero confessionem personæ, quæ ob deficientem aliquatenus intellectum ad confitendum inhabilis est, minorem habere probabilitatis gradum, quam illam, quæ coram judice incompetente facta est, vel ex eo patet, quia hæc supponit hominem intellectu integro præditum, adeoque hac magis finis, ut scilicet veritas obtineatur, attingitur.*

(a) Arg. L. 1. §. 15. ff. de Magistr. conven. B. D. Lauterbach, in Coll. Theor. Pract. tit. de Confessis, §. 15. & in dict. Disp. de Confessione, §. 30.

(b) B. D. Lauterbach, modo alleg. Disp. de Confessione, th. 29.

(c) B. D. Lauterbach, in Coll. d. tit. §. 6. Idem, in Disp. de Confessione, th. 7. 8. & 9. & in Disp. de Ira, th. 26.

(d) B. Dn. D. Harpprecht, Conf. 7. n. 158.

(e) B. D. Lauterbach, in Coll. Theor. Pract. tit. de Testibus, §. 13. 14. 15. & 16.

(f) At ob stare videtur, quod tantum absit, ut confessio pupilli aliquem producat effectum, ut potius, licet accesserit tutoris auctoritas, nihilominus tali pupillo vel & minori concedatur restitutio in integrum. L. 6. §. 5. ff. de Confessis. Lauterbach, in Coll. d. tit. de Confess. §. 7. & in sæpe alleg. Disp. de Confessione, th. 7. 10. & 11. Sed respondemus: licet non effectum plenum confessionis producat talis confessio, nihilominus illam, pro gradu intellectus & qualitate objecti, quod scilicet in sensus cadere potuit impuberum vel minorum, aliquam efficere debere præsumtionem; quod vel ex eo patet, quia impuberes non plane omni destituuntur intellectu, adeoque aliquo modo scire possunt, quid agant, ita, ut horum confessiones non plane abhorreant a fine confessionis. Id quod & exinde intelligitur, quia impuberes & minores etiam in criminalibus ultimo supplicio affici, Harpprecht, Resp. 99. n. 38. seqq. & confessione sua aliquo modo sibi præjudicare queunt; Lauterbach, in Coll. d. tit. de Confessis, §. 7. quod, cum in rebus majoris momenti affirmetur, quales sunt causæ criminales, imò capitales, absonum sane foret, plane nullum effectum tribuere confessioni in civilibus vel causis minoris momenti. Insuper & responderi potest, eo ipso, quia restitutio datur in integrum, si confessio auctoritate tutorum vel consensu curatorum facta sit, non plane nullam esse debere hujusmodi confessionem; restitutio enim in integrum supponit negotia per se valida; Lauterbach, in Coll. tit. de in integr. restit. §. 18. neque restitutioni in integrum locus est, nisi probata sit læsio; læsus autem dici nequit minor, nisi probatum sit, confessionem vitium aliud habuisse; Lauterbach, Disp. de Confessione th. 11. in fin. verbis:

Cæterum,

Cæterum, si minor, licet præfente Curatore, adversarii dolo deceptus vel iudicis persuasione inductus, aliquid confessus sit, etiam in criminalibus causis, prævia causæ cognitione, ipsi in integrum restitutionem concedendam esse, docet post alios, Menochius &c. Hinc & omnino, si tutor vel curator in iudicio ex officio & juris necessitate aliquid confiteatur, præjudicare potest pupillo vel minori; Lauterbach, d. Disp. de Confessione, th. 25. cur non, si ipse præsto sit pupillus?

§. 117.

Dispicitur
de confes-
sione extra-
judiciali.

Et tantum de confessione judiciali & dijudicandis ejus gradibus si unum vel alterum requisitum deficiat! Restat jam, ut & de confessione extrajudiciali quædam subjungamus. Extrajudicialem confessionem supra (§ 114.) diximus illam, quæ fit extra iudicium, non coram iudice, sed coram aliis, qui non sunt iudices competentes (a). Hinc facile patet ad extrajudicialem quoque spectare confessionem illam, quæ facta est coram iudice incompetente (§. 116.) (b), qui scilicet intuitu litigantium dici nequit persona publica, sed privata, quamvis hæc magnum confessionis extrajudicialis gradum consequatur (§. 116.). Sic porro huc referenda est confessio coram Notario & testibus facta, nisi Notario eum in finem expresse commissio a iudice competente demandata sit (c). Neque hic enim est iudex competens; omnis autem confessio non coram iudice competente facta est extrajudicialis saltem, non judicialis (§. 114.); Et cum illa sit extrajudicialis, quæ fit coram iudice non competente, qui tamen magis proprie dici potest persona publica, multo magis hoc dicendum erit de Notario, licet de cætero alio respectu habeatur pro persona publica.

(a) Lauterbach, in Coll. Theor. Pract. tit. de Confessis, §. 4. Idem, in d. Disp. de Confessione, th. 43.

(b) Lauterbach, in d. Disp. de Confess. th. 29.

(c) Reformat. Francef. P. I. tit. 30. §. 1. ibi: Nicht allein aber seynd die gerichtliche Bekännnisse, sondern auch die, so ausserhalb Rechts, als vor Notarien und Zeugen, &c. Jus Prov. Württ. P. I, tit. 33. §. 88 sollen auch &c. pag. 128. verb: Es sollen auch die Bekännnisse, so ausserhalb Rechts, vor Notarien und Gezeugen, oder sonst vor ehrbaren Leuten &c. D. Lauterbach, in d. Disp. de Confessione, th. 45. 46. 49.

§. 118.

Hæc iterum
vel fit præ-
fente & ac-
ceptante ad-
versario, vel
non acce-
ptante eo-
dem.

Extrajudicialem confessionem iterum vel fieri præfente & acceptante, saltem non contradicente adversario (a), vel illo absente, (supra §. 114.) dictum est. Magna, ratione effectus, est differentia inter hosce duos casus; confessio enim, præfente & acce-

acceptante adversario facta, incidit aliquo modo in pactum vel promissum (*b*), adeoque plene probat (*c*); confessio autem extrajudicialis, absente adversario facta, saltem operatur semiplenam probationem, secundum communem DD. sententiam (*d*); Licet de Jure Württembergico & huic vis ac efficacia plenæ probationis tributa sit (*e*). Ratio differentiæ mihi potissimum in eo videtur esse posita, quia nemo tam facile coram adversario suo aliquid in sui præjudicium asseveraturus esse creditur, quam illo absente, & coram tertiis, quorum nihil plane interest, sive tale quid adsertum esse, sive non esse; & hoc enim casu non tantum fatenti imminet præjudicium, & hinc facilius fieri potest, ut aliquis animo sese jactandi aliquid dicat (*f*). Hinc hoc casu in criminalibus extrajudicialis confessio, modo concurrat cum indiciis aliis, locum dat saltem torturæ (*g*).

(a) Arg. L. 12. pr. ff. de Sponsalibus.

(b) C. 10. X. de Probat. B. D. Lauterb. in Coll. Theor. Pract. tit. de Confessis, §. 23. & in d. Disp. de Confessione, th. 45.

(c) Stryk, in Us. mod. tit. de Confess. §. 5. Lauterbach, in Coll. d. l. §. 23. & in all. Disp. th. 45.

(d) Mevius, P. 7. Dec. 154. n. 5. Lauterbach, in Coll. d. l. §. 23. & dict. Disp. th. 45.

(e) Jus Prov. Würt. P. 1. tit. 33. §. 3. Es sollen auch, pag. 128. verb: eine genügsame Beweisung einzuführen, kräftig seyn. B. Dn. D. Lauterbach, dict. Disp. th. 45.

(f) Leyser, in Medit. ad ff. spec. 637. n. 2. 3. 4. §. ubi Vinnium ad §. 1. Inst. de Milit. testam. allegat verbis: „Putat in conviviis, circulis ac congressionibus familiarium, ubi sæpe leviter quædam effundimus, & jactamus magis, „quam serio loquimur, „&c.

(g) Ord. Crim. Carol. art. 30. & 32. ibi: Und es wäre eine solche Person, daß man sich derselben That zu ihr versehen mag &c. add. Lauterbach, in Coll. d. cit. §. 27. & in d. Disp. de Confessione, th. 51. Leyser, d. spec. 637. n. 3. & 6.

§. 119.

Rationem, cur confessiones extrajudiciales, non præsentæ & acceptante adversario factæ, minus roboris habeant, quam illæ, quæ adversario præsentæ & acceptante factæ sunt, in eo positam esse diximus, quia non tantum præjudicium ex asseveratione sua illi imminet, qui coram tertio, cujus nihil interest, aliquid in sui præjudicium asserit, quantum metuendum est illi, qui coram

K

persona,

Regula traditur dijudicandi gravitatem confessionis extrajudicialis.

persona, cujus proprie interest, tale quid asseverat, adeoque hoc posteriori casu talis confessio animo magis præmeditato & prævia deliberatione majori edita esse censetur (§. 118.). *Quo majus igitur alicui præjudicium ex tali confessione extrajudiciali imminet, & quo magis deliberato facta est, eo major illi accedit gradus probabilitatis.*

§. 120.

Enarrantur
requisita
confessionis
extrajudi-
cialis.

Hinc jam dispiciemus primo de requisitis confessionis extrajudicialis in casu, si plene probat, & deinde videbimus, quonam requisito deficiente, major supersit gradus probabilitatis; id, quod ex regula modo tradita (§. antec. 119.) facile fieri posse arbitror. Supponimus tantisper requisita illa generalia & cuique confessioni essentialia, v. gr. ut sit spontanea, ad minimum non metu injusto extorta, clara, non ambigua &c., quæ quippe in hac extrajudiciali confessione æque necessario requiruntur, ac in judiciali; hinc eatenus remittimus Lectorem ad ea, quæ (§. 115.) dicta sunt. Præsuppositis igitur hisce, requisita confessionis extrajudicialis in specie sunt, I.) ut promanaverit a persona ad confitendum habili (a), II.) adversario præsentem & acceptante (b), III.) ut sit legitime probata (c); Hæc tria si concurrant, quin confessio extrajudicialis plene probet, tam de jure civili, quam Würtembergico, nemo est, qui dubitat (§. 118.).

(a) Ut enim persona confitens confiteri possit, heic æque requiritur, ac in judiciali confessione; quia confessionem prælucente intellectu factam esse oportet. Hinc & heic eadem obtinet regula probabilitatem dijudicandi, quæ supra, cum enarrarentur requisita confessionis judicialis, tradita est (§. 116.)

(b) C. 10. X. de probat. B. Dn. D. Lauterbach, in Coll. Theor. Pract. tit. de Confessis, §. 23. & in Disp. de Confessione, th. 45.

(c) Hoc est singulare in hac specie confessionis; judicialis enim nulla indiget probatione, quia judicis præsentia omnem supplet probationem, B. Dn. D. Harpprecht, Resp. 14. n. 286. seqq. Magn. Dn. D. Schœpf, Dec. 58. n. 13. add. Dn. D. Lauterbach, Disp. de Confessione, th. 45. Mevius, P. 7. Dec. 154. Magnif. Dn. D. Schœpf, Decis. 33. n. 17.

§. 121.

Determina-
tur quonam
requisito de-
ficiente, plus
efficaciæ
confessionis
detrahatur,
adeoque mi-
nor vel ma-
jor probabi-
litis gra-
dus evadat?

Ponamus, deficere primum requisitum, scilicet confessionem promanasse a persona ad confitendum inhabili (a), facile patet, quo majori persona hujusmodi intellectu prædita fuit, eo majorem esse gradum probabilitatis; hinc & ea, quæ (ad §. 116.) deducta sunt, huc quadrant; Ita tamen, ut semper, deficiente

hoc

hoc requisito, confessio minorem gradum probabilitatis efficiat, quam si aliquid ex reliquis requisitis deficiat; Ponamus porro, deficere præsentiam & acceptationem adversarii, probatio saltem erit semiplena (*b*); gradus igitur heic jam ex praxi determinatus est. Quodsi jam ex aliis indiciis appareat, confessionem deliberatam fuisse, habebimus probationem semiplena majorem, & quo certius constabit de animo deliberato, eo major erit gradus probabilitatis, & tandem coincidit cum probatione plena. Sic, v. gr. si facta fuerit in loco publico, non inter privatos parietes, vel coram Notario & testibus, vel & confitens verbis animum suum serio declaraverit, erit sane probatio semiplena major. Imo, si juramento firmaverit hanc confessionem, vel ex post repetierit, coincidit cum probatione plena, nec ulterioribus adminiculis opus habebit; Satis enim hæ circumstantiæ deliberatum animum indignant (§. 119.). Hinc pro veritate juridica habenda est (*c*); Licet non paratam executionem habeat hæ confessio reiterata vel jurata (*d*). Ponamus, deficere tertium requisitum, scilicet non esse legitime probatam hancce confessionem, itidem non plene probabit, sed pro modo probationis majorem vel minorem consequetur gradum probabilitatis, adeoque majorem vel minorem fidem merebitur. Sic, v. gr. si confessio extrajudicialis probata sit per unicum testem omni exceptione majorem, posito, reliqua requisita præsto esse, probatio erit semiplena, adeoque juramento in supplementum roboranda & confirmanda; quodsi testis sit non omni exceptione major, probatio erit semiplena minor, adeoque locum habebit juramentum purgatorium (*e*). Aliquando & quædam requisita simul deficere possunt, & tum semper ad id attendendum est, *quantum robur quantamque efficaciam habitura esset confessio, si alterum horum requisitorum præsto esset, & tum tantum fidei decrescit confessioni, quantum roboris haberent hujusmodi requisita*; Semper enim in casibus magis compositis videndum est, annon tantisper per fictionem ad leviolem & simplicem reduci possint? v. gr. Ponamus deficere secundum requisitum, scilicet confessionem factam esse absente adversario, & deficere aliquid ex tertio requisito, v. gr. probatam esse hancce confessionem saltem per unicum testem, majorem sane fidem non merebitur hæ confessio, quam ut aliquam præsumptionem, sed probatione semiplena minorem, efficiat, adeoque,

uti infra Capite sequenti pluribus demonstrabitur, locum faciat juramento purgatorio (*f*). Quodsi enim plene probata esset per duos testes hæc confessio, semiplenam demum efficeret probationem; Cum vero jam & ex tertio requisito aliquid desit, scilicet, ut non legitime probata sit, minorem meretur fidem, & sic porro; sic, si v. gr. hic testis unicus non esset omni exceptione major, iterum minor foret gradus probabilitatis; si porro hic testis deponeret, talem, cum justo nimis bibisset, aliquid dixisse iterum debilior esset gradus probabilitatis &c. Sufficiat nobis normam quandam habere, secundum quam aliquo modo & comparative liceat dimetiri gradum probabilitatis hujusmodi.

- (a) Cui scil. potestas confitendi a LL. ademta est.
- (b) Licet enim multi & huic confessioni plenam probationis vim adscribant, Hahn, Ludwell, &c. magis tamen in foro recepta sententia est, hanc speciem extrajudicialis confessionis nonnisi semiplenæ probationis vim habere. B. D. Lauterbach, in Coll. tit. de Confess. cit. §. 23. & in Disp. de Confessione, th. 45 Ratio patet ex (§. 118.).
- (c) Carpzov, in Jurisprud. For. P. 1. const. 16. def. 21. Lauterbach, d. Disp. de confessione, th. 45. B. Dn. D. Harpprecht, Conf. 96. n. 25. seqq. Idem, in Conf. nov. §1. n. 117. Magn. Dn. D. Schœpf, Dec. 26. n. 2.
- (d) Recess, Deput. de anno 1600. §. wann in einer Verschreibung ic. & §. Ebener massen sollen die Confessiones &c.
- (e) Carpzov, in d. Jurisprud. For. P. 1. const. 23. def. 4. Lauterbach, in Coll. Theor. Pract. tit. de Probat. §. 8.
- (f) Magn. Dn. D. Schœpf, Dec. 33. n. 24. junct. Dec. 238. n. 5.



CAPVT III.

PARS II.

SECTIO II.

DE PROBATIONE PER TESTES.

§. 122.

Sufficiant hæc de Confessione; Prudens in Casibus obvenien-
tibus facile, &, uti speramus, non sine omni fructu, appli-
care poterit Regulas hucusque traditas. Accedimus jam ad se-
cundum probandi modum, per testes scilicet, (§. 108.) & heic,
quantum fieri poterit, gradum quendam probabilitatis assigna-
turi. Testis est persona, quæ, ad fidem de re dubia faciendam
judici, ab eodem evocatur & examinatur legitime (a). Qui de
gradu probabilitatis rite judicare vult, ex depositionibus testium
oriundo, ante omnia nosse debet requisita, quæ ad efficiendam
probationem plenam per testes necessaria sunt, ut deinde judi-
care possit, quantus sit gradus probabilitatis, uno vel altero re-
quisito deficiente. Requisite hæc vel concernunt ipsas testium
personas, eorumque dicta, vel formalia, quæ circa testium exa-
men observanda sunt (b). Hæc igitur requisita primo colligen-
da sunt brevibus, ut in conspectu habeamus veritatem juridicam,
quæ ex testimoniis testium oritur, quo facilius deinde de proba-
bilitate ejusque gradibus judicare possimus (§. 14.).

Transitus ad
secundum
probandi
modum per
testes.

(a) L. 17. C. de Testibus. Lauterbach, in Coll. Theor. Pract. tit. de Te-
stibus, §. 1.

(b) Lauterbach, in Coll. d. tit. §. 50.

§. 123.

Formalia, quæ circa instituendum testium examen, sive con-
ficiendum Rotulum, observanda sunt, sequentibus absolvuntur
maxime requisitis: primo, ut testium examen instituat a judi-
ce competente (a); secundo, ut probatio sive examen testium
fiat justo tempore, & quidem post-non ante litis contestatio-
nem, alias probatio nulla est (b); nec non articuli probatoriales
una cum denominatione testium & directorio, intra terminum
a judice ad probandum præfixum, porrigantur (c); sufficit enim,
modo nulla imputari possit culpa partibus (d). Tertio, ut articuli

Recensentur
requisita, ad
formam exa-
minis te-
stium sive
Rotuli per-
tinentia.

probatoriales adversario ad formanda, si velit, interrogatoria, communicentur (*e*). Quarto, ut partes citentur ad audiendum & videndum jurare testes (*f*). Quinto, ut testes juramento adstringantur (*g*), & sexto, ut Rotulus secundum modum in Recessu Imperii novissimo (*h*) præscriptum, vel alias prout moris est in hac vel illa regione, conscribatur (*i*).

- (a) Nov. 60. cap. 2. Gail, lib. 1. obs. 102. n. 4. B. D. Harpprecht, Resp. 71. n. 70. seqq. Magnif. Dn. D. Schœpf, Dec. 224. n. 17. & Dec. 321 n. 19. & 24.
- (b) Ante litis contestationem enim instituta probatio adeo nullum reddit examen testium, ut nequidem ullam præsumtionem operetur. Lauterbach, in Conf. Tub. Vol. 1. Conf. 23 n. 26. B. D. Harpprecht, Resp. 95. n. 101. nisi necessitas aliud exigat, vel causa sit summaria. Lauterbach, Coll. tit. de testib. §. 47. Add. Clement. Sæpe, de verb. signif.
- (c) B. D. Lauterbach, in Coll. Theor. Pract. tit. de probat. §. 39. B. D. Harpprecht, Resp. 95. n. 118. Magnif. Dn. D. Schœpf, Proc. Dicast. Würt. vet. Edit. c. 13. §. 5.
- (d) L. 24. ff. de his, quæ in fraud. cred.
- (e) Cap. 2. de Testib. in 6to. Jus Prov. Württ. P. 1. tit. 39. §. So fern nun ic. pag. 141. B. D. Harpprecht, Resp. 95. n. 100. & Conf. nov. 67. n. 19. seqq.
- (f) Auth. Sed & si quis, C. de testib. cap. 2. X. de testib. Concept. Cammer, Gerichts-Ordn. P. 3. tit. 18. §. ult. Hochfürstl. Würtemb. Hofgerichts-Ordn. P. 3. tit. 14. §. 2. J. P. Wurt. P. 1. tit. 37. §. Es sollen auch ic. pag. 136. B. D. Lauterbach, in Coll. tit. de Probat. §. 35. & Magnif. Dn. D. Schœpf, in Proc. Dicast. Württ. d. cap. 13. §. 10.
- (g) L. 9. C. de testib. B. D. Lauterbach, in Coll. tit. de Testib. §. 42. B. Dn. D. Harpprecht, Resp. 11. n. 104. & Resp. 95. n. 104. Magn. Dn. D. Schœpf, in Proc. Dicast. Wurt. d. cap. 13. §. 11. Idem, Dec. 111. n. 5. Dec. 321. n. 24. Dec. 349. n. 8. & 9. & passim alii.
- (h) Recess. Imper. noviss. de anno 1654. §. 46. Im übrigen verbleibt ic. & §. 52. B. D. Lauterbach, Coll. tit. de testib. §. 48. Magn. Dn. D. Schœpf, in Proc. Dicafter. c. 13. §. 12.
- (i) Sic Jure Wurt. in Rescr. Duc. dd. 1. Nov. 1699. Recessui huic aliquid superadditum est.

§. 124.

Omnia hæc
requisita ad
amissim ob-
servanda
sunt.

Omnia hæc requisita Rotuli (§. anteced. 123.) recensita probe observanda esse in conficiendo Rotulo Examinis Testium, & quidem ita observanda esse, ut, vel unica solennitate omissa, totus vitietur Rotulus, vel ex eo intelligitur, quia hæc requisita pro forma præscripta sunt, quæ neglecta omnia nulla redduntur, quæcunque acta sunt (*a*), adeoque, quin talis Rotulus, licet omnia in illo conspirent testimonia, nullius sit efficaciam, per se patet, in casu scilicet, ubi veritas major haberi, & defectus adhuc

huc suppleri potest; hinc hoc casu sæpe fieri solet, ut idem Rotulus nullus declaretur, & noviter secundum modum in LL. præscriptum confici jubeatur (b).

(a) Conf. B. Dn. D. Harpprecht, in Resp. 67. n. 23. & in Resp. 87. n. 85. seqq.

(b) B. Dn. D. Harpprecht, Resp. 65. n. 12. Idem, in Conf. nov. 70. n. 303. B. D. Lauterbach, in Coll. tit. de Testib. §. 48. in fin. Magn. Dn. D. Schœpf, Dec. 154. n. 7 - 10.

§. 125.

Quin igitur, si examen testium repeti queat, repeti debeat, nec prius quicquam valeat, extra dubium est; sed de hoc quæritur casu, si examen repeti amplius non possit, & Rotulus aliquo horum defectuum laboret, an tunc plane rejiciendus sit, nec omnino ad illum attendi debeat? Id, quod nemo facile affirmaverit. Cum enim finis testimoniorum sit, ut judici fides fiat de facto controverso, per definitionem testis (§. 122.), hic autem finis præcipue obtineatur per habilitatem testis & consensum ejusdem dictorum (a), & ideo saltem formalia hæc addita fuerint, ut eo major certitudinis gradus obtineretur; procul dubio, si finis nihilominus vel in totum vel in tantum obtentus sit, licet neglectis, sed non propria partium culpa (b), formalibus, omnino aut plenæ probationis effectus, aut aliqualis saltem gradus probabilitatis, præsto erit (c).

Si examen repeti nequeat, omnino non plane nullius roboris est Rotulus, licet unum vel alterum horum requisitorum deficiat.

(a) Clar. Kahl, in laud. Elem. Log. Probab. sect. 3. c. 1. §. 212. p. 201.

(b) Ubi enim propria concutrit partium culpa, omnino sibi imputare debent damnum inde emergens; damnum enim, quod quis sua culpa sentit, sentire haud videtur; per L. 203. ff. de R. J. sic, v. gr. si probatio fuerit decreta, & ad finem perducta, & Rotulus semel fuerit publicatus, non amplius admittuntur testes super iisdem articulis vel contrariis. Brunemann, in Proc. Civ. cap. 20. n. 80. seqq. Lauterbach, Conf. Tub. Vol. 1. Conf. 97. n. 2. Ratio hæc est, quia sibi imputare debet pars, quæ scivit testes, quos potuisset nominare, nec illos examinari petiit, hinc hoc casu, licet ex post de facto ultiores testes examinati sint, horum testimonium nullius fore momenti, certum est, nisi novi testes demum reperiantur, quos antea pars ignoravit; hoc enim casu, æque ac in casu, si reperta sint instrumenta nova, restitutionem in integrum locum habere constat. B. D. Lauterb. in Coll. Theor. Pract. tit. de re judicat. §. 26. B. D. Harpprecht, Conf. 7. n. 380. 381. sq. modo concurrant requisita restitutionis in integrum, recensita a Lauterbachio, cit. loc. Porro non audiendam esse partem post lapsum termini probatorii testes producere volentem, vel ex eo patet, quia omnis terminus probatorius est peremptorius, adeoque hoc effluxu partis culpa, alteri parti jamjam est jus quæsitum, quod ipsi invito nec a judice auferri potest, nisi adsint iustæ causæ restitutionis in integrum. Magnif. Dn. D. Schœpf, in Proc. Dicat. Wurt. vet.

vet. Edit. c. 13. §. 4. vel probatio a Iudice Superiori in secunda vel ulteriori instantia decernatur; B. D. Harpprecht, Conf. nov. 57. n. 100. Mevius, P. 2. Dec. 235. Magnif. Dn. D. Schœpf, in d. Proc. Dicast. Wurt. c. 13. §. 5. quia scilicet per interpositam appellationem causa redigitur in statum, in quo fuit tempore litis contestationis, arg. L. 13. C. de Procur. Lauterbach, in Coll. tit. Nihil innovari appellat. interpos. §. 6.

(c) Non enim plane infirmari hisce in casibus testimonia, licet unum vel alterum requisitorum supra recensitorum deficiat, omnes fere DDres unanimi consensu affirmant. Sic, quod v. gr. omissa citatio ad audiendum & videndum testes jurare, omnino non prorsus infirmet examen testium, affirmant Mascardus, de probat. vol. 2. concl. 683. n. 8. & 22. & B. Dn. D. Gräfs, in Conf. Tub. vol. 5. Conf. 65. n. 66. Porro, quod & testes injurati adhuc indicium quoddam faciant, Magnif. Dn. D. Schœpf, Dec. 210. n. 8. & 9. imo quandoque unicus injuratus testis, si nimirum de proprio facto testimonium perhibeat, & insimul honestæ & probatæ vitæ ac mortuus sit, plene probet, docet B. Dn. D. Harpprecht, in Resp. 11. n. 124. seqq. præsertim & injuratos admitti testes in casu, si juramentum exigere facile non potuerit, propugnat Idem B. Dn. D. Harpprecht, in Conf. nov. 27. n. 109.

§. 126.

Deficiente igitur uno vel altero requisito, remanet Rotulo gradus quidam probabilitatis.

Ubi igitur præsto sunt dicta requisita, positis terminis habilibus, quod scilicet materialia probationis,abilitas quippe testium, eorumque dicta insimul recte sese habeant, adest certitudo vel veritas juridica, adeoque ex Rotulo probatur plene id, quod probandum erat (§. 123. junct. §. 116.). Ubi autem deficit unum vel alterum requisitorum formalium, deficit etiam aliquod requisitum ad veritatem, adeoque præsto est probabilitas juridica (§. 27.), & hujusmodi defectus, modo scilicet, per modo dicta, materialia recte sese habeant, omnino non omnem probandi vim Rotulo adimit, sed remanet certus gradus probabilitatis, qui in judicando aliquem adhuc effectum producit (§. 125. & ib. not. c.). De hoc jam gradu nobis erit dispiciendum, & hinc paucis ob oculos nobis ponemus hæc requisita, iisdemque cum fine probationis collatis, dispiciemus, quonam deficiente major adhuc relinquatur gradus probabilitatis, quam deficiente altero.

§. 127.

Regula pro-
dijudicanda
gravitate
Rotuli, uno
vel altero
requisito
deficiente.

Finis omnino omnis probationis est, ut veritas eruatur (a), hinc & sine dubio probationis per testes; id, quod vel ex sola testis definitione apparet (§. 122.), unde statim pronò alveo fluit regula: *Quo magis fini probationis, scilicet investigationi veritatis, inservit tale requisitum, eo minor est gradus probabilitatis, si illud deficiat.*

deficiat. Hinc jam cum hac regula singula conferemus requisita, supra (§. 123.) tradita.

(d) B. D. Lauterbach, in Coll. Theor. Pract. tit. de Probat. §. 30. junct. L. 12. in fin. ff. de Probat.

§. 128.

Primum requisitum, quod supra (§. 123.) exhibuimus, fuit, ut Examen a Judice competente decerneretur & perficeretur; hinc quæritur: Quemnam effectum producat Rotulus non a Judice competente confectus? Heic duo considerandi sunt casus, nostro judicio: *Aut enim Rotulus ab alio Judice fuit confectus, qui tamen non fuit competens, aut a privato quodam, posito tamen, reliqua requisita in conficiendo Rotulo observata fuisse.* *Primo casu* gradum probabilitatis ex hoc Rotulo oriundum omnino *proxime accedere putem ad certitudinem plenam (a)*, adeoque talem Rotulum a Judice, licet non competente confectum, nihil fere differre a plena probatione, quæ ex Rotulo a Judice competente confecto oritur (b). Ratio hæc est: Requiritur ideo, ut examen testium a Judice competente suscipiatur, ne locus sit fraudibus circa conscribenda dicta testium eorumque testimonia; hinc contra Rotulum a privato conscriptum militat præsumptio non minima, in illo non accurate & adhibita omni fide & diligentia notata esse testium dicta. Cum vero hæc præsumptio maximam partem excludatur per præsentiam Judicis, licet non competentis, quia scilicet hic est persona publica, juramento adstricta; omnino cadit & ratio principalis, cur tali Rotulo fides non haberi debeat (c)? Secus res sese habet in casu, *si privatus quidam testes examinaverit.* Cum enim hoc casu omnis fides Rotuli nitatur proprie unico testimonio illius privati, quod scilicet testes hoc vel illo modo testimonium perbihuerint; *omnino talis Rotulus non majorem fidem habere poterit, quam testimonium scriptum, injuratum, unius testis, adeoque nonnisi levissimam efficiet præsumptionem (d).* Sed quæritur jam, quid dicendum sit de casu, si testes a Notatio publico fuerint examinati? Et heic iterum diversos casus distinguendos esse existimo; Aut enim Notarius *solus, non adhibitis testibus consuetis,* examinavit testes, & *omnino non multum tribui poterit examini.* Licet enim Notarius quoque sit publica persona, juramento adstricta; non tamen ejusdem authoritatis est cum iudice, nec ad hujusmodi negotia judicialia constitutus est, adeoque, licet paulo majorem fortasse fidem mereatur hujusmodi examen, quam

Quid, si Rotulus non a Judice competente confectus sit?

a persona plane privata susceptum (e), *non tamen plus, quam levem quandam præsumptionem efficiet.* Ratio est in promptu; Notario enim, nisi adhibuerit testes consuetos, proprie non plene creditur, & quod Notarius facit sine testibus, non multo maiorem fidem habet, quam negotium a privato gestum (f). Aut *adhibuit testes, & prope accedet gradus probabilitatis ex tali Rotulo oriundus ad gradum illum, quem producit Rotulus a Judice incompetente confectus.*

(a) Hinc præsertim in casu, si ob periculum in mora, vel alium casum, Judex competens examinare testes nequeat, examen hoc & a Judice incompetente & loci, ubicunque deprehenduntur testes, fieri potest, ne scilicet probationes pereant. Farinacius, Tract. de Test. quæst. 76. B. D. Lauterbach, in Conf. Tub. vol. I. Conf. 17. n. 120.

(b) Hinc hoc casu etiam extra necessitatis casum, concurrentibus præsertim aliis quibusdam adminiculis, plenam fidem hujusmodi Rotulo adscribere minime dubitarem, hisce autem deficientibus ad summum suppletorium iuramentum decernerem.

(c) Dantur tamen & heic iterum gradus probabilitatis; maiorem enim fidemtribuendum esse examini a Judice, de cujus competentia forte dubitatur, quam alii, a notorie incompetente, suscepto, nemo sane dubitabit; imo quandoque, si judicis competentia sit dubia, & partes itidem in persuasione fuerint, judicem esse competentem, sine omni adminiculo, positis scilicet reliquis terminis habilibus, hujusmodi Examini Testium plenam fidem tribuere non dubitarem. Ex anal. L. Barbarius Philippus. 3. ff. de Officio Prætoris.

(d) Quæstio enim, an testes ita deposuerint, nec aliter? nititur unius illius privati injurati, qui testimonia conscripsit, fide, adeoque maiorem efficaciam hujusmodi Rotulus habere nequit, quam testimonium scriptum non juratum, unius testis, scil. levissimæ præsumptionis effectum producit; alias plus esset in effectu, quam in causa. B. Dn. D. Lauterbach, Disp. de Epistola, th. 29. Magnif. Dn. D. Schœpf, Dec. 321. n. 24.

(e) Confer. Celeberr. Leyser, Med. ad ff. spec. 283. n. 36.

(f) Constit. Imper. de anno 1512. von Notarien, §. fürter, so befehlen wir ic. verb: Es müssen die Zeugen darzu genommen, und derer aller Nahmen und Sunamen flärlich beschriben werden. Hinc illis vulgo objicitur, quod sine testibus nullam habeant fidem. B. D. Lauterbach, in Coll. tit. de fide Instrum. §. 40.

§. 129.

Quid, si non
iusto tempo-
re confectus
sit Rotulus?

Progredimur ad secundum Requisitum Rotuli, tempus scilicet, intra quod Rotulus conficiendus est, indagaturi, an vel qualis gradus probabilitatis remaneat, tempore non observato? Tempus hoc aut consideratur tanquam terminus *a quo*, aut tanquam terminus *ad quem*; terminus *a quo* est a tempore Litis Contestatio-

testationis; hinc ante Litis Contestationem Rotulus confici nequit, alias Rotulus adeo nullus est, ut ne quidem præsumtionem quandam efficiat (a). Ratio hæc est, quia ante Litis Contestationem sciri nequit, an adversarius aliquid sit negaturus, aut quid sit negaturus, quid affirmaturus (b)? Quin igitur, si examen repeti possit, illud repetendum sit, & examen ante Litis Contestationem confectum plane nullius roboris sit, nullum dubium est (§. 125.); sed alia quæstio est de casu, si examen testium repeti nequeat, & interim facultas probandi plane adempta sit, an nimirum nec tunc hujusmodi Rotulus quicquam probet, sed, licet testes, ante Litis Contestationem examinati, unanimiter pro producente deposuerint, & reliqua Rotuli Requisita recte sese habeant, nihilominus contra talem pronunciari debeat simpliciter, æque, ac si nihil plane probasset? id, quod affirmare nollem, & quidem ex hac ratione: quia finis probationis nihilominus obtentus est, scilicet de veritate facti Judex certior redditus est, æque, ac si hoc examen post Litis Contestationem demum susceptum esset; nulla etenim ratio apparet, cur testes ante Litis Contestationem examinati minus veritatem dixerint, quam post Litis Contestationem examinati? adeoque, cum omnino Judici de facti veritate liqueat, perquam grave esset, aliquem ex hac sola ratione condemnare, quia examen testium ante Litis Contestationem susceptum fuit, adeoque producens saltem nimis assiduum in probando sese exhibuit. Hinc omnino *thesin illam, ceteroquin probe cognitam, quod tale examen testium nihil probet, ad illum casum restringendum esse putem, quando scilicet examen testium adhuc repeti potest*; cum semper illa sententia sit adoptanda, quæ minimum gravis est partibus (c). Id, quod vel ex eo patet, quia in casu necessitatis, vel & in causis summariis, hujusmodi examen adeo validum est, ut ne quidem repetitione quadam opus sit (§. 123. not. b.), quod & ex examine testium ad perpetuam rei memoriam suscepto, apparet (d). Quodsi igitur tali casu plene probat hujusmodi Rotulus, nimis durum sane foret, extra hos casus, si examen repeti amplius nequeat, plane nullam eidem vim adscribere.

(a) B. D. Lauterbach, in Conf. Tub. vol. I. Conf. 23. n. 26. & B. Dn. D. Harpprecht, Resp. 95. n. 101. seqq.

(b) B. D. Lauterbach, in Coll. Theor. Pract. tit. de probat. §. 36.

(c) Arg. L. 34. ff. de Reg. Jur.

(d) Carpzov, Jurispr. for. P. 1. Const. 16. Def. 35. & 36. Rutg. Rulandus, de Commissar. P. 2. L. 1. per tot. Requiritur tamen, ut, si actio nondum sit instituta, actor intra annum utilem agat, a tempore confecti Rotuli, alias cadit probationibus suis, & contra se habet præsumptionem juris & de jure, contra quam nulla amplius admittitur probatio. Gail, lib. 1. obs. 92. n. 3. & 4. Alciatus, de præsumt. in princip. p. 2. n. 15.

§. 130.

Quid, si ante
Litis Conte-
stationem,
extra neces-
sitatis casum,
Rotulus con-
fectus sit?

Cum igitur non omnino omni destituatur vi hujusmodi Rotulus Examinis Testium, quæritur jam, quanta ipsi, in casu modo recensito, vis adscribenda sit, si scil. ante Litis Contestationem confectus sit, & adhuc intra annum actor egerit, vel plane post libellum jamjam editum Examen Testium susceptum sit? In decidendâ hacce quæstione respiciendum est ad finem probationis, adtendendo scilicet ad id, in quantum adhuc obtineri possit idem finis, licet Rotulus ante Litis Contestationem confectus sit? Finis est, ut Judex de veritate facti certior reddatur (§. 127.). Atqui vero nulla est ratio, cur testes post Litis Contestationem potius veritatem dicant, quam ante illam (§. 129.), sed ratio, cur regulariter testes post Litis Contestationem examinari debeant, hæc est, ut sciatur, quid adversarius affirmaturus sit, vel negaturus (§. 129. not. b.), quæ ratio in ipsam testimoniorum veritatem vel falsitatem plane nullum habet influxum, licet enim hoc casu aliquando fieri possit, ut superflua probentur, superflua tamen non nocent veritati, verum illam potius magis confirmant atque corroborant; Ergo omnino itidem proxime accedit ad ipsam veritatem gradus probabilitatis ex tali Rotulo oriundus, & major adhuc, meo judicio, erit, quam ille, qui ex Rotulo, a judice incompetente confecto, suboritur; Ratio hæc est: quia judicis competentia cum fine probationis majorem habet connexionem, quam tempus hoc, num ante vel post Litis Contestationem Rotulus confectus sit; judici enim competenti fit probatio, adeoque ejus est ponderare, quid probatum sit, nec ne (a)? ac judicis competentia omnem fraudis suspicionem excludit (§. 128.).

(a) L. 3. §. 2 ff. de testibus.

§. 131.

Quid, si post
terminum
probato-
rium?

Jam & dispiciendum est de termino probationis ad quem, sive altero membro requisiti secundi. Hic terminus ad quem nullibi regulariter determinatus est, sed dependet ab arbitrio judicis (a); ut plurimum autem est 4. vel 6. septimanarum (b)

pro

pro gravitate causarum, atque adeo præclusivus & peremptorius est, ut illo præterlapso etiam jus probandi ipso jure cadat (c), adeoque probatio post terminum probatorium suscepta, sit ipso jure nulla, nec propter renunciationem probationis tacitam aliquid operetur, nisi adsint justæ causæ ad restitutionem in integrum decernendam (d). Cum igitur, præterlapso, culpa partitis, termino probatorio, illa ipso jure beneficio probandi cadat, quin *talis Rotulus, propter jus, adversario ex tacita hac renunciatione jamjam quæsitum, plane nullum amplius robur habeat, extra dubium est, adeoque nullum plane effectum producit, nec minimam gignit præsumptionem, ob militantem in contrarium præsumptionem juris & de jure; hinc & hoc casu de determinando aliquo gradu probabilitatis sermo esse nequit (e).*

- (a) L. I. L. 7. C. de dilat. B. Dn. D. Lauterbach, in Coll. Theor. Pract. tit. de probat. §. 40.
 (b) B. D. Lauterbach, in Coll. d. l. & Magnif. Dn. D. Schœpf, Proc. Dicast. Würt. vet. Edit. c. 13. §. 4. add. Jus Prov. Württ. P. I. tit. 32. §. Und wann ic. p. 127. & P. I. tit. 42. §. Wann nach ic. p. 145. & §. Und wann ic. p. 146. Ord. Dicast. Wurt. P. 3. tit. 11. §. 4.
 (c) L. I. C. de dilat. B. D. Lauterbach, in Coll. tit. de probat. §. 39. Magnif. Dn. D. Schœpf, in Proc. Dicast. Württ. d. l. Gail, lib. 1. obs. 91. Stryk, Uf. mod. tit. de fer. & dilat. §. 19. add. Jus Prov. Württ. P. I, tit. 21. §. Welcher aber ic. p. 106.
 (d) B. Dn. D. Lauterb. in Coll. d. l. §. 39. B. Dn. D. Harpprecht, Conf. 27. n. 207. & Conf. nov. 69. n. 26. sqq. Magnif. Dn. D. Schœpf, in Proc. Dicast. Wurtemb. d. l.
 (e) Licet in secunda Instantia hoc casu de novo possit decerni probatio. (vid. §. 125. not. b.) add. Dn. Stryk, in Disp. de Reprob. post didicit Attestat. c. 2. §. 13.

§. 132.

Tertium Rotuli rite confecti vel conficiendi requisitum est, ut articuli probatoriales adversario ad interrogandum, si velit, sint communicati. Articuli probatoriales ideo adversario, ad formandum, si velit, interrogatoria, communicandi sunt, ut ipsi occasio præbeatur, ea, quæ defensioni inserviunt inferendi, & quæ forte in articulis nimis generaliter posita sunt, specialius determinandi, ut inde veritas magis eruatur (a). Cum igitur multum ad veritatem eruendam, tanquam finem omnis probationis (§. 127.), conferant interrogatoria specialia, omnino horum interrogatoriorum ommissio non parum detrahit probabilitati Rotuli (d. §. 127.) Sed quæritur jam, quantus sit hujus

Quid, si articuli ad interrogandum non sint communicati?

probabilitatis gradus, intuitu requisitorum haecenus enumeratorum? & Resp. *omnino omissio horum interrogatoriorum specialium plus detrahit valori Rotuli, quam omissio duorum priorum requisitorum, scil. si examen testium vel ante Litis Contestationem, vel a iudice non competente susceptum sit, & sequentis Requisiti quarti, ubi Rotulus Examinis Testium non citata parte adversa confectus esse supponitur; ratio est in promptu, quia, per demonstrata, & in §. 133. ulterius demonstranda, exhibitio interrogatoriorum plus inservit fini probationis, quam requisita modo recensita. Quia tamen nihilominus, si articuli per se sint clari, ipsi veritati depositionum non adeo multum probabilitatis detrahitur, & veritas quandoque erui potest, licet interrogatoria plane omissa sint, (b) imo Commissarius, si testes obscure vel nimis generaliter deponant, ex officio interrogatoria supplere potest, (c) nihilominus adhuc hanc probabilitatem superare arbitramur probationem semiplenam; adeoque semiplena maiorem nihilominus præsto esse probationem existimamus. (d)*

(a) Gail, lib. I. obs. 95. Plebst, ad Jus Prov. Württ. P. I. th. 106. I. P. W. P. I. tit. 39. §. 8. Es sollen auch p. 141. verb. sondern allein dasjenige, so zum Handel dienlich, darein zu bringen.

(b) Quia enim si pars noluerit formare interrogatoria, Rotulus nihilominus plene probet, extra dubium est, Magnif. Dn. D. Schöpf, in Proc. Dicast. Württemb. c. 13. §. 8. I. P. W. P. I. tit. 39. §. und obgleich x. p. 141. Ord. Dic. Württ. P. 3. tit. 14. §. 4. B. Dn. D. Harpprecht, Conf. nov. 67. n. 21. §§.

(c) C. 37. X. de test. I. P. W. P. I. tit. 39. §. Darnach. p. 142. Magnif. Dn. D. Schöpf, in Proc. Dicast. Württemb. d. I. §. 8.

(d) Cum enim, si pars sponte renunciaverit interrogatoriis, plena fides Rotulo tribuatur, (vid. supr. not. b) & quidem ideo, quia ex solis articulis factum clarum reddi potest, nullam video rationem, cur non, omissis interrogatoriis, si veritas facti ex Articulis pateat, ad minimum talis Rotulus plus quam semiplene probet? hoc enim casu cessat finis principalis interrogatoriorum. Quia autem nihilominus de eo non semper certo constat, quid contigisset, si interrogatoria formata essent, quin omissio communicationis articulorum ad interrogandum NB. in se plus deroget fini probationis, quam requisita modo recensita, adeoque, quin omissio hujus Requisiti plus detrahat, probabilitati Rotuli, quam omissio illorum, per se patet.

§. 133.

Quid, si partes non sint citatae ad audiendum & videndum jurare testes legitime sint citatae. Ponamus, hoc deficere requisitum, quinam adhuc supererit gradus

Sequitur jam quartum Requisite Rotuli, scilicet, ut partes ad videndum & audiendum jurare testes legitime sint citatae. Ponamus, hoc deficere requisitum, quinam adhuc supererit gradus

gradus probabilitatis? quod enim non plane nihil probet, passim DD. asseverant. (a) Hoc ex collatione requisiti, cum fine probationis, facile erit intellectu. Cum enim hoc requisitum ideo præscriptum sit a LL, ut partes videant, quomodo testes sese gerant, an suspectos sese aliquo modo reddant, nec ne? facile patet, omnino nonnihil facere hoc requisitum ad finem probationis, veritatem scilicet eruendam. Cum tamen nihilominus hoc officium etiam partibus absentibus Commissario incumbat, (b) adeoque parum mali partibus inde metuendum sit, nec non partibus licet non comparentibus iudex vel Commissarius nihilominus in causa progredi possit (c); facile patet, *non multum derogari veritati ex Rotulo oriundæ, per defectum hujus Requisiti, adeoque remanere magnum gradum probabilitatis, & majorem esse gradum probabilitatis hoc casu, quam priori illo, quo Rotulus a iudice incompetente confectus supposebatur, at minorem, quam casu illo, ubi ante Litis contestationem saltem confectus supposebatur Rotulus.* Ratio est in promptu; plus enim facit ad eruendam veritatem & fidem Rotulo habendam præsentia Judicis competentis, quæ quippe omnem excludit fraudis suspicionem, quam citatio partium, quæ quippe in se parum fidei Rotuli addit, cum Judici vel Commissario incumbat & attendere ad id, an testes suspectos sese reddiderint, nec ne? (d) cum vero citatio partium nihilominus aliquando aliquali sese utilitate commendare possit, e contrario autem, si testes ante Litis contestationem examinati sint, plane intuitu veritatis eruendæ nihil intersit, quia, per supra demonstrata, nulla plane subest ratio, cur testes ante Litis-contestationem, veritatem minus dicant, quam post illam, adeoque ex omisso hoc requisito fidei Rotuli plane nihil detratur; omnino, in casu omissæ citationis hujus, minor præsto erit gradus probabilitatis, quam in casu, ubi Examen testium ante Litis Contestationem confectum erat. (§. 127.)

(a) Mascardus, de probat. vol. 2. Concl. 683. n. 8. & 22. B. Dn. D. Grass, in Consil. Tubing. vol. V. Cons. 65. n. 66.

(b) Ord. Crim. Carol. V. art. 71. verb. Ob der Zeug wackelmüthig oder unbeständig erfunden, wie er den Zeugen in äußerlichen Gebärden vermerckt ic. I. P. W. P. I. tit. 37. §. Sodann ic. p. 138. verb. Folgendß solche Aussag, auch wie sie beschehen, (mit Anzeig der Gebärden, so sich ein Zeug argwöhnisch verhalten) umständlich durch den Commissarium dem Rotul gebührllich inserirt ic. Struv. Exerc. 28. th. 45. B. Dn. D. Lauterbach, in Coll. Theor. Pract. tit. de test. §. 48.

(c) Ci-

(c) Citatio enim hæc est peremptoria & præclusiva, Ayth. sed & si quis, C. de test. verb. „ Quodsi venire noluerit, etiam eo absente, attestaciones recipiat, & perinde valebunt, ac si eo præsentē receptæ fuissent, nec opposere poterit: quod ex una parte datæ sunt. „ C. 2. X. de test. & attestacion. J. P. W. P. I. tit 38. §. 63 sollen auch 11. p. 136. & Ord. Dicaster. Wurt. P. 3. tit. 14. §. 2.

(d) At, inquis, ex omiſſa citatione oritur præſumptio m. f. contra Judicem vel Commissarium, adeoque idem est, ac si a Judice suspecto examen susceptum esset, cur igitur plus roboris habeat Rotulus a Judice non competente, sed nullatenus suspecto, confectus? sed Resp. suspicio hæc est levissima & generalissima, adeoque ex hac sola omiſſione Judex nondum pro suspecto haberi potest; eliditur enim hæc suspicio per contrariam juris præſumptionem, quod quilibet (multo magis igitur Judex, vel ab illo constitutus Commissarius) tamdiu pro bono habendus sit, donec probetur contrarium, & quidem hoc casu evidentissime. Ill. Thomafius, Disp. de præſumpt. bonit.

§. 134.

Licet deficient requirita 4. hucusque recensita, Rotulus nihilominus adhuc semiplene probat.

Semiplena probatio præſto eſſe dicitur, quando dimidia pars eorum, quæ ad plenam veritatem juridicam constituendam requiruntur, præſto est, altera vero dimidia pars requisitorum deficit; id, quod vel ex ipſo vocabulo semiplenæ probationis intelligitur. Sic v. gr. semiplene probasse dicitur ille, qui assertum suum per testem unicum, omni tamen exceptione majorem, probavit (a). Cur? quia duo testes omni exceptione majores constituunt veritatem juridicam plenam, adeoque hoc casu dimidia pars requisitorum ad veritatem plenam præſto est, altera autem pars deficit. Quod, cum ita sese habeat, intelligitur, *non obstante defectu quatuor requisitorum hætenus recensitorum, Rotulum nihilominus semper plus, quam semiplene, probare*; Ratio est in promptu; nullum enim requisitorum hætenus recensitorum influit per se in ipsa requisita veritatis testimoniorum, & materialia probationis, quippe quæ, licet omiſſis singulis hisce requisitis, nihilominus recte sese habere possunt; formalia enim saltem ad adjuvanda materialia inventa sunt, adeoque nec eorum defectus tantum operari potest, ut dimidium fidei detrahatur hujusmodi Rotulo. Secus res sese habet, deficiente Requisito quinto, mox explicando.

(a) Carpzov, in Jurisprud. for. P. I. Const. 23. Def. 4. Mevius, P. VII. Dec. 41. n. 2. B. D. Lauterbach, in Coll. Theor. Pract. tit. de probat. §. 8.

§. 135.

Quintum Rotuli bene constituti requisitum, supra (§. 123.) recensitum est, ut testes sint juramento de dicenda veritate adstricti. Quæritur igitur, quanta Rotulo, omisso hoc requisito, relinquatur probabilitas? Juramentum testes ideo præstant, ut plus ponderis testimonia illorum accipiant (*a*); facit igitur juramentum testium quam maxime ad finem probationis, ut nimirum veritas facti eruatur (§. 127.); quin igitur, hoc Requisito omisso, omnino probabilitas Rotuli admodum exigua sit, per se patet (§. 127.). Cum igitur aliquo modo gradus hujus probabilitatis ad minimum comparative nobis assignandus sit, determinandum nobis erit aliquatenus, quantum fidei, omisso hoc juramento, detrahatur Rotulo? Inter 100. testes vix unus alterve perfidus erit, teste experientia; summa enim hæc est turpitudine, quæ sine summa ratione a nemine est præsumenda (§. 67.), adeoque juratum testimonium ad injuratum, valore externo & juridico, ad minimum sese habet ut 100. ad 1. (*b*). Jam vero unius testis, licet jurati, testimonium saltem efficit probationem semiplenam (§. 134. not. *a*.), adeoque ad constituendam semiplenam probationem ad minimum requirerentur 100. testes injurati; cum vero vix ac ne vix quidem in casibus obvenientibus tantus numerus, & ne quidem dimidia illorum pars, haberi possit, facile patet, *hujusmodi testimonia injurata*, licet plura, vix *minimam efficere præsumtiunculam* (*c*), quæ tamen iterum, pro gravitate & probitate testium eorumque consensu, modo augetur, modo diminuitur, pro ratione scil. circumstantiarum individualium in casibus propositis obviarum (*d*).

Quantus gradus probabilitatis Rotulo relinquatur, si testes non sint juramento adstricti?

(*a*) L. 9. C. de testib. ad hanc Gothofredus, in notis, n. 16. Lauterbach, in Coll. Theor. Pract. tit. de test. §. 48. quo & facit formula juramenti Concept. Cammer-Verichts-Ordn. P. 1. tit. 95. & Hochfürstl. Würtemb. Bau-Ordn. p. 17.

(*b*) Conf. Clariss. Kahl, in laud. Elem. Log. Probab. sect. 3. c. 1. §. 223. p. m. 206.

(*c*) Lauterbach, in Consil. Tubingens. Vol. 1. Cons. 132. n. 50. Farinacius, Tract. de Test. quæst. 74. Magnif. Dn. D. Schæpf, Decis. 224. n. 16. seqq. juncto inprimis n. 26. B. Dn. D. Harpprecht, Cons. nov. 27. n. 111.

(*d*) B. Dn. D. Harpprecht, Resp. 11. n. 124. imo, si hanc suam depositionem testis moribundus morte confirmaverit, perinde quandoque habetur, ac si actu jurasset; add. Dn. Stryk, in Diss. de morte loco jurisjur. per tot. præsertim & c. 1. §. 5. Inter centenos enim nemo, qui morti proximus est, adeo immemor æternæ salutis censetur, ut adhuc in extremo vitæ articulo

judici mentiri velit; Dantur etiam gradus probabilitatis, ut aliquando depositiones testium in juratorum proxime accedant ad probationem, sive plenam, sive semiplenam. Sic, v. gr. licet juramentum testis debeat esse corporale & solenne; quid sit corporale & solenne, vid. Excell. Dn. D. Christoph. Frid. Harpprechti, affinis nostri atque Præceptoris, æternum pie colendi, Diss. de jurejur. in script. præstito, quam Dissertationem nobis sub Præsidio Viri Excellent. defendere licuit, §. 10. Nihilominus, si v. gr. juramentum fuerit verum, licet non corporale & solenne, magnum gradum probabilitatis Rotulus accipiet, & proximæ hujusmodi depositiones erunt veritati juridicæ; ponamus vero saltem, testimonia mediante tactu baculi judicialis esse corroborata, minor erit gradus probabilitatis, in se tamen parum aberit a priori casu, cum omnino tactus baculi judicialis fiat loco juramenti, atque essentia juramenti illi competat; Lauterbach, in Coll. Theor. Pract. tit. de jurejur. §. 16. B. Dn. D. Harpprecht, in Diss. de Transact. jurata, §. 8. n. 19. Ponamus, sub aliis execrationibus fieri depositiones testium, minor erit gradus, quam prior, & ne ad semiplenam quidem accedet probationem, quia essentia juramenti deficit, sed major tamen erit, quam si simplex plane fuerit depositio; & sic porro.

§. 136.

Quid, si Rotulus non secundum formam in Re-cessu Imp. nov. præscriptam conditus sit?

Sextum denique Requisitum, ad quod in Rotulo rite formando attendendum est, consistit in eo; ut Rotulus secundum Recessum Imperii novissimum, vel & secundum statuta locorum particularia, conditus sit (§. 123.); Cum vero partim forma Rotuli externa saltem ideo præscripta sit, ut Judex vel Referens melius in conspectu habeat totam materiam probandam (a), adeoque illa omissa ne tantillum quidem veritati facti derogetur, partim vero hoc requisitum semper, sive a priori, sive ab alio Commissario, manentibus testimoniis, repeti possit & debeat (b); heic plane non de determinando aliquo gradu probabilitatis sermo est.

(a) Magnif. Dn. D. Schœpf, in Process. Dicaster. Wurt. vet. edit. c. 13. §. 12. p. m. 122. seq.

(b) Gail, lib. 1. obs. 134. n. 14 seq. B. Dn. D. Lauterbach, in Coll. Theor. Pract. tit. de test. §. 48.

§. 137.

Recensentur gradus probabilitatis, ordine, quo sese invicem excipiunt,

Quodsi itaque gradus probabilitatis, Rotulo remanentes, deficiente uno vel altero Requisito, ordine quodam locandi essent, ordo foret sequens: 1.) maxima sese probabilitate commendat Rotulus, qui ante Litis Contestationem confectus est (§. 130.), hunc sequitur 2.) ille, in quo citatio partium ad audiendum & videndum jurare testes omissa est (§. 133.); quem excipit 3.) ille, qui a judice non competente, (sed NB. non a privato quodam, vel & Notario)

conditus

conditus est (§. 128.); & 4.) denique sequitur ille, in quo articuli parti adversæ, ad dandum interrogatoria, non fuerunt communicati; (§. 132.) & in hisce quatuor casibus, modo recensitis, probabilitas semper major est semiplena probatione (§. 134.); Quintum requisitum si deficiat, Rotulus levissimam saltem operatur præsumtiunculam (§. 135.), quæ vix adtendi meretur, & ultimum Requisitum heic plane non venit in computum (§. 136.).

§. 138.

Tantum de Forma Rotuli, accedimus jam etiam ad ejusdem materiam, quæ in eo consistit, ut Rotuli contenta factò respondeant ejusque veritati. Ut de veritate facti rite constet, requiritur, *ut testes non solum veritatem dicere potuerint, sed etiam voluerint*; hæc duo, si præsto sint, etiam materialia Rotuli recte sese habent (a); veritatem iterum testes dicere non potuerunt, α) vel propter qualitatem personarum, quia scilicet hæc vel illa res plane non in sensus testium incidere potuit, vel quia, licet sensu factum testis perceperit, intellectus ipsi ad testimonium ferendum deficit, vel β) propter qualitatem causæ ipsius, quia hæc vel illa persona factò huic vel illi non interfuit, nec illud sensibus suis percipere potuit. Secundum requisitum veritatis, ut scil. testes veritatem etiam dicere voluerint, iterum *vel colligitur ex circumstantiis generalibus pluribus factis communibus, vel ex circumstantiis facti specialioribus & individuis*; v. gr. si depositiones sint contrariæ, vacillantes &c. & sub hisce divisionibus comprehenduntur omnes testium defectus & nævi.

Fit transitus
a Rotuli forma
ad ejus
materiam.

(a) Clariss. Kahlius, in Elem. Log. Prob. sect. 3. c. 1. §. 216. & 217.

§. 119.

Testis qui uno vel altero nævo, ex modo recensitis, laborat, dicitur *inhabilis* (a).

Quid sit testis inhabilis?

(a) B. D. Lauterbach, in Coll. Theor. Pract. tit. de Test. §. 11.

§. 140.

Inhabiles vel ita absolute rejiciuntur, ut ne quidem præsumtionem quandam efficiant, vel ita, ut quidem regulariter non idonei sint, verum tamen aliquam præsumtionem constituent; & hi etiam aliquando audiunt *non omni exceptione majores*.

Inhabiles sunt vel absolute, vel secundum quid, & hi audiunt non o.e. majores.

§. 141.

Quinam sint
absolute in-
habiles?

Hisce præmissis, progredimur ad ipsa testium requisita; quorum primum in in eo posuimus, ut veritatem dicere potuerint; Testes veritatem dicere non possunt, vel α) quia per se propter qualitatem personæ tale factum in eorum sive intellectum sive sensum non cadit, vel quia β) ex qualitate hujus vel illius facti specialis hoc fieri non potuit (§. 138.); *Qui prorsus nihil de facto sive intelligere, sive sensibus percipere potuerunt, sive mediate, sive immediate, plane sunt inhabiles, nec ullam faciunt præsumtionem*; adeoque hoc casu neque de gradu probabilitatis, sive præsumptionis, quicquam determinari potest. Ratio est in promptu: Finis probationis est, ut veritas facti eruatur (§. 127.); Quicumque testes veritatem dicere omnino nullo modo possunt, illi nec fini probationis, neque in tantum, neque in totum, satisfacere possunt, qui autem fini probationis plane nullo modo satisfacere possunt, neque in tantum, neque in totum, illi nec in tantum, nec in totum, aliquid probare possunt, vel, quod tantundem est, illi neque ullam præsumtionem efficiunt; alias enim plus foret in effectu, quam in causa, quod est absurdum.

§. 142.

Recensentur
species absolute inhabi-
lium.

Illi igitur, qui plane veritatem dicere nequeunt, nec adeoque præsumtionem quandam efficere possunt (§. 141.), sunt 1.) *Furiosi & mente capti*, nisi habeant intervalla dilucida (a); quo & referuntur summe ebrii, ob paritatem rationis (b), 2.) *Surdi & muti, nec non cæci, in causis, quæ in hos sensus incidunt* (c), 3.) *Infantes*, qui scilicet nondum annum 7. compleverunt, vel & *infantiae proximi* (d), 4.) huc referuntur, *qui in certis negotiis solennibus, ut testamenti factione, testes esse prohibentur*, v. gr. *feminae, prodigi &c.* (e), & denique 5.) propter qualitatem hujus vel illius facti in specie, huc referuntur, *qui plane nullam de facto habent notitiam* (f). Horum igitur testimonia ita nulla sunt, ut tota probatio vel & totus actus, (si scilicet de actu solenni quodam sermo sit,) nulla vel nullus sit, nec præsumtio minima inde nascatur, adeoque nec horum testimonia alio modo suppleri possunt, quod enim plane non est, illud nec suppleri potest.

(a) L. 40. L. 124. §. 1. ff. de R. J. L. 2. §. 3. ff. de Jure Codic. L. 20. §. 4. ff. qui test. fac. poss. B. Dn. D. Lauterbach, in Coll. Theor. Pract. tit. de test. §. 12.

(b) Mascari-

- (b) Mascardus, de Probat. Concl. §80. & B. D. Lauterbach, in Coll. d. l.
- (c) Quo minus autem tales sensibus suis sunt orbat, & quo magis igitur de facto probando cognitionem habere possunt, eo plus etiam illorum testimonio accedit fidei. B. D. Lauterbach, in Coll. d. l. §. 12. & 17. Uno verbo, quo magis requisita testium in hisce personis concurrunt, & finis probationis obtineri potest, eo probabilius quoque redditur eorum testimonium. Hinc, si non plane privati sint usu hujus vel illius sensus, vel & si in causis in alium sensum integrum & sanum incidentibus aliquid deponant, omnino testium juramento adstringi poterunt, & hoc posteriori casu etiam illorum testimonium plane validum est. vid. laud. Diff. Excellent. Dn. D. Harpprecht, de jurejurando in scriptis præstando, per tot.
- (d) B. D. Lauterbach, in Consil. Tübing. vol. IV, Cons. 154. n. 25. Idem, in Coll. d. tit. §. 13. Licet vero Infantes & Infantia proximi omnino a testimonio dicendo arceantur; aliud tamen dicendum est de pubertati proximis, qui quippe magis jam sciunt, quid agant, adeoque fini probationis magis satisfacere possunt, quam infantes & infantia proximi; hinc hi licet non omni exceptione majores sint, non tamen prorsus a testimonio dicendo repelluntur, sed omnino volentes admittuntur, B. D. Lauterbach, in Coll. d. tit. §. 14. præsertim in causis civilibus; Lauterbach, ibid. §. 13. hinc & hi omnino pœnis subijci possunt. B. Dn. D. Harpprecht, in Cons. nov. 29. n. 72. & Criminalistæ passim. Quo majori igitur talis impubes præditus est intellectu, & quo magis præsertim in hujusmodi factis, quale est probandum, versatus est, eo majori omnino ejus depositio sese commendat probabilitate; imo nec infantis testimonium ubique semper rejiciendum esse putem; cum omnino, per supra (§. 116. not. d.) deducta, quandoque & infantes veritatem dicere possint. Add. Celeb. Leyser, in medit. ad ff. spec. 283. n. 4.
- (e) §. 6. Inst. de testam. ord. Lauterbach, in Coll. d. l. §. 19. & 20. de Jure Wurtemb. fœminæ etiam in criminalibus non sunt omni exceptione majores, sed admittuntur saltem in causis, in quibus veritas aliter haberi nequit. J. P. W. P. I. tit. 36. §. Item Weibspersonen &c. p. 134. B. D. Lauterbach, in Differ. inter Jus Wurt. & Commun P. I. th. 59.
- (f) Quo magis tamen testis in causa informatus est, & quo majorem habet facti quæst. notitiam, eo magis quoque idoneus est. Farinacius, de testib. qu. 65. n. 165. B. Dn. D. Harpprecht, Cons. 88. n. 143.

§. 143.

Quidam porro non quidem in totum impediuntur veritatem dicere, sed tamen in tantum; Huc spectant 1.) illi, qui factum probandum non propriis sensibus perceperunt (a), sed illud a tertio audiverunt, ut testes de auditu: 2.) testes de credulitate, & 3.) impuberes (§. 142. not. d.). Cum igitur hi veritatem dicere in totum non impediuntur, adeoque in tantum ad minimum fini probationis satisfacere possint; omnino nec prorsus erunt repellendi a testimonio dicendo (§. 141.), sed tamen non sunt omni exceptione majores (b), quia testes proprie pleno intellectu gaudere & factum probandum propriis sensibus percepisse oportet.

(a) Dico, *propriis sensibus perceperunt*. Licet enim proprie testes oculati auritis opponantur & his præferantur; clar. Kahl, in laud. Elem. Logic. Probat. sect. 3. c. 1. §. 233. & 234. distinguendum tamen videtur inter facta, quæ proprie auribus, vel alio sensu non possunt non percipi, & inter illa, in quibus visus locum habet; priori casu omnino auriti æquipollent oculatis, v. gr. si sermo sit, an testis Cajum injurias evomere audiverit in Titium? &c. Posteriori vero casu omnino testes de auditu postponuntur oculatis, quia hoc casu auriti dicuntur, qui factum saltim a tertio enarrari audiverunt.

(b) Hinc v. gr. testes de auditu, quamdiu testes oculati haberi possunt, non admittuntur, arg. L. 5. §. 6. ff. de re milit. Stryk, de Jure sens. Diff. 3. c. 3. n. 13. B. D. Lauterbach, in Consf. Tub. vol. 1. cons. 140. n. 30. fqq. Nec non ex eadem ratione testes de credulitate non probant, nisi concurrentibus aliis adminiculis. B. D. Lauterbach, in Consf. Tub. vol. 2. Cons. 100. n. 10.

§. 144.

Quinam gradu reliquis sint præferendi?

Hi igitur (§. 143.) recensiti possunt quidem testimonium dicere, sed non sunt omni exceptione majores. Quæritur itaque, quantus sit gradus probabilitatis ex singulorum depositione resultans? Testis unicus omni exceptione major semiplenam constituit probationem (a). Hinc statim patet, omnes testes Exceptioni cuidam obnoxios constituere gradum probabilitatis, semiplena probatione minorem. Sed quæritur jam: quinam depositionibus suis comparative majorem efficiant probabilitatem? *Minima* sane inter hos modo recensitos *se se commendat probabilitate depositio testis de auditu* (b). Cum enim hujus depositio nitatur mera relatione alterius injurati, nec legitime examinati, adeoque multiplicibus exceptionibus obnoxii, insuper, & ne hoc quidem plene probatum sit, an talis testis de auditu tale quid audiverit? cum ad plenam probationem requirantur duo ad minimum testes, minima sane inde resultat probabilitas, vix, nisi in summo gradu necessitatis attendenda (c) *Majori jamjam præfulget probabilitate testimonium de credulitate*, cum hoc casu testis non solum hoc vel illud se audivisse simpliciter affirmet, sed insuper etiam ex rationibus notis depositionem suam veram esse credat, quod secus se se habet in teste de auditu, qui relata mere refert, adeoque unice nititur alterius referentis fide; *iterum majorem denique probabilitatis gradum consequitur testimonium impuberis* (d), quippe qui oculatus supponitur, atque factum propriis sensibus percepisse, adeoque majori certitudine deponere potest, quam alius, qui facto non ipse interfuit; modo

do factum ita comparatum sit, ut in impuberis intellectum cadere possit.

(a) B. D. Lauterbach, in Coll. tit. de probat. §. 8.

(b) Imo quandoque plures auriti non plus valent, quam unicus oculatus injuratus, quia scilicet aliquando fieri potest, ut plures factum ab eodem enarrari audiverint; quo casu omnino non plus esse potest in effectu, quam est in causa. Kahl, in Elem. Log. prob. d. Sect. 3. c. 1. §. 241. p. 213. Etiam inter auritos iterum dari possunt gradus; majori enim v. gr. probabilitate sese commendat testes auritus, qui factum recenseri audit ab illo, qui ipse facto interfuit, quam is, qui factum audit ab eo, qui facto non ipse interfuit, sed illud iterum a tertio audit. &c. Kahl, c. l. §. 239. p. 212.

(c) B. Dn. D. Lauterbach, in Consil. Tubing. vol. 2. Cons. 99. n. 4.

(d) Heic tamen iterum dantur gradus probabilitatis pro ratione objecti, quatenus scilicet hoc in intellectum impuberis cadere potest, vel non potest.

§. 145.

Alios porro inhabiles esse diximus ideo, quia veritatem dicere haud voluisse præsumuntur; hi iterum aut ita repelluntur, ut plane ne præsumtionem quidem constituent, adeoque plane inhabiles sint, aut saltem non omni exceptione majores. (§. 140.) Multæ magnæque heic sunt DDrum controversiæ, quænam impedimenta Testem plane inhabilem reddant, quænam non omni exceptione majorem (a)? admodum igitur difficile & lubricum erit, heic præcise determinare, quinam plane non admittendi sint, nec ne, quinam admittendi quidem sint, sed quorum testimonium tamen non plenum robur habeat? Faciamus rei periculum, persuasi fore, ut, si rem in uno vel altero casu minus acu tetigerimus, materiæ difficultati & ingenii tenuitati aliquid condonetur; determinandum hoc esse putamus ex fine probationis. (§. 127.)

Quodcumque enim impedimentum ita comparatum est, ut fini probationis e diametro repugnet, illud omnino testem plane reddit inhabilem; quodcumque autem impedimentum non directe repugnat fini probationis, illud nec testem prorsus reddit inhabilem, sed saltem derogat ejus fidei in tantum, in quantum impedimentum huic fini contrarium est.

(a) Confer. Celeb. Leyser, in Medit. ad ff. spec. 283. n. 1. & plur. sqq. ubi ita: „venio nunc ad titulum de testibus. Quem ut solide explicarem, aliquot dies legendis, qui passim de hoc argumento exstant, commentariis, „excerpendis memorabilibus, colligendis Responsis Juridicis, impendi. Peracto hoc labore, meditari & digerere collecta cœpi, diversosque titulos, „in quos meditationes meas referrem, excogitavi. Constitueram nempe agere de testimonio impuberum, minorum, senum decrepitorum, testium in propria

Quando testis sit inhabilis, ideo, quia veritatem dicere præsumitur noluisse,

„propria causa, membrorum universitatis, parentum, liberorum, conjugum,
 „fratrum, cognatorum, adfinium, amicorum, inimicorum, magistratum,
 „tutorum, advocatorum, sacerdotum, domesticorum, subjectorum, injura-
 „torum, negativorum, testium de auditu, de credulitate, personarum vi-
 „lium & infamium, invitorum. Singulis his titulis Responſa aliquot destina-
 „veram. Quæ, postquam cum cura inspicere & considerare cepi, tantam in-
 „vicem eorum pugnam animadverti, ut ea in luculentam consonantiam redi-
 „gere desperarem. Evolvi Farinacii aliorumque spissa de testibus volumina;
 „Regulas in illis multas inveni, sed, quando eas cum subjectis limitationibus
 „contuli, ipsarum Regularum usum nullum superesse vidi; reperi tandem, &
 „meum, & omnium, qui de testibus scripserunt, laborem inanem fuisse, ac
 „potuisse cunctas, quæ de fide testium proponuntur, regulas, ampliationes,
 „limitationes, paucissimis comprehendere, atque ad hanc unicam regulam re-
 „ferri, quam ego Hadriani verbis, quæ Callistratus refert, proponam ex
 „L. 3. §. 2. ff. de testib. &c.,

§. 146.

Recensentur
 in specie in-
 habiles, ab-
 solute tales.

Manifeste inidoneos & statim repellendos putem 1.) *Perju-
 ros (a)*, ex ea scilicet ratione, quia omnis testium fides nititur
 hoc fundamento, ut testis veritatem dicere velit & possit (§. 138.),
 & quo magis testis fides adstringatur, juramentum ipsi est præ-
 standum; cum igitur perjurus jamjam factis demonstraverit, hoc
 vinculum adstringendæ fidei apud se nihil plane valere, omnino
 ipse finis principalis testimonii in perjuro cadit; nulla enim adest
 ratio sufficiens, cur jam potius juramento præstito stet, quam
 antea; hinc, quin talis manifeste inidoneus sit nec quicquam
 probet, per se intelligitur (§. 144.). 2.) Ex eadem fere ratione
 manifeste inidoneus est *ille testis, qui se testem produci passus est, vel
 & testimonium scriptum exhibuit, ex post vero, cum examinandus esset
 legitime, juramentum testium præstare absque justa causa detrectavit (b)*.
 Manifeste enim talis declarat depositionem suam veritati haud
 esse consentaneam, quia alias illæsa conscientia juramentum præ-
 stare posset. 3.) Plane repelluntur *illi, quibus inimiciæ capitales
 intercesserunt cum eo, contra quem producuntur (c)*. Sed heic paulo
 accuratius nobis determinandum esse videtur, quo casu inimi-
 citiæ capitales intercessisse videantur? id, quod facile fieri posse
 arbitror, si hoc impedimentum cum fine probationis conferatur.
 Quæritur enim heic, num talis probabiliter veritatem dixisse
 censi possit? Quamdiu igitur hic finis ab inimico, si non in to-
 tum, ad minimum tamen in tantum, adhuc expectari potest, tamdiu
 etiam nondum inimicitia ita comparata esse videtur, ut ideo
 talis testis prorsus repelli possit; hinc nostro judicio adtenden-
 dum

dum est ad id, num talis inimicus jamjam odium suum ita demonstraverit, & adeo omnem honestatem per facta sua deposuerit, ut ex illis factis certum sit, **talem** inimicum nequidem juramenti præstiti ullam initurum esse rationem; quod facile ex eo intelligi potest, si facta, quibus inimicitiam suam testatus est, ita fuerunt comparata, ut turpiora vel æque turpia fuerint, quam perjurium committere; hoc enim casu omnino conjici potest, talem nec hoc casu perjurii rationem habiturum esse; quod si vero facta, quibus talis inimicus inimicitiam suam demonstravit, non æque turpia fuerunt, quam perjurium, omnino nec plane repellendus erit talis inimicus, cum nimis injurium foret in virum de cetero honestum, de illo præsumere, quod propter inimicitiam, licet gravissimam, perjurium commissurus sit 4.) *Plane repelluntur testes inidonei in causis, in quibus testes solennitatis ergo accedunt, vel certus testium numerus præcise ad certum effectum requiritur, nec alia adminicula ad probationem supplendam admittuntur.* Sic testes inidonei, in testamenti factione adhibiti, omnino testamentum ipsum nullum reddunt; quia enim heic pro forma requiritur certus testium numerus, omnino, si inidoneus fuerit adhibitus, perinde erit, ac si non fuisset adhibitus, adeoque forma non recte sese habebit, & ideo testamentum ipsum cadet (d). 5.) *Repellendum esse putem bannitum, sive banno Imperii proscriptum;* hic enim omnia jura amisit, & in Republica habetur plane pro non-ente (e). 6.) *denique repellendi sunt corrupti, qui pecuniam acceperunt, ut falsum dicerent testimonium (f);* quia nimirum hi manifeste declararunt, se non veritatis, sed lucri causa testimonium præstituros esse, adeoque finis probationis haud obtinetur. Reliquos omnes, etiam illos, qui in propria quasi causa deponunt, nisi alia accedat inhabilitas, omnino non prorsus arcendos esse arbitror (g); quia scilicet & ipsa pars aliquando, si juramento adstringatur, aliquid conferre potest ad probationem, nec omni fide indigna habetur; alias enim juramentum a judice parti nunquam posset deferri sive suppletorium, sive purgatorium. Cum igitur illius assertio jurata, quem tamen proprie & principaliter causa tangit, non plane nullius roboris sit, omnino nec testes plane erunt repellendi, quos causa non æque principaliter tangit ac actorem vel reum sive partem ipsam.

(a) C. 9. X. de testib. Lauterb. in Coll. Theor. Pract. tit. de testib. §. 36. Idem, in Cons. Tub. vol. 4. cons. 13. n. § 1. Celeb. Leyser, in med. ad ff. spec. 283 n. 35.

- (b) Arg. L. 38. ff. de jurejur. B. Dn. D. Harpprecht, Cons. nov. 27. n. 107. 108. 109. & 110.
- (c) L. 3. pr. ff. L. 17. C. de Testib. B. D. Lauterbach, in Coll. d. tit. de testib. §. 35. Leyser, in medit. ad ff. spec. 283. n. 25. & 35. Menochius, de Arbitr. judic. Quæst. lib. 2. cas. 110. & 239.
- (d) B. Dn. D. Harpprecht, Resp. 87. n. 84. seqq.
- (e) Ummius, in proc. jud. Disp. 16. th. 1. n. 10. B. D. Lauterbach, in Coll. d. tit. de testib. §. 18. Hinc & statim plerumque inter interrogatoria generalia refertur illud, an quis sit in banno Imperii, ob Zeug in des H. R. Reichs Nacht seye? vid. Jus Prov. Wurt. P. I. tit. 39. int. gen. 2. pag. 142. Add. Ordnung des Königl. Landfriedens zu Worms de anno 1495. & de anno 1521. rubr. Die Pöen der Friedbrecher. Lauterbach, in Coll. Theor. Pract. tit. de adopt. §. 20.
- (f) d. C. 9. X. de Test. L. 17. C. de Test. junct. J. P. W. P. I. tit. 39. interr. gen. 4 p. 142.
- (g) Hos quidem plane inidoneos esse putat Leyser, spec. ad ff. 283. n. 35. æque ac illum, qui publica vitæ infamia laborat pluribus facinoribus pollutus, id, quod tamen absolute verum esse haud puto, nisi facinora tanta sint, ut graviora sint perjurio, ita, ut verisimile sit, testem nec perjurii rationem habiturum esse, & insuper testis habitum in delinquendo sibi comparaverit, nec forte ex imperitia, vel animo haud satis deliberato deliquerit, tum enim omnino cadit finis probationis, scilicet fides judici facienda & veritatis indagatio.

§. 147.

Huc & referendi testes contrarii.

Haftenus recensiti testes (§. 149.) nullam prorsus præsumptionem constituunt, & plane inhabiles sunt, quia veritatem dicere noluisse præsumuntur; jam vero dantur & alii, qui itidem plane nihil probant, & quorum testimonium æque parum roboris habet, & ne ullum quidem gradum probabilitatis juridicæ constituit, & quidem ideo, quia manifestum est, illos veritatem celasse; tales sunt 7.) *manifeste contrarii vel sibi ipsis suisque depositionibus propriis, vel aliis probationibus vel aliorum contestium æque dignorum testimoniis* (a). Cum enim contradictorie opposita simul existere & vera esse nequeant, omnino necesse est, ut hoc casu talium testium alterutra depositio falsa sit, adeoque ut in una vel altera depositione manifeste mentiti sint; quia igitur hoc casu manifeste apparet, tales testes contrarios veritatem dicere noluisse, id quod oppido repugnat e diametro fini probationis omnis, facile apparet, hos ita inidoneos esse, ut ne ullam quidem præsumptionem faciant (§. 143.).

- (a) Non tamen omnis testium contrarietas statim plane illos inidoneos reddit, sed requiritur contrarietas in substantialibus. B. Dn. D. Harpprecht, resp. 81. n. 68. & resp. 82. n. 71. seq. Testes enim, quantum fieri potest, ad concordiam sunt redigendi. Petr. Müller, in Disp. de contraria test. deposit. c. 4. sqq. Farinacius, de test. P. 2. qu. 65. & 68. Magnif. Dn. D. Schöpf, Dec. 261. n. 16.

n. 16. Quandoque tamen & contrarietas in accidentalibus plane derogat testium fidei, si nimirum testes positive talem circumstantiam asserant, & in assignanda tali circumstantia, licet extrajudiciali, variant, quam non nosse non possunt, ita, ut error conjici nullo modo possit. Cum enim omne factum, de quo quæritur, omnimode determinatum sit, adeoque omnia, tam substantialia, quam accidentalia, invicem amice conspirare debeant, omaino, si testes in minimis circumstantiis ad rem facientibus, & quas nosse debent, contrarii sint, illorum fidei nihil plane tribui potest, & quidem ex hac ratione, quia, si testes in talibus circumstantiis variant, factum non est omni modo determinatum, adeoque existere nequit, nec obstat, hoc casu ad minimum reliquas circumstantias extraessentialiales supponendas esse, modo constet de essentialibus omnibus, sicut supra (§. 96.) affirmavimus; ibi enim supponitur, reliqua requisita veritatis extraessentialia non repugnare plane ipsi facto, sed saltem de iis judici haud constare; hic vero fingimus casum, ubi testes sibi contrariantur, adeoque determinatio facto repugnat. Imo cum tales testes scienter in circumstantiis extraessentialibus contrarii oppido sint perjuri, nec ideo ratio sit, cur in substantialibus magis ad juramentum suum respexerint, quam in extraessentialibus; facile patet, horum testimonium ne minima quidem sese commendare probabilitate, quia testes perjuri de thesi ne præsumptionem quidem efficiunt (§. 114.). Quadrare huc videtur exemplum illud, quod in historia de Susannæ accusatoribus legimus; cum enim testes variassent in tali circumstantia, quam oppido nosse debebant, adeoque scienter, sub quam scilicet arbore Susanna adulterium commisisset, sub tilia, an sub quercu? merito Susanna absoluta fuit, licet testes in circumstantia saltem extraessentiali variassent. Add. Illustr. Heineccius, in Elem. ff. tit. de test. §. 144. n. 6.

§. 148.

Hos igitur, quos hactenus enumeravimus, testes ita repelli & inhabiles esse, ut eorum testimonium ne præsumptionem quidem efficiat, supra evicimus (§. 144. & 145.). Reliqui igitur, de quibus aliquo modo conjici potest, quod forte veritatem non dicere voluerint, etiam testes in propria causa (§. 144.) nihilominus aliquid ad minimum probant, licet non omni exceptione majores sint, quales sunt 1.) *criminosi* (a), 2.) *levis notæ macula laborantes* (b), 3.) *minores 20. annis in criminalibus* (c), 4.) *femine præsertim in criminalibus de Jure Würtemb.* (d), 5.) *omnes in causa propria* (e), 6) *denique Judæi vel hæretici, in causis Christianos vel orthodoxos concernentibus* (f).

Quinam non absolute sint inhabiles, sed non omni exceptione majores?

(a) Cap. 54. X. de testib. Celeb. Leyser, in spec. ad ff. 283. n. 32. Huc referuntur infames, sive juris sive facti infamia laborantes. J. P. W. P. §. tit. 36. §. Item ehrlose Leuth 1c. pag. 134. B. [D. Lauterbach, in Coll. Theor. Pract. tit. de test. §. 18.

(b) Celeb. Leyser, d. spec. ad ff. 283. n. 34. B. D. Frommann, in Disp. de levis notæ macula, th. 55.

- (c) L. 20. ff. de testib. Lauterbach, in Coll. d. tit. §. 20. Excipiuntur tamen casus, a) si veritas aliter haberi nequeat, b) si agatur de probanda innocentia Rei, & c) in crimine læsæ Majestatis. Carpzov, in prax. crim. qu. 114. n. 42. seqq. Magnif. Dn. D. Schœpf, Dec. 224. n. 27. & 28. D. Frommann, in Disp. de innocentiae præsidio, th. 31. Farinacius, de Testib. qu. §4. n. 35. 117. in hisce enim casibus & inhabiles admittuntur testes.
- (d) C. 10. in fin. X. de verb. signif. J. P. W. P. 1. tit. 36 §. Item Weibspersonen X. p. 134. B. D. Lauterbach, in Coll. d. tit. de testib. §. 20.
- (e) L. 10. ff. L. 19. C. de testib. D. Lauterbach, in Coll. d. l. §. 21.
- (f) Nov. 45. cap. 1. B. D. Lauterbach, in Coll. d. l. §. 35. Idem Lauterbach, in Conf. Tub. vol. 4. Conf. 35. n. 21. & Farinacius, de testib. qu. 62. n. 335. seqq.

§. 149.

Quoties habiles & omni exceptione majores testes haberi possunt, inhabiles non admittuntur.

Id semper faciendum est, quod optimum est & maxime conducit, per principia Moral. (a). Igitur semper omnis opera in eo collocanda est, ut finis probationis, scilicet veritas, quam fieri potest maxime, obtineatur; magis autem obtinetur finis probationis, si adhibeantur testes habiles, quam per inhabiles (§. 138. & 139.). Ergo si habiles testes haberi possint, quin hi adhibendi sint, & reliqui inhabiles, vel & qui non omni exceptione majores sunt, excludantur, nullum est dubium (b). Id quod vel exinde patet, quia ille, qui potest habere testes habiles, nihilominus his omiſſis producit inhabiles, summam corruptionis suspicionem contra se habet, cum æque facile producere habiles, & eodem negotio omnes super habilitate testium orituras lites præscindere posset, quod cum non faciat, omnino valde probabiliter concludi potest, habiles ex mala conscientia præteriri. Quoties igitur habiles haberi possunt testes, inhabiles nihil plane probant (c).

(a) Parens noster Canz, in Discipl. moral. in Discursu prælim. c. 3. §. 66.

(b) Quamvis ad adjuvandas reliquas probationes admittantur. B. Dn. D. Harpprecht, resp. 3. n. 12.

(c) B. Dn. D. Harpprecht, in resp. 7. n. 266.

§. 150.

Regula dijudicandi gradum probabilitatis ex testium inhabilitate oriundum.

Testes igitur non omni exceptione majores haud quicquam probant, si habiles æque facile haberi possint (§. 147.) (a), sed admittuntur saltem in casu, si habiles deficient, vel haberi nequeant, vel & si aliæ præsto sint præsumptiones adminiculantes; hoc igitur casu probant quidem, sed non plene, adeoque gradum quendam saltem efficiunt probabilitatis, qui jam, quantum fieri

feri potest, ad minimum comparative nobis est determinandus. Heic prior regula (§. 143.) tradita recurrit: *Quodcunque scilicet impedimentum magis repugnat fini probationis, veritati scilicet eruendæ, illud etiam magis derogat fidei testium, & minorem efficit præsumptionis gradum.*

(a) Testes heic habiles haberi posse negantur, si tempore Rotuli conficiendi, & postquam probatio decreta fuit, habiles non amplius haberi possint, modo non dolo malo expectaverit Actor, donec habiles non amplius haberi potuerint.

§. 151.

Ex præmissis patet, illud impedimentum, quod magis repugnat fini probationis, scilicet veritati eruendæ, magis quoque derogare fidei testium (§. 150.). Quodsi jam determinandum sit, quodnam impedimentum ex his, quæ supra (§. 148.) recensuimus, magis derogat fini probationis vel minus, adeoque majorem fidei testis relinquat probabilitatem, vel minorem, sine dubio respiciendum erit ad rationem, cur hic vel ille testis pro inhabili habeatur, ut appareat, num hæc ratio magis vel minus fini probationis repugnet? Singulos casus speciatim considerabimus. Inter testes non omni exceptione majores retulimus supra (§. 148.) etiam 1.) *fæminas*, quæ quippe præsertim de Jure Würt. in criminalibus non omni exceptione majores sunt (§. 148. not. d.). Si respiciamus ad rationem, nulla sane alia assignari poterit ratio, quam fragilitas sexus (a); quæ sane ratio adeo generalis & indeterminata est, ut nil fere per illam fini probationis derogeretur; multæ enim dantur fœminæ, quæ omnino viris multo sunt religiosiores, adeoque de quibus multo minus, quam de viris, perjurium præsumendum est. Heic enim non quæritur de factis, singulare judicium deposcentibus, sed quæ cuique obvia sunt, & a quoque facile intelligi possunt; fragilitas vero est vitium intellectus potius, quam voluntatis; hinc, si de factis quæstio sit, quæ fœmina æque nosse potest, ac vir, sane male fragilitas allegatur tanquam ratio, cur mulieres veritatem, quam sciunt, dicere nolint, si præsertim nulla alia concurrat ratio, ex qua mendacium conjici possit. *Minime igitur comparative hoc impedimentum derogat fidei testium, quia ad minimum maxime remota inde nascitur perjurii suspicio, quæ quippe in remota saltem possibilitate subsistit.* Gravius jam priori impedimentum est 2.) *minor ætas in causis criminalibus* (§. 114. not. c.).

Conferuntur inter se testes inhabiles, & dispicitur, quænam inhabilitas veritati plus derogat altera.

Cum enim in Legibus semper pro imbecillioribus habeantur minores, quam mulieres, ideo etiam, si collidat privilegium minorrennitatis cum privilegio sexui sequiori concessio, illud semper prævaleat hoc posteriori (b); per se patet, ex analogia juris hoc casu *minorennitatem magis obstare fidei testium, quam sexum* (c), adeoque hoc casu *gradum probabilitatis minorem esse, quam priori, majorem tamen, quam 3) casu tertio, quando scilicet testes levis notæ macula laborant*, levis notæ macula laborare dicuntur, qui vile atque sordidum (non tamen moraliter tale) vitæ genus exercent (d). Ratio igitur, cur hi non sint omni exceptione majores, hæc est, quia ut plurimum ex infima plebe & vilissimæ conditionis homines hujusmodi artibus exercendis destinantur, de quibus omnino per ipsam rerum naturam magis mendacium & perjurium præsumi potest, quam de aliis, qui nobilioribus artibus operam dant, & communiter meliori educatione fructi sunt; quia igitur negligentior educatio & exercitium sordidæ artis, quod quippe hujusmodi macula laborantibus honestiorem consuetudinem, ex qua meliora addiscere forte possent, difficiliorem reddit, omnino magis determinata ratio est, cur facilius de talibus notatis mendacium & perjurium concipi possit, quam de aliis, & quidem magis determinata ratio, quam in mulieribus vel minoribus, adeoque exercitium hujusmodi sordidæ artis majorem habere potest influxum in finem probationis, scilicet veritatem eruendam; *minorem sane gradum probabilitatis efficit testimonium hujusmodi macula notati, quam minoris vel feminae*. Sequuntur hos 4.) *Judæi & hæretici*; sed heic ante omnia determinandum esset, quisnam diceretur hæreticus? Nos cum communi DDrum schola heic loci sub hæretici vocabulo intelligimus illum, qui cum tribus in Imperio Romano approbatis religionibus non conspirat (e). Hi igitur testes sunt non omni exceptione majores (f), scilicet contra Orthodoxos, sive alteruter litigantium sit orthodoxus, sive uterque (g). Ratio hæc est, quia tales hæretici & Judæi aliquo modo pro inimicis habentur orthodoxorum & Christianorum, & quia superstitio semper quaecunque odium Christianorum illis instillasse præsumitur (h). Cum igitur hæc ratio iterum specialior sit priori, quia heic aliquo modo specialius de odio in alterutrum litigantium constat, *omnino horum testimonium iterum minori sese commendat probabilitate, quam priorum* (i), *at majori, quam 5.) testimonium illorum, qui in propria causa testes sunt*. Heic enim

enim

enim iterum specialior prioribus ratio adest, cur tales pro inhabilibus habeantur, ob proprium scilicet interesse, quod teste experientia omnibus maxime cordi est; hinc & quidam hos plane a testimonio dicendo arcendos, & nequidem examinandos esse putant. (k) Specialiorem dicimus hanc rationem prioribus, quia inde magis determinata suboritur suspicio, testem falsum dicturum esse testimonium, quam prioribus casibus, ubi æque specialiter & determinate testium non interest, pro quocunque litigantium depónant. 6) Denique sequitur *testimonium infamium & criminorum*, quod comparative minimam præ se fert probabilitatem; omnes enim rationes, cur priores pro inhabilibus habebantur, erant generales, non supponebant facta specialia, ex quibus suspicio perjurii colligeretur, at heic jamjam testes criminosi actu & factis demonstrarunt, honestatem sibi admodum non cordi esse, adeoque specialior prioribus omnibus heic præsto est ratio, cur minor fides hisce tribui debeat, quam prioribus. (l) Et heic iterum aliquo modo gradum probabilitatis determinatum esse arbitramur, quatenus hic oritur ex depositionibus testium, qui veritatem non plene dixisse vel dicere voluisse præsumuntur, & ideo habentur pro non omni Exceptione majoribus.

(a) Cap. 10. in fin. x. de V.S. verb. „nam varium & mutabile testimonium semper; femina producit &c. B. D. Lauterbach, in Coll. d. tit. de testib. §. 20.

(b) L. 12. ff. de minor. 25. ann. & ibi Gothofredus, in not. n. r¹. B. D. Lauterbach, in Coll. Theoret. pract. tit. de minorib. 25. ann. §. 26.

(c) Quodsi jam quæreretur, quo ordine collocandus esset pupillus, si de ejus testimonio ageretur in collisione cum casibus hætenus recensitis? absque dubio ex similitudine rationis dicendum esset, minori sese probabilitate commendare testimonium pupilli, quam minoris, sed majori, quam v. gr. testimonium levis notæ macula notati, & sic prudens semper priores casus ex regulis traditis cum hisce & vice versa comparare poterit. Sic e. gr. testimonium testis de auditu vel credulitate, quod nonnisi relatione alterius injurati, eademque nequidem satis probata, nititur, aperte minori probabilitatis gradu gaudet, quam v. gr. testimonium testis in propria causa, qui tamen factio ipsemet interfuit, & qui de perjurio specialius sese non suspectum reddidit; Sed tamen major hoc casu est gradus probabilitatis, quam testis criminosi, qui jamjam actu specimina vitæ minus honestæ edidit.

(d) L. 27. C. de inoffic. testam. L. 6. C. de dignit. Celeb. Leyser, spec. ad ff. §2. n. 6. B. D. Lauterbach, in Coll. Theor. Pract. tit. de his, qui not. infam. §. 31.

(e) Hi enim juribus communibus Imperii Romani non fruuntur, nec ullibi tolerari possunt publice. Instr. Pac. Westph. art. 7. Ex quo ipso sequitur trium religionum approbatarum affectas pro hæreticis habendos non esse.

(f) B. D. Lau-

- (f) B. D. Lauterbach, in *Conff. Tub. Vol. IV. Conf. 35. n. 21.* Farinacius, in *Proc. crim. Qu. 56. art. 7. n. 232.* B. Dn. D. Harpprecht, in *Conf. 70. n. 366.*
- (g) Nov. 45. c. 1. L. 21. C. de hæret. ibique Gothofredus in not. n. 31. Quamvis inter hæreticos vel Judæos testes sint idonei. Gothofredus, cit. loc. n. 33.
- (h) *Causa 2. Quæst. 7. can. 23. 24.* B. D. Lauterbach, in *Coll. d. tit. de test. 5. 35.*
- (i) Heic tamen iterum dantur diversi gradus probabilitatis. Sic v. gr. majori probabilitate sese commendat testimonium Judæi vel hæretici, si uterque ligantium sit orthodoxus, quam si ille saltem orthodoxus sit, contra quem Judæus vel hæreticus deponit; quia enim utrique propter Religionem æque infensus est, nulla est ratio, cur magis pro hoc, quam pro illo deponat. Contra, minori gradu probabilitatis gaudet testimonium hæretici vel Judæi, si hæresis ita comparata sit, ut ejus affectu juste decipi posse statuunt alteri Religioni addictos. Imo hoc casu plane non admittendos esse hujusmodi testes arbitror, quia scil. cessat finis omnis probationis. Sic, licet non omnimode rejici possit testimonium Judæorum, minorem tamen habet efficaciam, quam aliorum, qui dissecantes nullo modo decipi posse statuunt, quia scilicet Judæi plures statuunt reservationes mentales, imo facile absolutionem a perjurio contra Christianum commissio obtinere posse feruntur. vid. D. Beck, in *Tr. de Jure Judæor. c. 16. §. 20.* ubi ita: „Ob aber auch rathsam seye, daß „ein Christ einem Juden einen Eid deferire? ist eine andere Frage; dann „man hält insgemein darsür, daß die Juden jährlich den 10ten Tag des „Monaths Tisri am Jom Kippur, oder grossen Versöhnungs-Tag, von denen falschen Aylschwühren, so sie durch das ganze Jahr gethan, in ihrer „Synagog pflegen absolvirt zu werden. u. Hinc & tot & tantæ cautelæ circa Juramenta Judæorum excogitatæ sunt; de quibus vid. Cammerger. *Ordn. P. 1. tit. 86. der Frankfurter Juden-Stättigkeit und Ordn. dd. 7ten. Dec. An. 1705. Chur-Braunschweig. Ober-Appell. Ger. Ord. P. 2. tit. 8. pag. 205. alleg. a D. Beckio, cit. loc. §. 23.* Sic olim secundum Jus Saxonicum antiquum Judæus jurans pelli suillæ insistere debebat, im. *Nichtsteig-Landr. c. 50. Add. Casp. Ziegler, de Jurib. Judæor. c. 5. §. 5. recensitus ab Ill. Heineccio, in Elem. Jur. Germ. lib. 3. tit. 6. §. 228.* Qui mos tamen exolevit, & iuste quidem. vid. Dn. Stryk, in *Ul. mod. ad ff. tit. de jurejur. §. 9. & in Cautel. Juram. P. 2. Sect. 1. c. 2. n. 76.* Dn. Beck, cit. loc. §. 21.
- (k) Cel. Leyser, in *Spec. ad ff. 283. n. 35.*
- (l) At heic iterum dantur gradus; Quo majus enim est crimen commissum, eo minorem probabilitatis gradum consequitur testimonium hujusmodi facinorosi; hinc, si delictum sit gravius, si sæpius repetitum, ita, ut testis habitum in delinquendo consecutus sit, vel & si magis directe repugnet fini probationis, omnino minor est gradus probabilitatis, quam in delictis levioribus, non sæpius repetitis, vel & fini probationis non adeo contrariantibus.

§. 152.

Regula quo-
ad testes in
propria cau-
sa.

Dantur & plures gradus probabilitatis inter testes in propria causa, qui tamen adeo accurate, propter infinitam fere casuum indi-

individuum variationem, diversitatem temperamentorum, affectuum; &c. assignari non possunt. Hinc sufficiat, regulam aliquam tradidisse, secundum quam gravitas & pondus probabilitatis aliquo modo determinari potest. Testis in propria causa dicitur, qui ex victoria alterutrius litigantium damnum vel commodum sentit, vel sentire potest. (a) *Quo gravius igitur est damnum metuendum, vel quo majus commodum aliquis ex victoria sperare potest, eo minori testimonium ipsius gaudet gradu probabilitatis.* Gravius damnum aliquis sentire potest vel intuitu objecti. Sic v. gr. venditor, si agatur de Evictione, majus damnum ex victoria Domini supervenientis metuit, si res evincenda sit majoris pretii, quam si sit minoris &c. vel & quandoque gravitas commodi vel damni intelligitur ex majori vel minori gradu certitudinis, an scilicet futurum sit damnum vel commodum, nec ne? Sic v. gr. donator non tantum patitur damnum, si res donata evincatur a donatario, quantum venditor; præterquam enim, quod donator non teneatur regulariter de Evictione præstanda, sicuti is, qui titulo oneroso rem in alterum transtulit, (b) alter non perfecte ad ἀντίδοξα obligatur; (quæ quippe est ratio, cur donator non habeatur pro testē omni exceptione majori, (c)) adeoque etiam valde incertum est, num donatarius præcise ferente occasione gratitudinem suam testificaturus sit atque demonstraturus, nec ne? Quodsi igitur hanc Regulam in casibus hinc inde occurrentibus, in quibus testes habentur pro non omni Exceptione majoribus, tanquam in propria causa deponentes, applicare placuerit, non admodum difficile erit, comparative aliquo modo gradum probabilitatis assignare.

Sic I. v. gr. *testimonium Socii criminis* dicitur non omni exceptione majus, (d) & quidem præsertim ideo, quia talis est testis in propria causa. (e) Quodsi jam quærat, quantus sit gradus probabilitatis hujusmodi testimonii? *facile patet, omnium minima probabilitate illud sese commendare.* 1.) Enim talis ex sua depositione, si valeret, quoad objectum, magnum commodum vel damnum sperare posset, poenam scilicet quandoque corporis afflictivam, imo & aliquando ultimum supplicium, 2.) certo scire potest, hoc damnum vel commodum subsequaturum esse, & 3.) denique talis testis est criminofus, cujus testimonium, per supra demonstrata, (§. 151. n. 6.) licet proprium interesse non concurrat, valde exigui momenti est. *Quin igitur hujusmodi tes-*

O

timo-

testimonium socii criminis minima sese commendet probabilitate inter omnes testes in propria causa, per se clarum est. (f) imo hos, quoad gradum probabilitatis ut plurimum ad n. 6. supra (§. 151.) spectare arbitror.

Sic II. tanquam testes in propria causa non omni exceptione majores sunt, qui commodum vel damnum pecuniarium ex victoria alterutrius partis expectant, v. gr. venditor in causa Evictionis, socius in causa communi, fidejussor in causa, in qua fidejussit, correi sive debendi, sive credendi, singuli de universitate in causa universitatis, quatenus talis causa singulorum interesse vel commodum concernit, (g) omnes hi certissimum & quidem determinatum commodum vel incommodum ex sua depositione sperare aut metuere debent; *valde igitur exigui roboris est horum testimonium, gravius tamen testimonio sociorum criminis, sed minoris momenti, (h) quam*

III. *testimonium sanguinis vel affinitatis nexu inter se conjunctorum; Cum enim hi ex conjunctorum victoria æque certum & determinatum commodum sperare non possint, ac priores, omnino majori gradu probabilitatis gaudet testimonium conjunctorum, quam priorum. (i)*

IV. *Majori sese probabilitate commendat testimonium domesticorum, vel & subditorum; non solum enim nec hi ullum determinatum commodum vel damnum ex victoria herorum vel dominorum expectare possunt, sed nec tantus amor naturalis inter hos & dominos intercedit, quantus inter sanguine conjunctos, qui quippe semper ad minimum remote sive ex cognati meritis gloriam, sive ex demeritis ignominiam, imo quandoque, licet remote, & commodum pecuniarium, mediante scilicet hereditate, expectare possunt; quæ relationes omnes cessant in famulis nostris & subditis. (k)*

Gravius V. prioribus testimonium est illorum, qui propter Existimationem vel honorem vanum & incertum (l) non habentur pro omni exceptione majoribus; quales sunt α) Advocati in causis, in quibus patrocinium præstiterunt, β) Procuratores in causis Principalium, γ) Tutores in causis pupillorum, δ) Judices in causis, in quibus judicarunt. (m) Quod si enim hi rite officio suo functi sint, honestorum virorum inculpationem non est quod metuant; vana enim est gloria admodum, quam quis ex victoria injusta expectat, adeoque proprie, si vel maxime causa cadant, plane nullam inde metuere possunt existimationis jacturam. (n) Minime denique

VI. fidei

VI. fidei testis *nocet commodum gratiæ vel & gratitudinis*, quod forte expectare potest, v. gr. donator, re donata evicta, cui quippe ne vana quidem illa gloria, quam in liberalitate quæsi-
 sivit, revera adimitur; Quodsi enim donator non sciverit, rem
 esse alienam, alter nihilominus manet obstrictus ad gratitudi-
 nem (secus, si sciverit; tum enim incidit in crimen); Adde,
 quod admodum incertum sit, num alter revera sese gratum ex-
 hibiturus sit (o)? quo casu omnino, per deducta, minus est
 commodum, quod quis ex victoria alicujus sperare potest.

- (a) L. 1. §. 11. quando appell. B. Dn. D. Lauterbach, in Coll. Theor. Pract. tit. de Testib. §. 21. Mevius, P. 4. Dec. 285. n. 4. Sic inter interrogatoria generalia in omni Testium Examine adhibenda & illud communiter re-
 fertur: Ob Zeug Nutzen oder Schaden aus dem Sieg des führenden Theils
 zu hoffen oder zu fürchten habe? J. P. W. P. 1. tit. 39. int. §. pag. 142.
- (b) L. 18. §. ult. ff. de donat. junct. L. 62. ff. de ædilit. edict. B. D. Lauterbach
 in Coll. Theor. Pract. tit. de Evict. §. 15.
- (c) L. 25. §. 11. ff. de hered. petit. L. ult. C. de revoc. don. L. 54. §. 1. ff. de
 furt. B. D. Lauterbach, d. tit. de Testib. §. 24.
- (d) B. Dn. D. Harpprecht, resp. 14. n. 180. junct. n. 262.
- (e) L. 11. C. de Testib. C. 10. X. eod. L. ult. C. de accus. B. D. Lauterbach,
 in Coll. tit. de Testib. §. 28.
- (f) Dantur tamen & heic iterum gradus probabilitatis. Ponamus enim, tales
 criminosos deponere adversus alios notorie criminosos vel & infames,
 major fane erit gradus probabilitatis, quam si honestos viros in societa-
 tem criminis trahere velint depositione sua. B. Dn. D. Harpprecht, dict.
 resp. 14. n. 263. B. D. Lauterbach, d. tit. de Testib. §. 28. Add. L. ult. C.
 de accus. Sic & major est gradus probabilitatis, si commodum vel incom-
 modum sperandum vel metuendum minus sit. Confer. ea, quæ ad (§. 116.
 not. 1.) dicta sunt.
- (g) B. D. Lauterbach, in Coll. d. tit. de Testib. §. 23. B. Dn. D. Harpprecht,
 in Cons. nov. 82. n. 24. & 25. Magnif. Dn. D. Schœpf, in Dec. 262. n. 41.
- (h) Magis tamen iterum vel minus roboris habebit tale testimonium pro ma-
 gnitudine objecti. vid. illa, quæ in hoc §. deducta sunt.
- (i) Heic facile intelligitur, gradus probabilitatis iterum diversos esse pro ra-
 tione conjunctionis, sive propioris, sive remotioris, imo quandoque pro
 ratione & quantitate affectuum in casibus singulis. Sic *testimonium paren-
 tum sine dubio infimo gaudet probabilitatis gradu*; nulla enim arctior datur
 sanguinis conjunctio, quam quæ intercedit inter parentes & liberos, imo
*liberorum & parentum testimonium minori adhuc gradu probabilitatis sese
 commendare, quam illorum, quorum in classe secunda hujus sphi mentio facta
 est*, venditoris scilicet, si de evictione agatur &c., facile est demonstratu;
 Non solum enim quoque certo & directe hi commodum vel damnum pe-
 cuniarum

pecuniarium ex testimonio reciproco expectare possunt, quia scilicet sibi invicem sunt necessarii heredes ab intestato; verum & ultra hanc rationem accedit adhuc naturalis amor, qui intercedit inter parentes & liberos, adeoque duplex heic præsto est ratio, cur minoris sit fidei hujusmodi testimonium. Sic porro *respective minori probabilitatis gradu gaudet testimonium liberorum in potestate constitutorum, quam emancipatorum*, propter periculum majoris metus reverentialis; hinc & horum testimonium iterum *minori sese commendat probabilitate, quam parentum testimonium*, quia præter rationes parentum testimonio derogantes accedit adhuc metus reverentialis. Sic etiam iterum minus probabilitatis præ se fert testimonium uxoris pro marito, quam parentum & liberorum; non solum enim heic eadem ut plurimum & plerisque in locis est spes succedendi, adeoque commodum pecuniarium, verum etiam metus reverentialis, amorque conjugalis; & accedit insuper, quod plerisque in locis, imo ubique fere in Germania, obtineat societas conjugalis. vid. B. D. Lauterbach, in Diss. de ære alien. in societ. conjug. contracto solvend. per tot. B. Dn. D. Harpprecht, in Disp. de societ. conjug. Quæ iterum gravis est ratio, cur magis directe conjugum, quam liberorum & parentum, intersit, an conjuges victores evadant, nec ne? *Omnes igitur hi ne accedunt quidem ad classem secundam hujus § phi*, licet eorum testimonium non plane nullius sit momenti, sed omnino aliquid ad minimum præsertim certis in casibus operetur, si scilicet alii testes æque facile haberi non possint (§. 150. not. a.). B. D. Lauterbach, in Coll. d. tit. de Testib. §. 29. B. Dn. D. Grafs, Cons. Tub. vol. 5. Cons. 100. n. 25. seqq. In quibusdam tamen causis plene probant, ut, si agatur inter utrinque æqualiter conjunctos, quia tunc cessat ratio.

(k) Si tamen subditi in causis dominorum examinandi sint, requiritur, ut juramentum, quo dominis obstricti sunt, ad illum actum remittatur. Carpzov, P. I. const. 16. def. 64. B. D. Lauterbach, in Coll. d. tit. de Test. §. 34. Idem, in Cons. Tub. vol. I. cons. 23. n. 38. Sic &, si testes de universitate in causis universitatis, licet non singulos concernentibus, examinentur, quoque juramentum, quo tanquam Cives Universitati adstricti sunt, illis est remittendum ex similitudine rationis. Quodsi hæc remissio omissa sit, adhuc fieri debet, & testes, si fieri possit, denuo examinandi sunt; quodsi tamen relaxatio juramenti amplius fieri non possit, non quidem nullæ sunt hujusmodi depositiones, sed tamen non tanta probabilitate sese commendant, quanta sese commendarent, si vinculo juramenti fuissent soluti.

(l) Loquimur heic de gloria quadam incerta & inani, qualis sese exerit in casibus propositis. Secus igitur res sese habet & aliud judicium ferendum est, si testis existimationis simplicis veram jacturam metuat; cum enim fama pari passu cum vita ipsa ambulet, adeoque ut plurimum homines famam omnibus opibus anteponant: omnino hoc casu minor erit gradus probabilitatis, quam in classe secunda, ubi saltem de damno pecuniario sermo erat.

(m) Diversi iterum heic assignari possent gradus, pro gradu existimationis vel jacturæ existimationis, quam tales expectare forte possunt. Sic *respective minima inter casus hos allegatos probabilitate sese commendat testimonium Judicis, in causa, in qua judicavit*; Plus enim dedecoris Judex metuere potest ex sententia, quæ retractatur, quam Advocatus, quia Judex in utrius-

que

que partis momenta inquirere, & ex illis pro justiore pronunciare potuit; quod secus sese habet in Advocato. At *Advocati testimonium iterum minus præ se fert probabilitatis, quam testimonium Procuratoris*, quia Procurator nonnisi mutam personam gerit, Advocatus autem totam causam dirigit. Posset equidem heic dubium alicui suboriri ex eo, quia Procuratores post Litis Contestationem fiunt Litis domini, adeoque perinde habentur ac Principales litigantes ipsi; verum dominium hoc Litis admodum fictitium est, imo finito processu quoque finitur, adeoque fidei Procuratoris parum obstat. *Minima ignominia redundat denique in tutorem, in causa pupilli testem agentem, si scilicet non aliquando actio tutela ipsi sit metuenda*, quia hic utplurimum causis Advocatis & Procuratoribus committit &c.

(n) Diverfum igitur iudicium ferendum est, si res ita comparata sit, ut forte Judex, Advocatus vel & Tutor, propter negligentiam commissam, regressum metuat; tum enim spectat casus ad classem secundam.

(o) Quodsi vero donatio non sit simplex, sed remuneratoria, aliud erit dicendum, & casus spectat ad classem secundam; tum enim locum habet evictio, adeoque donatori regressus metuendus est. L. 27. L. 34. §. 1. ff. de donat. B. D. Lauterbach, in Colleg. Theoret. Pract. tit. de Evict. & duplæ stipul. §. 17.

§. 153.


Accedimus denique adhuc ad numerum testium a LL. requisitum; hic enim, si non præsto sit, itidem inde exoritur probabilitas juridica; de quo casu igitur paucissimis agendum erit. Requiritur ad probationem plenam ad minimum duo testes omni exceptione majores (a). *Ubi igitur unicus saltem præsto est testis, idemque omni exceptione major, ibi est probatio semiplena (b);* ubi sunt duo, quorum alter est omni exceptione major, alter non est, habemus probationem semiplena majorem; ubi est unus non omni exceptione major, habemus semiplena minorem probationem (c). Sed quid, si præsto sint duo testes, quorum uterque non est omni exceptione major? & distinguendum esse putem, *an uterque laboret defectu gravissimo, & qui maxime derogat fini probationis, an non adeo gravi? casu priori, v. gr. si præsto sint duo injurati, vel duo criminosi, vel & duo testes de auditu &c. probabilitatem nequidem ad semiplenæ probationis gradum ascendere vel vix hunc quandoque attingere putem*; cum enim inter semiplenam probationem, & hasce præsumptiones leves, multi adhuc interjaceant gradus intermedii, non unus saltem, utique, licet duo hujusmodi concurrant, nondum superant gradum probabilitatis omnium reliquorum interjacentium; *si vero præsto sint testes, non gravissimis defectibus, sed intermediis, laborantes, omnino efficient semiplenam*

Quantus
probabilita-
tis gradus ex
numero
testium oria-
tur?

miplenam probationem vel paulo majorem; sic v. gr. duo sanguine conjuncti, vel duo Judæi, vel duo, qui levis notæ macula notati sunt (§. 151. & 152.), efficient probationem semiplenam vel paulo majorem; quodsi vero defectus sint minimi, qui testibus gradum probabilitatis a semiplena probatione haud multum distantem relinquunt, probatio erit semiplena major, imo proxime accedet ad plenam probationem. v. gr. si duæ fœminæ producantur, vel uterque testium sit minor 20. annis in criminalibus &c., & sic ex præmissis facile dijudicari poterit aliquo modo gradus probabilitatis in casibus obvenientibus.

- (a) Singulare quid tamen sancitum est in Jure Canon. can. 2. & 3. quæst. 4. caus. 2. ubi Episcopus vel Præsul nonnisi 72., Presbyter Cardinalis 44., Diaconus Cardinalis 27., Subdiaconus & minorum ordinum Clerici nonnisi 7. testibus convinci posse, statuitur. Id, quod non solum ipsi Pauli Apostoli effato I. ad Timoth. 5. v. 19. e diametro contrariatur, nec ideo etiam hodie observatur, vid. B. Dn. D. Harpprecht, Cons. nov. 44. n. 626. seqq. verum etiam omnino notatu dignum est, quod glossa ad dictos Canones, ipsum summum Pontificem duobus testibus convinci posse, adfirmet; ita, ut eapropter æque, ac ipse Diabolus, damnandus sit, vid. B. Dn. D. Harpprecht, c. 1. n. 629.
- (b) Dantur tamen & casus excepti, in quibus & unicus testis sufficit, v. gr. in probanda rei innocentia. Frommann, de Innocentiæ Præsidio, th. 30. sqq. inter mercatores, modo alia concurrant adminicula; in Possessorio summa-riissimo, si officiales deponant in causis ad eorum officium spectantibus; de pluribus casibus vid. Farinacius, de test. quæst. 26. n. 18. in fin. add. Dn. D. Lauterbach, in Coll. Theor. Pract. tit. de probat. §. 12. & 33. quo & ille referri potest, si testis de facto proprio deponat. B. Dn. D. Harpprecht, Resp. 11. n. 124. add. Leyser, spec. ad ff. 283. n. 28.
- (c) B. D. Lauterbach, in Coll. Theor. Pract. tit. de probat. §. 3.





CAPVT III.

PARS II.

SECTIO III.

DE PROBATIONE PER INSTRVMENTA.

§. 154.

Sequitur jam tertius probandi modus, per Instrumenta scilicet, ubi itidem gradus probabilitatis, si unum vel alterum Instrumentorum requisitum deficiat, aliquo modo determinandus est. Instrumenta vel publica sunt, vel privata; *publicum dicitur, quod a Magistratu vel persona publica confectum vel confirmatum est, sive tacite, sive expresse*. Hinc triplici respectu dantur Instrumenta publica, 1.) illa scilicet, quæ a persona publica jurata, auctoritate Magistratus, confecta sunt; quo spectant v. gr. Protocolla publica judicialia (a); aut quæ non jussu Magistratus, sed tamen a personis publicis, v. gr. Notariis publicis, confecta sunt; quo & referuntur Notariorum Protocolla, ex quibus Instrumenta conficiuntur (b). 2.) Quæ quidem a privatis confecta, sed a Magistratu subscripta vel subsignata sunt, & hæc nituntur expressa Magistratus confirmatione (c), vel 3.) quæ a privatis quidem scripta sunt, sed in Archivis publicis asservantur (d), quæ tacita nituntur Magistratus auctoritate. Privatum instrumentum est, quod a privatis mere confectum est (e). De singulis erit dicendum.

Transitus ad
tertium pro-
bandi mo-
dum per in-
strumenta.

- (a) C. 2. X. de fide Instrum. B. Dn. D. Harpprecht, Conf. nov. 70. n. 190. B. Dn. Sam. Stryk, in Diff. de Jure protoc. c. 5. & 6. Jus Prov. Wurt. P. I. tit. 37. §. welcher besiegelte Brief etc. p. 129.
- (b) L. 30. C. de donat. L. ult. C. de re judic. B. D. Lauterbach, in Coll. tit. de fid. instr. §. 45. B. Dn. Sam. Stryk, in d. Diff. de Jure protoc. c. 2. seqq.
- (c) d. C. 2. X. de fide instrum. verb: aut Authenticum Sigillum habuerint, pr. Inst. de eint. vend. L. 8. §. 15. ff. quib. mod. pign. vel hypoth. solv. B. D. Lauterbach, in Coll. tit. de fid. instrum. §. 7.
- (d) Auth. Ad hæc. C. de fide instrum. L. 30. L. 31. C. de don. L. 10. ff. de probat. L. ult. C. de re judic. B. D. Lauterbach, in Coll. d. tit. de fid. instr. §. 7. & 8. B. Dn. D. Harpprecht, in Conf. nov. 99. n. 27. seqq. Huc & spectant, si inter privatos agatur, omnes scripturæ, omniaque documenta, asservata in scriiniis civitatum vel pagorum. Jus Prov. Wurt. P. I. tit. 34. Rubr. Rhodel, Urbar. Zinsß etc. p. 130. Besold, ad Jus Prov. Wurt. P. I. th. 69.
- (e) L. 5. 6. 7. C. de probat. L. 9. C. de fid. instr. B. D. Lauterbach, d. tit. de fid. instr. §. 12.

§. 155.

§. 155.

Enarrantur
Protocolli
judicialis
requisita.

Prima igitur species Instrumentorum publicorum illa est, quæ a persona publica jussu Magistratus, vel & ab ipso Magistratu, confecta sunt (§. 154.); huc præcipue spectant Protocolla publica judicialia; dispiciemus igitur de Requisitis Protocolli, ut, si de his constet, determinari possit, quanta remaneat probabilitas, uno vel altero Requisito deficiente; Protocollum igitur omnibus suis partibus absolutum, & plene probans, sequentia desiderat Requisita. Imo, ut *Persona Protocollum conscribens sit persona publica*, quæ vulgo dicitur, Actuarius, Secretarius, in Camera Imperiali Protonotarius (a), eademque jurata (b), & ut hæc persona ipsa propria manu Protocollum conscribat (c), nisi propter causas legales impedita sit, tum enim & jussu & auctoritate judicis alius admittitur substitutus, qui tamen in causis alicujus momenti quoque juramento debet esse adstrictus, quia potissimum Protocollum nititur fide scribentis (d), imo subjiciendum erit ab Actuario, quod ipse fuerit impeditus, & hic vel ille auctoritate judicis Protocollum confecerit (e); Ideo, ut *Protocollum fiat jussu & auctoritate judicis* (f). Illud, ut *omnia fideliter & ordine adnotata & conscripta sint* (g), hinc addi debet, 1.) dies & Consul (h), 2.) locus, 3.) nihil, in substantialibus scilicet, rasum vel deletum esse debet (i), 4.) fieri debet mentio judicis, partium, & Actuarii (k), 5.) abstinendum est ab abbreviaturis insolitis, &, quantum fieri potest, a cyphris (l). IVto denique requiritur, ut *præsertim in Criminalibus omnia de verbo ad verbum notentur, &, quantum fieri potest, formalia ipsa verba retineantur* (m), quamvis hoc, ad omnem suspicionem amovendam & utile sit in Civilibus. Hæc igitur Protocolli rite confecti præcipua sunt requisita; jam igitur dispiciendum est, quonam deficiente major remaneat fides Protocollo (n)?

(a) B. Dn. Sam. Stryk, in Diff. de jure protocoll. c. 5. n. 23. sqq. B. Dn. D. Harpprecht, in Resp. 48. n. 36. Celeb. Dn. Estor, in dem teutschen Reichs-Process, sect. 89. §. 2396. Celeb. Leyser, in spec. ad ff. 71. n. 1. 2. 3. Quandoque tamen & Protocolla conficiuntur ab officialibus in rebus ad eorum officia privative spectantibus; tum omnino hi ipsimet Protocollum conscribere possunt, non adhibito Actuario, modo reliqua requisita præsto sint, Imum scil. Illud & quandoque IVtum Dn. Sam. Stryk, d. Diff. c. 5. n. 49. sqq. c. 11. X. de probat. Sic non raro videmus, in nostro Ducatu, inquisitiones primas in delinquentes fieri a Præfecto in præsentia duorum Scabinorum, quo casu ipse Præfectus Protocollum conscribit, vel & quandoque in causis

- causis civilibus, quatenus coram Præfectis peraguntur, ab his Protocolla conficiuntur, quæ vocantur *Bogt=amtliche Protocolle*, atque omnino plenam merentur fidem. B. Dn. D. Harpprecht, Resp. 92. n. 178. Besold, The-saur. Pract. voc. *Gericht=Acta*.
- (b) Ord. Cam. P. I. art. 59. rubr. *der Gerichtsschreiber und Leser=Uhd.* Fulvius Pacianus, Tract. prolixo de probat. L. I. c. 65. n. 72. B. Dn. Sam. Stryk, in d. Diff. c. 5. n. 27. sqq.
- (c) B. Dn. Stryk, d. l. n. 38. Celeb. Dn. Estor, d. l. §. 2398.
- (d) Dn. Stryk, c. l. n. 47. Jus Prov. Württ. P. I. tit. 6. §. *Wir wollen auch*. pag. 42.
- (e) Dn. Stryk, c. l. n. 44. 45. 46. Dn. Estor, c. l. §. 2398.
- (f) Stryk, c. l. n. 52. Dn. Estor, d. l. §. 2396. in not. n. 2. Sufficit tamen & tacitus jussus vel præsumtus, v. gr. si de rebus quæstio sit, de quibus regulariter Protocollum confici consuevit. Dn. Stryk, c. l. c. 5. n. 53.
- (g) Dn. Stryk, d. l. c. 5. n. 54. sqq. Brunnemann, in Proc. Civ. c. I. n. 81. Dn. Estor, d. l. §. 2400.
- (h) Dn. Stryk, c. l. c. 5. n. 56. Dn. Estor, d. l. §. 2397.
- (i) Dn. Stryk, d. l. c. 2. n. 48. sqq. Dn. Estor, d. l. §. 1396. in not. n. 4.
- (k) Dn. Stryk, d. c. 5. n. 56. Dn. Estor, d. l. §. 2399.
- (l) Dn. Stryk, d. l. c. 5. n. 60. junct. c. 2. n. 45. sqq.
- (m) Ord. Crim. Carol. V. art. 184. sq. Carpzov, in Proc. Crim. P. 3. quæst. 113. n. 53. Dn. Stryk, in d. Diff. c. 5. n. 58. 59.
- (n) Cum Requisiti IIIⁱⁱ, submembra saltem ad bene esse, & ut eo certius de veritate Protocollⁱ constet, desiderentur; facile patet, si reliqua requisita recte sese habeant, hæc præcise non ita necessaria esse, ut eorum omisso statim vitiet Protocollum, sed hoc nihilominus plene probare; quamvis nulli adcurato Actu^{ario} suaderem, ut illa omitteret. Sic, licet dies & Consul nunquam omittendus sit, si tamen per accidens tempus non expressum sit, ideo totum Protocollum vitari non arbitror, modo non tempus substantialia causæ merita concernat; sic porro loci omissionem pariter validitati Protocollⁱ derogare haud credo, cum illud in dubio pro se habeat præsumtionem legalitatis, adeoque, licet locus non expressus sit, in dubio credendum sit, illud in loco Judicii consueto confectum esse; Rittershusius, in Cons. Alt. Resp. 77. n. 20. B. Dn. D. Harpprecht, Resp. 83. n. 272. Nec etiam rasuram vel deletionem fidei Protocollⁱ derogare puto solam, modo de substantialibus & causæ meritis constet; sæpe enim partes aliter vel adcuratius sese explicant, vel & Actu^{arius}, loco expressionum obscuriorum, alias clariores ponit. B. Dn. Stryk, in d. Diff. c. 2. n. 52. sqq. & n. 75. sqq. Sic porro Judicis & Actu^{arii} mentionem non præcise necessarium esse arbitror, modo probatum non sit, Protocollum non jubente & præsent^e iudice confectum esse; iterum enim præsumtio fortissima solennitatis & legalitatis heic omnem fraudis excludit suspicionem. Ill. Dn. a Wernher, P. 6. Obs. 259. Dn. Estor, c. l. §. 2399. not. I. aliud dicendum est de partibus; harum enim mentio si non facta sit, obscurum sane erit Protocollum ipsum, nec apparebit, an præcise

præcise ad casum quæstionis pertineat? Multo minus abbreviaturæ vel cyphri vitiant Protocollum, modo sint cognitæ vel cogniti, & legi possint. Tum enim demum fidei aliquid protocollo detrahitur, si ex illo non satis appareat de voluntate partium aut circumstantiis actus gesti. Menochius, de arbitrariis Judic. quæst. L. 2. cas. 187. n. 20. Dn. Stryk, cit. Diff. c. 6. n. 15. Sed probe notandum est, me hoc casu adfirmare saltem, Protocollum tale nihilominus probare plene, licet unum vel alterum modo recensitorum requisitorum deficiat; quo ipso tamen non affirmo, hujusmodi defectum principalem, qualis est præsertim temporis adjectio, (reliqui enim non attenduntur) eatenus vitare Protocollum, ut suppleri debeat hic defectus, si suppleri possit. Nobis etenim saltim quæstio est de casu, si suppleri tempus forte propter causæ antiquitatem non amplius possit, & tum tale Protocollum nihilominus plene probare aſſitor. Si enim scripturâ privata, in Archivis publicis, vel & si inter privatos agatur, in Registris & Scriniis Civitatum vel pagorum inventa, plene probat, (§. 154. not. d.) cur non plene probet tale Protocollum a persona publica jubente iudice & de cetero ita conscriptum, ut sensum habeat? Suppono enim heic reliqua requisita, ut scil. 1.) a persona publica, 2.) præsentem & jubentem Iudicem, & 3.) ita conscriptum sit, ut substantialia & causæ merita contineat; quod si enim unum ex his Principalibus Requisitis deficiat, & hoc probatum sit, omnino non amplius plene probabit Protocollum, & tum de gradibus probabilitatis determinandis sermo est.

§. 156.

Conferuntur
inter se gra-
dus proba-
bilitatis, si
unum vel
alterum Re-
quisitorum
Protocollum
deficiat,

Quod si igitur quæstio incidat, de majori vel minori probabilitatis gradu, de tribus illis Requisitis Principalibus, an scil. Imo *Protocollum conscriptum sit a persona jurata, Ildo, an conscriptum sit jubente & præsentem iudicem, & Illio, an ordine conscriptum sit, & causæ merita contineat?* potissimum dispiciendum est. Reliqua enim requisita, per deducta, non vitiant protocollum, ut scilicet non amplius plene probet, licet, omissa temporis expressione, hoc adhuc suppleri debeat, si suppleri possit. (§. 155. not. n) *Ponamus deficere Illitium requisitum*, scilicet Protocollum merita causæ non satis exprimere, adeoque exinde probationi sufficientem non accendi lucem, *nullus sane inde nascetur gradus probabilitatis, si scil. plane genuinus sensus inde intelligi nequeat, verum concidet totum Protocollum*, quia scilicet, si Protocollum contradictoria contineat, vel tam obscurum sit, ut nullus sensus exinde erui queat, plane nulla iudici fit fides, adeoque hoc casu Protocollum ne tantillum quidem ad finem probationis confert. Quod si vero adhuc appareat sensus quidam, omnino Protocollum plenam habebit fidem, licet paullo obscurius sit, & tum per genuinas interpretationis regulas verus ejus sensus erui debeat.

debeat. Nec hic igitur casus efficit gradum probabilitatis; aut enim plane nullus verus Protocolli apparet sensus, & prorsus nihil probabit, aut apparet sensus, licet difficulter erui possit, & plene probabit, licet obscurior stylus Judici nāuseam creare possit. *Ponamus deficere Imum Requisitum*, scilicet Protocollum a persona non jurata, sed tamen præsente & jubente iudice conscriptum esse, & *in levioribus causis nihilominus plene probabit (a)*, *in majoribus vero causis non item*, neque tamen nullam fidem faciet hujusmodi protocolum, cum præsentia & jussus judicis fraudis suspicionem heic excludant; aliquo igitur probabilitatis gradu sese commendabit, sed quæritur quonam? *major sane erit gradus probabilitatis, quam si Protocollum absente nec jubente iudice fuerit confectum, licet a persona jurata*; cum enim in causis levioribus hujusmodi Protocollo plene credatur, licet a persona non jurata conscriptum sit, omnino non tantum fidei illi decrescet in causis majoris momenti, ut *nihilominus ad minimum gradus probabilitatis remanens sit semiplena probatione major*; vix enim credibile est, aliquem in iudicio in præsentia plurium Scabinorum & Judicis, imo & quandoque partium, falsâ Protocollo inserturum esse, quæ falsa facillime possent animadverti, si forte Judex vel Scabinus saltim Protocollum inspicerent, vel partes ejus Extractum peterent; criminis falsi enim in continenti posset convinci, *contra vero, si Protocollum absente nec jubente iudice confectum sit*, 1.) omnis probatio sola nitetur fide Actuarii, licet jurati, qui absente iudice tam facile falsi convinci non poterit; 2.) sine Judicis auctoritate & jussu intelligi nequit Protocollum judiciale, adeoque *tale Protocollum a solo actuario jurato absente iudice confectum ad summum pari passu ambulabit cum testimonio jurato unius testis, & ideo semiplenam forte constituet probationem (b)*; & tantum de Protocollo judiciali. (c).

(a) Dn. Stryk, in d. Diff. c. 5. §. 44. sqq.

(b) Dn. Estor, in dem teutschen Reichs-Proc. d. sect. 89. §. 2399. not. 1. III.
Dn. a Wernher, P. I. Obs. I. n. 3.

(c) Unum enim ex his duobus requisitis si deficiat, probatio non amplius plena est; adeoque hoc casu Protocolum nonnisi gradum quendam constituit probabilitatis; utrumque tamen si præsto sit, id, quod & exinde præsumitur, si protocolum in Archivo vel Scrinio civitatis ordinario inter alia protocol-
la inveniatur, omnino plene probabit protocolum, adeoque præsumtionem
solemnitatis & veritatis tamdiu pro se habebit, donec contrarium evidentis-
sime probatum sit; B. Dn. D. Harpprecht, Resp. 83. n. 272. Dn. Stryk, d.

Diff. c. 6. n. 1. sqq. hinc, licet hæc vel illa suspicio in contrarium allata fuerit, v. gr. atramentum esse diversum, litterarum tractus non ubique eodem esse, locum vel tempus non adjectum esse, &c. orietur quidem inde suspicio contra Protocollum, fidei tamen illius ideo nihil derogabitur, nisi contrarium plene probatum sit, adeoque Protocollum nihilominus plene probabit; nec igitur hoc casu præsto erit probabilitas Juridica, quæ quippe supponit plenam probationem deesse. (§. 27.)

§. 157.

Pergitur ad
Protocolla
Notariorum.

Protocolla judicialia sequuntur Protocolla Notariorum publicorum, quæ magnam cum prioribus habent similitudinem atque affinitatem. Dicuntur etiam Protocolla, quia a persona publica confecta sunt, Notario scilicet, qui est persona publica, auctoritate publica, in Imperio nostro Imperatoria, constituta eo fine, ut de rebus gestis, certæ & perpetuæ memoriæ gratia Instrumenta condant (*a*), vel, secundum Huberum (*b*), vir bonus, acta secundum LL. concipere peritus, eamque ad rem publice constitutus. Protocollum hoc est annotatio facti a Notario eo fine facta, ut exinde postmodum instrumentum conficiatur (*c*), & ita plene probat, ut in dubio ad illud, tanquam fundamentum & basin instrumenti, recurratur, si hoc dubium sit, vel alio laboret vicio (*d*). Constare autem debet requisitis suis, quorum quædam Protocollo non quidem vim plenæ probationis adimunt, cautelæ & utilitatis tamen gratia præsto esse debent, quædam autem derogant fidei protocolli ipsi, ita, ut, omisso tali Requisito, Protocollum non amplius plenæ probationis vim habeat.

(*a*) B. D. Lauterbach, in Coll. tit. de fid. instrum. §. 25. Juri Romano munus Notariorum fuit incognitum, quippe quod demum novioribus temporibus cognitum esse cæpit, & proprie fundatur in Ord. Maximil. tit. von Notarien. de an. 1512. Tabelliones enim & Tabellarii Romanorum differabant quam maxime ab hodiernis Notariorum munere, quamvis in praxi receptum sit, ut, quoties Jura desiderant tabellionem vel tabularium, hodie admittatur Notarius, abrogato illo veterum tabellionum munere. Lauterbach, cit. loc. Ord. Imp. de Ao. 1512. von Notarien. §. Es ist auch. &c. 15.

(*b*) Huber, in Prælect. ad ff. tit. de fide instr. §. 8.

(*c*) B. D. Lauterbach, in Coll. d. tit. de fide instr. §. 26. Huber, d. l. §. 6. Sam. Stryk, in d. Diss. de Jure Protoc. c. 1. n. 16.

(*d*) Anal. c. 11. X. de probat. Carpzov, in Jurispr. for. P. 1. Const. 17. def. 44. B. D. Lauterbach, in Coll. d. l. §. 26. Stryk, in cit. Diss. c. 4. n. 1. sqq.

§. 158.

§. 158.

Jam igitur de requisitis Protocolli Notarialis dispiciendum est. Inum *idemque maxime essentialia requisita sunt, ut tale Protocollo conscriptum sit a Notario publico jurato, & quidem propria regulariter Notarii manu (a)*, nisi hic impeditus sit, quo minus scribere possit, quo casu per alium substitutum Protocollo scribi potest, sed ita, ut hic verbotenus illud ex ore Notarii dictantis excipiat, & postea Notarius huic Protocollo nomen suum subscribat, facta mentione impedimenti, & quod alter Protocollo ex ore suo exceperit (b). II^{do} *requiritur, ut Notarius ad fidem actui conciliandam & Protocollo vel Instrumentum conficiendum rogatus sit (c)*, & quidem, si negotium plures concernat, v. gr. si de contractu quaestio sit, &c. ab omnibus, quorum interest (d). Licet autem rogationis in Protocollo ipso mentio haud fiat expresse, illa tamen nihilominus praesumitur (e). III^{io} *requiritur, ut ad minimum Notarius duos testes adhibeat, si scilicet agatur non de negotio solenni, sed de facto probando (f)*. IV^{to} *requiritur, ut Notarius nomen suum Protocollo adjiciat (g)*. V^{to}, *ut Protocollo confectum partibus & testibus praelegat (h)*. VI^{to}, *ut substantialia facti ibi contineantur (i)*, VII^{mo}, *ut absteineatur a rasuris, cancellationibus, abbreviaturis & cyphris insolitis (k)*; & haec sunt principalia hujusmodi Protocolli Requisite, quae si cuncta praesto sint, Protocollo omnibus numeris absolutum est; jam & ad id attendendum erit, quanam requisita tantum fidei Protocolli derogent, ut Protocollo non amplius plene probet, adeoque, ut inde nascatur probabilitatis quidam gradus, & quanam licet deficient, Protocollo tamen nihilominus plenae probationis vim relinquunt?

(a) Dn. Stryk, in Diss. de Jure protoc. c. 2. n. 16. sqq. Dantur tamen plures Notariorum species; sic quidam sunt Notarii Caesarei, quidam Apostolici, qui posteriores nonnisi in causis Ecclesiasticis, in foris Catholicorum, adhibentur; Caesarei iterum sunt vel simpliciter tales, vel immatriculati, Camerae scilicet Imperialis Matriculae inserti; olim quidem heic nulla erat differentia; in Ordinatione Camerali autem de Ao. 1555. P. 1. tit. 39. sancitum est, ut in Actibus Cameralibus officium suum exercere alius non possit, quam immatriculatus, sic appellationes, citationes, &c. coram & ab his fieri debent, & quidem sub poena nullitatis. Gail, Obs. Pract. lib. 1. Obs. 21. n. 6. & 7. add. B. D. Lauterbach, in Coll. d. tit. de fide Instr. §. 33. Haec tamen differentia nos directo non tangit, quia nobis sermo est de probatione, & quatenus Instrumentum a tali Notario confectum probet; qualia Instrumenta, in fidem facti cujusdam confecta, cum regulariter ipsa

materialia processus concernant, nec ad Actus Camerales proprie spectent, omnino & in Camera Imperiali probare debent. Hinc & talia instrumenta a Notariis licet haud immatriculatis confecta, si nimirum confecta sint ad probationem facti, antequam processus ad Cameraam erat devolutus, nihilominus & in ipsa inclyta Camera Imperiali plenam fidem facere, extra dubium est.

(b) Dn. Stryk, c. 1. c. 2. n. 24.

(c) B. D. Lauterbach, in Coll. tit. de fide instrum. §. 34. Dn. Stryk, d. 1. c. 2. n. 10. & 11. add. Nov. 44. pr. & c. 1. quæ, licet de tabellioné loquatur, hodie etiam ad Notarios extendenda est (§. 157. not. a.). & Ord. Imper. de anno 1512. §. und nachdem in allgemeinen Rechten u. Ratio, cur rogatio requiratur, est, ne Notarius, se ipsum ingerendo sponte, fiat suspectus, sicuti testis. L. 25. ff. de procurat.

(d) B. D. Lauterbach, in Coll. d. tit. de fid. instr. §. 34.

(e) Dn. Stryk, d. Diff. de jure protoc. c. 2. n. 13. dissentire tamen videtur D. Lauterbach, in Coll. d. 1. §. 34. cum Menochio, L. 2. præsumt. 81. n. 1. seq. sed hic loquitur de instrumentis solennibus, ille de protocollis, adeoque commode poterunt conciliari. Quoad protocollo enim Strykii sententia nobis videtur de jure verior; Notarius enim non rogatus, protocollum conficiens, contra officium suum peccaret, quod in dubio haud præsumendum est; nullibi enim expresse constitutum legitur, ut præcise mentio fieri debeat rogationis in protocollo, licet rogatio requiratur; multo minus constitutum est, ut, omissa mentione rogationis, protocollo nulla vel non plenæ probationis vis relinquatur.

(f) Notario enim absque testibus non creditur. Lauterbach, in Coll. d. tit. de fid. instrum. §. 40. testium autem qualitas & numerus dependet a natura negotiorum, quibus adhibentur. Sic in testamentis requiruntur 7. testes, qui requisita habent testium testamentariorum; sic ad conficiendos Codicillos requiruntur testes 5. &c. regulariter tamen, ubi de testibus saltem veritatis, non solennitatis gratia adhibendis quæstio est, sufficiunt duo testes ad ferendum testimonium habiles. Si forte non sint omni exceptione majores, tantum decrescet fidei protocolli vel instrumenti, quantum decrescit fidei testium ipsorum; de qua re vid. supra (§§. 144. & 151.)

(g) Dn. Stryk, d. Diff. c. 2. n. 25. & 27.

(h) Ord. Imp. de anno 1512. §. dann nachdem. & §. und am meisten. add. Stryk, d. 1. c. 2. n. 30. seqq.

(i) Dn. Stryk, d. 1. c. 2. n. 34. seqq. hinc communiter additur annus & dies, imo & locus. Dn. Stryk, d. 1. n. 41. reliqua requisita instrumentorum, ut indictio Romana, nomen Imperatoris &c. ad protocollorum fidem haud requiruntur. Stryk, ibid. n. 42.

(k) Dn. Stryk, d. 1. c. 2. n. 45. seqq. Ord. Not. de anno 1512. §. Item die Notarien.

§. 159.

Protocollum Notariale omnibus partibus absolutum constare debere 7. Requisitis, supra (§. 158.) dictum est. Ex his Requisitis Imum, Ildum, Illcium, Vtum & Vltum ita necessaria esse, ut,

Quænam requisita omiffa veritati facti derogent?

ut, uno vel altero omisso, Protocollum non amplius plene probet, quilibet facile intelliget. *Primum* enim Requisitum, cum Protocollo Norariali essentiale sit, vel ideo saltem necessarium esse, ad plenam Protocollo probandi vim conciliandam, quia, hoc remoto, scriptura non amplius est Protocollum Notariale, per se patet. *Secundum* Requisitum, rogatio scil. Notarii, ideo necessarium est, quia a partium dependet voluntate, quomodo-cunque fidem actibus suis comparare velint; quodsi igitur deficiat partium voluntas, negotium quoddam coram Notario peragendi, deficiet quoque fides Notarii, qui quippe, absque partium consensu, illarum negotiis sese ingerendi immiscendique jus non habet, adeoque tum ad minimum tanquam Notarius non publicam fidem faciet, neque hoc casu ejus Protocollum vel Instrumentum, pro documento publico, habebitur, sed quicquid factum fuerit, habebitur pro Instrumento privato & depositione testis cujusdam privati, nec adeoque plenam fidem merebitur, sed constituet saltem gradum quandam probabilitatis. Quodsi tamen in Protocollo rogationis mentio omissa fuerit, hæc nihilominus in dubio intervenisse præsumitur (§. 158. not. e.). *Tertium* Requisitum, nimirum adhibitio testium, quia maxime fides Protocollorum & Instrumentorum inde dependet, quin omnino necessarium sit, eoque omisso Protocollum non amplius publici instrumenti, ejusdemque plene probantis, vim habeat, facile intelligitur. *Quintum* Requisitum, prælectio scilicet, cum itidem ad probationis vim non parum faciat, omnino etiam necessarium hujusmodi Protocolli partem esse, vel ex eo clarum est, quia alias partes & testes nescirent, quid Notarius scripsisset, adeoque testes, qui tamen ad majorem Protocollo fidem conciliandam adhiberi debent, non solum inutiles essent, verum etiam non satis constaret, an Notarius mentem partium veram nosset atque cepisset? consequenter, hoc requisito omisso, omnino finis probationis, fidei scilicet Judici faciendæ & veritati facti, haud parum detraheretur (a). Eadem etiam ratio Requisiti *Sexti*, ut scilicet Protocollum substantialia facti probandi contineat (b); hoc enim omisso, omnino ex Protocollo factum ipsum probari haud poterit, adeoque finis probationis quam maxime cadet; imo, si plane substantialia actus ex tali Protocollo haud appareant, Protocollum ne minimam quidem fidem faciet; omnia enim essentialia facti ipsum factum probandum constituunt;

hisce

hisce igitur sublati, nihil etiam de facto ipso probatum erit, circumstantiæ tamen, vel antecedentes, vel consequentes, de quibus forte ex Protocollo tali constat, indicium sive propius, sive remotius, constituent, pro illarum ratione (§. 98.). Hisce igitur Requisitis deficientibus, protocollo vim plenæ probationis amittet, & gradum saltem quendam probabilitatis juridicæ constituet.

(a) Licet autem in ipso protocollo prælectionis mentio haud fiat, illa tamen æque ac Notarii rogatio, erit præsumenda, propter præsumptionem delicti exclusivam, quæ omnino non permittit supponere, quod Notarius juratus officium suum neglexerit; imo, si dolus Notarii supponatur, poterit mentionem facere in instrumento prælectionis factæ, licet revera non facta sit, adeoque, si dubium circa prælectionem subnascatur, illa nihilominus aliunde probanda erit. Cum igitur mentio prælectionis, in instrumento facta, ipsam prælectionem per se haud probet, nec instrumento majorem fidem conciliet, nihil sane instrumento derogabitur, licet expressa prælectionis mentio facta haud sit, modo ab adversario probari nequeat, prælectionem plane omis- sam esse.

(b) Quæritur heic, num adjectio temporis & loci, vel & expressio nominum testium, sint partes essentielles, adeoque salva protocolli fide omitti nequeant? ita quidem sentit Dn. Stryk, in d. Diss. de jure protoc. c. 2. n. 41. ibique alleg. Nicol. Everhardus, de fide instrum. c. 3. n. 54. Nobis omnino videtur distinguendum esse, inter adjectionem loci & temporis, & expressionem nominum testium. Priori enim casu locus & tempus non semper spectant ad substantialia facti, adeoque horum omissionem fidei protocolli eatenus derogare haud arbitror, ut illud non amplius plene probet (§. 155. not. n.). Ulricus Huber, in Præl. ad ff. tit. de fid. instr. n. 4. nisi scilicet præcise notio temporis vel loci ingrediatur facti substantialia; licet consultius & melius sit, tam temporis, quam loci, semper mentionem facere. Posteriori casu omnino plenæ protocolli probationi nonnihil detrahi putem; adhibitio enim testium quam maxime ad finem probationis facit, & si ignorentur testium nomina, nemo certus esse potest, an Notarius testes adhibuerit, nec ne? cum tamen Notario absque testibus plene haud credatur. Adde, quod aliquando, si instrumenti fides in dubium vocetur, testes hi producantur; quodsi vero eorum nomina ignorentur, eorum productio erit impossibilis. Sin hic defectus aliunde suppleri & probari possit, testes hos vel illos negotio adhibitos esse, protocollo nihilominus plenam adscribere probationem haud dubitarem; nulla enim tum præsto est ratio, cur fidei hujusmodi protocolli aliquid derogetur? Huber, d. l. n. 5. quodsi enim eo casu, si testes protocollo subscripserunt, adeoque aliunde de testibus constat, non præcise necesse est, ut Notarius illorum mentionem injecerit, idem sine dubio dicendum erit, si eorum adhibitio, v. gr. per testes, vel aliunde, probetur; quamvis in eo nolum Hubero subscribere, quod in instrumento vel & protocollo præcise subscriptio testium necessaria sit. Const. Imp. de anno 1512. §. die Notarien sollen auch. Nov. 47. c. 1. & Nov. 73. add. B. D. Lauterbach, in Coll. tit. de fide instrum. §. 41.

§. 160.

Contra Requisite quartum & septimum Protocollo haud ita censentur esse necessaria, ut, illis prætermis, Protocollo statim plenam probandi vim amittat, sed illi hoc casu nihilominus plenam fidem tribuere equidem haud ambigerem. Quod enim quartum Requisite, Notarii scilicet subscriptionem, attinet, illa absque dubio ideo requiritur, ut constet, an Notarius Protocollo confecerit? quodsi vero de hac quæstione aliunde constet, cadit ratio hujus requisiti, adeoque Protocolli fidei nihil sane derogabitur (a). Eadem ratio est Requisite septimi, quodsi enim rasuræ non ita sint comparatæ, ut protocolli sensum dubium reddant, nihil obstat, quo minus tale Protocollo nihilominus plene probet (b), licet rasuræ, si non constat de earum ratione, suspicionem quandam, sed generalem saltem, contra Protocollo efficiant, quæ, accedentibus forte aliis adminiculis urgentioribus & gravioribus, ejus fidei derogare possunt. Aut igitur constat adhuc de sensu Protocolli vero, aut non; priori casu rasura nihil plane Protocolli fidei derogabit, sed illud nihilominus plene probabit; posteriori casu, omnis plane ejus vis concidet (§. 156.). Idem dicendum erit de Requisite sexto.

Quædam requisita, licet omissa, ipsi protocolli veritati nihil derogant.

(a) Dn. Stryk, d. Diff. de jure protoc. c. 2. n. 29. seqq. eadem ratio erit subscriptionis, quæ quippe quandoque etiam in ipsis instrumentis solennibus juramento suppleri potest. B. D. Lauterbach, in Coll. tit. de fide instrum. §. 41.

(b) Dn. Stryk, in d. Diff. c. 2. n. 62. seqq.

§. 161.

Quodsi igitur de probabilitate quadam ex hujusmodi Protocollo oriunda, quæstio sit, adtendendum erit saltem ad Requisite I. II. III. & V. & dispiciendum erit, quonam deficiente, major remaneat probabilitatis gradus? Ponamus jam, tale Protocollo a persona privata (a), & non a Notario publico, confectum esse; minimus sane Protocollo remanebit probabilitatis gradus; tum enim hujusmodi Protocollo publici Instrumenti fidem haud mereri vel ex eo patet, quia deficit persona publica jurata, cui soli hujusmodi Instrumentorum publicorum conficiendorum jus competit; erit igitur tum tale Instrumentum vel Protocollo scriptura privata, & eandem vim habebit, cum testimonio scripto injurato, de quo supra (§. 135.), h. e. præsumtiunculam vix adten-

Conferuntur inter se illa Requisite, quæ, omissa, fidei protocolli detrachunt.

adattendendam constituet. *Major jam priori remanebit protocollo probabilitatis gradus, deficiente Requisito tertio, scilicet, si Protocol- lum quidem conscriptum sit a Notario publico, sed testes non fuerint adhibiti (b).* Licet enim hoc casu Protocol- lum tale pro Instru- mento publico haberi nequeat, cum Notario plene haud creda- tur sine testibus; habebit tamen vim instrumenti privati, & qui- dem majorem, quam testimonium testis injurati; cum Notarius jamjam sit juramento adstrictus, adeoque ad semiplenam probatio- nem prope accedet (c). *Major iterum Protocollo supererit probabili- tatis gradus deficiente Requisito quinto, si scilicet Protocol- lum legitime prælectum non sit;* sine dubio enim minus fraudis metuendum est a Notario, qui in præsentia testium instrumentum & protocol- lum conscripsit, quam a tali, qui remotis testibus tale conscri- psit, licet Protocol- lum testibus non præcise relegerit; non so- lum enim heic supponitur Notarius juratus, verum & præsentia testium, quæ omnino, licet Protocol- lum prælectum non sit, ad minimum magis fraudis suspicionem excludit, quam si plane ad- hibiti non essent testes; minus enim præsumendum est, Nota- rium coram testibus falsa Protocollo suo inseruisse, quam testi- bus remotis, quia non solum statim per testes criminis falsi con- vinci posset, sed & Notario metuendum esset, ut testes Proto- colli prælectionem sponte peterent, quo casu facillime ejus per- jurium detegi posset. *Majori itaque gradu probabilitatis adhuc sese commendabit hoc casu Protocol- lum, quam semiplena probatio; Mi- nimè tandem fidei Protocolli derogabit defectus Requisiti secundi, si sci- licet Notarius rogatus non sit, nisi, (quod tamen semper fere hoc casu accidit,) insimul deficiat Requisitum quintum, prælectio scilicet; tum enim gradus probabilitatis minor erit, quam casu priori, aut major, quam si Requisitum primum vel tertium defi- ciat.* Prælectione enim facta, major iterum Protocollo fides ac- cedit, licet itidem hoc casu Protocol- lum publici Instrumenti vim non habeat, quam sine partium, quarum interest, consensu nancisci nequit; *major itaque hoc casu præsto erit probabilitatis gra- dus, quam probatio semiplena;* 1.) enim præsto erit testimonium ju- ratum Notarii publici, licet hoc casu tanquam persona privata consideretur; 2.) præsto sunt testes alii, qui, licet non jurati, præsumtionem tamen aliquam constituunt, & 3.) facta supponi- tur prælectio, quæ itidem magis fraudis suspicionem excludit.

(a) Sed quid dicendum de hoc casu, si Notarius quidem juratus adsit, sed de-
fectu

- fectu laborans, qui illum ad officium & munus Notarii suscipiendum & gerendum reddit inidoneum? Resp. hoc casu quidem testimonium erit privatum, sed nihilominus juratum, & majoris vel minoris fidei erit pro gravitate defectus; de quo casu vid. requisita testium & gradus probabilitatis exinde resultantes (§. 145. & 151.). add. Ord. Imp. de anno 1512. §. 2. *Erstlich ordnen wir.* & quia supponuntur alii testes, licet injurati, adhibiti esse, major nihilominus erit gradus probabilitatis, quam testimonium juratum unius testis, cui vero nulla alia accedunt adminicula, (sed NB. si testes protocollo nomina sua propria manu subjecerint, alias adhibitio testium sola nititur fide instrumentum conficientis); imo etiam ex rogatione & prælectione iterum major accedet gradus probabilitatis, propter tacitam partium adprobationem; hæc ex præmissis in casibus obvenientibus facile poterunt determinari.
- (b) Alia est ratio, ubi testes requiruntur non probationis, sed solennitatis gratiâ; tum enim totum corruebat negotium (§. 158. not. f.).
- (c) Non absque ratione addo, *ad semiplenam probationem prope accedet.* Deficit enim testium examen solenne, quod quippe requiritur, si testis, licet juratus, semiplene probare debeat (§. 123. & 124.).

§. 162.

Haftenus egimus de Protocollis Notariorum; jam accedimus ad Instrumenta publica ab illis confici solita, quæ scilicet ex Protocollis formantur, additis solennibus consuetis, adeoque & a DDribus vocantur extensa (a). Cum igitur Instrumenta ex Protocollis conficiantur, facile patet, non solum omnia Protocollorequisita etiam in Instrumentis extensis & solennibus desiderari, sed & plures adhuc alias solennitates requiri; quæ solennitates tam necessariæ sunt, ut, vel una ommissa, Instrumenta nulla sint, & vim suam amittant (b); sed saltem qua Documenta publica, quin enim tanquam privatæ scripturæ, nihilominus aliqualem probationis vim habeant, & gradum quendam probabilitatis constituent, nemo facile negabit, quia forma & essentia Instrumenti privati in talia Instrumenta quadrat (c), & sæpissime hujusmodi solennitates deficientes supplentur per alias probationes (d).

Fit progressus ad Instrumenta Notariorum.

- (a) Dn. Stryk, in d. Diff. de Jure Protoc. c. 3. n. 1. 2. 3.
- (b) B. Dn. D. Harpprecht, in Conf. nov. 44. n. 266. seqq. & Conf. nov. 72. n. 26. seqq.
- (c) Excellent. inter nos Jur. & Philos. Mor. Professor Dn. Christian. Ferd. Harpprecht, in Disp. de Actuum Conversione rel. per tot.
- (d) B. D. Lauterbach, in Coll. Theor. Pract. tit. de fid. instrum. §. 41. Ulr. Huber, d. t. n. 4. not. *. & **. add. ibi alleg. Dn. Menken, ad Ord. P. S. tit. 24. §. 2.

§. 163.

Requisita in-
strumento-
rum Nota-
rialium de-
scribuntur.

Solennitates, quæ, præter illa Protocollorum requisita (§. 158.) tradita, in Instrumentis publicis & solennibus observandæ sunt, sequentibus absolvuntur: Primo, *tale Instrumentum*, quatenus in *Camera Imperiali producitur, inscriptum sit membranae vel Pergameno*, non papyro (a), secundo, *incipiat ab invocatione Nominis Divini* (b), tertio, *addatur annus nativitatis Salvatoris nostri Jesu Christi* (c), quarto, *Indictio Romana* (d), quinto, *Nomen Imperatoris regnantis* (e). Sexto, *Tempus*, & quidem specialissime, exprimendum est, quoad annum, mensem, diem, imo horam, & *Locus*, itidem usque ad Conclave, in quo actus gestus fuit (f). Septimo, *adji- cienda & exprimenda sunt nomina & cognomina testium* (g), & octavo denique desideratur *subscriptio & subscriptio Notarii* (h).

(a) B. D. Lauterbach, in Coll. d. tit. de fide instrument. §. 35. Ord. Imper. de anno 1512. von Notarien. §. Item die Notarien. 19. verb. In Pergamen, und nicht Papier ic.

(b) d. Ord. Imper. de anno 1512. §. Und nachdem. 3. verb. Im Anfang nach Anrufung Göttlichen Namens, von dem alle Gutthat kommt ic. B. D. Lauterbach, in Coll. d. tit. de fid. instrum. §. 37.

(c) d. Ord. Imper. de anno 1512. §. Und nachdem. 3. verb. Die Jahrzahl unsers Hehls ic. B. D. Lauterbach, d. l. §. 37. B. D. Harpprecht, in resp. 44. n. 269.

(d) d. Ord. de anno 1512. §. Und nachdem. 3. verb. Römisch Zins-Zahl, Indictio genannt ic. B. D. Lauterbach, in Coll. d. l. §. 38. Ulr. Huber, in Prælect. ad ff. d. tit. de fid. instrum. n. 4.

(e) d. Ord. Notar. d. §. Und nachdem. 3. verb. der Name des obersten Fürsten ic. & seq. §. 4. verb. doch also, daß auß wenigst im Begriff des H. Röm. Reichs der Name und das Jahr der Regierung eines Röm. Kaisers oder Königs, so zu derselben Zeit ist, zu setzen. B. D. Lauterbach, in Coll. d. l. §. 39. Id, quod & requiritur de Jure Civ. Nov. 47. c. 1. Add. Huber, d. l. n. 4.

(f) Ord. Notar. d. §. Und nachdem. 3. verb. darnach Monath, Tag, Stund, Mahlstatt, und NB. an welchem Ort derselben ic. B. D. Lauterbach, in Coll. d. tit. §. 39. B. D. Harpprecht, in Cons. nov. 44. dict. n. 269. Ut autem testes subscribant, non est necesse. Nov. 47. c. 1. Nov. 73. Lauterbach, in Coll. d. tit. §. 41.

(g) d. Ord. Imper. von Notarien. alleg. §. Und nachdem. 3. verb. Zu dem die Zeugen darzu genommen, deren aller Namen und Zunahmen klärllich beschrieben ic. B. D. Lauterbach, in Coll. d. tit. §. 40.

(h) d. Ord. Imper. c. 1. verb. Und zuletzt das Signet und Unterschrift der Notarien ic. B. D. Lauterbach, in Coll. d. l. §. 41. Et quidem requiritur regulariter Signum Notariatus, nec sufficit proprium Notarii Signum, quo alias

alias in negotiis privatis uti consuevit. d. Ord. Imper. §. die Notarien sollen auch. 16. verb. Noch auch sein gewohnl. Signet ohne Gewalt des Richters aus redlichen Ursachen verwandeln, ändern, oder mit eines andern Zeichen sein Instrument zeichnen solle u. D. Lauterbach, in Coll. d. l. §. 41.

§. 164.

Hæc requisita una cum illis, quorum supra (§. 158.), cum de Protocollis Notariorum ageremus, mentio facta fuit, requiruntur singula ad constituendum Instrumentum solenne (§. 162.), ita, ut, vel uno deficiente, Instrumentum non amplius habeatur pro documento publico, sed non aliter probet, quam Instrumentum privatum, id quod (dict. §. 162.) demonstratum fuit. Et quidem notandum est, licet in Protocollo Notariali quædam requisita præsumantur, quorum forte mentio in ipso Protocollo haud facta est, hoc tamen secus sese habere in Instrumento publico, & quidem ideo, quia in Instrumento publico, tanquam extenso, requisita tam probationis, quam solennitatis gratia desiderantur, adeoque, si vel unius in Instrumento mentio facta non sit, deficit solennitas & forma Instrumenti, adeoque Instrumentum vñ Documenti publici haud consequitur; Contra vero in Protocollo magis ad substantialia causæ respicitur, & ad illa potissimum attendendum est, quæ plus ad finem probationis, veritatem scilicet, conferunt (a). Hinc licet v. gr. præcise opus haud sit, ut in Protocollo mentio injiciatur rogationis Notarii; item prælectionis, sed hæc requisita præsumi possint; imo licet aliquando in Protocollo sufficiat, si unum vel alterum requisitum aliunde probari possit, v. gr. testes esse adhibitos, Protocollum a Notario esse scriptum, nec præcise & absolute necessarium sit, ut in ipso Protocollo nomen Notarii vel testium sit expressum (§. 159. not. a. & b. & §. 160.); nihilominus hæc omnia præcise in Instrumento debent esse expressa (b), alias Instrumentum, tanquam Documentum publicum, haud probat, sed fit privatum, & in hac qualitate majorem vel minorem gradum probabilitatis efficit, quo magis vel minus de veritate facti Judici ex illo constat.

Nec heic talia requisita præsumuntur, sicut in Protocollis Notariorum.

(a) Dn. Stryk, in sæpe alleg. Diss. de Jure Protocolli. c. 2. n. 40. 41. & 42.

(b) d. Ord. Notari. alleg. §. Und nachdem. 3. verb. und von derselben Bittung und Erforderung Anzeige gethan u. B. D. Lauterbach, in Coll. tit. de fide instrum. §. 34. B. Dn. D. Harpprecht, Cons. nov. 44. n. 266. & Cons. nov. 72. n. 26.

§. 165.

Solennitates
hæ externæ,
licet omiffæ,
semper ta-
men gradum
probabilita-
tis femiplena
probatione
majorem re-
linquunt.

Cum hæc requisita (§. 163.) recensita & Protocollorum requisitis superaddita saltem loco formæ externæ in Instrumentis desiderentur, nec proprie & directe ad eruendam veritatem faciant, facile patet, facti veritati hæc non tantum derogare, quantum illi derogant requisita supra (§. 159. & 161.) tradita, adeoque, hæc ibidem dicta, si deficient, in ordine ibi exhibito, veritati modo magis, modo minus derogare: si vero præsto sint, semper gradum probabilitatis esse femiplena probatione majorem (§. 161.) licet omnes hæ solennitates externæ deficient, gradum autem probabilitatis augeri eo magis, quo plures præsto sunt harum solennitatum externarum, & quandoque proxime accedere ad plenam probationem. Major tamen tali scripturæ accedit probabilitatis gradus, si additum sit tempus speciale, item locus (§. 163. n. VI.), quia quædam circumstantiæ concomitantes magis determinantur (§. 100.), quam si reliquæ ibidem recensitæ solennitates externæ observatæ sint, quæ ad ipsam facti veritatem nihil fere conferunt. Hinc & vix operæ pretium erit, de gradu probabilitatis, quem singulæ tali scripturæ conciliant, admodum esse sollicitum. Imo, si Instrumentum omnia reliqua requisita habeat, Imum illud (§. 163.) traditum, quod scilicet inscriptum debeat esse membranæ, non papyro, plane non obstat, quo minus instrumentum adhuc pro publico & plene probante habeatur, etiam in ipsa Camera, (extra Cameram enim hoc non requiritur,) quia scilicet hic defectus semper suppleri potest & debet, & hinc injungitur Partibus, ut illud inscribi curent pergameni (a).

(a) B. D. Lauterbach, in Coll. d. tit. de fid. instrum. §. 35.

§. 166.

Pergitur ad
catastra; hæc
sunt vel
Steuer-Bü-
cher, vel Lâ-
ger- oder
Zins- & Bü-
cher.

Ad Instrumenta publica ratione causæ efficientis, quæ scilicet auctoritate & jussu Magistratus conficiuntur, inprimis etiam referuntur Catastra sive Libri censuales; cum enim definitio instrumentorum publicorum illis conveniat, (§. 154.) illa etiam hisce accensenda & cum his tractanda esse facile patet (a). *Catastri* vocabulum generale est, & pro materia substratæ diversitate diversimode accipitur; in genere autem denotat instrumentum publicum, in quo sive Tributa & Collectæ, cum designatione facultatum singulorum Civium & Contribuentium, sive Census perpetui, jura,

ser-

servitutes, &c. cuique designatorum vel & fundo adhærentia, inveniuntur descripta (b). Unde patet, Catastra vel continere Consignationem facultatum Contribuentium, cum earum æstimatione & distributione collectarum, quo casu dicuntur *Steuer-Bücher, Steuer-Register, Saal-Bücher, &c. (c)* vel continere descriptionem jurium & servitutum, cuique designatorum vel certis fundis inhærentium, quo casu dicuntur *Läger-Bücher, Zins-Bücher, &c. (d)* de utroque specialiter agemus.

(a) Catastra Instrumentis publicis accensenda esse probant & Roos, sive, sub cuius præsidio Disputatio habita fuit, Joh. Volckmar Bechmann, Diff. Jenæ 1680. habit. de Æstimis, von Steuer- und Anlagß-Registern, th. 3. & 9. Struve, in Syntagm. Jur. Civil. Exerc. 28. n. 28. Frid. Wilh. Lyser, in Disp. de Revisione Catastri, c. 1. §. 5. 6. c. 2. §. 3. & c. 7. §. 2.

(b) Joh. Christoph. Freyesleben, Disp. Erford. 1680. habit. & Lipf. 1745. recus. de Libris censualibus ac judicialibus, von Erb- und Gerichts-Büchern, th. 5.

(c) Bechmann, cit. loc. th. 2. Freyesleben, d. Disp. th. 4. Wehner, Obs. pract. voc. Saalbuch. Lyser, cit. Diff. c. 1. §. 3. J. Prov. Württ. P. 1. tit. 34. rubr. Rhodel, Urbar-Zins-Steuer-Rechen-Stadt-und Dorf-Bücher.

(d) B. Dn. D. Harpprecht, in Cons. nov. 4. n. 174. Magnif. Dn. D. Schoepf, Dec. 311. pr. & Practici passim.

§. 167.

Catastrorum, sensu priori acceptorum, sive *derer Steuer-Bücher*, Requisita sequentia potissimum a DD. traduntur: I. ut rer *Steuer-Bücher*, *Requisita des* *conficiantur auctoritate publica (a)*, a personis, quibus id negotii *Bücher*. specialiter demandatum est, iisque *juratis (b)*; II. *præsentibus duobus vel tribus testibus (c)*; III. *citatis omnibus, quorum interest (d)*, IV. *ut omnes præstito juramento profiteantur facultates suas (e)*; V. *hæ describantur, & proportionetenus onera distribuantur (f)*; VI. *facta descriptione denuo prælegantur (g)*; VII. *ut subsequatur reiterata confessio, ad minimum illi, quorum interest, non contradicant cum aliqua specie (h)*; VIII. *accedat Commissarii vel Notarii & testium subscriptio & sigillatio (i)*; & denique, IX. si de uno vel altero requisito non constet ex Instrumento desuper confecto, wann *keine Urkund dabey befindlich, ut roboratum sit juramento Notarii & testium (k)*.

(a) B. D. Lauterbach, in Cons. Tub. vol. 1. Conf. 10. n. 30 - 32. Mevius, P. 4. Dec. 34. n. 3. B. Dn. D. Harpprecht, Cons. Nov. 4. n. 175. Bechmann, d. Disp. de Æstimis, th. 11. & 19. Freyesleben, in d. Disp. de Libris cen-

- cenfualibus & judicialib. th. 10. Lyfer, Disp. de Revis. Catastr. c. 1. §. 5. Demandari solet hoc negotium plerumque certis Commissariis, singulari iuramento adstrictis, qui, si antiquum Catastrum saltem renovent, dicuntur Renovatores.
- (b) Huic officio sæpe admoventur solent Notarii Publici, vel & præter Commissarium adhibetur Notarius, ut Instrumentum desuper conficiat, pro consuetudine cuiusque loci. Harpprecht, d. Cons. nov. 4. n. 175. & Freyesleben, d. l. th. 10.
- (c) Harpprecht, Cons. nov. 4. d. n. 175. Freyesleben, d. l. th. 10. & communiter testium loco adhibentur Syndici & defensores civitatum & pagorum, vel & Scabini, & quidem ideo, quia hi optime sciunt cuiusque facultates & personarum conditionem. Lyfer, d. Disp. c. 5. §. 2.
- (d) D. Lauterbach, in Confl. Tub. dict. vol. 1. conf. 10. n. 30. seqq. Mevius, P. 4. Dec. 34. n. 3. Harpprecht, d. Cons. nov. 4. n. 175. Bechmann, d. Disp. th. 41. Freyesleben, d. Disp. th. 7. Lyfer, c. 1. c. 5. §. 2.
- (e) Freyesleben, d. l. th. 10. Lyfer, cit. Disp. c. 5. §. 2.
- (f) Mevius, d. l. Bechmann, l. c. th. 44. Freyesleben, c. l. Lyfer, dict. Disp. c. 5. §. 4.
- (g) D. Lauterbach, Confl. Tub. vol. 1. conf. 28. n. 10. seqq. & DD. Gräfs, ib. vol. 5. conf. 60. n. 19. Festasius, in Tr. de Æstimis, c. 2. Bechmann, d. Disp. th. 41. B. Dn. D. Harpprecht, in Cons. nov. dict. loc. Freyesleben, dict. loc. th. 10.
- (h) Berlich, Dec. 283. n. 1 - 17. Harpprecht, Cons. nov. d. l. Freyesleben, d. l. th. 10.
- (i) Harpprecht, Cons. nov. 4. d. n. 175. Freyesleben, d. Disp. th. 10.
- (k) Harpprecht, sæpe cit. loc. & Freyesleben, dict. loc.

§. 168.

Quid, si a
persona pri-
vata condita
fiat?

Præmissis hisce, singula jam requisita specialiter considerabimus, expensuri, quantus catastro, remoto uno vel altero requisito, gradus probabilitatis remaneat, vel an veritati aliquid, an vero nihil derogetur? Ponamus jam, deficere primum Requisite, scilicet *Instrumentum tale a persona non publica auctoritate ad consiciendum catastro constituta, sed privata auctoritate conscriptum reperiri*, de cetero autem omnia requisita catastro habere (§. 167.) recensita, quæritur: An & quantum forte probet? Cum publica hoc casu deficiat autoritas & publica persona, sine qua publicum Instrumentum confici nequit, statim patet, ad minimum talem scripturam pro Instrumento publico haberi non posse, sed, si aliquid probat, non tanquam catastro, sed tanquam aliam quancunque scripturam privatam probare. Quod si igitur

tur hoc casu de gradu probabilitatis, quem talis scriptura producit, determinando quaestio sit, diversi distinguendi sunt casus: *Aut enim de reliquis Requisitis supra (§. 167.) firmatis, v. gr. de professione facultatum spontanea eademque jurata, de praelectione hujus scripturae, & ratificatione &c. aliunde, e. gr. per testes, subscriptionem partium &c. constat, aut non; priori casu facile intelligitur, talem scripturam contra consentientes & ratificantes, sicuti aliam scripturam privatam, plene probare inter illos, qui sponte talem scripturam confici, & sese tali Instrumento inseri passi sunt, quia tum respici potest tanquam conventio quaedam inter illos, quibus consentientibus hujusmodi scriptura confecta est; sicuti de confessione extrajudiciali ab adversario in continente acceptata constat (§. 120.); quibus adeoque & Jus quoddam reciprocum inde acquiritur (a); Secus, si alius tertius forte vel & ipse Magistratus ex tali privata Matricula aliquid probare velit; quia enim hi non respici possunt ut contrahentes, majorem etiam probabilitatis gradum talis scriptura intuitu tertii cujusdam non consequetur, quam ut habeatur pro confessione extrajudiciali, eademque a parte adversa non acceptata, adeoque semiplene probet (§. 121.). Et tantum de priori casu, si scilicet de catastro requisitis aliunde constet; Jam vero casu posteriori, si scilicet de catastro requisitis, v. gr. consensu partium &c., non aliunde, nisi ex sola tali scriptura privata, constet, major etiam illi fides haberi non poterit, quam testimonio testis unius, vel, si testes subscripserint, plurium testium, sed injuratorum, adeoque semiplena probatione longe inferiorem consequetur gradum probabilitatis (§. 135.), nisi aliae forte accedant circumstantiae adminiculantes, v. gr. antiquitas scripturae, sive confirmatio Magistratus, sive depositio in Archivo publico &c. (b).*

(a) B. D. Lauterbach, in Coll. Theor. Pract. tit. de confess. §. 23. Confessio enim praesente & acceptante adversario facta cadit in promissum.

(b) Sed quid, si tale Catastrum a persona quidem publica auctoritate constituta, & de cetero adhibitis omnibus solennitatibus & observatis requisitis Catastri confectum sit, persona autem illa juramento non sit adstricta? *Wann 1. Ex. der Commissarius oder Renovator nicht beendiget worden?* & resp. Aut de juramento saltem dubitatur, quia forte ejus in Catastro nulla sit mentio, aut certo constat, talem Commissarium juramentum haud praestitisse; casu priori praesumendum erit, Commissarium juramento esse adstrictum, quia communiter omnes, qui tale munus suscipiunt, juramento adstringi solent; Casu posteriori nihilominus, meo judicio, tale Catastrum plene probabit; ratio haec est, quia Summus Imperans, qui tale negotium injurato commisit,

eo ipso illi iuramentum remisisse censendus est; quod eo facilius fieri potest, quia adhibitio testium & consensus partium, imo quandoque earum subscriptio, heic omnem fraudis excludunt suspicionem. Secus res sese habebit, si forte ex oblivione omissum sit tale iuramentum; tum enim, antequam illud præstitum sit, talis Commissarius habetur pro persona privata, quia sub conditione iuramenti præstandi demum constitutus est, adeoque, *si de veritate contentorum non aliunde constet*, non plus operabitur talis scriptura, quam testimonium testis injurati, nisi forte testes jurati fuerint adhibiti, tum enim præsto erit vel plena vel semiplena (§. 121.) probatio.

§. 169.

Quid, si testes non sint adhibiti?

Ponamus porro, abesse Idem Catastri Requisitum, testes scilicet non esse adhibitos; & scriptura iterum tanquam Instrumentum publicum & Catastrum proprie tale haud probabit; Commissario enim soli absque testibus, sicuti & Notario, non creditur plene. Et sicuti Notarius absque testibus Instrumentum publicum haud conficit (a): ita nec talis Commissarius Catastrum absque testibus conficere potest, sed hujusmodi scriptura, si nimirum non in publico Archivo asservetur, habebitur saltem pro scriptura privata. *Gradus igitur probabilitatis, ex tali scriptura resultans, prope accedet ad semiplenam probationem*, quia scilicet respici potest tanquam testimonium scriptum juratum, *vel quandoque dimidium saltem semiplenæ probationis efficiet, si quæstio sit de partium confessione extrajudiciali* (§. 121.) probanda. Quod si vero a partibus, & illis, quorum interest, subscripta sit, contra illos plene probabit, sicuti alia scriptura privata contra scribentem plenam fidem meretur, modo sit recognita (b).

(a) B. D. Lauterbach, in Coll. Theor. Pract. tit. de fid. instrum. §. 40.

(b) B. Dn. D. Harpprecht, Cons. 3. n. 15. & Cons. 4. n. 260. B. D. Lauterbach, in Coll. tit. de fide instrum. §. 53.

§. 170.

Quid, si partes non sint citatæ?

Tertium Requisitum est Citatio singulorum Interessentium, quæ Citatio adeo necessaria est, ut illa omissa totus actus nullus sit, nec quicquam contra non citatum ex tali catastro inferri possit (a); modo ex post ratificatio non sit subsecuta, quo casu omnino citationis ratio palmaria cadit. Aut igitur ratificatio partium earundemque professio facultatum nihilominus subsecuta est, aut non; si prius; nihil plane officit omissio citationis, sed tale catastro nihilominus etiam tanquam Instrumentum publicum (b) plene probabit; si posterius, contra non citatum plane nihil probabit, adeoque neutro casu de probabilitate quadam juridica sermo esse potest.

(a) B. Dn.

- (a) B. Dn. D. Harppr. Conf. nov. 4. n. 175. & Bechmann, in d. Diss. de Æstimis, th. 41.
 (b) Omnia enim Instrumenti publici Requisita essentialia præsto sunt, Persona scilicet publica, & testium præsentia.

§. 171.

Quartum Catastri Requisitum in eo ponitur, ut citati jurato facultates suas profiteantur, & quidem tanquam collectis subjectas. Qui enim sponte se suasque facultates Catastro inseri patitur, eo ipso quasi contrahere videtur de solvendis collectis, & tacite renunciat immunitati suæ (a). Ponamus jam, talem facultates suas plane non esse professum, sed potius contradixisse; ex tali Catastro plane nihil contra illum inferri poterit. Ponamus, illum facultates suas quidem professum esse, sed non ut oneri collectandi subjectas; iterum ratione obligationis collectas solvendi nihil inde contra illum probari poterit (b), & quidem per regulam universalem: Quod instrumentum non cantat, nec nostrum est cantare (c). Manet igitur in ceteris saluum Catastrum; quoad illa vero, quæ non expressa sunt, nihil probabit, nullus itaque inde orietur gradus probabilitatis. Eadem fere ratio est Requisiti quinti; quod scilicet facta æstimatione onera sint distribuenda. Quodsi enim Catastrum de oneribus & obligatione solvendi collectas sileat, nihil plane inde contra illum, qui immunitatem sibi arrogat, poterit probari; secus res sese habet, si Catastrum expresse obligationis hujus mentionem faciat, sed quantitatem & proportionem non exprimat; hic enim defectus instituto calculo & habita proportionis ratione facile suppleri poterit; nec heic igitur aliquis erit probabilitatis gradus.

Quid, si partes facultates suas non sint professæ?

(a) Mevius P. 4. Dec. 179. n. 1. Bechmann, in d. Diss. de Æstimis, th. 45.

(b) Mevius, d. l. P. 4. Dec. 179. n. 11. Bechmann, d. l. th. 45.

(c) L. 21. C. de Probat. B. D. Lauterbach, in Coll. d. tit. de fid. instrum. §. 55. Magnif. Dn. D. Schœpf, Dec. 350. n. 16.

§. 172.

Sextum & septimum Requisitum, Prælectio scilicet & subsecuta Ratificatio, iterum ita sunt comparata, ut nullum constituent probabilitatis gradum. Aut enim quis sponte facultates suas tanquam oneri collectarum subjectas professus est; & non opus erit prælectione & reiterata ratificatione, ita scilicet, ut hac omissa Probationi Catastri aliquid derogetur. Quodsi enim partes in obligationem Collectas solvendi consenserunt, statim obligantur (a), nec præcise opus est reiterata ratificatione; licet

Quid, si Catastrum non prælectum, vel ab iis, quorum interest, non ratihabuit sit?

melius agant Commissarii, si nec hæc requisita negligant, ut scilicet eo certiores sint, se mentem profitentium rite cepisse. Aut partes non sponte professæ sunt facultates suas tanquam onere Collectarum affectas; & omnino, nisi ex post Prælectio & consensus accesserit, plane nihil probabit Catastrum (§. 171.). Neutro igitur casu præsto erit gradus quidam probabilitatis.

(a) Bechmann, d. Disp. de Æstimis, th. 41. verb. Qui nec citati, nec postea descriptioni nihilominus factæ consensum suum adhibuere &c.

§. 173.

Quid, si
Commissa-
rius non sub-
scripserit vel
subsignave-
rit?

Sequitur octavum Catastri Requisitum, Subscriptio scilicet & Subsignatio Commissarii vel Notarii & Testium. Ratio, cur hæc subscriptio desideretur, absque dubio hæc est, ut constet, a quonam tale Catastrum confectum sit, & an Testes, qui pro forma requiruntur, adhibiti sint, nec ne? adeoque an omnia legitime observata sint? Cum enim facile constare non possit, an Notarius vel Commissarius una cum testibus tale Catastrum conscripserit, nisi ex eorum subscriptione? eatenus sane adeo necessarium est hoc Requisitum, ut, illo omisso, Catastrum non amplius sit Catastrum, & amittat vim & efficaciam Instrumenti publici. Imo, cum hoc casu nequidem respici possit tanquam testimonium privatum injuratum, quia scilicet de ejus Authore non constat, plane nihil probabit talis scriptura, nisi forte accedant alia adminicula, v. gr. Antiquitas vel repositio in Archivo publico &c. Nec hoc igitur casu sermo esse poterit de probabilitate quadam juridica. Quodsi vero aliunde constet de ejus Authore, & quod a Notario in præsentia testium conscriptum sit, quod tamen vix ac ne vix quidem accidere solet; omnino, meo quidem judicio, plene probabit, licet subscriptio & subsignatio subsecutæ haud sint; Ratio enim tunc hujus Requisiti plane cessat; nec tum igitur inde orietur gradus quidam probabilitatis.

§. 174.

Quid, si testes
non sint
juramento
adstricti?

Nonum deniq; catastri requisitum est, ut non solum Notarius vel Commissarius (§. 168. not. b.), sed & testes juramento sint adstricti, omnia ita, nec aliter, coram se gesta esse, quæcunque in Catastro continentur. Heic tamen distinguendum est, an Notarius Instrumentum super tali Catastro confecerit, nec ne? Priori casu regulariter non opus est testibus juratis (a); sicut & Instrumenta Notariorum plene probant, licet testes jurati non sint (b); Imo hoc casu nec opus

opus est testium subscriptione (c). Casu posteriori, si scilicet Instrumentum solenne desuper non sit confectum, omnino requiritur non solum subscriptio testium, eorumque subsignatio, verum & eorum iuramentum, quamvis semper fere adhiberi soleant jurati testes (d). *Ponamus jam hoc casu posteriori, adhibitos esse testes injuratos, qualis tum promanabit probabilitatis gradus? Cum forma Catastri deficiat; omnino tanquam instrumentum publicum haud probabit, sed saltem tanquam privatum. Erit igitur gradus probabilitatis major semiplena probatione.* Si enim plane nulli adhibiti fuissent testes, testimonium Notarii vel Commissarii jurati solum constitueret semiplenam probationem. Cum autem heic accedat testimonium adhuc aliorum testium, licet injuratorum; paulo major erit gradus probabilitatis, quam semiplena probatio.

(a) Freyesleben, in dict. Disp. de Libris censualibus ac judicialibus, th. 10.

(b) Ord. Imper. de anno 1512. §. und nachdem. 3. B. D. Lauterbach, in Colleg. Theor. Pract. tit. de fid. instr. §. 40.

(c) Ord. Imper. de anno 1712. dict. loc. Nov. 47. cap. 1. Nov. 73. B. D. Lauterbach, in Coll. d. l. §. 41.

(d) Quæritur, si reperiatur Catastrum subscriptum a testibus tanquam juratis, an sufficiat, testes se ita subscripsisse, an vero aliunde, non per illorum propriam manum, constare debeat de iuramento ab illis præstito? resp. si Catastrum reliqua requisita essentialia habeat, præsertim Requisita I. II. VI. & VII. ita, ut haberi possit pro Instrumento publico, sufficit ex ipso Catastro de testium iuramento constare; Instrumenti enim publici effectus est, ut omnia ibi contenta pro plenissime probatis habeantur. B. D. Lauterbach, in Coll. Theor. Pract. tit. de fid. instrum. §. 45. Sin minus illa requisita habeat, neque adeoque pro Catastro & Instrumento publico haberi possit; omnino non sufficit hujusmodi privata annotatio; de hac enim circumstantia, an testes sint jurati, nec ne? nonnisi ex illorum testimonio scripto injurato, eodemque privato, constat, adeoque admodum levis est conjectura.

§. 175.

Ex antecedentibus igitur intelligitur, saltem deficiente requisito primo, (§. 168.) secundo (§. 169.), & nono (§. 174.) sermonem esse posse de probabilitate quadam juridica, de cujus gradu insimul locis competentibus jamjam dictum fuit. Quod si igitur dicti casus inter se conferantur, statim patet, *minima probabilitate sese commendare hujusmodi Matriculam deficiente Requisito primo, si scil. illa a persona privata conscripta sit, nec de Catastri Requisitis aliunde, nisi ex sola subscriptione Auctoris & forte testium quorundam, constet; tum enim gradus probabilitatis pari passu ambulabit cum testimonio*

Investigatur, quonam Requisito omisso major, quonam minor prodeat probabilitatis gradus?

scripto non jurato, adeoque longe inferior erit semiplena probatione (§. 168.) (a). Major est gradus probabilitatis, deficiente Requisito secundo, scilicet, si testes non sint adhibiti; prope enim tum accedet ad semiplenam probationem, imo quandoque pro semiplena probatione haberi poterit (§. 169.); Æqualis vel paululum major est gradus probabilitatis, si adversarius non consenserit statim in principio in talem Matriculam, licet a privato confectam; gradus enim probabilitatis cum semiplena probatione coincidit (§. 168.), quia præsto est confessio extrajudicialis non acceptata. Iterum major denique supererit gradus probabilitatis deficiente Requisito nono, si scilicet testes adhibiti non sint jurati, tum enim gradus probabilitatis superat semiplenam probationem (§. 174.) (b).

(a) Licet forte testes vel & talis auctor privatus matriculæ addiderint, testes esse juratos; quodii enim de eorum juramento non aliunde constet, hoc testimonium privatum injuratum nihil probabit, nec efficiet nisi levem conjecturam, quod sint juramento adstricti (§. 174. not. d.).

(b) Sed quid, si testes sint jurati, & de hoc aliunde constet, auctor autem hujusmodi matriculæ sit privatus, vel Commissarius nondum fuerit juratus? Resp. Distinguendum est, an talis Commissarius publica auctoritate & jussu Superioris conscripserit talem Matriculam, an vero non jussu Superioris? priori casu, si nimirum committens agat ex tali Matricula, gradus probabilitatis parum aberit a plena probatione; de consensu enim eorum, quorum interest, per duos testes juratos constat, & Commissarius, licet nondum juratus sit, committentem repræsentat, & ejus nomine hanc confessionem acceptare præsumitur; hæc vero confessio, licet extrajudicialis, plene probat, inter illos, qui consenserunt (§. 168.); secus, si alius, non consentiens in hanc Matriculam, illam pro se alleget; tum enim gradus probabilitatis coincidit cum semiplena probatione (d. §. 168.). Sic & posteriori casu, si Princeps ex tali Matricula conscripta a privato, cui confectio Catastri non fuit commissa, agat, pro illo, tanquam absente nec consentiente, non probabit, nisi semiplene ex eadem ratione.

§. 176.

De Catastris,
Läger = Bü-
chern seu
Zins = Bü-
chern.

Secunda Catastrorum species comprehendit illa, in quibus jura, servitutes, census &c., continentur, & quæ vocantur Läger = Bücher, Zins = Bücher (§. 166.), de quorum requisitis itidem paucissimis dispiciendum esset. Quia vero cum prioribus (§. 167.) recensitis, præter quartum & quintum, eadem sunt, adeoque septem ibidem notatis requisitis constant (a), de quorum gradu probabilitatis supra jam satis superque actum est præsertim (§. 175.), heic idem repetere nolumus, sed B. L. eo remittimus (b).

(a) B. Dn.

(a) B. Dn. D. Harpprecht, in Cons. nov. 4. n. 175. Freyesleben, d. Disp. de Libris Censual. & Judic. th. 10. Lauterbach, in Conf. Tubing. vol. 1. Conf. 10. n. 30. seqq. vol. 1. conf. 28. n. 10. seqq. Dn. D. Grafs, Ibid. vol. 5. conf. 60. n. 19. seqq.

(b) Hoc unicum adhuc notandum est, a Catastris probe secernendos esse libros illos, quos forte privati quidam in pagis vel civitatibus conscripserunt de juribus pagi & consuetudinibus, quales quandoque circumferuntur sub tit: *Dorff-Büchlein, des Gleden Herkommen und Gewohnheiten*; Hi enim Libri, cum a potissimum privatis, non citatis ut plurimum illis, quorum interest, confecti sunt, nisi in Archivis publicis asserventur, sunt mera documenta privata, & per se pro scribentibus plane nihil probant, nisi forte antiquitas vel aliæ circumstantiæ aliqualem fidem illis concilient.

§. 177.

Hæ sunt præcipuæ species Instrumentorum publicorum intuitu causæ efficientis talium, quæ frequentissime in foro occurrunt; plures quidem aliæ dantur species (a); de quibus singulis autem ob temporis angustiam agere jam haud licet; ex analogia priorum de his non difficile erit judicium. Pergimus igitur ad alia.

(a) vid. Freyesleben, in d. Disp. de Libris censual. & judic. th. 29. & 30.

§. 178.

Secunda species Instrumentorum publicorum continet illa, quæ quidem a privatis conscripta sunt, per confirmationem auctem Magistratus expressam, sive mediante subscriptione sive sigillatione sive utraque simul, fiunt publica (a). Aliæ requirunt confirmationem Magistratus majoris fidei ergo, alia tam ad majorem illis fidem conciliandam, quam solennitatis causa; qualia sunt Instrumenta, in quibus hypothecæ publicæ constituuntur; In his posterioribus cum confirmatio pro forma requiratur, facile patet, illa deficiente, plane omnem corrui effectum talis scripturæ; sic, omissa hac confirmatione, in Instrumento, in quo hypotheca publica constituenda erat, omnis cessat effectus hypothecæ publicæ, & hypotheca manet privata (b); adeoque hoc respectu sermo esse nequit de probabilitate quadam juridica; Secus res sese habet in prioribus, in quibus confirmatio Magistratus requiritur saltem majoris fidei conciliandæ gratia, ubi omissio forte uno vel altero requisito remanet certus gradus probabilitatis, de quo nobis sermo est.

Fit transitus ad illa instrumenta publica, quæ mediante confirmatione Magistratus sive sigillatione sive subscriptione talia fiunt.

(a) Cap. 2. X. de fide instr. pr. Inst. de emt. vend. L. 8. §. 15. ff. quib. mod. pign. vel hypoth. solv.

(b) Sic

(b) Sic aliquando quærebatur, num Instrumentum obligationis a Præfesto loci subscriptum & sigillatum haberi posset pro Instrumento publico, adeoque num hypotheca, hoc modo constituta, reliquis privatis præferenda esset, nec ne? & Resp. quod non; Præfessus enim non est nisi pars judicii, ad constituendam autem hypothecam publicam requiritur, ut desuper coram judicio sedente cognoscatur, daß darüber vor gefessenem Gericht erkannt werde. Erat igitur hypotheca privata, ne minima quidem prælatione munita, licet Præfessus subscripsisset; ubi enim de solennitate observanda quæstio est, illa omiſſa, totus corruiſt actus, nec relinquitur ullus effectus, nec itaque de probabilitate quadam juridica heic sermo esse potest.

§. 179.

Horum Re-
quisita.

Requisita hujusmodi instrumenti publici sunt perpaucæ, requiritur enim Imo, *ut tale Instrumentum a Magistratu, Hdo, animo illud confirmandi, initio, subscriptum vel sigillatum sit (a).* Si sigillum tantum appositum sit, requiritur porro ut constet, 1.) cujus sit sigillum, 2.) a quo sit appositum, & 3.) quo fine (b)? Hæc requisita si præsto sint, Instrumentum fit publicum, & non solum producit effectum plenæ probationis, verum etiam recognitione non opus habet, nec in illo locum habet jurata diffessio, quæ quippe saltem in Instrumentis privatis admittitur (c).

(a) B. D. Lauterbach, in Coll. Theor. Pract. tit. de fide Instr. §. 7.

(b) Lauterbach, d. l. si tamen constet, cujus sit sigillum, reliqua requisita præsumuntur, quod scil. a Magistratu & animo confirmandi appositum sit.

(c) Nov. 49. c. 2. Leyser, Spec. ad ff. 266. n. 3.

§. 180.

Quid, si non
a Magistratu
vel toto ju-
dicio confir-
matio facta
sit?

Quodsi jam deficiat primum Requisitum, & tale Instrumentum non a Magistratu, vel ad minimum non a toto judicio (a), sed v. gr. saltem a quibusdam ejus membris, confirmatum sit, statim patet, illud publicum non esse; a confirmatione enim Magistratus dependet heic essentia Instrumenti publici; quo itaque remoto, Instrumentum non amplius concipi potest publicum; ponamus itaque, *tale Instrumentum subscriptum esse a privatis*, erit scriptura privata quorundam testium injuratorum testimonio firmata, adeoque *admodum levis erit conjectura inde resultans, nisi alia concurrant adminicula, vel talis scriptura ab adversario recognita & subscripta, vel & producta sit; quo casu plene probat, sed tanquam scriptura privata; quodsi tale Instrumentum subscriptum sit a quibusdam saltem membris Magistratus, iterum scriptura erit saltem privata; Magistratum enim hi non constituunt, adeoque hoc casu habentur itidem pro privatis,*
nisi

nisi forte a totidem subscriptum sit membris, quot requiruntur ad constituendum judicium, & desuper in judicio deliberatum & cognitum sit. Major tamen forte hoc casu erit gradus probabilitatis; quam si Instrumentum subscriptum sit a mere privatis, quia sunt personæ in officio publico & dignitate quadam constitutæ, quibus omnino paullo major habenda est fides, quam testibus mere privatis; quia tamen testimonium manet injuratum, conjectura nihilominus erit admodum levis, & longe inferior semiplena probatione (b).

(a) Sed quid, an Judex requiritur competens, an & sufficit, confirmationem factam esse a Judice incompetente? & diversam esse arbitror responsum pro diversitate ipsorum negotiorum, quæ vel coram competente, vel incompetente Judice fieri possunt, & vel voluntariæ vel contentiosæ sunt jurisdictionis. Sic v. gr. testamenta judicialia coram Judice etiam incompetente condi, vel & deponi posse, constat. L. 19. C. de Testam. B. D. Lauterbach, in Disp. de Testam. Jud. th. 18. & 19. Contra vero Instrumenta, v. gr. super contractibus confecta, a Judice ordinario confirmari oportet, si publica fieri debeant. Sic in specie in alienationibus bonorum immobilium de Jure Wurt. necessario contractus Judici competenti, rei sitæ scilicet, insinuandi, & a Judice confirmandi sunt. Jus Prov. Wurt. P. II. tit. 13. §. wir wollen, setzen und ordnen &c. fol. 279. seq. verb. vor unsern Gerichten, unter welchen die Güther gelegen seynb.

(b) Analogiam quandam cum hisce Instrumentis publicis habent copiarum vidimatarum, quæ quippe itidem per subscriptionem personarum publicarum quandoque effectum plenæ probationis obtinent, modo ab Actuario judicii ordinario vidimatarum sint. Rec. Imp. de anno 1654. §. 34. add. Jus Prov. Wurt. P. I. tit. 34. rubr. besiegelte Brief oder Transsumta &c. B. Dn. D. Harpprecht, Resp. 55. n. 30. Dn. Estor, in dem Teutschen Reichs-Proceß. sect. 16. §. 381. Sed hæc vidimatio, ut, ita loquar, saltem probat convenientiam Copiarum cum Originali, nec adeoque majorem vim habere potest, quam ipsum Originale; quodsi itaque hoc sit Instrumentum saltem privatum, nec illud aliter, quam tanquam Instrumentum privatum, probare potest. Dn. Estor, c. l. §. 382. Instrumenta a Notariis vidimata tantum non probant, quantum vidimata ab Actuariis ordinariis, sed operantur saltem conjecturam, Dn. Estor, c. l. §. 381. n. 1. & plerumque DD. his adscribunt vim semiplenæ probationis. B. Dn. D. Harpprecht, Resp. 93. n. 189.

§. 181.

Ponamus porro, deficere secundum Requisitum, Instrumentum scilicet tale a Magistratu quidem subscriptum vel subsignatum esse, sed absque animo illud rati habendi vel confirmandi, ex alia forte causa, vel & ex errore; nec hoc igitur casu præsto erit gradus quidam probabilitatis; essentia enim hujus confirmationis, sicuti omnium entium Moralium, consistit in consensu, Quid, si tale Instrumentum a Magistratu subscriptum sit, absque animo rati habendi?

quo deficiente, deficit ipsum negotium, ipsaque confirmatio, & quidem in totum, ita, ut non solum instrumentum tale plane pro publico haberi nequeat, quippe a Magistratu non confirmatum, sed etiam, nisi aliæ concurrant circumstantiæ, v. gr. adversarius illud agnoverit vel eidem subscripserit, non probet tanquam scriptura privata, quia scilicet subscribentes, ob defectum consensus, nihil roboris huiusmodi scripturæ addiderunt. Eadem ratio est si deficiat Requisitum tertium, si scilicet tale Instrumentum a Magistratu non subscriptum vel sigillatum sit; essentia enim Instrumenti consistit in scriptura, & Instrumenti publici per confirmationem talis in subscriptione vel sigillatione; quibus itaque deficientibus, instrumentum non est publicum, sed privatum (a); neque tanquam privatum hoc casu quicquam probare potest, nisi aliæ concurrant circumstantiæ, v. gr. subscriptio & recognitio adversarii &c. quia scriptura privata pro scribente regulariter nihil probat (b). Nec hoc igitur casu sermo esse potest de probabilitate quadam juridica.

(a) Sed cur tale Instrumentum nihil probet, si scil. a Magistratu confirmatum sit, licet præcise subscriptum vel subsignatum non sit? Nonne subscriptio est saltem signum confirmationis? an igitur confirmatio, si de ea aliunde, quam ex subscriptione vel signatione, constet, nihil operabitur? Resp. operabitur sine hoc, ut actus, de quo quæritur, censeatur coram Magistratu gestus esse, & ita, tanquam talis, effectus suos nanciscatur; ipsa autem scriptura non erit Instrumentum publicum; aliud enim est, actum, qui in Instrumento continetur, nihilominus effectus suos producere, aliud est, hoc ex tali scriptura probari; nobis enim sermo est de casu, an hoc Instrumentum, qua tale, effectus probationis producat, & an ex illo probari possit, quod actus a Magistratu confirmatus sit? quod sane fieri nequit, nisi Magistratus illi subscripserit vel subsignaverit? Sic, v. gr. si hypotheca publica coram Magistratu constituta sit, illa nihilominus est hypotheca publica, & omnes illius effectus producit, licet Magistratus Instrumentum obligationis non subscripserit nec subsignaverit, sed tum confirmatio Magistratus ex hoc Instrumento obligationis, qua tali, probari nequit, adeoque hoc per se nullum plane producit probationis effectum.

(b) L. 5. L. 7. C. de probat. B. Dn. D. Lauterbach, in Coll. Theor. Pract. tit. de fid. instrum. §. 20.

Fit progressus ad illa, quæ per repositionem & asservationem in Archivis publicis fiunt.

§. 182.

Sequitur denique tertia species Instrumentorum publicorum, illorum scilicet, quæ per repositionem & asservationem in Archivis publicis fiunt publica (§. 154.); Archivum nobis dicitur locus publicus, non suspectus, in quo is, qui superioritate territoriali gaudet, reponit & asservat documenta & scripturas, quæ ali-

aliquando usui esse possunt. Vocatur & quandoque *Cansley*, item *Registratur* oder *Hof-Registratur* (a); quamvis vox *Registratura* hodie magis pro privatis chartophylaciis civitatum municipalium accipiatur, & tum germanice exprimi potest *Schreib-Stuben*, *Stadt-Registratur* &c. (b).

(a) Wehner, *Obf. Pract.* verbo: *Registratur*, *Hof-Registratur*. Ahasv. *Fritsch*, *Tract. de Jure Archivi & Cancellariæ*, c. 1. n. 13.

(b) Ahasv. *Fritsch*, d. *Tract.* c. 3. n. 24. Wehner, d. l.

§. 183.

Talis Archivi effectus est, ut scripturæ quæcunque, sive per se publicæ, sive privatæ, ibidem asservatæ publicæ fiant (a), & absque recognitione adversarii probent, & per consequentiam diffessionem juratam respuant (b). Imo tales scripturæ ex Archivo petitæ non solum inter subditos illius territorii probant, sed & contra tertios non subjectos, imo & pro Principe, ex cujus Archivo desumptæ sunt (c); Imo & Copiæ, si sint antiquæ, ex Archivo productæ, plene probant (d).

Hæc omnes effectus Instrumentorum publicorum habent.

(a) Nov. 49. c. 2. Avth. ad hæc. C. de fide Instr. Schilter, *Inst. Jur. Publ.* lib. 4. tit. 6. §. 3. Dn. Leyser, *spec. ad ff.* 266. n. 2. B. D. Lauterbach, in *Coll. Theor. Pract.* tit. de fid. instrum. §. 8. qui hoc jus Archivi etiam ad Monasteria & Ecclesias extendit, quod tamen de Monasterio, qua tali, nisi insimul immediatum sit, asserere haud ausim. add. *Fritsch*, cit. *Tract.* c. 3. n. 30.

(b) Dn. Leyser, cit. *spec. ad ff.* 266. n. 2. & 3.

(c) Ahasv. *Fritsch*, d. *Tract. de Jure Archivi & Cancellar.* c. 7. n. 55. Dn. Lyncker, in *Disp. de Archivo Imper.* Jen. 1686. habit. not. p. fol. 35. & ibi alleg. Rutg. Rulandus, in *Tract. de Commissar.* P. II. lib. 5. c. 45. Knipschild, de *Jur. Civit. Imp.* L. 2. c. 12. n. 15. seqq. Dissentiunt quidem Leyser, d. *spec. ad ff.* 266. n. 8. & ibi cit. Coccejus, in *Juris publ. prudentia*, c. 23. §. 8. Sed non solum scripturas tales, ex Archivo publico prolatas, etiam contra extraneos probare quotidiana fere comprobavit praxis; sic enim non raro Catastra ex Archivo desumpta contra Extraneos quoque plene probasse, & ita judicatum esse memini, verum & stante Leyseri sententia nulla differentia foret inter scrinia civitatum municipalium, & Archiva publica; illa enim pariter inter incolas & cives plene probant; imo, stante hac sententia, scripturas extraneos concernentes in Archivo asservare tantum non superfluum esset; posita enim Leyseri ratione, ne præsumtionem quidem efficerent pro producendo tales scripturæ ex Archivo prolatae; quodsi enim Princeps extra territorium plane pro privato habeatur, etiam intuitu juris Archivi, scripturæ ex tali Archivo desumptæ ne præsumtionem quidem constituent, quia scriptura ex privati cujusdam scrinio producta, ex hac sola ratione, plane nihil roboris accipit, quod tamen ipse Leyserus, c. l. asseverare haud audet.

(d) B. D. Lauterbach, in Coll. d. l. §. 8. Carpzov, in Jurisprud. for. P. 1. Const. 17. def. 38. Knipschild, d. Tract. de Jure Civit. Imper. L. 2. c. 12. n. 12. sqq. Myler ab Ehrenbach, de Principibus & Stat. Imp. 47. §. 6. Ahasv. Fritsch, d. Tract. de Jure Archiv. & Cancell. c. 7. n. 47. Dissentit iterum Leyser, d. spec. ad ff. 266. n. 9. cui tamen subscribere haud possumus; si enim scripturæ privatæ per solam repositionem in Archivio publico publicæ fiunt, & plenæ probationis vim nanciscuntur, uti ipse Celeb. Leyser, d. spec. n. 2. concedit, nulla ratio est, cur non idem de Copiis dici possit; originalia enim per se absque repositione in Archivio ut plurimum plenam fidem habent, licet non eo ipso fiant Instrumenta publica; rarissimus igitur foret casus, in quo Archivum alicujus utilitatis esset. At, inquis, si sola in Archivio repositio sufficit ad conciliandam privatæ scripturæ vim Instrumenti publici, cur non etiam Copiæ recentiores pro publicis habentur Instrumentis, cur enim omnes concedunt, ut Copia talis plene probet, requiri insimul, ut sit antiqua? Resp. non absque ratione diximus in definitione (§. 182.), præter repositionem & requiri asservationem in Archivio, nec ideo solam repositionem in Archivio pro causa venditavimus, cur tales scripturæ publicæ fiant; sed & præterea requisivimus, ut per aliquod tempus, & ad minimum diu ante litem ortam, in illo fuerint asservatæ; recentior enim Copia supponit, originale ipsum adhuc vel superesse, vel ad minimum brevi ante adhuc præsto fuisse; merito igitur falsi suspicionem incurrit, qui, cum probabiliter Originale ipsam producere posset, non producit nisi Copiam; si enim & recens Copia eo ipso probaret, quia in Archivio publico reposita est, statim sub initio hujus vel illius litis Archivio documenta fictitia inseri possent; quo ipso summæ iniquitati locus concederetur; hæc vero suspicio, si copiæ sint antiquæ, corrui-

§. 184.

Requisita Instrumenti ex Archivio depromti.

Ex definitione Archivi, supra (§. 182.) tradita, statim fluunt requisita, quæ desiderantur, si scriptura ex Archivio depromta publica fieri & plene probare debeat. Requiritur enim primo, *ut sit desumpta ex loco publico consueto*, in quo tales scripturæ regulariter asservantur, secundo, *ut locus ille constitutus sit ab eo, qui superioritate territoriali gaudet*, qui quippe solus habet jus Archivi (a), tertio, *ut per aliquod tempus ibi fuerit asservata*, ad minimum, antequam de lite oritura cogitari potuerat, ibi jamjam reposita fuerit; id quod ex antiquitate scripturæ præsumitur (§. 183. not. d.). Hæc si concurrant, scriptura talis habetur pro publica, & plene probat (§. 183.) (b).

(a) Myler ab Ehrenbach, de Princip. & Stat. Imp. c. 47. Ahasv. Fritsch, d. Tract. de Jure Archivi & Cancell. c. 3. n. 3. 4.

(b) Ahasv. Fritsch, d. Tract. c. 17. n. 18. 19. Lyncker, d. Disp. de Archivio Imp. not. p. pag. 36. Celeb. Leyser, spec. ad ff. 266. n. 5. sunt quidam, qui plura desiderant Archivi bene constituti requisita, quorum plures allegat Fritsch, d. c. 7. n. 8. seqq. quæ tamen partim sub prioribus comprehenduntur, partim autem plane necessaria non sunt.

§. 185.

§. 185.

Jam & dispiciendum est de probabilitate juridica, quæ ex defectu unius vel alterius requisitorum modo recensitorum suboriri potest. *Tertium Requisitum* si deficiat, h. e. si Instrumentum, de quo quæritur, demum tempore motæ litis in Archivo reponatur, nec antea jam ibi asservatum fuerit, plane nullam, ex hac repositione nimirum, consequitur fidem (§. 183. not. d.) (a); nec adeoque hoc casu præsto erit gradus quidam probabilitatis juridicæ. Jam transeamus ad reliqua Requisita. Ponamus deficere *primum Requisitum*, scilicet scripturam talem non desumptam esse ex consueto Archivi loco, ubi alias hujusmodi scripturæ asservari solent, facile patet, hoc casu concidere essentialiam Archivi, & rationem, propter quam hujusmodi scripturæ, cæteroquin privatæ, vis Instrumenti publici tribuitur; nullus igitur inde promanabit probabilitatis gradus, nisi forte hujusmodi scripturis in Palatiis Principum repertis paulo majorem fidem tribuere velimus, quam scripturæ plane privatæ & apud privatos repertæ; levis tamen nihilominus erit gradus probabilitatis, si præsertim Princeps hujusmodi scripturam pro se allegare velit. Manet enim scriptura privata, & quæ de illis locum habet, Regula, scripturam privatam pro allegante nihil regulariter probare (b), & heic non plane cessat. Quodsi jam ponamus, deficere *secundum Requisitum*, scil. illum, in cujus serinio talis scriptura reperta fuit, non habere jus Archivi; distinguendum erit inter mere privatos, & communitates & civitates municipales, vel & Monasteria mediata &c. Priori casu, cum mere privati nequidem Registraturam privatam habeant, plane nihil probat talis scriptura; alias enim nunquam sine effectu esse posset scriptura privata; *posteriori casu constituunt præsumptionis gradum tales scripturæ, si inter privatos agatur, non si agatur inter ipsas Communitates, & tum ad minimum semiplene (c), & quandoque plene probant (d).*

(a) Add. Fritsch, dict. Tract. de Jure Archivi & Cancellar. c. 7. n. 47. Myler ab Ehrenbach, de Princ. & Stat. Imper. c. 47. §. 6.

(b) L. 5. l. 7. C. de probat. B. D. Lauterbach, in Coll. d. tit. de fide instr. §. 20.

(c) Ahasv. Fritsch, d. Tract. c. 7. n. 64.

(d) J. Prov. Wurt. P. 1. tit. 34. rubr. Rhodel, Urban. Zins. Steuer. Necken- Stadt- und Dorf- Bücher. fol. 130. Hoc præsertim locum habet, si antiquitas Documentorum concurrat, quippe quæ quandoque sola scripturæ privatæ semiplenæ probationis vim conciliat. B. Dn. D. Harpprecht, resp. 86. n. 170.

§. 186.

Erit transitus
ad Instru-
menta pri-
vata.

Absoluta materia de Instrumentis publicis, progredimur jam ad Instrumenta privata, indagaturi, quando hæc probent, & quatenus circa horum probationem suboriri possit probabilitas quædam juridica. *Instrumentum privatum dicimus, quod neque a personis publicis confectum, neque confirmatum est, sive expresse, sive tacite (§. 154.).* Talis scriptura per se, quamdiu non constat, illam ab adversario scriptam vel subscriptam vel ad minimum approbatam esse, contra illum nihil plane probat. Exemplo enim perniciosum est, dicit Imperator Gallienus (a), ut ei scripturæ credatur, qua unusquisque sibi annotatione propria debitorem constituit. Ratio igitur hæc est, ne quis falso scripturam pro adversarii manu conscripta venditare possit. Adeoque, *quamdiu non constat, instrumentum tale adversarii manu, vel ad minimum prævio ejus consensu, exaratum esse, nihil probat.* Contra vero, *quando-
cunque probari potest, scripturam productam ab altero conscriptam, vel ad minimum illo consentiente ab alio scriptam esse, cessat ratio prohibitionis, & tale instrumentum, etiam privatum, plene probat (b).*

(a) L. 7. C. de probat. L. 5. C. ibid. Add. B. Dn. D. Harpprecht, resp. 86. n. 74. seqq. & n. 97. Idem, in Cons. nov. 71. n. 117. quod adeo verum est, ut ne fiscus quidem hujusmodi privata annotatione debitorem sibi constituere possit. Harpprecht, Cons. nov. 84. n. 93. Conf. Bardili, in Disp. de Recognitione Instrum. th. 7.

(b) Ratio hæc cum itidem cesset in Instrumentis publicis, quæ quippe publica nituntur autoritate (§. 154.), facile intelligitur, cur hæc recognitione opus non habeant. Bardili, d. Disp. de Recognitione Instrum. th. 20. Celeb. Leyser, spec. ad ff. 266. n. 2. 3. Ill. Dn. Estor, in dem Teutschen Reichs-Proc. sect. 15. §. 403. Jure tamen Saxonico & publica Instrumenta recognoscenda sunt, Bardili, d. Disp. th. 21.

§. 187.

Tribus po-
tissimum
modis Av-
tentia In-
strumenti
privati pro-
bari potest.

Non aliter itaque probat Instrumentum privatum, quam quatenus illud vel adversarii manu scriptum, vel ad minimum illius consensu exaratum esse probari potest (§. 186.). Cum igitur quatuor præsertim dentur probandi modi, per confessionem scilicet, per testes, per Instrumenta, & per juramenta (§. 108.), Omnibus etiam hisce modis probari potest auctor hujusmodi scripturæ, excepto Modo tertio, per Instrumenta scilicet (a). *Quodsi enim adversarius fateatur, scripturam hanc vel illam a se vel ad minimum jussu suo conscriptam esse, illam dicitur recognoscere (b).*

Quodsi

Quodsi idem per testes probetur, dicitur recognitio per testes, & denique mediante juramento fit hæc probatio in comparatione literarum, quo casu regulariter hæc comparatio suppletur juramento in supplementum (c); vel locum habet juramentum purgatorium, uti in jurata diffensione (d). De singulis casibus brevissimis dispiciendum est, & videndum, quatenus inde resultet probabilitas juridica.

(a) Ratio, cur per Instrumenta regulariter probari nequeat, quod scripturæ ab adversario vel ejus jussu ab alio conscripta sit, in eo posita est, quia eadem facilitate, qua quis Instrumentum privatum propria manu conscribere, & illud pro alterius manu exarato venditare potest, etiam aliud fingere potest Instrumentum, ex quo ejus Auctorem vult probare; nulla igitur ratio est, cur potius huic instrumento credatur, quam alteri. Quod si tamen Instrumentum publicum, vel aliud privatum, ab adversario agnitum, probet hanc vel illam scripturam ab adversario vel ejus jussu scriptam esse, cessat ratio, & omnino etiam illud pro recognito haberi debet. arg. eor. quæ deducit Bardili, d. Disp. de Recognit. Instrum. th. 27. Engelbrecht, in Disp. de Recognit. Instrum. th. 21.

(b) Bardili, d. Disp. th. 4. Celeb. Estor, in dem Teutschen Reichs-Proceß, sect. 16. §. 394. arg. L. 56. ff. de V. S. ibique Gothofredus, in not. §. Engelbrecht, in d. Disp. th. 3.

(c) B. Dn. D. Harpprecht, in Cons. 37. n. 133. seqq. Celeb. Estor, in alleg. Teutsch. R. P. sect. 16. §. 419.

(d) B. Dn. D. Harpprecht, in Cons. 75. n. 524. Bardili, d. Disp. th. 14. & 15. Jus Prov. Wurt. P. I. tit. 35. §. Wann die Parthien ic. fol. 132. Dn. Estor, in dem Teutsch. Reichs-Proceß, d. I. §. 409. arg. Recept. Imp. noviss. de anno 1654. §. 39.

§. 188.

Primus modus, quo probari potest, aliquem scripturam sua manu exarasse vel scribi curavisse, est Recognitio. Quid sit Recognitio, patet ex (§. anteced. 187.). Est autem Recognitio vel expressa, vel tacita (a). Illa, quæ verbis exprimitur, hæc, quæ ex factis colligitur. Illa iterum fit ab adversario vel sponte, vel prævio jussu Judicis, qui recognitionem vel juratam diffensionem per Interlocutoriam imposuit (b). Hæc, tacita scilicet, vel colligitur ex taciturnitate adversarii, qui nihil contra tale instrumentum excipit (c), vel ex illius spontanea productione; qui enim instrumentum pro se producit, eo ipso contenta illius approbasse censetur, & illud etiam contra se admittere tenetur (d).

(a) Bardili, sæpe cit. Disp. de Recognit. Instrum. th. 5.

(b) Arg. L. 4. §. 5. & L. 5. ff. de Edend. Bardili, d. Disp. th. 8.

(c) Mevius, P. 4. Dec. 64. Bardili, d. Disp. th. 23. Dn. Estor, in dem Teutschen Reichs-Proceß, sect. 16. §. 396.

(d) B. Dn.

(d) B. Dn. D. Harpprecht, resp. 80. n. 402. resp. 85. n. 502. Idem, Cons. nov. 87. n. 35. Magnif. D. D. Schœpf, Dec. 262. n. 17.

§. 189.

Recognitio
modo plene,
modo semi-
plene pro-
bat.

Recognitio expressa ab adversario sponte facta in judicio (a) plene probat (b); Sicut enim confessio judicialis plene probat, ita nec dubitandum est, quin talis recognitio plenæ probationis effectum producat. Quodsi jam Instrumentum ab adversario extra judicium recognitum sit, modo plene, modo semiplene, probabit, pro diversitate scilicet confessionis extrajudicialis; de quo casu supra (§. 121.) jamjam actum fuit.

(a) Regulariter enim recognitio in judicio coram Judice competente facienda est. Carpzov, in Jurispr. For. P. 1. Const. 17. Def. 17. n. 1. Berlich, P. 1. concl. 44. n. 4. Bardili, d. Disp. de Recognit. Instrum. th. 8. Dn. Estor, *Deutsch. Reichs-Proceß*, d. sect. 16. §. 405. Add. Engelbrecht, in Disp. de Recognit. Instr. th. 31.

(b) Bardili, in d. Disp. th. 23.

§. 190.

Si Recognitio spontanea non sit, a Judice imponitur; Recensentur ejus requisita.

Quodsi vero Instrumentum productum ab adversario recognosci nolit, opus est, ut a Judice, mediante sententia interlocutoria, ejus recognitio, vel jurata confessio, adversario imponatur. Quo casu sequentia requiruntur: I.) *ut hæc recognitio a Judice imponatur (a)*: II.) *post Litis Contestationem (b)*, quo tempore demum omnis probatio perficienda est: & III.) *ut tum in judicio adversarius fateatur, scripturam ab adversario prolatam vel a se, vel ab alio, sed suo jussu conscriptam esse (c)*; Et quidem, si scriptura vel subscriptio pro propria adversarii manu venditetur, opus est, ut fateatur non solum Instrumentum sua manu conscriptum esse, verum etiam Instrumenti contenta veritati esse consentanea; sin vero scriptura tertii cujusdam manu conscripta esse dicatur, saltem recognoscere debet manum scribentis, si scilicet probabiliter manum scribentis scire possit (d). Hoc casu enim scire non tenetur, an tertius ille vera, an falsa scripserit (e)?

(a) Bardili, in d. Disp. de Recognit. Instrum. th. 8. Estor, in *Deutsch. Reichs-Proceß*, d. sect. 16. §. 405.

(b) t. t. X. ut lite non contest. Carpzov, in Jurispr. For. P. 1. Const. 16. Def. 35. Bardili, d. Disp. th. 11.

(c) Bardili, d. Disp. th. 28.

(d) Carpzov. lib. 3. tit. 8. resp. 79. n. 5. Bardili, d. Disp. th. 25. Estor, in *Deutsch. Reichs-Proceß*, d. sect. 16. §. 404. not. 1. Sic recognosci debet non solum manus illius, qui

qui pro aliquo subscripsit, Carpzov & Bardili, cit. loc. verum etiam v. gr. manus Tutoris vel Curatoris, Institoris, patris, filii, uxoris &c. arg. L. 8. ff. de administr. tut. vel curat. & L. 1. C. de Instit. act. Ektor, in dem Teutsch. Reichs-Proceß, dict. loc. §. 404. not. 3.

(e) Carpzov, lib. 3. tit. 8. resp. 80. n. 10. jung. lib. 3. tit. 8. resp. 79. n. 8. Bardili, in d. Disp. th. 30.

§. 191.

Ex præmissis (§. anteced. 190.) statim intelligitur, deficiente licet uno vel altero Requisitorum ibi enarratorum, nunquam tamen fere præsto esse probabilitatem juridicam. Ponamus enim deficere *primum Requisitum*, scilicet Recognitionem ab adversario sponte sua, nullo præcedente Judicis Decreto, factam esse, casus erit supra (§. 189.) pertractatus, & quia supponitur heic recognitionis in judicio facta, nihilominus plene probabit; nec igitur heic casus est probabilitatis cujusdam juridicæ. Ponamus abesse *secundum Requisitum*, scil. Recognitionem, per errorem forte, adversario ante Litis Contestationem impositam & subsecutam esse; iterum plene probabit talis recognitionis, æque ac confessio in jure facta; imo hoc casu statim Executio decerni poterit, si Instrumentum id, quod probandum erat, contineat (a). Nulla siquidem ratio est, cur talis confessio ante Litis Contestationem facta non ejusdem ponderis sit cum illa, quæ ex post facta est; quia finis recognitionis hoc modo æque obtentus fuit, licet Judex eo, quod recognitionem ante Litis Contestationem decrevit, contra processus formalia peccaverit; Judicis enim error heic partibus nocere nequit (b). Nec ex hoc igitur casu resultat probabilitas juridica. Ponamus denique *tertio* deficere agnitionem Instrumenti ipsam; cadit & forma recognitionis (c) & finis; nullus igitur iterum promanabit effectus, nulla probabilitas juridica (d).

Quid, si unum vel alterum requisitorum deficiat?

(a) Confessus enim in jure habetur pro judicato, nec tunc aliæ sunt Prætoris partes, quam solutionis tempus assignare & exequi. L. 1. L. 6. pr. & §. 2. & ult. ff. L. un. C. de Confess. L. 56. ff. de re jud. L. 21. ff. de judic. L. 71. §. 2. ff. de Leg. 1. B. D. Lauterbach, in Coll. Theor. Pract. tit. de confess. §. 16.

(b) Arg. eor. quæ ex L. 24. ff. de his, quæ in fraud. cred. Carpzovio in Jurispr. For. P. 1. Const. 16. Def. 3. ibique Esbachio, Mynsingero, Berlichio &c., deducit Magnif. Dn. D. Schœpf, in Proc. Dicast. Wurt. vet. Edit. c. 13. §. 5.

(c) Bardili, in d. Disp. de Recognit. Instrum. th. 28. Dn. Ektor, im Teutschen Reichs-Proceß, sect. 16. §. 394.

(d) Quæritur, quid dicendum sit de casu, si quis partem Instrumenti quidem recognoscat, alteram non? an nihilominus Instrumentum totum haberi debeat pro recognito? Resp. Diversi heic distinguendi sunt casus. Aut enim Instrumentum in fine ab adversario subscriptum vel sigillatum est, & subscriptionem suam vel sigillum recognovit, & tum totum Instrumentum recognovisse & approbasse censetur; qui enim Instrumento nomen suum subscripsit, vel sigillum apposuit, omnia ejus contenta videtur approbasse. L. 26. §. ult. ff. de pos. L. 13. C. de N. N. P. L. 26. §. 1. ff. de pignor. L. 39. ff. de pignor. act. L. 1. §. 4. ff. quod jussu. B. Dn. D. Harpprecht, resp. 12 n. 28. & cons. 95. n. 370. & mult. seqq. Aut Instrumentum ab adversario non est subscriptum vel signatum, sed manu illius scriptum, adversarius autem alteram Instrumenti partem agnovit pro sua manu, alteram non, & videndum est, an Instrumentum contineat connexa, quorum alterum absque altero intelligi nequit, nec ne? Priori casu, altera parte recognita, & altera habetur pro recognita; eo ipso enim Reus convincitur, quod & alteram partem scripserit. Add. ea, quæ adstruit B. Dn. D. Harpprecht, in Cons. nov. 83. n. 108. ubi elegans de Bironio in Gallia, hoc modo convicto, adfert exemplum; Posteriori casu non item; sed locus erit diffinitioni juratæ, vel aliis remediis consuetis, v. gr. Recognitioni per testes, vel comparationi Literarum, ad reum convincendum, quod & alteram Instrumenti partem scripserit, vel scribi curaverit.

§. 192.

Pergitur ad
recognitio-
nem tacitam.

Haftenus de recognitione expressa; jam & paucis de tacita agendum est; hæc vel oritur ex eo, si adversarius contra talem scripturam in judicio productam nihil excipiat, vel si ipsemet scripturam, ex qua aliquid contra illum infertur, in judicio producat (§. 188.). Priori casu, ut tacita facta esse censeatur recognitio, requiritur 1.) *ut contra scripturam productam adversarius nihil exceperit*, & 2.) *ut contra illam in judicio nihil exceperit*, 3.) *ut hoc a producente acceptatum sit* (a); nullo horum requisitorum deficiente redundat gradus probabilitatis; ponamus enim, deesse *Requisitum primum*, scil. adversarium excepisse contra scripturam prolatam, & nihil probabit talis scriptura contra eum, qui excepit (b), nisi formiter fuerit recognita, vel aliis modis veritas scripturæ probata sit; nullus itaque præsto erit gradus probabilitatis. Ponamus, deficere *secundum Requisitum*, scilicet in judicio quidem nihil exceptum esse, sed extrajudicialiter adversarium tenorem instrumenti impugnasse, & nihil operabitur hæc contradictio extrajudicialis; imputet enim sibi adversarius, qui in judicio contradictionem suam non repetiit; potius enim sententiam mutasse, & ex post Instrumentum productum approbasse censetur; sicut enim nihil obstat, quo minus instrumentum probet,

probet, licet ab initio adversarius illi contradixerit in iudicio, modo post impositam recognoscendi necessitatem illud recognoverit, quia hoc casu ex post demum recognoscens bonam fidem agnovisse censetur (§. 190.): ita & multo minus tacitæ in iudicio factæ recognitioni nocebit antecedens protestatio & contradictio extrajudicialis. Semper enim posterior voluntas potior est priori (c). Ponamus denique, *tertium* deficere *Requisitum*, scil. tacitam hanc recognitionem ab adversario producentem non fuisse acceptatam, & is, qui non contradixit, semper adhuc contradicere potest; quo casu nulla præsto esse censetur recognitio, nec gradus quidam probabilitatis inde resultat, nisi alter sese insimul in illo Instrumento fundaverit; tum enim ex alia ratione illud tacite approbasse censetur; Sin vero alter plane nunquam per totum processum contradixerit, itidem censebitur tacite Instrumentum approbasse, & ideo plene probabit (d); nullo igitur casu promanabit gradus quidam probabilitatis juridicæ.

(a) Bardili, in d. Disp. de Recognit. Instrum. th. 23.

(b) Bardili, d. Disp. th. 7.

(c) B. Dn. D. Harpprecht, Resp. 12. n. 306.

(d) Bardili, d. Disp. th. 23. n. 8. verb. tunc, *parte opponente*, nihilominus effect forniciter recognoscenda.

§. 193.

Porro tacite recognitionem fieri diximus, si aliquis ipsemet in iudicio scripturam produxerit; eo ipso enim illam etiam in passibus contrariis approbasse censetur; æquum enim est, vi Edicti, quod quisque juris in alterum statuerit, ut instrumentum, quo quis contra suum adversarium utitur, pariter etiam contra se valere patiatur (a), nisi protestatus sit, se illud Instrumentum saltem in passibus proficuis producere velle, contraria autem mediante productione nolle recognoscere nec approbare; quo casu, nisi instrumentum contineat connexa, quorum alterum sine altero intelligi nequit, omnino, quoad partes non acceptatas, contra producentem nihil probat instrumentum productum (b).

Quid, si instrumentum ab adversario productum sit?

(a) B. Dn. D. Harpprecht, Resp. 40. n. 55.

(b) Idem, in d. Resp. 40. n. 53. & Cons. nov. 87. n. 35.

§. 194.

Ut igitur tale Instrumentum productum contra producentem probet, requiritur, 1.) ut contineat passus producenti contrarios, 2.) ut in iudicio producat, & 3.) ut absque protestatione producat; gradus, Nullus heic sese exserere potest probabilitatis

tur; hæc tria si concurrant, illud in passibus contrariis producentem etiam contra se admittere debere ex antecedentibus patet. Quodsi jam removeamus *primum Requisitum*, h. e. si instrumentum productum nullos passus producenti contrarios contineat, facile patet, quod etiam contra illum nihil probet; nulla igitur inde resultat probabilitas juridica. Remoto *secundo Requirito*, scilicet, si tale instrumentum non fuerit productum in iudicio, neque pro- neque contra illum, qui in eo se fundat, quicquam probare potest; si enim probare debet Instrumentum, illud iudici ob oculos poni debet, cui scilicet fides facti probandi facienda est; finis enim omnis probationis est, ut Iudex de facto probando certior reddatur (a), qui si ne in tantum quidem obtineatur, nullus etiam inde promanat gradus probabilitatis (b). *Tertio Requirito* remoto, h. e. si instrumentum cum protestatione, de sibi non præjudicando, uti vocant, productum sit, aut Instrumentum continet capitula connexa, aut non; casu priori nihil operatur protestatio, & instrumentum nihilominus plene probat (§. anteced. 193.); nullus igitur itidem præsto est probabilitatis gradus; casu posteriori contra producentem etiam plane nihil operari potest; nullibi igitur sese exserit probabilitatis gradus (c).

(a) L. 12. in fin. ff. de probat. B. D. Lauterbach, in Coll. Theor. Pract. tit. de probat. §. 30.

(b) Sed quid? si quis coram privatis quibusdam ostenderit scripturam tanquam sibi proficuum, annon inde oritur gradus quidam probabilitatis, quasi illud approbasset? Resp. Ratio, cur producens Instrumentum contra se admittere teneatur, in eo posita est, quia illo contra adversarium uti vult, adeoque etiam illud ex æquitate, vi editi, quod quisque juris &c. contra se admittere tenetur (§. 193.); quodsi igitur quis in iudicio tale Instrumentum non produxerit, nec adeoque actualiter illo contra adversarium uti contenderit, ratio hæc cessat; non igitur probat tale Instrumentum, nisi quis illud actualiter in iudicio produxerit tanquam sibi proficuum. Ex capite igitur productionis, casu supra dicto, adversarius ex tali Instrumento nihil poterit inferre. Quodsi tamen ipse hoc Instrumentum non habeat, positis terminis habilibus, ejus editionem petere, & illud deinde ipse producere potest. add. Dn. Ektor, in dem Teutschen Reichs-Proceß, d. sect. 16 §. 422. & B. D. Lauterbach, in Coll. Theor. Pract. tit. de edendo, §. 25. sqq.

(c) Ex hac quæstione oritur alia, num v. gr. ille, qui instrumentum sibi ab altero edi petit, eo ipso illud quasi producens censeatur approbare? Resp. ex sola petitione editionis nulla adhuc præsumi potest approbatio; editio enim petitur proprie saltem eo fine, ut aliquis ex exhibitione instrumenti cognoscere possit, an in illo forte experiendi causa contineatur? L. 2. ff. ad exhibendum,

bendum. L. 1. §. 7. ff. de tab. exhib. add. Jacob. Frid. Rollwagen, in Disp. Argent. 1671. habita, de Comparat. Literar. th. 37.

§. 195.

Secundus modus, quo probari potest, quod aliquis auctor sit scripturæ, vel ad minimum in illam consenserit, fit per testes (§. 187.); quodsi enim auctor scripturæ, sive is, cujus consensu confecta fuit, vel non amplius in vivis sit (a), vel & producens perjurium metuat (b), statim potest, loco recognitionis instrumenti, ejus avthentiam per testes probare; in illius siquidem arbitrio positum est, an mediante recognitione vel diffensione jurata, an vero mediante probatione per testes, instrumento veritatem asserere velit, nec ne (c)? imo hanc ultimam probandi speciem eligere potest, licet recognitio vel diffensio jurata a judice adversario jamjam per interlocutoriam imposita sit (d), vel & licet ab adversario juramentum jam acceptatum sit, modo hoc casu suspicionem perjurii aliquo modo verisimilem reddere possit (a). Præstito etiam hoc juramento, cum causa demum ad processum ordinarium deveniat, & ibi avthentia instrumenti modo ordinario ventiletur, quia causa redigitur in statum Litis Contestationis negativæ (f), adhuc perjurium adversarii & avthentiam instrumenti per testes probare potest (g).

(a) B. Dn. D. Harpprecht, Cons. 60. n. 117. sqq. inprimis n. 119.

(b) Dn. Ekor, in dem Teutschen Reichs-Proceß, d. sect. 16. §. 414.

(c) Bardili, in d. Disp. de Recognit. Instrum. th. 44.

(d) B. Dn. D. Harpprecht, Cons. 75. n. 23. & 539.

(e) B. Dn. D. Harpprecht, d. Cons. 75. n. 341.

(f) B. Dn. D. Harpprecht, in Cons. 37. n. 20. sqq.

(g) Idem, d. Cons. 75. n. 540. quo casu talis negans sigillum proprium hodie arbitrarie punitur. Lauterbach, in Coll. tit. de fide instr. §. 53. Jus Prov. Würt. P. 1. tit. 34. §. 1. Und da einer. fol. 130. olim contra tales negantes dupli poena obtinebat; Nov. 18. c. 8. Lauterbach, ad Jus Prov. Würt. P. 1. th. 56. quam & hodie, parte petente, locum habere posse arbitror.

§. 196.

In hac probatione per testes diversi distinguendi sunt casus; Diversi heic aut enim testes producti deponunt, se ipsos instrumenti confectio- a se discer- terfuisse, vel & sese subscripsisse; & hoc casu agnoscunt manum suam nendi sunt & sigillum, & avthentia scripturæ plene censetur probata (a); aut casus, ex qui- bus diversi, saltem deponunt, se nosse scribentis manum, quæ ipsis satis cognita sit, oriuntur licet actui ipsi non interfuerint, & facile patet, illos plene probare probabilita-

non posse; cum nec probatio per comparisonem literarum ab ipsis artis peritis suscepta plene probet, per infra demonstranda; & hoc casu probatio saltem est semiplena probatione minor, & concurrentibus aliis demum adminiculis, plene probat (b). Priori casu pro testium qualitate & numero oritur etiam quandoque probabilitas juridica, modo major, modo minor; de quo casu supra, cum materiam de testibus pertractaremus, satis actum fuit; Posteriori casu etiam pro testium qualitate & numero oritur major, vel minor probabilitatus gradus, qui tamen, licet duo præsto sint testes omni exceptione majores, nunquam efficit semiplenam probationem. Ponamus enim, v. gr. unum saltem testem asseverare, se manum auctoris habere cognitam, longe inferior erit probabilitatis gradus semiplena probatione; ponamus, hunc laborare defectu, iterum minor erit gradus; & sic porro; & heic repeti possunt omnia ea, quæ supra de testibus pluribus dicta sunt.

(a) B. Dn. D. Harpprecht, Cons. 75. n. 530. Bardili, in d. Disp. de Recognit. Instrum. th. 44.

(b) B. Dn. D. Harpprecht, all. Cons. 75. n. 535. & Bardili, d. Disp. th. 44.

§. 197.

Probatio
avthenticiæ
per juramen-
ta.

Accedimus denique ad probationem avthenticiæ scripturarum privatarum per juramenta; per Instrumenta enim hujusmodi probationem non facile institui posse, supra (§. 187. not. a.) dictum fuit. Fit autem probatio hæc per juramenta vel mediante juramento suppletorio vel purgatorio (§. 187.); Priori modo fieri solet, si alia præsto sint adminicula, quæ semiplenam efficiunt probationem; sic v. gr. instrumenta antiqua per se sine recognitione (a) semiplene probant (b), adeoque, mediante juramento in supplementum, eorum avthentia probari potest. Sic porro libri mercatorum per se sine recognitione (c) efficiunt semiplenam probationem (d), adeoque eidem juramento locum dant. Similis casus est, si scriptura morte scribentis corroborata sit, & mortuus in agone constitutus illam veram esse affirmaverit (e); Communissimum autem & frequentissimum remedium, quo instituitur hæc probatio, & cui regulariter juramentum suppletorium accedere solet, est comparatio literarum, de qua jam in primis agendum erit (f).

(a) Bardili, in sæpe cit. Disp. de Recognit. Instr. th. 22.

(b) B. Dn. D. Harpprecht, Resp. 86. n. 170

(c) Dn. Estor,

- (c) Dn. Eftor, in dem Teutschen Reichs-Proceß. feñ. 16. §. 415.
 (d) Carpzov, P. 1. Const. 17. Def. 35. Klein, in Disp. de probat. quæ fit per libros mercatorum, per tot. B. D. Lauterbach, in Coll. tit de fide instrum. §. 50.
 (e) B. Dn. D. Harpprecht, Cons. 37. n. 121. feqq. & Cons. nov. 70. n. 282. & argum. eorum, quæ occasione hæredum mercatoris deducit Stryk, in Disp. de morte loco jurisjur. c. 2. §. 8.
 (f) Heic facile patet, quandoque etiam ex modo juramenti præstiti, si aliquid omiffum fit, vel & si juramentum non præstitum fit, sed accesserint aliæ asseverationes &c., oriri posse probabilitatem juridicam, quæ, quanta sit? infra docebitur, & tum facilis erit applicatio ad casum propositum.

§. 198.

Accedimus igitur ad comparationem literarum, quæ, tanquam remedium admodum periculosum (a), nonnisi in subsidium locum habet (b); hæc est remedium, vi cujus scriptura producta cum alia, quæ absque dubio adversarii manu scripta est, comparatur, & de similitudine literarum judicium fertur (c), & si omnimoda similitudo reperiatur, plusquam semiplene, sin vero aliqualis dissimilitudo, sed levis, præsto fit, probat per se semiplene (d). Modo Requisitis suis constet.

- (a) B. Dn. D. Harpprecht, in Cons. 75. n. 527. sæpe enim dantur homines, qui alterius manum perfecte imitari possunt, sæpe etiam aliter scribunt senes, aliter juvenes &c. hinc omnes circumstantiæ probe ponderandæ sunt. Bardili, in d. Disp. de Recognitione Instrum. §. 42.
 (b) Nov. 73. c. 1. & 7. Bardili, d. Disp. th. 11. Rollwaag, d. Disp. de comparat. literarum, th. 9. Quandoque & adhuc decerni potest post diffessionem juratam. vid. B. Dn. D. Harpprecht, in Cons. 37. n. 30. feqq.
 (c) Bardili, c. 1. Eftor, in dem Teutschen Reichs-Proceß, d. feñ. 16. §. 416. Rollwaagen, d. Disp. de Comparat. literarum, th. 3. Sedem suam habet hæc comparatio literarum in L. 20. & Avth. ad hæc. C. de fid Instr. & Nov. 49. c. 2.
 (d) B. Dn. D. Harpprecht, in d. Cons. 37. n. 133. feqq.

§. 199.

Requisita hujus comparationis literarum a DDbus traduntur sequentia: Imo, ut adversario petente præstetur juramentum calumniæ, quod non malitiose petita sit, nec aliud in promptu fuerit remedium, II^{do}, ut præsto sint duæ scripturæ, altera, ex qua instituitur comp^oratio, & altera, cujus gratia instituitur, quarum illa notorie debet esse adversarii manu conscripta; hinc in LL. requiritur, ut illa sit ex Archivo desumpta (a). III^{io}, ut adhibeantur duo in arte periti, qui eam ob causam juramento sunt adstricti. IV^{to}, ut hi periti, prævia

prævia adcurata comparatione litterarum, similitudinem deprehendant litterarum, & Vto, ut sequatur Judicis Interlocutoria declaratoria, quod scil. utraque scriptura eadem manu scripta sit (b). Hæc requisita ad amussim observanda esse contendunt DDres (c).

(a) Per L. 20. C. & Avth, ad hæc de fid. Instr. Hodie vero, quia & ex quacunque privata scriptura institui possit hæc comparatio, modo illa certo adversarii manu scripta sit, extra dubium est. Dn. Estor, d. sect. 16. §. 416. & 417. Rollwaagen, in d. Disp. de comparat. litterarum, th. 31. arg. Avth. ad hæc. C. de fid. Instrum. verb. Ad hæc ex his literis, quibus adversarius tuus utitur & profert &c. loquitur igitur heic Imperator de scriptura privata ab adversario producta. Prior igitur sententia per hanc Avthenticam, quippe ex Nov. 49. c. 2. desumptam adeoque jus posterius, sublata esse videtur & correctæ, add. Bardili, d. Disp. de Recognit. Instr. th. 43.

(b) B. Dn. D. Harpprecht, in sæpe cit. Cons. 37. n. 35 - 44. Bardili, in dict. Disp. de Recognit. Instrum. th. 43. Rollwaagen, in d. Disp. de comparat. litterarum, th. 14 - 21. Dn. Estor, in dem Teutschen Reichs-Process, d. sect. 16. §. 417.

(c) B. Dn. D. Harpprecht, d. Cons. 37. n. 44. Rollwaagen, d. Disp. th. 22.

§. 200.

Omissio uno
vel altero
Requisito, si
illud suppleri
nequeat, ori-
tur probabi-
litas juridi-
ca.

Requisita hæc comparationis litterarum ad amussim & ad unguem observanda esse supra diximus (§. 199.). Ex quo patet, quod, neglecto uno vel altero requisito, Judex vel illud supplere, vel & quandoque totam litterarum comparationem repetere debeat. Non tamen ideo sequitur, ut, si forte hæc comparatio defectu quodam laboret, qui amplius suppleri nequit, vel si comparatio repeti non possit, v. gr. si Instrumentum amissum sit &c. illa statim, deficiente uno vel altero requisito extraessentiali, irrita plane reddatur, nec inde præsumtio seu probabilitas quædam juridica nascatur, sed potius quandoque remanet probabilitatis gradus, haud multum ab illo gradu, quem comparatio litterarum rite instituta parit, distans. Imo hodie solennis illa litterarum comparatio non ita frequens est, sed Judex plerumque contentus esse solet minus solenni, in qua nonnisi essentialia desiderantur requisita, & quæ nihilominus etiam sicut solennis semiplene probat (a). Quin igitur in casu, ubi hic vel ille defectus in solenni comparatione suppleri nequeat, & ille haud multum deroget fidei comparationis, sed potius remaneat probabilitatis gradus, modo major, modo minor, vel ex eo patet, quia tum talis comparatio ad minimum constat adhuc requisitis minus solennis comparationis litterarum, quæ suis non destituitur effectibus.

Imo,

Imo, cum hujus vel illius Requisiti omissio partibus imputari nequeat, nec hic judicis error tantum illis nocere poterit, ut plane omnis fides hujusmodi comparationi denegetur (*b*).

(*a*) Dn. Estor, in dem Teutschen Reichs-Proceß, sect. 16. §. 418. & 419.

(*b*) Anal. L. 24. ff. de his, quæ in fraud. cred. & eorum, quæ deducit Magnif. D. D. Schœpf, in Proc. Dicast. Wurt. vet. edit. c. 13. §. 5.

§. 201.

Præmissis hisce dispiciendum jam erit, qualis nascatur probabilitatis gradus, hoc vel illo Requisito deficiente, vel & quibusnam in casibus hujusmodi comparatio plane nihil operetur? Ponamus jam, deficere *primum Requisitum*, scil. a petente comparationem literarum juramentum calumniæ haud præstitum esse; & duo distinguendi sunt casus; aut enim ab adversario petitum non fuit, & tacite omitti poterit a Judice (*a*), nec igitur quicquam detrahit hoc casu fidei comparationis; aut petitum fuit ab adversario, & a judice fuit neglectum, & omnino male egit judex, qui, omisso hoc juramento, nihilominus ad ipsam literarum comparationem processit, & processus eatenus nullus fit, ut, si fieri possit, comparatio denuo institui, vel hoc juramentum suppleri debeat (*b*); nihilominus tamen ideo nihil vel parum fidei comparationis ipsi detrahi, *si suppleri non amplius possit* (*c*), vel ex eo patet, quia partim error judicis parti nocere non debet, partim vero, quia finis principalis comparationis, observatis reliquis requisitis, nihilominus obtentus est, nec omissio hujus juramenti fidei artis peritorum ad comparationem literarum adhibitorum, quorum causa tamen proprie fides aliqua hujusmodi comparationi tribuitur, derogare potuit (*d*); Adeoque nihil, vel admodum parum detrahi fidei comparationis omisso hoc juramento, per se patet. Cum igitur, si similitudo perfecta deprehendatur literarum, hæc comparatio plusquam semiplenam probationem producat, ad minimum hoc casu, si vel maxime, omisso hoc requisito, fidei comparationis aliquid detrahi concedamus, remanebit adhuc semiplena probatio, juramento in supplementum roboranda (*e*). Secundum *Requisitum* si deficiat, h. e. si deficiat scriptura, vel illa, ex qua comparatio instituitur, vel illa, cujus causa instituitur, utroque casu comparatio non est possibilis, adeoque nec inde oriri poterit gradus quidam probabilitatis. Tertio *Requisito* remoto, si scil. non adhibeantur artis periti, sive tales, qui

Inquiritur in gradum probabilitatis ex omissione unius vel alterius Requisitionis.

dignoscendis literis pares sunt, iterum corrui omnis comparationis fides; *sin vero adhibeantur artis periti, sed juramento non adstringantur, aliquam quidem producet fidem hujusmodi comparatio, sed non majorem, quam testimonium injuratum, h. e. valde exiguum, & semiplena probatione longe inferiorem. Quartum Requisitum si deficiat, h. e. si artis periti vel non accurate omnia perpenderit, & pro gradu diligentiae modo major, modo minor inde nascetur probabilitatis gradus, vel, si deprehendant dissimilitudinem, sed exiguum, & probatio erit semiplena, si majorem, & erit semiplena minor, & sic pro gradibus convenientiae modo major, modo minor probabilitas, ita tamen, ut sola comparatio, si vel maxima reperiatur similitudo, nunquam, sine aliis adminiculis (f), plenam efficiat probationem. Quintum denique Requisitum semper suppleri potest a iudice, si ex antecedentibus videat, aliquid sibi probatum esse vel non esse, adeoque hoc casu de gradu probabilitatis quaestio incidere nequit.*

- (a) Rutg. Rulandus, de Commissar. L. 5. c. 38. n. 9. B. Dn. D. Harpprecht, in saepe alleg. Cons. 37. n. 35. generaliter enim juramentum calumniae generale tacito partium consensu, hoc est, partibus non petentibus, a iudice omitti posse, constat ex c. 1. §. 1. de juram. calumn. in 6to. Recess. Deput. de anno 1600. §. als auch unser 10. add. Jus Prov. Wurt. P. I. tit. 26. §. und mag zwar 10. pag. 117. B. D. Lauterbach, in Coll. Theor. Pract. tit. de jurejur. §. 82. Est namque hoc nostrum juramentum calumniae tam speciale, quam certo modo generale; Rollwaagen, in d. Disp. de Comparat. Literar. th. 15. id quod & exinde patet, quia in juramento calumniae generali promittit jurans, se nullam non necessariam probationem exacturum, nec falsa probatione usurum esse. Nov. 49. cap. ult. Jus Prov. Wurt. P. I. d. tit. 26. §. zum vierten 10. pag. 117. & §. zum funften 10. ibid. Add. Avth. in isto. C. de jurejur. propter calumn. Quod idem & hoc casu exigitur. B. Dn. D. Harpprecht, in d. Cons. 37. n. 36. Rollwaagen, cit. loc. th. 15.
- (b) Jus Prov. Wurt. P. I. tit. 26. §. und mag 10. pag. 117. verbis: zu Verhütung der Nullität 10.
- (c) Vix tamen accidere potest casus, ut repeti nequeat hoc juramentum, cum & heredes ad minimum de credulitate illud praestare teneantur. vid. B. D. Grave, in Disp. de jurejur. propter calumn. dand. c. 3. th. 3.
- (d) Conf. Joh. Sam. Stryk, in Disp. de remis. juram. calumn. c. 1. n. 66. seq.
- (e) Si Iudex, vel adversario petente, vel proprio motu hoc juramentum parti comparisonem petenti injunxerit, nec illa jurare voluerit, nihil etiam plane operatur comparatio literarum ex post instituta; effectus enim hujus juramenti recusati est, ut recusans quoad istum articulum pro confesso habeatur & causa cadat, D. Lauterbach, in Coll. tit. de jurejur. §. 40. & 90. adeoque, cum adversario eo ipso jus jam quaesitum sit, omnia ex post gesta adeo nulla sunt, ut plane nihil operentur, & talis comparatio ne probabilitatis quidem gradum vel praesumptionem ullam producat; eo ipso enim recusans censetur fassus esse, quod dolo malo comparisonem petierit, & veritatem suppressere voluerit.

(f) Ad

(f) Ad hæc adminicula etiam referri potest casus, si plures scripturæ vel plurimum manus conferantur inter se, & similes reperiantur; eo ipso enim multiplex hæc convenientia & similitudo multum addit roboris hujusmodi comparationi literarum, v. gr. si testium subscriptiones etiam deprehendantur convenire cum illorum ductibus literarum consuetis, vid. B. Dn. D. Harpprecht, in d. Cons. 37. n. 102. vel & si suffulciatur hujusmodi comparatio a testibus manus suas recognoscentibus &c.

§. 202.

Progredimur jam ad alterum modum reprobandi, sc. Instrumentorum privatorum Avthentiam per juramentum, jusjurandum scil. purgatorium; id quod fit in diffessione jurata (§. 187.) Juramentum enim hoc, cum præstetur ab illo, contra quem producit scriptura privata, & quidem eo fine, ut scripturam illam falsam esse probet, adeoque suspicionem contra se militantem purget, quæ quippe proprie est natura juramenti purgatorii (a), proprie referendum est ad juramenta purgatoria. Quamprimum itaque ab adversario producit scriptura privata, illa aut recognoscenda est, de quo casu supra (§. 188. sqq.) actum fuit, aut ejus Avthentia, mediante juramento, neganda est (b), quod vocatur diffessio jurata.

Modus elidendi Probationem Instrumentorum privatorum Avthentia per juramentum purgatorium, quod fit mediante diffessione jurata.

(a) Cap. ult. X. de jurejur. cap. 8. X. de purg. canon. B. D. Lauterbach, in Coll. Theor. Pract. tit. de jurejur. §. 44.

(b) Bardili, in d. Disp. de Recognit. Instrum. th. 14. & 15. Dn. Estor, in dem Teutisch. Reichs-Proc. sect. 16. §. 393. Reces. Imp. noviss. de anno 1654. §. 39. Add. Jus Prov. Wurt. P. I. tit. 35. §. Wann die Parthien xc. pag. 132.

§. 203.

Diffessionis hujus juratæ is est effectus, ut tale Instrumentum habeatur pro falso (a), & Reus, nisi producat aliis modis illius Avthentiam & veritatem assertorum probare queat (b), quod ipsi salvum manet (c), quia tum causa redigitur in statum Lit. Contest. negativæ (d), absolvatur (e).

Effectus diffessionis juratæ.

(a) B. Dn. D. Harpprecht, in Cons. 75. n. 524.

(b) Idem, Cons. 37. n. 21. & ibi alleg. Mevius, in P. 6. Dec. 278. n. 1. Engelbrecht, in Disp. de Recognit. Instrum. th. 28.

(c) Idem, cit. loc. & Cons. 75. n. 524. & 540. Engelbrecht, d. Disp. th. 23. 24.

(d) Idem, Cons. 37. n. 24.

(e) Idem, d. Cons. 75. n. 539.

§. 204.

Diffessioni juratæ haud locum faciunt illa Instrumenta privata, quæ per se aliquam vel & semiplenam fidem habent, adeoque

Quænam Instrumenta diffessionem juratam non locum admittant.

locum dant juramento in supplementum, v. gr. Libri mercatorum (a); sicut nec recognitione opus habent; supra (§. 197.).

(a) Dn. Estor, in L. N. Process, dict. sect. 16, §. 415.

§. 205.

Quomodo
circa hanc
diffessionem
juratam pro-
babilitas ju-
ridica sese
exferere
possit?

Ex antecendentibus patet, diffessionem juratam non haberi pro plena falsitatis probatione; alias enim tam facili negotio nulla in contrarium admitteretur probatio, nec haberetur saltem loco Litis Contestationis negativæ, sed Reus statim absolvendus esset; actore enim non probante, multo magis igitur Reo innocentiam probante, Reus absolvendus est (a); sed saltem operari præsumtionem juris contra instrumenti producti avthentiam, quæ onus probandi contrarium in adversarium rejicit. Ex quo porro inferitur, illam per se probabilitati juridicæ accensendam esse. Alio tamen adhuc modo probabilitas juridica circa hanc diffessionem juratam sese exferere potest, in modo scil. juramentum præstandi; sic, v. gr. si moriatur is, cui diffessio injuncta erat, & asseveret, priusquam decedat, Instrumentum, de quo quæritur, falsum esse, oritur inde suspicio quædam falsitatis; imo, si ante mortem delatum hoc juramentum acceptaverit, habetur pro actu præstito (b); siis, contra quem productum erat tale Instrumentum, sub gravibus contestationibus ejus falsitatem asseruerit, alia inde oritur suspicio falsitatis &c. illic fortior, heic levior, & sic porro pro personæ qualitate & asseverationum gravitate (c). Quomodo ceterum probabilitas juridica circa materiam juramentorum sese exferere possit? mox ulterius dicendum erit.

(a) L. 2. C. de probat. L. 4. C. de edend. L. 9. C. de except. C. ult. X. de Jurejur. B. Dn. D. Harppr. Resp. 11. n. 91. Resp. 60. n. 1011. Resp. 86. n. 179. & DDres passim.

(b) Sam. Stryk, in laud. Diss. de morte loco jurisjur. c. 2. §. 9.

(c) Sed objici posset: Quid opus est heic differere de hujusmodi probabilitatibus? nunquam enim occurrere potest casus, in quo illæ utilitatem aliquam afferre queant; si enim ponamus, illum, qui jurare debebat, mortuum esse, heredes ejus tenebuntur jurare de credulitate; & aliena, modo cognita, manus recognoscenda, aut mediante juramento ejus falsitas adstruenda est. Dn. Estor, in L. N. P. d. sect. 16. §. 404. not. 3. Bardili, in d. Disp. de recognit. instrum. th. 25. Engelbrecht, in d. Disp. de recognit. instrum. th. 10. Sed salva res est; sæpe enim occurrunt casus, ubi jurata hæc diffessio in heredibus locum habere nequit, & hi ne de credulitate quidem jurare possunt; v. gr. si manus aliena recognoscenda sit, quæ heredibus non æque ac mortuo cognita est. Tum enim omnino hujusmodi suspensiones falsitatis tantum operantur, ut alter luculentissimis & majoribus ad minimum, quam ordinariis, probationibus opus habeat, ad veritatem instrumenti producti adstruendam.

CAPVT III.

CAPUT III.

PARS II.

SECTIO IV.

DE PROBATIONE PER IVRAMENTA.

§. 206.

Hactenus egimus de probatione per Instrumenta, tam publica, quam privata, & monstravimus, qualis & quanta probabilitas circa illam sese exserere queat; jam progredimur ad quartam Probationum speciem, per Juramenta scilicet (§. 108.). Multiplicis generis Juramenta dari aliunde constat; præstantur enim vel in causis publicis, vel privatis (a), & posteriori casu iterum vel in causis privatorum judicialibus, vel extrajudicialibus (b). Illuc spectant potissimum assertoria, nec non quæ decisionem rei controversæ concernunt (c); Huc pertinent proprie illa, quæ promissoria vocantur, vel quæ ad actus cujusdam confirmationem accedunt, & ideo vocantur confirmatoria. Nobis heic proprie sermo est de illis, quæ ad rei controversæ decisionem spectant, & uno verbo de judicialibus. Cum enim probabilitatem juridicam nobis proprie habeamus propositam, quæ proprie probationi inservit, probatio autem fiat Judici: facile patet, Juramenta extrajudicialia, adeoque etiam promissoria vel confirmatoria, huc non spectare.

(a) B. D. Lauterbach, in Coll. Theor. Pract. tit. de jurejur. §. 34.

(b) Idem, d. l. §. 35.

(c) Andr. Bajer, in Disp. de Juramentis, th. 9. 10. Dn. Estor, in dem Teutschen Reichs-Proceß, sect. 17. §. 459. 460.

§. 207.

Spectant itaque huc proprie Juramenta judicialia, in re controversa præstanda. Sed jam quæritur, quid sit juramentum, & quid heic vocemus juramentum judiciale? Juramentum dicitur Invocatio Nominis Divini, qua DEVS T. O. M. tanquam asserti alicujus testis & vindex provocatur (a). Judiciale juramentum heic loci in sensu latiori accipitur, pro illo, quod in judicio coram judice præstandum est, & quo asseritur, hoc vel illud partis assertum verum esse; hoc loco enim contradistinguitur extrajudiciali, quo aliquid vel promittitur, vel actus quidam confirmatur.

tur & corroboratur. Alio sensu, eoque specialiori, quod dicatur judiciale? mox dicetur.

- (a) Levitic. XIX. v. 12. Exod. XXII. v. 11. Deuteron. VI. v. 13. & X. v. 20. I. Chron. XXIX. v. 9. II. Chron. XXXVI. v. 13. I. Reg. VII. v. 32. II. Reg. XXV. v. 7. Psalm. VII. v. 10. Jerem. XI. v. 20. Rom. I. v. 9. IX. v. 5. Hebræor. VI. v. 16. B. D. Harpprecht, Resp. 71. n. 191. seq. Andr. Bajer, d. Disp. de juram. th. 4. Dn. Estor, in dem Teutsch. Reichs-Proceß, sect. 17. n. 457. Exc. Dn. D. Christoph. Frid. Harpprecht, in laud. Disp. de jurejur. scriptura præstito, th. 3.

§. 208.

Quædam
sola per se
efficiunt
probatio-
nem, quæ-
dam illam
adjuvant vel
elidunt.

Juramentorum, quæ probationis gratia in judicio præstantur, quædam sunt ita comparata, ut sola, non accedentibus aliis ad-
miniculis, probationem plenam efficiant; quædam supponunt
præsumptiones quasdam, easdemque vel suppleant, vel elidunt.
Prioris generis sunt juramentum judiciale, quod hoc loco dicitur
illud, quod pars parti in judicio defert (a), & juramenta dandorum & respondendorum. Posterioris generis sunt suppletorium & purgatorium. De singulis jam speciatim dicendum erit (b).

- (a) L. 12. pr. & §. 1. C. de Jurejur. B. D. Lauterbach, in Coll. Th. Præf. tit. de Jurejur. §. 62. Besold, in Disp. de juram. convent. th. 2. qui illud conventionale appellat.
(b) Plura quidem alia dantur juramenta in judicio præstanda, v. gr. juramentum in litem, juramentum calumniæ, juramentum manifestationis, minorationis &c. de quibus vid. Lauterbach, dict. loc. §. 37. sqq. Sed cum hæc partim sub prioribus comprehendantur & illorum species sint, partim non directe ad materiam probationis spectent, partim vero non tam frequenter occurrant; merito illa jam brevitatis studio prætermittimus, & præsertim species modo recensitas pertractamus; ceterum Lectori de reliquis, ex illis, quæ jamjam tradituri sumus, facile erit judicium.

§. 209.

De Juramen-
to judiciali
strictè sic
dicto.

Primum igitur, de quo jam agendum est, Juramentum, est Juramentum judiciale vel conventionale, quod pars defert parti in
judicio litis decidendæ ergo. Cum enim sæpe accidere soleat,
ut pars quædam intentionem suam modis hætenus recensitis ideo
probare non possit, quia & testibus & documentis destituitur, vel
quia forte a testibus perjurium metuit; inventus est modus hic
probandi, quo facillime causâ controversâ decidi potest, per jura-
mentum scilicet conventionale vel judiciale, si nimirum non me-
tuatur adversarii perjurium. Deferri potest hoc juramentum,
licet nihil plane probari potuerit (a), vel & licet probatio jam
absoluta sit, sed nihil probatum sit (b), a quocunque, qui liberam
rerum

rerum suarum administrationem habet (*c*), cuique, etiam personæ infami (*d*), modo adversarius nondum plene probaverit, tum enim ulterioribus probationibus opus non est (*e*), in omnibus causis præter publica judicia (*f*) & causas matrimoniales, (si contra matrimonium jurandum sit) (*g*), in quacunque iudicii parte (*b*), etiam termino probatorio jamjam elapso (*i*), ante & post Litiscontestationem (*k*), & delatum aut simpliciter in forma a Iudice comprobata (*l*) præstari, aut referri (*m*), aut contrarii probatione elidi debet (*n*); alias recusatum, absque justa causa, operatur plenam probationem; & articulus, super quo iuramentum delatum fuit, censetur confessione adversarii roboratus (*o*); si præstitum sit, operatur absolutionem adeo plenam, ut deferens nequidem audiatur, si ex instrumentis forte noviter repertis sententiam conetur impugnare (*p*), quia causa per conventionem quasi partium spontaneam censetur esse decisa (*q*).

(*a*) L. 35. pr. ff. de jurejur. L. ult. C. de fideic. L. 21. §. penult. ff. de probat. B. D. Lauterbach, in Coll. Th. Pract. tit. de jurejur. §. 63. B. Dn. D. Harpprecht, in resp. 89. n. 92. Idem, in Cons. nov. 32. n. 63. & Cons. nov. 57. n. 55. Cel. Leyser, in spec. ad ff. 135. n. 5.

(*b*) Arg. L. 11. L. 12. C. de R. C. & jurejur. B. D. Lauterbach, in Coll. d. tit. §. 63.

(*c*) Lauterbach, in Coll. d. l. Paul. Anforgius, in Disp. Argent. 1661. habit. de jurejur. quod pars parti deferat in iudicio, th. 17. Besold, in Disp. de juram. convent. th. 5-13. inclus.

(*d*) L. 26. pr. ff. de jurejur. B. D. Lauterbach, in Coll. d. t. §. 64.

(*e*) Cap. 2. X. de probat. B. D. Lauterbach, in Disp. de relat. jurisjur. th. 29. sqq. & th. 36. sqq.

(*f*) Anforg, in d. Disp. th. 19. B. D. Lauterbach, in Coll. d. tit. §. 65.

(*g*) B. D. Lauterbach, in Coll. d. tit. §. 65. Besold, in d. Disp. th. 14. & 17. Celeb. Dn. Estor, in dem teutschen Reichs-Process, sect. 17. §. 482.

(*h*) L. 12. pr. C. de R. C. & jurejur. B. D. Lauterbach, in Coll. d. tit. §. 66.

(*i*) Arg. L. 11. & d. L. 12. C. de R. C. & jurejur. Lauterbach, in Coll. d. tit. §. 63. & 66. Besold, in d. Disp. de jurejur. convent. th. 16.

(*k*) Dn. Estor, in T. N. Proc. sect. 17. §. 496. L. 12. pr. C. de R. C. & jurejur.

(*l*) B. Dn. D. Harpprecht, in resp. 13. n. 206. & n. 224.

(*m*) Anforg, in d. Disp. th. 31. B. D. Lauterbach, in Coll. d. tit. §. 68. nisi de facto tertii, nonejus, cui delatum est, sermo sit, tum enim relatio locum non habet. Lauterbach, d. l. §. 68. Harpprecht, resp. 13. n. 201.

(*n*) Arg. Cap. 2. X. de probat. Lauterbach, in Coll. d. l. §. 67.

(*o*) L. 34. §. 6. & ult. L. 38. ff. de jurejur. L. 9. C. ibid. Lauterbach, in Coll. d. tit. §. 67. Anforg, in d. Disp. th. 50. sqq.

(*p*) Lauterbach, in Coll. d. l. §. 71. L. 1. C. de R. C. & jurejur. Celeb. Estor, in d. sect. 17. §. 463.

(*q*) Hinc

(q) Hinc & in jure sæpe æquiparatur Transactioni & rei judicatæ, & nihil quæritur, nisi an juratum sit? L. 56. ff. de re jud. L. 5. §. 2. ff. de jurejur. B. Dn. D. Harpprecht, in resp. 29. n. 62. & in Cons. nov. 18. n. 50.

§. 210.

Ejus
requisita.

Ex præmissis Requisita hujus Juramenti, si scil. omnes effectus suos producere debeat, facile intelliguntur. Cum enim quæstio sit, quid requiratur, ut hoc juramentum præstitum plenarium absolutionis vel condemnationis effectum producat? ad sequentia attendendum est requisita: I. *An persona deferens sit habilis*, h. e. rerum suarum administrationem habeat liberam? Quia enim est species Transactionis, nemo id deferre potest, nisi qui etiam transigere potest; hinc excluditur v. g. pupillus sine tutoris auctoritate, prodigus, furiosus, mente captus, minor absque Curatore, &c. (a) II. *requiritur, ut persona, cui defertur, intellectum habeat, & dignoscere possit, quid agat (b)?* Ceterum nihil interest, cujuscunque sexus vel ætatis sit is, cui delatum est, vel cujuscunque conditionis sit, infamis, &c. sibi enim imputet deferens, quod tali personæ ipse sponte sua causæ decisionem commiserit (c). III. *requiritur, ut causa ita comparata sit, ut juramenti delationem admittat*; hinc excluduntur causæ matrimoniales, si scil. contra matrimonium jurandum sit (d), item criminales, quatenus pœnam corporis afflictivam vel plane capitalem concernunt (e). IV. *ut præstitum sit in judicio (f)*. V. *requiritur, ut forma juramenti interna recte sese habeat*, h. e. ut juratum sit per DEum T. O. M. isque invocatus sit in testem & vindicem (g). VI. *ut & forma externa recte sese habeat*; hinc 1.) præstandum est hoc juramentum proprie tempore matutino, quia jurandum est jejuno stomacho (b). 2.) Avisatio sive admonitio de perjurio vitando præcedere debet; 3.) viri elevatis prioribus digitis manus dextræ, fœminæ iisdem pectori sinistro admotis, jurare debent. VII. *ut juramentum hoc præstitum sit ab ipso Principali, non per Procuratorem*, etiam speciali mandato instructum, nisi volente & consentiente adversario deferente (i). Hæc requisita, si recte sese habeant, juramentum hoc plenam producit probationem, & sequitur absolutio vel condemnatio. Jam vero etiam de gradibus probabilitatis dispiciendum est, ex defectu unius vel alterius Requisiti promanantibus.

(a) Paul. Anforg. in dict. Disp. de jurejur. quod pars parti defert in judicio; th. 17. Besoldus, in Disp. de jurejur. convent. th. 5 - 13. B. D. Lauterbach, in Coll. d. tit. de jurejur. §. 63.

(b) B.

- (b) B. D. Lauterbach, in Coll. d. tit. §. 64. Befold, in d. Disp. th. 18. Juramentum enim tres habere debet Comites, veritatem, justitiam, & Judicium, quæ tria necessario debent præsto esse. B. D. Lauterbach, in Tract. Synopt. de Juram. in genere, §. 1. th. 10. B. Dn. D. Harpprecht, in Cons. 30. n. 114.
- (c) L. 23. L. 26. pr. ff. de jurejur. L. ult. §. ult. ff. de liberal. caus. Befold, in d. Disp. th. 18. B. D. Lauterbach, in Coll. d. tit. §. 64.
- (d) Befold, in d. Disp. th. 14. B. D. Lauterbach, in Coll. d. tit. de jurejur. §. 55. & 65.
- (e) Paul. Ansof. in d. Disp. th. 19. Befold, d. l. th. 17. B. D. Lauterbach, in Coll. d. l. th. 65.
- (f) Grave, in Disp. de jurejur. propter calumn. dando, c. 5. §. 2. Dn. Estor, in L. R. Proc. d. sect. 17. §. 509.
- (g) Vid. supra (§. 207. not. a.)
- (h) Grave, in d. Disp. c. 5. §. 1. Dn. Estor, in dem teutschen Reichs-Proceß, sect. 17. n. 508.
- (i) Requiritur quidem etiam, ut deferens, adversario petente, juramentum malitiæ præstet; B. Dn. D. Harpprecht, in Cons. nov. 57. n. 64. L. 34. §. 4. ff. de jurejur. L. 37. ff. ibid. L. 9. C. de R. C. & jurejur. L. ult. C. de fideic. Dn. Estor, in dem teutschen Reichs-Proceß, sect. 17. §. 503. Sed primo, hoc, si petitum non sit, haud exigitur; secundo, si petitum & a judice neglectum, juramentum autem principale ab adversario nihilominus præstitum sit, adeo non principale hoc juramentum amittit vires suas, & gradum quandam probabilitatis producit, ut potius pro jurante ex duplici capite pronuncian- dum sit, partim ideo, quia, si adversarius juramentum calumniæ præstare detrectet, juramentum principale habetur pro præstito. Dn. Estor, in teut- schen Reichs-Proceß, sect. 17. §. 514. L. 37. ff. de jurejur. B. D. Lauterbach, in Coll. d. tit. §. 67. partim ideo, quia præstito juramento judiciali tota causa habetur pro decisa. L. 1. L. 2. ff. de jurejur. Dn. Estor, d. l. §. 463. B. D. Lauterbach, in Coll. d. l. §. 71.

§. 211.

Ponamus jam Imum deficere requisitum, juramentum scilicet ^{Quid, si dela-}judiciale delatum esse a persona inhabili: & nullum esse hoc ^{tum sit a per-}casu hoc juramentum, licet præstitum sit, facile patet (a); sed ^{sona inhabili?} hoc intelligendum est, quatenus consideratur tanquam juramen- tum judiciale, & ejus effectus plenarios producere debet; illud vero non adeo nullum esse, quin ex præstatione hujus juramen- ti pro præstante non aliqua militet præsumptio & probabilitas quæ- dam Juridica, vel ex eo patet, quia temere nemo præsumitur jurare & nomen Dei in vanum invocare; operabitur igitur hoc casu tale juramentum præstitum probabilitatem quandam Juridi- cam, sed quæritur: quantam? Resp. *Gradus hic accedet prope ad semiplenam probationem.* Quodsi igitur alia concurrant admini- cula, semiplenam probationem vel paulo majorem efficientia,

nullus dubito, quin hoc casu pro tali jurante pronunciari possit; coincidet enim tum juramentum hoc cum juramento suppletorio, & sine dubio idem operabitur, quod illud operatur, imo quandoque etiam elidet præsumptiones adversarii, sicut purgatorium, & cum illo coincidet; quodsi itaque adversarius intentionem suam probare non potuerit, quin, præstito hoc juramento, præstans, æque ac si purgatorium præstitisset, absolvendus sit, equidem nullus plane dubito; omnia enim essentialia juramenti sive suppletorii, sive purgatorii, in casibus modo propositis præsto sunt, & finis, ut scilicet vel probatio minus plena suppleatur, vel præsumptiones adversarii elidantur, hoc casu æque, ac præstitis juramenti sive suppletorio, sive purgatorio, obtentus est.

(a) L. 17. §. 1. L. 32. ff. de Jurejur. L. 1. §. 1. ff. quar. rer. act. non datur. Befold, in Disp. de Jurejur. conv. th. 6.

§. 212.

Quid, si jurans fuerit inhabilis?

Ponamus porro, defectum esse in Requisito II^{do}, scil. personam, quæ juramentum hoc præstitit, non fuisse habilem, i. e. illam intellectu sufficienti, ad dignoscenda ea, super quibus juratum erat, destitutam fuisse; & facile patet, totum corrui hoc juramentum, nec ullam habere efficaciam, nec adeoque reliqui probabilitatem quandam Juridicam; ratio enim, propter quam hic probandi modus introductus est, hæc est, ut talis metu vindictæ divinæ veritatem revelet; cum vero ratio hæc in illo, qui intellectu suo destituitur plenarie, tota cesset, quin nullus ex tali juramento gradus probabilitatis promanare possit, facile patet. Quodsi vero pupillus juramentum tale præstiterit, qui non omni destituitur intellectu, quin plene probet hoc juramentum, vel ex eo intelligitur, quia sibi imputare debet adversarius, quod juramentum tali concediderit (a); quamvis regulariter judex actualem juramenti præstationem differre debeat ad pubertatem usque plenam, h. e. ad annum usque 18. (b) adeoque, si pupillus eo usque vixerit, juramentum hoc repeti debeat, quamvis etiam quandoque admittatur post annum 14. (c)

(a) L. 26. pr. ff. de Jurejur. Befold, in d. Disp. de Jurejur. convent. th. 18. arg. eorum, quæ deducit Grave, in sæpe cit. Disp. de Jurejur. propter calumn. dando, c. 3. §. 17.

(b) Carpzov, in Jurisprud. for. P. 1. Const. 12. def. 42. Berger, in Elect. Disc. for. tit. 18. p. 532. sq. Dn. Estor, in dem teutschen Reichs-Proceß, sect. 17. §. 474. not. 1.

(c) Can.

(c) Can. 15. 16. Caus. 22. quæst. 5. Celeb. Leyser, in spec. ad ff. 136. coroll. 3.

§. 213.

Quodsi jam in III. Requisitum impingi supponamus, juramentum scil. judiciale deferri in causa, in qua regulariter juramentum tale deferri nequit, ut in causa matrimoniali, vel criminali, quin iterum juramentum judiciale, qua tale, nullum sit, ex antecedente Legis prohibitionem apparet, ita scil., ut effectus juramenti judicialis producere nequeat; sed annon fortasse probabilitas inde oriri possit, quæ conjuncta cum aliis adminiculis quandoque plenam probationem efficere queat, quæritur? Equidem heic distinguendum esse arbitror inter causas criminales, & matrimoniales; priori casu, si scil. de poena quadam gravi corporis afflictiva vel forte plane capitali quæstio sit, omnino tale juramentum nihil operari persuasum habeo; aut enim accusator præstitit hoc juramentum, aut Reus; si prius; ideo nihil operari potest, quia in criminalibus requiruntur probationes, uti loquuntur Juri, luce meridiana clariores (a); quo omnino accusatoris juramentum referri nequit; si posterius; tum omnino propter manifestam perjurii suspensionem haud admittendum erit, sicut nec purgatorium hoc casu facile decerni solet, sed potius tali in casu vel absolutionem rei ab Instantia, vel plane dimissionem ejus absque sententia, locum obtinere putem (b), pro facti diversis qualitatibus & circumstantiis; nec igitur, licet etiam actu præstitum sit tale juramentum, illud aliquid operari putem. Aliter paululum rem sese habere arbitror in causis matrimonialibus; aut enim juramentum hoc a Reo præstitum est ad elidendas suspensiones, & plene probabit, quia juramentum judiciale pro matrimonio præstitum omnino validum est (§. 209. not. g.); aut præstitum est ab Actore ad supplendas probationes imperfectas, & directe tanquam juramentum judiciale haud valebit, quia contra matrimonium juramentum judiciale haud admittitur, nihilominus tamen non plane nihil operabitur, sed pari passu ambulabit cum juramento suppletorio, & ob paritatem rationis eundem effectum producet, quem juramentum suppletorium in causis matrimonialibus producit contra matrimonium, hoc est, *admittetur, si præter semiplenam probationem pro actore insignis militet præsumptio* (c); *supplebit itaque probationem semiplena probatione longe majorem, adeoque producet præsumptionem semiplena probatione longe*

Quid, si delatum sit in causa criminali, vel matrimoniali?

longe inferiorem. Sicut in genere in causis valde arduis juramentum suppletorium non semiplenam, sed hac minorem, constituit probationem (d).

- (a) L. ult. C. de probat. B. Dn. D. Harpprecht, in Resp. 3. n. 6. Id. Resp. 2. n. 14. & 15. & DD. passim. Hinc nec hoc casu admittitur juramentum suppletorium. Gail, lib. 1. obs. 108. n. 11. 12. sq. & lib. 2. Obs. 94. n. 8. B. D. Lauterbach, in Coll. d. tit. de Jurejur. §. 77.
 (b) Excell. Dn. D. Mœgling, in Disp. de Dimiss. Reorum sine sententia, th. 8.
 (c) B. Dn. D. Lauterbach, dict. Coll. & tit. de Jurejur. §. 77.
 (d) Gail & Lauterbach, dict. locc. B. Dn. D. Harpprecht, in Cons. nov. 23. n. 35.

§. 214.

Quid, si non
in judicio ju-
raturum sit?

Ponamus porro, defectum esse in IV. Requisito, h. e. juramentum hoc non coram judice & in judicio, sed extra judicium coram privato quodam forte præstitum esse; (quod tamen vix ac ne vix quidem accidere potest,) & illud nihilominus plene probare arbitror, si scilicet adversarius, vel expresse, vel tacite, consenserit; si enim valet juramentum conventionale, quod extra judicium defertur & suscipitur (a), omnino nulla est ratio, cur hoc non eundem effectum producat; incidit enim tum in juramentum illud voluntarium & extrajudiciale, cujus quippe formam induit. Quod si vero adversarius non consenserit, illud omnino plene probare, & omnes plane juramenti effectus producere haud arbitror, quia omnino per conventionem in judicio præstari debuisset, adeoque heic in conventionis legem impactum fuit; imo accedit quoque alia ratio, quia forte coram judice jurans magis præmeditato jurasse censetur, quem quippe magis reveretur, quam privatum; nihilominus tamen hunc defectum adeo levem esse arbitror, ut facile, accedente quodam alio adminiculo, suppleatur, adeoque non multum valori hujus juramenti detrahatur; cum omnino nemo facile pejeraturus esse censeatur, præsertim admonitus, quod heic supponitur, nec præsentia judicis multum in ipsum juramenti hujus finem, ut scil. veritas reveletur, influat, adeoque partes ad locum in conventionem sua haud multum respexisse censeantur. *Summa itaque probabilitate & tantum non plena probatione sese commendabit juramentum hoc casu præstitum, licet, si repeti queat, illud coram judice repeti, consultius sit (b).*

- (a) L. 17. pr. L. 26. §. ult. L. 28. §. ult. ff. de Jurejur. B. D. Lauterbach, in Coll. tit. de Jurejur. §. 52.

(b) Op-

(b) Opponi posset: si in Legem conventionis jurans impegit, Juramentum deficiente conditione non amplius est judiciale, adeoque incidit in Juramentum suppletorium vel purgatorium, & saltem semiplena vel minori probatione sese commendat. Sed, cum parum ipsi Juramenti efficaciam locus, tanquam circumstantia valde accidentalis, addat, sane, in dubio, Juramentum deferens non ita præcise illud adversario sub hac Lege detulisse censetur, ut hac conditione sublata Juramentum præstari plane nolit; quod enim parum ad rem facit, ad illud, in dubio, in conventionem nemo censetur respexisse, adeoque hoc casu Juramentum nihilominus manet judiciale, sed non omnibus plane numeris absolutum.

§. 215.

Quintum Requisitum si defectus habeat, h. e. si circa formam Juramenti internam peccatum sit, v. gr. si non per DEum, vel non per DEum tanquam testem & vindicem, vel plane non juratum sit, diversi, pro diversitate scilicet defectuum, promanabunt effectus. Ponamus, v. gr. per Creaturas, Angelos, Sanctos, Cælum, Terram &c. juratum esse, & dist: aut jurans has creaturas pro vera Divinitate habet; & omnino verum est Juramentum, quale scilicet a tali pro ipsius conscientia exigere potest (a); aut hujusmodi creaturas non habet pro Divinitate quadaam, & nullum præstito est Juramentum, licet & tales asseverationes, quia magis enim animus demonstrant, assertioni alicui levidenssem quandam præsumtiunculam conciliare queant; ponamus, in formula Juramenti peccatum & v. gr. DEum saltem tanquam testem, non insimul ut vindicem perjurii, invocatum esse, nec hoc casu Juramentum judiciale omnes suos effectus producat, quia is, qui DEum insimul tanquam vindicem mali invocatur, testatum reddit, quod in ipsa præstatione Juramenti perjurii poenam sibi ob oculos ponat, adeoque multo minus perjurium committere censetur, quam is, qui DEum saltem ut testem invocatur; hinc solam DEI invocationem in testem multi pro vero Juramento non habent (b). Quia tamen DEus nomen suum in vanum invocantes certissime gravi poena coerciturus est, & hoc omnes jurantes, præsertim admoniti, ignorare nequeunt; omnino prope accedet talis invocatio seria ad juramentum, & parum aberit a vero juramento. Sed quæritur, quem gradum probabilitatis producat? & Resp. cum hoc casu pars essentialis Juramenti deficiat, non videri adversarium in talis Juramenti præstationem consensisse, adeoque qua Juramentum judiciale illud valere non posse; sed quandoque tamen prope accedet ad juramentum suppletorium, vel purgatorium, adeoque probatio erit semiplena proba-

Quid, si circa formam Juramenti internam peccatum sit?

tione paullo minor. Ponamus DEum tanquam vindicem & ultorem perjurii provocatum esse, & verum erit Juramentum, si pro asserenda veritate facti cujusdam hæc provocatio facta sit; eo ipso enim implicite DEus etiam tanquam testis provocatus est (*c*); omnino itaque validum erit Juramentum judiciale hoc modo præstitum. Ponamus porro, verum Juramentum & solenne haud præstitum esse; & dist: an forte morte impeditus præter suam culpam illud præstare actu non potuerit, licet paratus fuerit, & habetur omnino pro præstito (*d*); an vero formula ipsa seu modus asseverandi Juramentum haud involverit, & omnino asseveratio talis pro vero Juramento judiciali haberi nequit, quod quippe verum & solenne requirit Juramentum. Sic v. gr. solus tactus baculi judicialis, vel promissio loco jurisjurandi, non habetur pro vero, multo minus pro solenni Juramento (*e*); non igitur sufficit heic, cum partes per conventionem consenserint in verum & solenne Juramentum, *producet itaque quidem præsumptionem, sed semiplena probatione inferiorem*, quia nequidem in vim Juramenti suppletorii valere potest, vel purgatorii, quæ quippe itidem verum & solenne deprecantur Juramentum, majorem tamen efficiet præsumptionem hæc promissio, quæ quippe prope accedit ad verum Juramentum, quam aliæ asseverationes, quæ plane formam Juramenti non continent; v. gr. si quis veritatem asserit cujusdam asseveret *bey gutem Gewissen, bey guter Treu und Glauben* &c. (*f*), ast minorem, quam ubi DEus tanquam testis invocatus erat; quia ibi, præter intentionem juramentum præstandi, etiam accedunt verba, quibus animus hic declaratur; hoc casu vero non solum intentio solenne Juramentum præstandi deficit, sed nec animus hic verbis declaratur.

(a) Stryk, in *Uf. Mod.* tit. de Jurejur. §. 8. B. D. Lauterbach, in *Coll. ibid.* §. 15.

(b) Excell. Dn. D. Christoph. Frid. Harpprecht, in *Disp. de Jurejur.* scriptura præstito, th. 7. not. 27. & qui ibi alleg. Illustr. Bœlmer, in *Jure Eccles. Prot.* tit. de Jurejur. §. 7.

(c) Hinc formula ubique fere usitata: ita me DEus adjuvet, *als mir Gott helfe und sein H. Wort*, verum continet Juramentum; quo & referenda formula in *Ord. Cam. P. 1. tit. 57. & seq. & Rec. Imper. de anno 1555. §. und dann dieweil*, præscripta, qua juratur per DEum & SSum ejus Evangelium.

(d) Sam. Stryk, in *Disp. de morte loco Jurisjur.* c. 2. §. 3.

(e) B. Dn. D. Lauterbach, in *Tract. Synopt. de Juram. in genere*, §. 1. n. 22. B. Dn. D. Harpprecht, in *Resp.* 63. n. 98. & 99. Idem, in *Cons. nov.* 18. n. 15. seqq. ubi insinuat tractat casum, si quis respondeat sub fide Juramenti,

in alia jam causa præstiti. Idem, in Cons. 18. n. 115. Idem, in Cons. 89. n. 30. Andr. Baier, Posit. de Juram. th. 8.

(f) Adscribitur quidem hisce verbis vis ac efficacia Juramenti, si a Principibus vel Comitibus pronunciata sint, v. gr. si hi aliquid promiserint *hey Fürst. oder Gräflichen Parolen*. B. Dn. D. Lauterbach, in Coll. d. tit. de Jurejur. §. 20. Gail, L. 2. Obs. 59. n. 6. B. Dn. D. Harpprecht, Resp. 71. n. 61. an vero hæc verba eandem vim habeant, in Juramentis solennibus in judicio præstandis? de eo merito dubitatur. Lauterbach, in d.l. Pariter promissiones Mercatorum, *hey Treu und Glauben*, æquiparantur Juramentis. Joh. Marquard, de Jure Mercatorum, L. 2. c. 8. n. 3. B. D. Lauterbach, in Coll. d. t. B. Dn. D. Harpprecht, in Resp. 97. n. 70. quod tamen in casibus, in quibus verum & solenne requiritur Juramentum, haud procedit; hinc hæc verba nunquam æquiparantur Juramento in judicio præstando.

§. 216.

Progredimur ad VI^{um} Requisitum, quod in eo posuimus, ut forma juramenti externa, h. e. solennitates externæ, quæ alias in juramento intervenire solent, recte sese habeant. Hæc requisita, cum omnino usu fori tantum non universali recepta sint, & proprie solenne, uti vocant, juramentum constituent (a), omnino in juramentis, maxime judicialibus, quæ quippe omnia solennia sunt, observari debent, quia ibi partes conventionem suam in juramentum solenne consensisse censentur. Quin igitur, omissis hisce solennibus, juramentum judiciale non omnibus numeris absolutum sit, facile patet, adeoque etiam omnes illius effectus producere vix poterit. Cum vero contra hæc solennitates ad internum juramentorum valorem parum vel nihil conferant, adeoque partes in conventionem ad illas potissimum non respexisse censeantur, quamvis sua in jurando utilitate haud destituantur (b): sane haud multum valori hujusmodi juramenti earum ommissio detrahit, adeoque, *hoc casu, omnino parum aberit gradus probabilitatis inde oriundus a plena probatione, erit itaque hoc casu probatione semiplena multo major* (c); Nihilominus, pro diversitate harum solennitatum, iterum diversus erit gradus probabilitatis; sic, v. gr. *omissa avisatione*, quia hæc efficit, ut juramentum majori deliberatione præstetur, *minor erit gradus probabilitatis, quam si digiti elevati haud sint*, quæ quippe solennitas cum intentione jurantis, ad quam tamen maxime respiciendum est, minimam habet connexionem, licet, & ommissa avisatione, gradus probabilitatis adhuc semiplena probatione major sit, quia nemo tam leviter juramentum suscipere censetur; ita enim

Quid, si forma Juramenti externa minus recte sese habeat?

enim & in casu, ubi solenne juramentum non requiritur, v. gr. in negotiis extrajudicialibus, ubi juramentum confirmationis saltem gratia additur, tale juramentum pro vero juramento habetur, & plene obligat, licet avisatio specialis non præcesserit.

- (a) L. 21. C. de R. V. Briffonius, edit. Heinecc, de V. S. p. 1258. seq. Excell. Dn. D. Harpprecht, in laud. Disp. de jurejur. script. præstito, §. 10. not. 47. 48.
- (b) Excell. Dn. D. Harpprecht, d. l. §. 10. not. 49. 50.
- (c) At vero, cur heic gradum probabilitatis semiplena probatione majorem esse contendimus, cum supra (§. 211.) deficiente Requisito primo, illum semiplenæ probationi æqualem, vel illa paulo minorem, pronunciaverimus? Sed Resp. ibi supponebatur defectus in persona deferente, ibi itaque juramentum præstitum tanquam judiciale non amplius considerari poterat, sed incidebat in suppletorium, cujus effectus saltem est semiplena probatio; secus res sese habet in casu nostro præsentis, ubi, cum persona deferens habilis, & ceterum juramentum verum intervenisse supponatur, manet juramentum judiciale, licet non omnimodo solenne, adeoque tantum aliquid pro gravitate nimirum solennitatis omissæ illi detrahatur.
- (d) Verum enim dicitur, cui competit definitio juramenti. Ill. Wernher, in Obs. Pract. Obs. 151. n. 30. B. Dn. D. Harpprecht, in Diss. de Transact. jur. §. 8. n. 19. & hoc respectu contradistinguitur assertioni morientis, asseverationi per Principis salutem, asseverationi loco juramenti &c. de quibus casibus supra (§. 215.) actum fuit. add Excell. Dn. D. Harpprecht, in sæpe laud. Disp. de jurejur. scriptura præstito, th. 10. not. 46. Leyser, spec. ad ff. 144. & 567. n. 4. Stryk, in Disp. de morte loco jutisjur. Berger, de Urpheda, c. §. th. 6. & plures ibi alleg.

§. 217.

Quid, si per
Procurato-
rem præsti-
tum sit?

Septimum Requisitum hoc est, ut Juramentum judiciale in propria persona, non per procuratorem, nequidem speciali mandato instructum, præstitum sit. Tres itaque heic statim sese exserunt casus; Aut enim præstitum fuit per Procuratorem speciali mandato instructum, consentiente adversario, & res extra dubium est, tum enim plene probabit, & omnes Juramenti judicialis effectus producet (§. 210. not. i.); Aut præstitum est a Procuratore speciali mandato instructo, sed non consentiente vel invito adversario, & tanquam juramentum judiciale omnibus numeris absolutum probare haud poterit, quia partes in personalem illius præstationem præcise consensisse censentur; nihilominus tamen, quia est Juramentum verum & solenne, omniaque Juramenti essentialia habet, quæ tamen partes in conventionem suam potissimum respexisse censentur, *parum aberit a plena probatione, & major erit gradus, quam in casu supra (§. 215.) recensito, ubi DEus tanquam testis saltem invocatus supponebatur, quia heic verum præsto est Ju-
ramen-*

ramentum (a). Aut præstitum est a Procuratore, nullo speciali mandato instructo; & plane nihil operabitur, quia alius pro alio sine speciali mandato jurare nequit (b), & finis primarius hujus Juramenti cessat.

(a) Regulariter enim hodie & alia Juramenta per Procuratorem speciali mandato instructum præstari possunt. C. 3. 4. 6. X. de Juram. calumn. c. 2. §. 1. ibid. in 6to. Grave, in Disp. de Jurejur. propter calumn. dando, c. 3. §. 8. Add. Ord. Camer. P. 1. tit. 20. §. *Im Fall aber ic.* J. P. W. P. 1. tit. 26. §. *Ehe aber ic.* pag. 117. Quæ sanctiones, licet de Juramento calumniæ agant, hodie & ad reliqua Juramenta non excepta extenduntur, si scil. justæ causæ adsint, cur in persona præstari haud potuerint; habetur enim in foro pro vero & solenni Juramento, licet consultius sit, semper in persona jurari. Add. B. Dn. D. Harpprecht, in Resp. 92. n. 187.

(b) Omnes enim causæ arduæ, quo & referuntur delationes & præstationes Juramentorum, requirunt speciale mandatum. Ill. Bœhmer, in Disp. de causis arduis, c. 2. §. 23. B. D. Lauterbach, in Coll. tit. de procurat. §. 56.

§. 218.

Ex præmissis patet, tale Juramentum majori, quam semiplena Ordo, quo probatione sese commendare, deficientibus Requisitis IV. VI. gradus probabilitatis, & VII. Et quidem maxima probabilitate & tantum non plena proba- omisso uno batione gaudet 1.) tale juramentum judiciale, in quo saltem Elevatio vel altero digitorum in manibus, vel eorum appositio ad pectus sinistrum in femi- Requisito, nis, deficit. Minori 2.) probabilitate gaudet juramentum, non con- sese exci- sentiente adversario, extra locum judicii, nec coram judice vel coram piunt, ejus Deputatis præstitum, quia hæc circumstantia majorem habet influxum in finem hujus Juramenti, veritatem scil. revelandam, quam Elevatio digitorum. 3.) Iterum minori probabilitatis gradu sese commendat juramentum absque avisatione præcedente præstitum, quia avisatio juranti in mentem revocat actum, quem suscepturus est, adeoque maximum & directum influxum in ipsum Juramentum habet, *ast* 4.) majori, quam in casu, ubi hoc juramentum per procuratorem, licet speciali mandato instructum, præstitum fuit, absque adversarii consensu, quia prius omnes supponit reliquas solennitates externas, hoc vero posterius revera omnibus destitutum est, cum, si recte consideretur, proprie sit Juramentum in scriptura præstitum; solennitates enim hæ, quæ quippe ideo excogitatæ sunt, ut jurans eo majori deliberatione ad Juramentum accedat, non a Principali observantur, adeoque in illo plane nullum usum habent, ac perinde est revera, ac si plane non adhibitæ essent. Mutat hoc Juramentum formam suam, & incidit in Juramentum suppletorium

Y

vel

vel purgatorium, deficientibus Requisitis I. III. & V. ita quidem, ut 1.) plenum juramenti suppletorii effectum producat, & in causis non maxime arduis semiplenam probationem constituat, in casu, ubi delatum fuit a persona inhabili. Hac 2.) paulo minorem præsumptionem efficit idem juramentum in casu, ubi Deus saltem in testem, non insimul in vindicem, invocatus est, quia deficit pars Juramenti essentialis, adeoque neque vim suppletorii, nec purgatorii, multo minus judicialis Juramenti habere potest; partes etenim non videntur fuisse consensuræ in Juramentum, cui pars Juramenti essentialis deesset; quia tamen ut plurimum seria hæc invocatio DEI in testem insimul involvit implicite ejusdem invocationem tanquam vindicis (a), adeoque proxime accedit ad verum Juramentum, ad minimum incidit in Juramentum suppletorium vel purgatorium non omnibus numeris absolutum, & proxime ad semiplenam probationem accedet; major itaque hoc casu erit gradus probabilitatis, quam 3.) deficiente Requisito tertio, si scilicet in causa matrimoniali contra matrimonium præstitum sit juramentum judiciale, quia, per supra (§. 213.) deducta, tum hoc Juramentum producit præsumptionem semiplena probatione longe inferiorem. Hac 4.) iterum minori probabilitate sese commendat casus, si saltem loco juramenti judicialis, asseveratio loco juramenti, vel promissio an Eides statt, uti vocatur, facta sit, quia hæc plane intentionem verum Juramentum præstandi excludit (§. 215.), quæ tamen priori casu præsto est (b). Minima tandem 5.) probabilitate sese commendat casus, si plane nonnisi asseverationes aliæ, v. gr. per creaturas, subsecutæ sint, vel stipulata, ut ajunt, manu, non in vim juramenti, aliquid promissum sit; quia heic plane omnis Juramenti forma deficit.

(a) At objici posset, si invocatio DEI tanquam testis implicite involvit etiam Ejus invocationem tanquam vindicis, cur dicimus, deesse Juramento partem essentialem? Nonne duo hæc, si concurrant, verum constituunt Juramentum? Sed resp. expresse diximus, quandoque & ut plurimum hanc invocationem Numinis Divini in testem etiam involvere Ejus Invocationem tanquam vindicis, quia scilicet heic ad intentionem jurantis respiciendum est, num scil. hic in jurando etiam vindictam Divinam sibi propositam habuerit? quod certo asseverari nequit, nisi expresse etiam DEI tanquam vindicis mentio in Juramenti formula facta sit. Hoc igitur si factum non sit, nec tota Juramenti definitio in talem actum cadet. Add. Exc. Dn. D. Christoph. Frid. Harpprecht, in sæpe laud. Disp. de Jurejur. scriptura præstito, th. 7. not. 27.

(b) Nihilominus tamen quibusdam in casibus & promissio loco jurisjurandi, *Engelobung an Eides statt*, producit vim Juramenti sive suppletorii, sive purgatorii, imo & judicialis integram, in causis scil. levioribus, quæ actualiter Jura-

Juramenti præstationem haud suadent, ubi v. gr. saltem de parva summa aliquot florenorum sermo est; id quod in Liquidationibus in Concurſibus Creditorum sæpe observari videmus. Add. B. Dn. D. Harpprecht, in Resp. 92. n. 28. 100. 110. 111. 116. 184. & passim.

§. 219.

Accedimus jam ad alteram Juramentorum speciem, qua, mediante Juramento, adversarii confessio extorquetur, adeoque, ubi Juramento absque aliis adminiculis plena fides tribuitur, scil. ad Juramentum, uti vocant, Respondendorum. Sæpe enim, si partes brevius sese expedire velint, factum suum redigunt in articulos, quos positionales vocant, ad quos adversarius respondere tenetur, ut plurimum mediante Juramento respondendorum. Sedem habent hæ positiones potissimum in Jure Canonico (a); Differt enim hodiernus modus articulos positionales formandi a veteribus illis Interrogationibus in Jure factis, quæ actori ad instruendam actionem inserviebant, & ideo in Jure coram Prætoribus ante Litis Contestationem fiebant (b); Nostræ autem positiones, tanquam species probationis, regulariter, post Litis Contestationem saltem (c) & intra terminum probatorium (d) exhibendæ sunt; quo facto, adversarius communicatur, eidemque certus terminus præfigitur, intra quem deliberare potest, num illas affirmare, num negare velit? quo elapso, citatur, & coram Judice vel ejus Commissario ad positiones respondere tenetur, prævio Juramento respondendorum (e), modo adversarius antea præstiterit Juramentum dandorum (f), quod scil. non frivole & vexandi adversarii gratia Juramentum respondendorum ab illo exegerit, & contenta in articulis pro veris habeat. Quod si deinde illas affirmet, valent in vim confessionis, & Ponens intentionem suam plene probavit; sin neget, Ponenti integrum est, negatas positiones alio modo ordinario probare, si velit (g).

De Juramentis dandorum & respondendorum.

(a) Cap. un. X. de Lit. Contest. cap. 1. & 2. de conf. in 6to. cap. 3. de Jurejur. in 6to. B. D. Lauterbach, in Coll. tit. de interr. in Jure fac. §. 7.

(b) L. 4. §. 1. ff. de interr. in Jur. fac. B. D. Lauterbach, in Coll. d. tit. §. 1.

(c) B. D. Lauterbach, d. tit. §. 13. Add. Jus Prov. Wurt. P. I. tit. 28. §. wann nach Bevestigung des Krießs &c. pag. 119. Stryk, in Uf. mod. d. tit. de interr. in Jur. fac. §. 48.

(d) B. D. Lauterbach, in Coll. d. tit. §. 13. Magn. Dn. D. Schœpf, in Proc. Dicast. Wurt. vet. Edit. c. 14. §. 1.

(e) B. D. Lauterbach, d. l. §. 15. Magn. Dn. D. Schœpf, d. l. §. 1. formula Juramenti Respondendorum exhibetur in J. P. W. P. I. tit. 30. pag. 125.

(f) B. D. Lauterbach, d. l. §. 13. Magn. Dn. D. Schœpf, cit. loc. formula continetur in J. P. W. P. I. tit. 28. pag. 121.

(g) Grave, in sæpe cit. Disp. de jurejur. propter calumn. dando, c. 7. §. 1. in fin. Celeb. Leyser, in spec. ad ff. 135. n. 4.

§. 220.

Requisita
Juramenti
Responden-
dorum.

Ex præmissis Requisita Responsionis ad articulos positionales per se fluunt; requiritur enim Imo, *ut Ponens post Litis Contestationem*, II^{do}, *intra terminum probatorium*, III^{tio}, *adversario petente, Juramento dandorum præstito*, IV^{to}, *Articulos positionales exhibeat: ad hos V^{to} adversarius, quem vulgo DDres den Ponaten appellant, intra terminum præfixum respondeat, & quidem, si velit Ponens, VI^{to} sub Juramento Respondendorum (§. 219.), quod Juramentum respondendorum VII^{mo} non solum formam Juramenti internam, verum etiam VIII^{vo} externam habere debet.* Nihilominus tamen haud facile heic probabilitas juridica sese exserit. Aut enim Reus Articulos positionales affirmavit, aut negavit. Si affirmavit, præsto erit confessio, sufficiens ad condemnandum, licet Ponens neque Juramentum dandorum, neque adversarius, sive der Ponat, Juramentum respondendorum præstiterit; incidet itaque casus in confessionem judicialem, & ejus effectus producet, cum eaque ex pari judicandus erit; hinc & ea, quæ supra de confessione judiciali dicta sunt, huc spectant, omnesque casus, in quibus illa probabilitatem quandam juridicam efficit, & huc referendi sunt (a). Sin Reus articulos negaverit, & quidem sub Juramento respondendorum, nec terminum contumaciter neglexerit (b), probare poterit Ponens intencionem suam alio modo ordinario (§. 219. not. g.), sed probatio esse debet ordinaria probatione major, quia tunc præstitum Juramentum respondendorum non plane nullius efficaciam est, & præsumtionem quandam, quæ prope accedit ad semiplenam probationem (c), pro jurante efficit, quæ adversarii sive Ponentis probatione elidenda est. Et quia hoc casu Juramentum respondendorum incidit in purgatorium, etiam casus illi & gradus probabilitatis, quos purgatorium, uno vel altero forte requisito deficiente, producit, & qui mox explicandi erunt, huc quadrabunt (d).

(a) Sin adversarius ante Litis Contestationem, quod tamen contra ordinem processus est, ad articulos positionales forte ex ignorantia Judicis & partis responderit, confessio erit in Jure facta, & Executioni statim absque prævia sententia condemnatoria vel absolutoria locum faciet. B. D. Lauterbach, in tit. de confess. §. 16.

(b) Sin

- (b) Sin is, contra quem Articuli positionales producti sunt, sive des Ponat, terminum contumaciter neglexerit, Articuli habentur pro affirmatis in contumaciam. Stryk, in Us. mod. tit. de interr. in Jur. fac. §. 59. sqq. B. D. Lauterbach, in Coll. eod. tit. §. 15.
- (c) In causa enim non admodum ardua Juramentum partis constituit communiter semiplenam probationem, & quidem suppletorium illam supplet, B. D. Lauterbach, in Tract. Synopt. de Juram. necess. §. 6. n. 94. & 95. B. Dn. D. Harpprecht, Cons. nov. 61. n. 65, sqq. purgatorium eandem elidit, C. 3. §. ult. X. de probat. L. 188. ff. de R. I. B. Dn. D. Harpprecht, in Cons. nov. 27. n. 115. B. Dn. D. Sam. Stryk, in Disp. de morte loco jurisjur. c. 2. §. 9. adeoque utroque casu efficit gradum probabilitatis semiplenæ probationi æqualem.
- (d) Quandoque etiam, si alia adminicula concurrant incidere potest hoc Juramentum Respondendorum in Juramentum suppletorium, si articuli contineant factum, quod & Reo probandum incumbit, v. gr. Exceptionem Rei sive des Ponaten concernant, licet cautus Advocatus non facile ita concipiat Articulos, ut Rei Exceptiones contineant, cum illas probare superfluum sit; Reus enim excipiendo fit actor, & exceptiones suas ipse probare tenetur, L. 19. ff. de probat. L. 4. C. de edend. adeoque, si Exceptionem suam non probaverit, condemnatur.

§. 221.

Progredimur ad Juramenta, quæ per se plenam probationem De Juramentum haud constituunt, suppletorium scil. & purgatorium. Et primo to suppletorio loco quidem de Juramento suppletorio agendum erit. Defert hoc Juramentum Judex (a) illi, qui intentionem suam ad minimum semiplene probavit (b), sive actori, sive reo (c), modo sit integræ famæ, & habilis; hinc jurans debet esse, sicut testis, omni exceptione major (d); & quidem propter inopiam reliquarum probationum (e), adeoque regulariter nonnisi post Litis Contestationem deferri potest; quia tamen deferitur a Judice, cui nunquam concluditur in causa, nihil interest, sive ante sive post causæ conclusionem deferatur (f), imo quandoque in sententia demum definitiva deferatur (g). Ex præmissis patet, *Juramentum suppletorium esse Juramentum litis decisivum, quod Judex alteri ex litigantibus ad semiplenam probationem confirmandam deferret* (b).

(a) L. 31. ff. L. 3. C. de Jurejur.

(b) B. D. Lauterbach, in Coll. d. tit. de Jurejur. §. 74. Idem, in Tract. Synopt. de Juram. necess. §. 6. n. 94. & 95. B. Dn. D. Harpprecht, in Cons. nov. 61. n. 65. seqq. & DD. passim.

(c) B. D. Lauterbach, in Coll. d. tit. §. 76.

(d) Constituitur enim talis testis in propria causa. L. ult. C. de fideic. B. Dn. D. Harpprecht, in Cons. nov. 11. n. 24. & Cons. nov. 23. n. 45. & passim. Hinc, quin æque, imo magis, quam testis, idoneus esse debeat, per se patet. Add. B. Dn. D. Harpprecht, in Cons. nov. 11. n. 25. & d. Cons. nov. 23. n. 58. sqq.

(e) L. 3. C. de R. C. & Jurejur. B. D. Lauterbach, in Coll. d. tit. §. 74. B. Dn. D. Harpprecht, Cons. nov. 23. n. 42. & Cons. nov. 61. n. 67.

(f) Arg. L. 21. ff. de interr. in jur. fac. Gail, lib. 1. obs. 98. n. 4. & §. B. D. Lauterbach, in Coll. d. tit. §. 73.

(g) Idem Lauterbach, in Coll. d. l. §. 75.

(h) Idem, d. l. §. 72.

§. 222.

Requisita
Juramenti
suppletorii.

Non solum igitur in Juramento suppletorio desiderantur Re-
quisita illa omnia Juramenti judicialis, supra (§. 210.) recensita,
præter primum, quia hoc nostrum a Judice, non a parte defer-
tur; sed & illis accedunt adhuc sequentia: Imo, ut *Judex deferens*
fit habilis, i. e. competens, II^{do}, ut *idem juramentum deferat post*
Litis Contestationem, & III^{tio}, ut *jurans sit persona idonea*, & *sicuti*
testis, omni exceptione major. Hinc jam de gradibus probabilita-
tis erit dispiciendum.

§. 223.

Conferuntur
inter se gra-
dus proba-
bilitatis ex
omissione
unius vel al-
terius Re-
quisiti orien-
di.

Cum omnia Requisita Juramenti judicialis supra (§. 210.) dicta
etiam desiderentur in hoc suppletorio, præter Imum (§. 222); fa-
cile intelligitur, uno vel altero remoto, gradum probabilitatis
comparative eundem esse, quem supra (§. 218.) determinavimus,
& eodem ordine casus & heic sese invicem excipere, ita tamen,
ut casus 4. priores, qui in Juramento judiciali majorem semiplena
probatione probabilitatis gradum constituebant, in suppletorio
eadem paulo minorem efficiant, sed tamen ad semiplenam proba-
tionem, uti in judiciali ad plenam, accedant: reliqui autem qua-
tuor casus, excepto Imo, qui scil. saltem in Juramentum judiciale
quadrat, semiplena probatione longe inferiorem constituent
probabilitatis gradum. Adeoque jam de tribus illis (§. 222.)
recensitis requisitis dispiciendum est, & investigandum, quantus,
omisso uno vel altero, redundet probabilitatis gradus, in com-
paratione cum modo dictis. Ponamus Imo, Juramentum dela-
tum fuisse a Judice incompetente, & illud nullum erit (a), adeo-
que suppleri debet, si fieri possit, vel necessitas id postulet, a com-
petente; sin minus suppleri possit, *coincidit cum casu illo* II^{do} (§. 218.)
dicto, ubi juramentum extra judicium præstitum esse supposebatur; per-
sona enim deferens in ipsius juramenti suppletorii veritatem per se nul-
lum habet influxum, sicut & locus, adeoque hoc casu parum veritati
facti detrahatur, imo ut plurimum, qui deferente Judice incom-
petente, quem pro competente habebat, jurat, eadem reveren-

tia ad præstationem ipsius Juramenti accedit, qua accedit, si delatum sit a Judice competente, adeoque hoc casu majori probabilitatis gradu tale juramentum sese commendat, quam extra locum judicii præstitum, qui quippe locus quandoque, licet per accidens, influxum in animum jurantis habere potest. Ponamus porro, hoc Juramentum ante Litis Contestationem delatum fuisse; & minimum ipsi rei veritati detrabetur, quia nulla est ratio, cur jurans ante Litis Contestationem minus veritatem revelaverit, quam post illam, & ratio, cur regulariter hoc Juramentum post Litis Contestationem demum præstandum sit, saltem in meliori processus ordine posita est, nec plane in ipsa materialia causæ influxum habet; majori itaque hoc casu probabilitate gaudet juramentum hoc suppletorium, quam si Elevatio digitorum omissa sit; quia quandoque jurantes multum efficaciam hujusmodi Ceremoniæ tribuunt, ad quorum tamen animum in determinando probabilitatis gradu heic potissimum respiciendum est. Quodsi denique in persona jurante, quæ quippe, sicut testis, omni exceptione major esse debet, deprehendatur defectus, idem hoc casu producetur probabilitatis gradus, quem producit testimonium testis non omni exceptione majoris, pro gradu scilicet habilitatis & gravitate defectus; de quo vid. supra (§. 151. seqq.) in genere enim heic non facile aliquid determinari potest; aliquando enim defectus adeo levis est, ut parum vel nihil efficaciam hujusmodi testimonio detrahat; aliquando autem tanti momenti est, ut in veritatem facti maximum habeat influxum.

(a) A Judice enim incompetente gesta ipso jure nulla sunt. B. Dn. D. Harpprecht, Resp. 36. n. 75. seqq. & Resp. 38. n. 92. seq.

§. 224.

Sequitur denique adhuc Juramentum purgatorium, quo suspicionibus gravatus, id, quod sibi objicitur, falsum esse asseverat, atque sic innocentiam suam ostendit (a). Dicitur & Jure Canonico Purgatio canonica, in oppositione ad Purgationem vulgarem (b), quæ olim, præsertim in Germania, frequens erat, v. gr. per ferrum candens &c. quæ tamen barbaries nostris seculis politioribus exolevit. Desertur hoc Juramentum etiam a Judice existentibus suspicionibus, quæ tamen ex altera parte Juramento suppletorio locum non faciunt (c), ut plurimum Reo, interdum vero etiam Actori ratione Exceptionis (d), modo persona sit habilis, in omnibus causis, etiam criminalibus (e), licet, si ad

De Juramento purgatorio.
pœnam

pœnam capitalem agatur, ei non facile locus concedatur, propter metum perjurii: in loco iudicii (*f*): &, præstitum, locum dat absolutioni plenariæ (*g*), licet probatio in contrarium non omnimodo excludatur (*h*).

(a) C. ult. X. de Jurejur. C. 8. X. de Purg. canoa. B. D. Lauterbach, in Coll. tit. de Jurejur. §. 44.

(b) Tot. tit. in Jur. Can. X. de Purgat. can. Cel. Heineccius, in Elem. Jur. Germ. L. 3. tit. 6. §. 228. seqq.

(c) d. C. ult. X. de jurejur. B. D. Lauterbach, in Coll. d. tit. §. 47.

(d) L. ult. §. 5. C. de jur. dom. impetr. Avth. novo Jure. C. de pœn. jud. qui male jud. D. Lauterbach, in Coll. d. tit. §. 48.

(e) C. 1. & C. 11. X. de purg. can. C. 6. X. ibid. D. Lauterbach, ibid. §. 49.

(f) Ord. Cam. P. 2. tit. 10. Lauterbach, ibid. §. 50.

(g) C. 8. X. de purg. can. C. 10. X. ibid. Ord. Cam. d. tit. 10. §. und so er solch it.

(h) Arg. L. 31. ff. de jurejur. Ord. Cam. d. l. Lauterbach, ibid. §. 51.

§. 225.

Ejus Requi-
sita, & pro-
babilitatis
gradus inde
resultantes.

Requisita coincidunt fere cum Requisitis Juramenti suppleto-
rii, supra (§. 222.) recensitis, adeoque etiam eodem modo heic
sefe exserere potest probalitas juridica, quæ tamen ideo in Jura-
mento purgatorio non magnæ utilitatis est, quia, si actor non
probaverit, reus absolvendus est, licet hic plane nihil probave-
rit (*a*); & si is, cui Juramentum purgatorium delatum fuit, illud
præstiterit, modo a Judice delato, non est in culpa, quod tale
Juramentum recte præstitum haud sit, adeoque heic illi nihil
potest imputari, hinc & omnino absolvendus erit, æque ac si
hoc Juramentum more solito præstitisset, posito scilicet, hoc
Juramentum repeti non posse, si is, qui illud præstitit, forte
mortuus sit; nullus igitur hic probabilitati juridicæ, quoad effe-
ctum, conceditur locus.

(a) L. 2. C. de probat. L. 4. C. de edend. L. 9. C. de except. B. Dn. D. Harp-
precht, in Resp. 11. n. 91. & Resp. 60. n. 1011.



C A P V T III.

PARS II.

SECTIO V.

DE PROBATIONE PER OCVLAREM
INSPECTIONEM.

§. 225.

Pertractatis jam quatuor illis modis probandi, Capiti huic finem imponere possemus, nisi inter scribendum nobis in mentem veniret alius probandi modus, quo Judici proprie non per alios, sed per proprios sensus, fides fit, h. e. Ocularis Inspectio; de qua paucis adhuc agendum est. *Dicitur ocularis Inspectio actus judicialis, quo Judici de re dubia vel facto controverso, per ejus aspectum & proprios sensus, fit fides (a).*

De inspectione legali & oculari.

(a) Conf. Scheinemann, in Disp. de oculari Inspectione, vom Augenschein, th. 4.

§. 226.

Dicitur & aspectus, præsens aspectus, localis Inquisitio, indagatio, Experimentum oculare, intuitiva probatio, demonstratio ocularis, probatio perspectiva &c. (a).

(a) Scheinemann, in d. Disp. th. 3.

§. 227.

Locum habet hæc Inspectio vel in causis criminalibus, præsertim in homicidio, ubi de lethalitate vulneris constare debet, vel in causis civilibus. De priori casu nobis ideo heic sermo non est, quia singularia habet requisita (a), quæ, omissa, ita nullam reddunt hanc inspectionem, ut plane ad ultimum supplicium deveniri nequeat (b), nisi vulnus *absque dubio* habeatur pro absolute lethali (c), adeoque hoc casu nec inde redundet gradus quidam probabilitatis supplendus, nisi forte Medico vel Chirurgo non adhibito minorem redundare gradum probabilitatis dixeris, quam si judex vel scribe juratus non accesserit, adeoque hoc casu posteriori majorem decernendam esse pœnam extraordinariam affirmaveris, quam priori, quia periti in arte de lethalitate vulneris majori probabilitate deponere possunt, quam Judex, adeoque major adest probabilitas, homicidium perpetratum esse, quam si Judex solus ita senserit, qui quippe ideo saltem præsens esse debet,

Locum habet vel in criminalibus, vel in civilibus.

bet, ut videat, an Medici legaliter procedant, adeoque non, ut ipse de lethali-
tate vulneris iudicium ferat, nec ut persona prin-
cipalis (*d*). Uno verbo, *quo magis dubium redditur corpus delicti, uno vel altero requisito omisso, eo minor redundat ex tali inspectione probabilitatis gradus, eoque levior decerni potest & debet pœna extraordinaria.* Nobis heic loci potissimum brevitatis causa de Inspec-
tione oculari in causis civilibus sermo est.

(a) Ord. Crim. Carol. art. 14. & art. 149. ibique DDres add. Rescript. Gen. & Würtemb. de Anno 1656. dd. 10. Januar. & Lauterbach, in Differ. Jur. Civ. & Württ. in Caus. Crim. th. 12. n. 30. ubi quasdam differentias inter Jus Commune & Würtemb. assignat.

(b) Carpzov, in Prax. Crim. P. 1. qu. 26. n. 32. & 50. Scheinemann, in d. Disp. th. 9. Magn. Dn. D. Schœpf, in Dec. 83. n. 1. & DDres passim.

(c) Magn. Dn. D. Schœpf, d. Dec. 83. n. 2. sqq. & B. Dn. D. Harpprecht, in Resp. 21. n. 38. sqq. & Resp. 36. n. 87. sqq.

(d) Idem B. Du D. Harpprecht, in dict. Resp. 21. n. 11. sq.

§. 228.

Requisita
Inspectionis
ocularis in
causis civi-
libus.

Ante omnia itaque Requisita Inspectionis ocularis, ejusdem-
que solennis, determinanda sunt. Quandoque enim non tantis
ambagibus opus est, in causis scilicet, quæ facile cujusvis sensibus
obnoxia sunt; in hisce enim, modo certo de facto constet, vel
& Judex ipse in rem præsentem iverit, absque ulterioribus am-
bagibus poterit sententiam ferre; sic in casu supra (§. 227.) re-
censito, si aliunde de absoluta vulneris lethali-
tate constet, non opus est solenni illa inspectione, sed Judex nihilominus pœnam
ordinariam decernere potest (§. 227. not. c.); licet semper me-
lius & tutius agat, si nihilominus inspectionem legalem instituat.
Sin vero res sit paulo altioris indaginis, nec quorumvis oculis
statim obvia, vel & cum arte certa connexionem habeat, omni-
no solennis requiritur inspectio, quæ sequentibus absolvitur com-
muniter requisitis: Imo, *ut fiat a Judice competente*, cui quippe
probatio omnis fieri debet (*a*); *Ido, ut fiat regulariter post Litis*
Contestationem, non ante illam, quia nulla probatio ante Litis
Contestationem admittitur (*b*), post illam vero semper inspectio
fieri potest, etiam post probationem jamjam finitam, vel & post
conclusionem in causa (*c*), imo quandoque & in ipsa executio-
ne (*d*), quia omnium probationum firmissima, validissima & opti-
ma dicitur (*e*), & per illam adversarii injuria statim & in conti-
nenti demonstrari potest; *IIIto, citatis partibus* (*f*), *IVto, adbi-*
bitis artis peritis, non uno saltem, quippe quod periculosum dici-
tur

tur in jure (g), *sed pluribus*, & nisi in negotio quodam specialiter plures desiderentur (h), sufficiunt duo, si haberi possint; tales autem adhibendi, qui artem quandam legitime didicerunt, & profitentur publice (i); sin certi constituti sint, sicut ut plurimum in bene constitutis rebus publicis ad singula negotia expresse certi periti jurati constitui solent, hi præ reliquis adhibendi sunt (k); V^{to} *Juratis* (l), VI^{to} *omni exceptione majoribus* (m), VII^{mo} *hi artis periti in rebus, quæ non immediate in sensus cadunt, sed ratiociniis de- mum evolvi debent, addere debent rationes assertorum suorum* (n); VIII^{vo} *requiritur præsentia Judicis vel ejus Commissarii* (o), & IX^{no} *Secretarii vel actuarii jurati* (p). Diversa tamen diversis in locis heic desiderantur requisita (q), quæ heic singula speciatim exprimi nequeunt, quæ tamen, si omissa sint, quantum ipsi facti veritati detrahant, Candidus Lector, ex antecedentibus partim, partim vero ex mox deducendis, facile poterit dijudicare.

(a) L. 12. ff. de probat. L. 5. L. 19 C. de test. Scheinemann, in d. Disp. de Ocul. Inspect. th. 6.

(b) Scheinemann, c. 1. Magnif. Dn. D. Schœpf, in Proc. Dicast. Würt. vet. edit. c. 16. §. 1.

(c) Scheinemann, d. l. th. 8. Jus Prov. Wurt. P. 1. tit. § 1. §. Beweisung durch Augenschein. fol. 157. & ibi Plebst, Disp. 1. th. 115.

(d) Scheinemann, d. l. th. 8. & ibi alleg. Rutg. Rulandus, de Commiss. P. 2. L. 3. c. 1. n. 13.

(e) Gail, lib. 1. obs. 26. n. 9. Scheinemann, in d. Disp. th. 48.

(f) Arg. L. 3. C. fin. Regund. Jus Prov. Wurt. P. 1. tit. § 1. d. §. Beweisung durch Augenschein. fol. 157. verb. darzu doch dem Gegentheile jederzeit auch zu verkünden. Hochfürstl. Würtemb. Hofgerichts-Ordn. P. 3. tit. 18. §. 1. & 8. & P. 3. tit. 20. §. 2. Hochfürstl. Würtemb. Bau-Ordn. p. 9. in fin.

(g) Scheinemann, in d. Disp. th. 18. ibi alleg. Lauterbach, in Differ. jur. Civ. & Wurt. in caus. crim. th. 12. in fin.

(h) Hujusmodi casus aliquot recenset Scheinemann, d. l. th. 18. ex L. 1. pr. ff. de ventre inspic. d. L. 1. §. 10. ff. ibid. add. Ord. Crim. Carol. d. art. 149.

(i) Scheinemann, c. 1. §. 15. Hochfürstl. Würtemb. Landes-Ordn. tit. 55. §. 2.

(k) Scheinemann, d. Disp. th. 17. licet præcise nullitas non sit, si alii adhibeantur, nec ideo talis inspectio effectum plenæ probationis amittat.

(l) Carpzov, in Jurisprud. For. P. 1. Const. 22. Def. 12. Scheinemann, d. l. th. 20. add. Jus Prov. Wurt. P. 1. tit. 43. §. So die Parthien. fol. 147. verbis: die geschwöhrene, doch der Sachen unverwandte, Leib- und Wund- Aerzte u. c. Sufficit tamen juramentum generale ante præstitum. Pacianus, de probat. L. 1. c. 47. n. 21. in primis n. 24. sqq. Carpzov, in Prax. Crim. P. 1. quæst. 26. n. 40. Quoad praxin autem Dicastarii Wurtembergici non sufficit generale illud juramentum, sed in singulis actibus artis periti vel judici fidem & diligentiam mediante asseveratione loco jurisjurandi promittere, vel & partibus petentibus

corporale desuper juramentum præstare tenentur. *Würtemb. Hofgerichts-Ord.* P. 3. tit. 20. §. 2. & P. 1. tit. 9. circa fin. Scheinemann, d. 1. th. 20.

(m) Arg. Cap. 54. X. de test. Scheinemann, d. 1. th. 13. & 17.

(n) Idem Scheinemann, d. Disp. th. 19.

(o) Regulariter & de Jure Civili Inspectio fieri debet ab ipso Judice; Rutger. Rulandus, de Commiss. P. 1. L. 1. c. 1. Ord. Crim. art. 149. Jure autem Canonico, arg. Clem. un. de Off. Jud. deleg. & moribus hodiernis, testeque Scheinmanno, in d. Disp. th. 10. hæc potestas etiam Commissario concedi & committi potest. add. Magn. Dn. D. Schœpf, in Proc. Dicast. vet. edit. c. 16. §. 1.

(p) Rutg. Rulandus, d. 1. P. 2. L. 3. c. 10. Scheinemann, in cit. Disp. th. 27.

(q) Sic, quid requiratur in supremo Dicast. Wurt. ad inspectionem solennem? vid. Ord. Dicast. P. 3. tit. 18. §. 3. Magnif. Dn. D. Schœpf, in d. Proc. Dicast. Würtemb. c. 16. §. 1.

§. 229.

Quinam
gradus pro-
babilitatis
prodeant,
uno vel alte-
ro requisito
omisso?

Quodsi igitur repeti queant hæc requisita, & res adhuc integra sit, quin repeti debeant, extra dubium est; nobis autem de casu quæstio est, ubi non amplius repeti possunt; & hinc quæritur, qualem & quantum probabilitatis gradum producat talis inspectio, uno vel altero Requisito omisso? *Minimum fidei Rotulæ derogare, si deficiat secundum Requisitum, h. e. si inspectio legalis ante Litis Contestationem suscepta sit, ex eo statim patet, quia nulla ratio est, cur inspectores minus veritatem dixerint, vel dicere voluerint ante Litis Contestationem, quam post illam; plane nullum enim in ipsam rei veritatem, tanquam finem probationis, influxum habet tempus, quandocunque probatio suscepta sit; Ratio enim, cur probatio post Litis Contestationem demum peragenda sit, hæc est, ne superflua probentur, quia ante Litis Contestationem nondum constat, quid Reus affirmaturus, quid negaturus sit? Atqui vero superflua heic non nocent; quodsi enim quis plura probaverit, quam debebat, omnino magis finem probationis consecutus est, quam debuisset, ad minimum æque finem attigit, ac si superflua omisset; nulla igitur est ratio, cur minus vincere debeat, quam alius, qui non plus probavit. Conf. (§. 130. & 137.). Plus fini probationis detrabitur, omisso Requisito tertio, Citatione scil. partium; ratio enim, cur hæc desideretur, est, ut partes certiores reddantur & videant, omnia fideliter peragi; quæ ratio omnino majorem in finem probationis influxum habet, quam tempus probationis (§. 130. & 137.), ast minorem, quam omisso Requisito nono, si forte actarius juratus adhibitus non sit, sed ejus loco vel Judex, sive ejus Commissarius, vel & unus ex artis peritis juratis, Protocollum conscripserit (a); cum enim hi supponantur jamjam juramento ad-*
stricti

stricti esse, omnino quidem fidei Protocolli non multo plus derogatur, ac si ipse actuarius præsens fuisset, ast plus tamen eidem derogatur, quam si partes non sint citatæ, quia hoc posteriori casu plures personæ juratæ supponuntur præsentes esse, quam priori casu, quo una persona deficit, actuarius scilicet, & Judex inspectionem continuare potest, licet partes non compareant. *Minori probabilitatis gradu sese commendat casus, quo Requisitum primum supponitur deficere, scil. quando inspectio a iudice haud competente fuit suscepta.* Cum enim Judex in illis, quæ ad ejus forum non spectant, proprie iudex non sit, omnino magna auctoritatis pars, & major quidem, quam si actuarius saltem deficiat, hujusmodi inspectioni detrahitur, si iudex fuerit incompetens; quia tamen nihilominus hujus præsencia directe nullum in finem probationis habet influxum, & iudex incompetens ob munus publicum, cui præest, & jusjurandum præstitum, omnino multo majorem fidem meretur, quam privatus; eo minus iudicis incompetencia fidei hujusmodi inspectionis detrahit, quia aliquot artis peritorum testimonium ad minimum plus quam semiplenam probationem efficere deberet, si & hi soli actui interfuissent, licet saltem de credulitate testimonium perhibeant; ex anal. eorum, quæ supra occasione comparationis literarum, (§. 198. & 201.) deducta sunt; adeoque iudicis & actuarii, licet incompetentium, præsencia hujusmodi inspectioni omnino gradum probabilitatis semiplena probatione adhuc longe majorem addit. Ex his porro patet, licet 4. hæc Requirita hæcenus recensita, quæ quippe saltem ad formam inspectionis externam pertinent, nec directe in ipsam facti veritatem, tanquam finem omnis probationis, influxum habent, omnia removeantur, gradum tamen probabilitatis manere nihilominus semiplena probatione superiorem, modo ad minimum duo artis periti adhibiti sint, & hi unanimiter deponant de facti hac vel illa qualitate; quo minori tamen certitudine de illa deponunt, eo plus etiam facto probabilitatis decrescit, & si de sententia sua aliquatenus hæsitent, & cum formidine oppositi deponant, producent gradum probabilitatis semiplenæ probationi æqualem, vel & si dubium gravius sit, hac minorem; sicut supra (dict. §. 198. & 201.) de comparatione literarum demonstratum fuit.

- (a) Secus res sese habet, si plane privatus & injuratus Protocollum conscripserit, & heic dilting. an forte Inspectores huic protocollo subscripserint? & pari passu ambulabit cum protocollo ab Aduario ordinario conscripto; ad minimum

non multum gradu ab illo differet, quia finis probationis æque obtinetur, an non subscripserint? & vid. supra (§. 156.).

§. 230.

Quantus
gradus re-
maneat defi-
cientibus re-
quisitis IVto,
Vto & VIto:

Deficientibus igitur 4.) requisitis supra (§. 229.) recensitis, remanet probabilitatis gradus semiplena probatione major; *At vero jam, deficientibus Requisite quarto & quinto, gradus probabilitatis ex tali inspectione oriundus semiplena probatione longe inferior est, & quandoque vix adtendendus.* Cum enim præsentia duorum artis peritorum gradum probabilitatis semiplena probatione majorem constituat; *facile patet, si forte unicus saltem adhibitus sit, & reliqua requisita §. anteced. recensita deficient, gradum probabilitatis inde oriundum semiplena probatione minorem esse; sin cetera omnia paria sint, & causa ita comparata sit, ut omnium oculis pateat, nihilominus plene probat inspectio (§. 228.); si nonnisi periti in arte de illa judicare queant, probabit forte semiplene, & si plane nullus adhibitus sit, & nemo, nisi judex forte ipse inspectioni interfuerit in causa, quæ non cujusvis oculis obvia est, vel artem quandam peculiarem concernit, gradus probabilitatis producit adeo exiguus, ut vix ac ne vix quidem adtendi mereatur; Unius tamen forte artis periti jurati testimonium præferri duorum non juratorum (§. 135.), contra vero testimonium artis periti, licet non jurati, præferri tamen judicio imperiti alicujus &c (a), facile intelligitur.*

- (a) Alii adhuc, occasione adhibitionis artis peritorum eorumque qualitatis, oriri possunt gradus probabilitatis, si forte circa Requisite sextum aliquid desideretur, h. e. si non sint omni exceptione majores, hæc tamen quæstio ex illis, quæ supra de testibus dicta sunt, facile poterit resolvi, nisi quod hoc casu defectus semper fidei inspectionis plus derogat, quam in teste, quia & duo artis periti soli nondum tamen constituunt plenam probationem (§. 229.), sicuti depositio duorum testium, adeoque etiam pro rata heic singulis probabilitatis gradibus ibi recensitis, aliquid decrescit.

§. 231.

Et tantum de determinatione graduum probabilitatis; jam & accedimus ad effectus probabilitatis juridicæ, & ejus applicationem, de qua Cap. seq. jam paucissimis adhuc erit dispiciendum.



CAPVT IV. DE EFFECTV, VSV ET APPLICATIONE PRAESVMTIONVM.

§. 232.

Præsumptiones communiter a DDbus discesci in Præsumptiones *Transitus* Juris & de Jure, Juris tantum & hominis seu facti, supra (§. 42. seqq.) pluribus demonstravimus. Hinc & de singularum effectū & applicatione speciatiim, sed brevissimis, jam agendum erit, eumque in finem quædam Regulæ tradendæ erunt, quæ facile in casibus obvenientibus poterunt applicari.

§. 233.

Quantum igitur primo loco adtinet Præsumptiones Juris & de Jure, cum hæc adeo pro veritatibus habeantur juridicis, ut omnis *Regula pro præsumtionibus juris & de jure.* excludatur contrarii probatio: qualem in foro effectum producant? facile & per se patet; ita enim habentur pro veris, ut adversarius, si vel maxime contrarium probare velit, non audiat (a), sed pro tali, qui Præsumptionem Juris & de Jure pro se habet, absolute pronunciari debeat. Hinc Regula: *Pro illo, qui Præsumptionem juris & de jure pro se habet, semper pronunciandum est (b).*

(a) Præsumptionem quidem Juris & de Jure per confessionem adversarii, in cuius gratiam talis præsumptio inventa est, tolli, plures statuunt DD. Inter quos & referendus est Menochius, Tract. de præsumpt. L. 1. quæst. 61. n. 1. sqq. item Alciatus, de præsumpt. in princ. P. 2. n. 1 - 5. aliique complures. Nec mirum est, circa hanc quæstionem sese torquere illos, qui & ejusmodi juris præsumptiones, quæ violentæ dicuntur, & quibus elidendis majoribus probationibus opus est, ad præsumptiones juris & de jure referunt; cum enim in LL. sæpe has adversarii confessione elidi videant, omnino Regulam, quod hujusmodi præsumptiones contrarii probationem respuant, variis modis limitare, & confessionem excipere debent. At, illis, qui genuina exempla præsumptionum juris & de jure a spuris probe secernunt, tantis ambagibus haud opus est; hi enim contra præsumptionem juris & de jure genuinam, & propriam talem, nullam plane probationem, & ne confessionem quidem admitti intrepide statuunt, quæ quippe etiam materiæ probationum, tanquam species, accensenda est. Celeb. Leyser, in spec. ad ff. 260. n. 5. Obstat videtur casus Rei judicatus, de quo constat, quod quandoque contrarii probationem, per Instrumenta noviter reperta, admittat; L. 1. ff. de in integr. restit. L. 7. §. 3. in fin. L. 24. §. 1. in fin. L. 44. ff. de minor. 25. ann. Carpzov, in Jurisprud. For. P. 1. Const. 26. Def. 23. B. Dn. D. Lauterbach, in Coll. tit. de Re jud. §. 26. B. Dn. D. Harpprecht, Cons. 70. n. 380. sqq. sed ex ipsis locis allegatis apparet,

apparet, hoc directo fieri non posse, sed hujusmodi probationem saltem restitutioni in integrum locum dare, quo ipso hac in re jus strictum correctum esse intelligitur, adeoque proprie hunc casum præsumtionibus juris & de jure hodie amplius accensere nolle, quia præsumtio juris & de jure probationem contrarii non admittit.

- (b) Mascardus de probat. vol. 1. quæst. 10. n. 48. Menochius, de præsumt. L. 1. quæst. 3. n. 17. Pacianus, de probat. L. 1. c. 11. n. 2. B. D. Lauterbach, in Coll. tit. de probat. & præsumt. §. 44. Celeb. Bœhmer, in Disp. de Collis. præsumt. c. 1. §. 5. p. m. 8. Leyser, d. spec. ad ff. 260. n. 7. ubi præjudicium Consistorii Magdeburgici adfert, quod marito, qui, post adulterium ab ejus uxore commissum, cum hac concubuerat, actionem ad divortium denegavit, licet uxor in singulari scriptura confessæ fuerit, maritum non aliter, quam sub expressa protestatione, quod coitus ille hanc actionem haud excludere deberet, secum rem habuisse.

§. 234.

Regula pro
præsumtio-
nibus juris.

Præsumtiones juris, per definitionem (§. 51.) datam, sunt, quibus Lex aliquid pro vero habet, tamdiu, donec, per ordinariam probationem, contrarium probetur. Sunt igitur loco veritatum, si quidem ita loqui liceat, interimisticarum, & *in dubio pro illo, qui tali præsumtione nititur, pronunciandum est* (a), licet forte adversarius aliquid, sed non plene, probaverit; ad elidendum enim hunc probabilitatis gradum, ad veritatem juridicam proxime accedentem, omnino opus est majori probabilitatis gradu, hoc est, veritate juridica ipsa (b); imo quandoque & majoribus probationibus opus est, quam ordinariis, si præsumtio juris sit violenta, & Lex ad illam diluendam majores exigat probationes; cujus rei exempla supra Cap. II. aliquot recensuimus (c).

- (a) L. 23. pr. ff. quod metus causa. L. 30. pr. C. de inoffic. testam. L. 16. C. de probat. L. 24. ff. de probat. Cap. 3. X. de procur. Cap. un. X. ut Eccl. benef. sine dimin. Confer. Menochius, de præsumt. L. 1. quæst. 33. n. 2. sq. B. D. Lauterbach, in Coll. d. tit. de probat. & præsumt. §. 44. Celeb. Bœhmer, in d. Diff. de Collis. præsumt. c. 2. §. 13. & DD. passim.

- (b) Menochius, d. Traët. de præsumt. L. 1. quæst. 32. n. 4. Ill. Bœhmer, c. 1.

- (c) Hinc huc quadrant illa, quæ de præsumtione juris & de jure, & probatione, quatenus contra illam admittatur, scil. de confessione, notorietate &c. tradunt Menochius & alii.

§. 235.

De concursu
præsumtio-
num juris
generalio-
rum & spe-
cialiorum
remissive.

Quod præsumtiones juris specialiores generalioribus præferendæ sint, & quod tum generaliores præsumtionum hominis remotiorum naturam induant, supra jam Cap. II. dictum fuit, adeoque, quæ ibi hac de re fusius pertractata sunt, ideo evolvenda & huc referenda erunt, quo B. L. videat, quemnam effectum utraque producat.

§. 236.

Progredimur jam ad præsumptiones facti vel hominis, paucis indagaturi, quemnam effectum hæc præsumptiones producant? Diversum esse huncce effectum, pro diversitate causarum, nemo est, qui neget, vel parum LL. & Juris nostri scientia imbutus. Alium enim producant effectum in criminalibus, alium in civilibus causis, alium in negotiis civilibus arduis, v. gr. matrimonialibus, alium in minus arduis &c. hinc de singulis casibus pauca dicemus. Quantum ad causas criminales, præsertim capitales, attinet, quædrat huc notissima illa Juris Regula, *quod nemo ultimo supplicio affici possit, nisi criminis per probationes luce meridiana clariores convictus sit* (a); Exceptis quibusdam criminibus difficilioris probationis, & quæ ut plurimum clam perpetrari solent, adeoque non aliter facile, quam per conjecturas, probari possunt (b); ante omnia autem de corpore delicti constare debet (c); in quo, si defectus reperiatur, ad ultimum supplicium procedi nequit, sed tunc subintrat pœna extraordinaria, modo gravior, modo levior, pro atrocitate delicti imputati & gravitate præsumtionum, quibus corpus delicti probatum est (§. 227.). Ex præmissis fluit Regula: *In causis capitalibus regulariter non sufficit, Reum per conjecturas solas convictum esse, sed requiruntur probationes plenæ, vel per testes, vel per instrumenta, vel & per confessionem* (d); adeoque heic juramentis suppletorio & purgatorio locus non est, nec sufficit, si saltem de facto per aliquot Requisita, licet concomitantia & essentialia, constet.

Præsumtio-
nes facti ali-
um effectum
producant in
causis crimi-
nalibus, iis-
que capitali-
bus, alium in
non capitali-
bus vel & ci-
vilibus.

(a) L. ult. C. de probat. B. Dn. D. Harpprecht, in Resp. 3. n. 6. sq. & DD. passim.

(b) Talia sunt v. gr. adulterium, Carpzov, in Prax. Crim. quæst. 114. n. 35. B. Dn. D. Harpprecht, Resp. 14. n. 184. Sodomia, Carpzov, in Prax. Crim. quæst. 76. n. 50. sqq. B. Dn. D. Harpprecht, in Resp. 100. n. 20. sqq. Et in genere omnia delicta carnis, porro crimen falsi, B. Dn. D. Harpprecht, Resp. 73. n. 141. sqq. & Resp. 75. n. 158. Crimen Simonia, Menochius, de præsumt. L. 1. quæst. 58. n. 4. Crimen hæreseos, C. 7. de hæret. in 6to. Expositionis infantum, Menochius, d. l. n. 7. &c.

(c) B. Dn. D. Harpprecht, in Resp. 36. n. 36. sqq. Resp. 55. n. 10. Licet etiam saltem tortura decernenda sit, nihilominus de corpore delicti antea legitime constare debet. Ord. Crim. Carol. art. 6. B. Dn. D. Harpprecht, Resp. 34. n. 84. Imo ne ad ullum quidem actum deveniri potest, nisi antea Corpus delicti satis repræsentatum sit; B. Dn. D. Harpprecht, in d. Resp. 36. n. 37. Quomodo autem in hoc vel illo crimine, præsertim in criminibus carnis, de corpore delicti constare debeat? de eo videri possunt Criminalistæ passim.

(d) Ord. Crim. Carol. art. 22.

§. 237.

Regula pro
præsumtio-
nibus homi-
nis vel facti
in causis cri-
minalibus.

Licet igitur in Criminalibus, si Reus capite plectendus sit, requirantur probationes sole meridiano clariores (§. 236.); non tamen ideo sequitur, ut in illis plane nullum effectum producat probabilitas juridica; pro gravitate enim & pondere harum præsumtionum, si de corpore delicti constet (§. 236. not. c.), diversi producant effectus; sic levissimæ conjecturæ, etiam remotæ, locum dant inquisitioni generali (a), paullo graviores, inquisitioni speciali (b); imo tales, quæ semiplenam ad minimum probationem constituunt, sufficiunt ad eum effectum, ut tortura decerni possit (c).

(a) Cap. 17. X. de accusat. Menochius, de præsumt. L. 1. quæst. 87. n. 5.

(b) V. gr. communis fama, mala fama in genere, si v. gr. concurrat circumstantia antecedens &c. vid. supra (§. 94. not. a.), add. Menochius, de præsumt. L. 1. quæst. 88. n. 21. ubi plura indicia, ad inquisitionem specialem sufficientia, recensentur.

(c) Ord. Crim. Carol. art. 23. verb: *Über, so die Hauptsach der Missethat mit einem guten Zeugen bewiesen, dieselb, als eine halbe Beweisung, machet eine genugsame Anzeigung* &c. add. art. 30. Menochius, de præsumt. L. 1. qu. 89. n. 3.

§. 238.

Quales re-
quirantur
præsumtio-
nes ad inqui-
sitionem spe-
cialem?

Ex antecedentibus facile patet, ad inquisitionem specialem decernendam requiri præsumptiones non nimium vagas, sed ad minimum requiri communem famam, non tamen præcisè requiri tales præsumptiones, quæ semiplenam probationem constituunt, sed minores admitti; sic v. gr. sufficit mala vita antea acta, si concurrat quædam suspicio, ex ipsis facti individualibus circumstantiis petita, licet antecedens (§. 99.); v. gr. si quis sit vitæ malæ antea actæ, & visus sit in via ad locum, in quo delictum perpetratum fuit &c. *Et sic v. gr. omnis circumstantia antecedens, vel & consequens, v. gr. fuga (a), sufficit ad inquisitionem specialem, modo persona talis sit, ut hæc suspicio non per alias elidatur, v. gr. persona sit honestissimæ vitæ, nec læso inimica, vel fuga ex alia forte causa, eademque probabili, subsequuta sit (b).*

(a) Menochius, de præsumt. L. 1. qu. 88. n. 21.

(b) Conf. ea, quæ tradit Id. Menochius, d. l. qu. 89. n. 36. sqq.

§. 239.

Quales lo-
cum faciunt
territioni?

Aliæ graviores suspensiones, quæ proxime accedunt ad semiplenam probationem, v. gr. circumstantiæ concomitantes, quandoque locum faciunt territorii, nisi aliæ sint in contrarium, quæ has aliquatenus elidunt; vel & si ex modo probandi oriatur gradus probabilitatis ad semiplenam probationem proxime accedens (a).

(a) Si

(a) Sic huc spectat casus, v. gr. si correat alium tanquam correat denunciet, aliaque concurrant conjecturæ quædam generales, v. gr. si Reus in tortura non expresse de hoc vel illo subiecto quæsitus sit, aut unum vel alterum requisitorum in art. Ord. Carol. 31. deficiat.

§. 240.

Quodsi jam præsto sit probatio semiplena, ad minimum vel & Quales tor-
major, cæteris paribus (a), decerni potest tortura; & quo magis turæ ipsi?
accedit probabilitas ad plenam probationem, eo major semper decerni
potest gradus torturæ. Hinc ex præmissis facile patet, quantæ uti-
litis sit, nosse gradus probabilitatis, & habere certos caracte-
res, ex quibus gravitas probabilitatis aliquo modo determinari
potest.

(a) Non absque ratione addo, *cæteris paribus*; ut enim tortura decerni possit, requiritur, 1.) ut de corpore delicti constet; Ord. Crim. Carol. art. 6. L. 1. §. 24. ff. de SCto. Silan. B. D. Lauterb. in Coll. tit. de quæst. §. 51. 2.) ut præsto sit semiplena probatio; vid. supra (§. 237. not. c.) 3.) ut delictum ita comparatum sit, ut probatum locum faciat ultimo supplicio, vel pœnæ corporis afflictivæ, eidemque gravi; inhumanum enim esset, si remedium eruendæ veritatis gravius esset, ipsa pœna aliquando decernenda; L. 1. pr. L. 8. pr. ff. de quæst. Stryk, in Us. mod. §. 2. tit. de quæst. Lauterbach, in Coll. d. tit. §. 48. 4.) ut persona ita comparata sit, ut tormentis subijci queat; hinc excluduntur valetudinarii, ægroti &c. Ord. Crim. Carol. art. 59. B. Dn. D. Harpprecht, Resp. 28. n. 27. sqq. Fœmina prægnans, puerpera &c. propter partum, Lauterbach, in Coll. dict. tit. de quæst. §. 43. furiosi, mente capti, impuberes, Lauterbach, d. l. §. 42. & quidam denique in criminibus non admodum atrocibus propter dignitatem; Lauterbach, c. l. §. 44. & 45.

§. 241.

Præmissis hisce, brevibus dispiciemus, quando probatio semi- Quando
plena, ad torturam sufficiens, præsto esse dici queat? adeoque ea, probatio se-
quæ Capite antecedente de graduum probabilitatis determina- miplena di-
tione diximus, magis jam in succum vertemus atque sanguinem. catur, præ-
Probabilitatem juridicam sese exferere posse vel circa objectum consideratur
ipsum probandum, vel circa modum probandi, supra evicimus. probabilitas
Quoad objectum quodvis factum determinatur per suas circum- juridica,
stantias vel antecedentes, vel concomitantes, easdemque vel ef- sese exferit
fentiales, vel extraessentialia, vel consequentes (§. 99.). Quævis circa obje-
circumstantia, si scilicet in suo genere rite probata sit (a), facit ctum pro-
indiciu modo gravius, modo levius, pro ejus qualitate, supra bandum?
(§. 100. sqq.) recensita. Jam igitur determinandum erit, qualis
circumstantia constituat probationem semiplenam? id forte ex
casibus in Ordinatione Carolina hinc inde recensitis facile pate-
bit. Ex quibus colligimus Regulam: *Circumstantia concomitans,*

eademque essentialis, constituit semiplenam probationem, & torturæ locum facit (b).

- (a) Ord. Crim. Carol. art. 30. verb: *Über, so einer etliche Umstände, Wahrzeichen, Anzeigung, Argwohn oder Verdacht beweisen will, daß soll er zum allerwenigsten mit zween guten, tüglichen, unverwerfflichen Zeugen thun.* ibique DDres. add. Menochius de præsumt. L. 1. qu. 91. n. 2. B. Dn. D. Lauterbach, in Coll. d. tit. de quæst. §. 23.
- (b) *Quodsi enim singula indicia, ad torturam sola sufficientia, in singulis criminibus conferamus, apparebit, Imperatorem semper supponere, ut constet de circumstantia quadam concomitante essentiali. Percurramus hæc indicia brevibus: In homicidio clam perpetrato indicium ad torturam sufficiens recensetur illud, si reus a) tempore homicidii, b) Suspectus, v. gr. in loco delicti, vel prope illum, (ecce circumstantias concomitantes!) c) vestibus sanguine perfusus, vel cum armis, (en circumstantiam concomitantem essentialem!) visus sit, art. Ord. Crim. 33. vel si res, quæ occisi fuerant, apud aliquem deprehendantur; nonne enim hoc est latrocinii indicium essentialiale? add Ord. Crim. 38. Sic porro homicidii publice commissi indicium ad torturam sufficiens dicitur, si a) reus prope occisum fuit, (en circumstantiam concomitantem!) b) armis instructus, quibus occisum petiit, art. Ord. Crim. 34. (en eandem essentialem!) Sic infanticidii vel clandestini partus (quippe ex quo, in hoc delicto difficulter probando, colligitur infanticidii crimen, Magnif. Dn. D. Schöpf, in Diss. de Infanticid. præsumto, §. 11.) indicium ad torturam sufficiens est, si visa fuerit mulier utero intumescente, cum aliis graviditatis indiciis, mox cessaverit tumor, & obstetrices vel Medici illam prægnantem fuisse affirmant, & hoc casu torqueri potest, licet amplius de corpore delicti non constet. Magnif. Dn. D. Schöpf, c. I. Ord. Crim. Carol. art. 35. nonne hæ circumstantiæ sunt concomitantes & essentielles graviditatis & partus clandestini? eadem ratione indicium partus clandestini habetur, si lac in mamillis reæ fuerit repertum, idque sufficiens ad torturam, art. Ord. Crim. 36. cur? est enim hæc iterum circumstantia concomitans atque essentialis graviditatis & partus clandestini. Sic porro criminis veneficii indicium ad torturam sufficiens est, si reus venenum emerit, nec ejus sufficientem rationem allegare possit, & sit persona levis, vel occiso inimica, vel & si venenum emerit, & hoc coram Magistratu negaverit? art. Ord. Carol. 37. nonne hæ circumstantiæ sunt concomitantes & essentielles veneni propinati? Sic criminis rapinæ indicium sufficiens dicitur, si res ablatæ apud reum deprehendantur, nec hic titulum vel auctorem allegare queat; art. Ord. Crim. 38. Nonne vero res ablata criminis rapinæ requisitum vel circumstantia concomitans & essentialis est? quo & facit art. 39. verb: *und nicht solche redliche Dienst, Handthierung oder Gült, die sie haben, anzeigen können ic.* Sic incendii indicium ad torturam sufficiens perhibetur illud, si quis, brevi ante incendium exortum, materiam combustibilem & ad hunc finem idoneam secum habuerit; art. Ord. Carol. 41. Nonne itidem hæc est circumstantia concomitans, eademque essentialis? Idem judicium esto de indicii prodicionis, furti, Magiæ &c. quæ artic. 42. 43. & 44. recensentur. Unicus articulus ejusd. Ord. Crim. 29. videtur ob stare, ubi indicium ad torturam sufficiens dicitur, si in loco delicti aliquid reperiatur, quod Rei fuit, & quod Reus proxime ante delictum perpetratum secum tulit. Heic enim*

enim præsto esse videtur circumstantia concomitans quidem, sed non essentialis, concomitans ideo, quia ex re reperta concluditur ad ejus possessoris præsentiam in loco delicti, quæ præsentia sane est circumstantia concomitans, sed non essentialis, ideo, quia heic supponi videtur res, quæ forte in ipsum delictum perpetrandum non habet influxum; add. Lauterbach, in Coll. tit. de quæst. § 23. sed solam hanc circumstantiam, nisi alia concurrant indicia, v. gr. si vita male antea acta non concurrat, vel inimicitia &c. ad torturam sufficere haud arbitror; quodsi enim ipsa Rei præsentia in loco delicti, nisi concurrat circumstantia essentialis, per deducta, sola ad torturam non sufficiat, eum sufficeret saltem, si v. gr. vestis, annulus &c. ibi deprehendatur, quæ tamen circumstantia ideo saltem facit præsumtionem, quia Rei præsentiam in loco delicti arguit? annon facile accidere potuit, ut transiens per talem locum delicti aliquid perdidit? aliud dicendum, si reperta sint instrumenta ad perpetrandum delictum quæst. apta; tum enim præsto est circumstantia essentialis? Quicquid sit, ad minimum valde levis torturæ gradus hoc casu decerni poterit.

§. 242.

Quantum ad gradum probabilitatis ex modo probandi oriundum attinet, ex præmissis in Cap. III. facile patebit, quando præsto sit semiplena probatio, adeoque quando tortura decerni possit? Sic v. gr. per supra dicta confessio extrajudicialis non acceptata semiplene probat (§. 121. not. b.), & hinc locum dat torturæ (a). Quantum e. gr. ad confessionem judicialem attinet, tria posuimus ejus requisita (§. 115.). Quodsi jam confessio in judicio facta sit, statim plene probabit, nec opus erit tortura; in Criminalibus enim, & Processu Inquisitorio, nullus est adversarius, qui confessionem acceptare possit, vel & Judex ex officio confessionem acceptare tenetur; ponamus, confessionem factam esse coram *Judice incompetente*, facile patet, *summum gradum torturæ posse decerni*; Cum enim confessio extrajudicialis locum faciat torturæ, multo magis torturæ locum faciet confessio non coram personis plane privatis, sed coram Judice, licet incompetente, facta; gradus enim hic est semiplena probatione major. Ponamus, personam fuisse inhabilem, & distinguendi erunt diversi casus; aut enim confitens plane fuit inhabilis, ut mente captus, furiosus &c. & plane nihil operabitur confessio, *aut secundum quid*, v. gr. pupillus, & *confessio erit semiplena probatione minor* (b), aut minor, & in Criminalibus plene probabit, sicut & fœminæ confessio (c).

Quando eadem dicatur præsto esse, si quaeritur de probabilitate juridica, quantum sefe exserit circa modum probandi?

(a) Ord. Crim. Carol. art. 32. Menochius, de præsumt. L. 1. qu. 89. n. 14. sqq. B. Dn. D. Lauterbach, in Coll. tit. de quæst. §. 26. Coccejus, in Disp. de eo, quod justum est circa inquisitionem in Auctorem rixæ, Cl. 2. §. 6. & 15.

(b) Pupillus enim regulariter nec in criminalibus confiteri potest, nec, licet confessus, torquendus est; L. 10. princ. ff. de quæst. L. 1. §. 33. ff. ad Sct. Silan. B. Dn. D. Lauterbach, in Coll. tit. de quæst. §. 42. Quia tamen non

plane nihil operatur ejus confessio, quæritur: quantum forte gradum probabilitatis efficiat? & Resp. *regulariter semiplena probatione minorem*; cum enim is, qui 25. annum complevit, omnino absolute confessione sua sibi præjudicare possit, non dubitandum est, illum, qui ne dimidiam quidem partem hujus ætatis complevit, non tantum confessione sua sibi detrimenti inferre posse, ut inde prodeat gradus probabilitatis, semiplenæ probationi æqualis. Licet eatenus in Criminalibus Exceptio sit, ut & minor 25. annis sibi præjudicare possit confessione sua, privilegium enim hoc odiosum ad casus non expressos non est extendendum, nec igitur ideo, quia minores 25. annis confessione sua sibi præjudicant, idem etiam ad minores 14. annis extendendum est, ut, v. gr. cum in Civilibus horum confessio constituat gradum probabilitatis semiplena probatione minorem, in Criminalibus, ex eadem analogia, hac majorem efficiat probabilitatis gradum; sed potius in hisce regulæ erit eo magis inhærendum, quia, per probata, constat, impuberes ne quidem propter judicialem, multo minus propter extrajudicialem confessionem torqueri posse, adeoque Jus & Praxis hanc nostram thesin corroborant atque confirmant.

- (c) Carpzov, in Prax. Crim. quæst. 118. n. 33. B. Dn. D. Lauterbach, in Coll. tit. de confessis, §. 7. Idem. tit. de quæst. §. 42. Menochius, de præsumt. lib. 1. qu. 89. n. 22.

§. 243.

Continuatio
prioris.

Sic porro v. gr. testis unicus omni exceptione major, qui de facto principali deponit, semiplenam efficit probationem (§. 173.), adeoque torturæ locum facit (a). Et sic porro per singulos probationis modos facile esset, repetere cunctos casus, in quibus semiplena probatio præsto est; ne vero eadem semper recoquamus, remittimus Lectorem ad anteced. Cap. III. quod, si cum attentione legerit, facile poterit judicare, quonam in casu tortura discerni queat, nec ne? Sic & concurrentibus quibusdam præsumtionibus facile patet majorem fieri probabilitatis gradum, adeoque & magis torturæ locum esse. Quandoque & sese elidere possunt, & tum ex antecedentibus itidem facile erit judicatu, quænam præsumtio fortior sit, & quantum circiter illi per alteram contrariam probabilitatis detrahatur (b).

- (a) Ord. Crim. Carol. art. 30. Menochius de præsumt. L. I. d. quæst. 89. n. 5. 6. sqq. B. Dn. D. Lauterbach, in Coll. tit. de quæst. §. 23.

- (b) Sic aliquando saltem constat de circumstantia quadam, sive antecedente, sive concomitante, sive consequente, eadem autem non satis est probata, & hinc fit probabilitatis gradus minor, quam si rite probata esset (§. 105.). E. gr. circumstantia concomitans essentialis semiplene probat (§. 241.); Sin hæc per unicum omni exceptione majorem testem probata sit, gradus probabilitatis inde redundans erit medius inter semiplenam probationem, & nullam; & sic porro; Sic confessio extrajudicialis legitime probata efficit semiplenam probationem; sin vero per unicum saltem testem omni exceptione majorem probata sit, gradus itidem erit medius inter semiplenam probationem, & plane nullam proba-

probationem. Sic, si hæc confessio probetur per Protocolum Notarii absque testibus confectum, vel ab Actuário, Judice non præsentem, scriptum (§. 156. & 161.), gradus probabilitatis erit itidem inter semiplenam probationem, & nullam plane probationem medius; duo enim casus modo dicti per se semiplene probant hanc confessionem extrajudicialem, & hæc per se, si probata sit, efficit semiplenam probationem, adeoque in toto præsto erit dimidius gradus semiplenæ probationis. Quid, si de confessione rei constet ex Protocollo judiciali, in præsentia Judicis conscripto, sed ab Actuário non jurato, quia heic præsto est confessio judicialis, quæ per se plene probat, per demonstrata, tantum huic plenæ probationi decedit, quantum hujus Protocolli fidei decedit, propter defectum Actuarii jurati, h. e. probabilitatis gradus erit semiplena probatione major (§. 156.) & summo torturæ gradui locum faciet, si forte Reus retractet confessionem suam. Imo quandoque & examinantur Rei coram solo Judice vel Præfesto, & tum Protocollo hujusmodi officialis itidem plene probat, & confessio habetur pro judiciali, adeoque non torturæ, sed ultimo supplicio ipsi locum facit (§. 155. not. a.). Sufficiant hæc de Effectu, Usu & Applicatione Præsumtionum in Criminalibus; prudens facile, occasione hætenus dictorum, in aliis casibus, qui heic specialiter inferi nequeunt, judicium ferre poterit. Hinc jam accedimus ad Effectum harum Præsumtionum in Causis Civilibus.

§. 244.

Ex præmissis effectus, quem probabilitas juridica in Causis Civilibus parit, facile intelligitur. Quod enim in Criminalibus supplet tortura, id in Causis Civilibus suppleant juramenta, vel suppletorium, vel purgatorium (a). Aut igitur actor intentionem suam plene probavit, aut non: Si prius, Reus erit condemnandus, nisi Reus actoris probationes aliis probationibus eliserit (b); si posterius, aut actor semiplene aut minus quam semiplene probavit, casu priori admittitur ad juramentum in supplementum, nisi causa sit admodum ardua, ut matrimonialis &c. (c), vel si actor notitiam nullam vel exiguam facti habeat (d), quo casu potius ad elidendam ejus semiplenam probationem Reus admittitur ad juramentum purgatorium (e); sicut & casu posteriori, si actor minus quam semiplene probaverit (f); Sin nec reus sufficientem facti notitiam habeat, adeoque neuter jurare possit, Reus erit absolvendus, ex regula generali: actore non sufficienter probante, Reus est absolvendus (g).

De effectu probabilitatis juridicæ in Causis Civilibus.

(a) Ill. Bæhmer; in sæpe laud. Diss. de Collis. Præsumt. c. 2. §. 13. B. Dn. D. Harpprecht, in Cons. nov. 23. n. 42. & in Cons. nov. 61. n. 67.

(b) L. 5. pr. ff. de probat. L. 4. C. de edend. B. Dn. D. Lauterbach, in Coll. tit. de probat. §. 41.

(c) Gail, L. 1. Obs. 108. n. 11. & L. 2. Obs. 94. n. 8. B. D. D. Lauterbach, in Coll. tit. de Juræjur. §. 77. Idem, in Tract. Synopt. de Juram. necess. §. 6. n. 94. & 95. B. Dn. D. Harpprecht, in Cons. nov. 61. n. 65. sqq.

(d) B. Dn.

- (d) B. Dn. D. Harpprecht, Cons. nov. 23. n. 38. sqq. ut enim de credulitate jurare possint, solis regulariter mercatorum hæredibus ad supplendos libros mercatorum permissum est. Idem, c. 1. n. 61. add. ejusd. Consil. Tubing. 75. n. 565.
- (e) C. 3. §. ult. X. de probat. L. 188. ff. de R. J. B. Dn. D. Harpprecht, Cons. nov. 27. n. 115. & passim.
- (f) B. Dn. D. Lauterbach, in Coll. tit. de Jurejur. §. 47.
- (g) B. Dn. D. Harpprecht, Cons. nov. 23. n. 68.

§. 245.

Ejus appli-
catio.

Quando dicatur præsto esse probatio semiplena, vel hac major, vel minor, ex anteced. Cap. III. patet. Quando igitur alterutrum juramentorum modo recensitorum locum habeat? prudens Judex, vi Regularum in anteced. (§. 244.) datarum, facile dijudicare poterit. Sicut & ex graduum determinatione, de qua studio in Cap. III. fusius egimus, facile colligere poterit, quam probabilitas in casibus singulis obviis altera major, adeoque alteri præferenda sit, & quantum probabilitatis circiter fortiori, in collisione cum debiliori, remaneat? Nec non heic duæ forte præsumptiones, quarum utraque semiplenam probationem efficit, conjungi possunt, ita, ut plenam constituent probationem, secus ac in criminalibus (§. 236.). Jam vero, pertractata hac materia, quantum per temporis & apparatus librarii angustiam, nec non virium imbecillitatem, & reliquas occupationes licuit, huic nostræ Tractationi imponimus

F I N E M!



165, 327

71905

